





1524



312

12-25-E-2

✓

~~11-35-a-40~~

14-13-a-14





12-25-E-17  
**BENEDICTI**  
**PERERII**  
VALENTINI

*E Societate IESV.*

**ADVERSVS FALLACES**  
**& superstitiosas artes,**  
**ID EST,**

**DE MAGIA, DE OBSERVATIONE**  
*Somniorum, & de Divinatione Astrologica.*  
**LIBRI TRES.**

*Et à mendis qua antea irrepsent accuratissime repurgatus.*



**- LVGDVN I,**  
**APVD HORATIVM CARDON.**  

---

**M. D. C. III.**

12 25 E 17



CAMILLO

CAETANO

PATRIARCHÆ ALEXANDRINO.

Benedictus Pererius S. D.



**T**RIA sunt genera rerum,  
CAMILLE Patriarcha Il-  
lustrissime, in quarum stu-  
dio & observatione morta-  
lium animi vesana quadam libidine, vel  
potius rabie noscendi quæ futura sunt,  
fœdis & noxijs illuduntur fallacijs  
atque impijs erroribus illigantur: Som-  
nia, & natalitia Astrologorum prædi-  
cta, atque Artes Magicæ. Neque ve-  
rò earum rerum pestilens vis, priuatos  
tantum aut singulos homines, verum  
etiam Principes ac Reges ipsasq; ciui-

*tates & Respublicas inuasit, infecit, ac  
 perdidit. Ac licet has generis humani  
 pestes omnibus ferè saculis tum sapientes  
 viri firmissimis rationibus profligare,  
 tum prudentes Rerum publicarum  
 rectores ac Principes seuerissimis dam-  
 natas edictis & atrocissimis pœnis ad-  
 dictas, è societate hominum extermi-  
 nare flagrantissimè cupiuerunt, obnixèq;  
 contenderunt: perparum tamen adhuc  
 profectum est. Adeo enim malum hoc  
 in animis hominum hæret infixum, ut  
 penitus extrahi vix queat nec eius sa-  
 nandi potens atque efficax ullum iam  
 remedium inueniri posse credatur. Ita-  
 que hic vsu venit. quod de Mathematici-  
 cis scitè quidam vereq; dixit: Genus ho-  
 minum, inquit, potentibus infidum, spe-  
 rantibus fallax: quod in ciuitate nostra  
 & vetabitur semper, & retinebitur.  
 Sed nihilominus tamen mihi quidè val-  
 de vtiliter ac salutariter fecisse visi sunt,  
 qui doctis aduersus eas artes editis libris,  
 vanam*

Tacitus  
 historia  
 rû lib. i.

*Danam & fallacem ac perniciosam esse  
 hominum generi, nimis curiosam & su-  
 perstitiosam earum rerum observatio-  
 nem, aperte demonstrarunt. Quorum ego  
 prudens consilium, piūque studium, at-  
 que utilem conatum amulatus, tres ad-  
 uersus eas artes libros confeci, vnum de  
 Magia, alterum de Observatione som-  
 niorum, tertium de Diuinatione Astro-  
 logica. Ac primus quidem liber planè  
 nouus est factus, nunc primū lucem aspi-  
 ciens: quæ reliquis autem duobus libris  
 disputantur, ea fere sunt in Commenta-  
 rijs nostris partim in Daniele, partim  
 in Genesim explicata. Sed, quia non pau-  
 ci eos Commentarios nō legent, aut quod  
 eos propter studiorum diuersitatem non  
 iuuat legere, aut quia non vacat propter  
 occupationes, putavi me pergratum plu-  
 rimis facturum, si, quo latius horum li-  
 brorum pateat utilitas, separatim eas  
 disputationes, atque vnum in volumen,  
 idq̃ modicum inclusas, typis excudendas*

curarem: ratus scilicet fore, ut eas ipsas  
disputationes, tum propter exquisitam  
multisq; optatam eiusmodi rerum cogni-  
tionem, tum etiam propter paruitatem  
commoditatēque voluminis, & plures,  
& avidius atque utilius legant. Has ego  
lucubratiunculas apparere volui sub tuo  
nomine CAMILLE Præsul ornatissi-  
me: quem omnes qui norunt, non possunt  
non amare propter singularem ingenij ac  
mōrum suavitatem, & quod vera animi  
bona cum ampliſſimis naturæ ac fortu-  
næ bonis adequasti, admirari & obser-  
uare coguntur. Video sanè perexiguum  
esse munus; nec dignum tuæ nobilitatis  
ac dignitatis amplitudine: sed est tamen  
amoris & observantiæ plenissimum, &  
quanti ego te faciam, quantumque Cæ-  
tanam familiam colat Societas nostra,  
certissimum testimonium.

BENE

# BENEDICTI

P E R E R I I,

LIBER PRIMVS,

qui est

D E M A G I A.

**D**UPLICEM esse Magiam hic liber ostēdit, alterā quidem Naturalem & veram, ex occultis rerum naturis & virtutibus profectam, intimamque ac præstantissimam Philosophiæ partem, & admirandorum effectricem operum, ab omni que alienā superstitione, & à Dæmonum artificio ac maleficio puram, sed paucissimis tamen mortalium exploratē perceptam: Alteram verò (quæ vulgo iactatur & celebratur) ab omni ratione ac veritate vacuam, fallacē item & noxiam, Dæmonumque fraudibus & maleficiis implicatam, ob idq; meritò infamem & abominabilem, & è societate hominum exterminandam. Hinc præterea cognoscet lector, quatenus vtraque Magia

## DE MAGIA

progredi, & qualia quantave opera possit facere, & an mira quæ videtur facere posterior Magia, verè talia sint, qualia spectantibus videntur, an verò præstricta oculorum acie, spectantium fallant existimationem, nec veram habeant earum rerum quas repræsentant vim & naturam, sed nudas tantum atque inanes earum rerum similitudines & imagines ferant: Denique quæ videntur & vulgo creduntur Magorum miracula, quibus rebus differant à veris miraculis, quibusve notis & signis facile diiudicari & internosci queant. Libuit autem ante ipsum operis vestibulum, velut in conspectu lectoris ponere generales sententias & capita disputationum quæ hic tractantur, quò scilicet cupidius ille, huius libri lectionem adeat, & ex ipsa lectione eam capiat utilitatem, cuius ei afferendæ utilitatis flagrans desiderium, nec dubia spes ad huius nos voluminis scriptiorem impulit.

INDEX



INDEX CAPITVM  
ET DISPUTATIONVM

LIBRI PRIMI,

Qui est de Magia.

- I. **A**N omnia que feruntur à Magis facta, sint vel ab illis, vel ab alijs conficta.
- II. An omnes effectus Magiæ reuera tales sint quales videntur.
- III. An sit aliqua Magia naturalis, & que, aut qualis ea sit, & unde eam homines discant.
- IV. An sit aliqua Magia non naturalis, & Demonum magisterio atque artificio hominibus tradita.
- V. An spiritus illi, quorum magisterio & auxilio mira faciunt Magi, sint boni an mali.
- VI. Que opera admiranda possint Demones, aut per seipsos, aut per Magos facere.
- VII. Quas res Demon nec per se, nec per Magos possit efficere.
- VIII. An opera Magorum sint verè miracula, & quemadmodum à veris mira-



7 INDEX CAP. ET DISP.

- culis differant & internosci queant.
- IX. Quotuplex sit *Magia*, & primo de *Magia Astronomica*.
- X. De *Arte Cabalistica*.
- XI. De *Necromantica*, id est, Mortuorum ex *Inferis* ad viuorum conspectum & colloquia euocatione.
- XII. An per artem magicam possit verum aurum fieri ab *Alchimistis*.
- XIII. De origine *Magie*, & his qui in ea clari ac nobiles fuerunt.
- XIV. An *Magie* studium & vsus sit licitus.
- XV. De *Magis Pharaonis*, quorum mentio fit in libro *Exodi*: & qui nominatim fuerunt illi qui restiterunt *Moyse*.
- XVI. An prodigia quæ *Magi Pharaonis* fecerunt, reuera fuerint talia, qualia videbantur, necne.
- XVII. Quæ ratione & artificio, prodigia illa fuerint à *Magis* facta.

CAPVT

## CAPVT PRIMVM.

*An quæ à Magis facta esse, vel sermonibus vulgi feruntur, vel à scriptoribus mandata sunt litteris, omnia sint fabulosa, ficta, & falsa, an verò aliqua fuerint, vii narrantur, verè ab illis gesta.*



ON est dubium quin eorum quæ de Magis aut dicuntur aut scribuntur, quam plurima sint ficta & falsa: nā pleriq; hominū nimis sunt creduli & superstitiosi, & rebus admirandis facillè capiuntur, cum etiā docti viri & Philosophi, vt inquit Aristoteles, quoniam fabula continet aliquid nouum & mirabile, fabulis oblectentur. Quis enim nō videt, quæ Ouidius narrat in libris Metamorphoseos, omnia ficta esse à Poëtis sicut illa de Circe & Medea, & de sociis Diomedis in aues conuersis, quæ longo post tempore circa templum Diomedis volitabāt, de sociis Vlyssis, quos Circe mutauit in bestias, de Arcadibus qui traiecto quodā stagno verrebātur in lupos, de socero Medæ, quem illa à senectute ad iuuetutem reuocauit, de draconibus, quibus simul iunctis Medea volauit per aëra, & de aliis id genus fabulis, quas Poëtæ cum ad oblectationem legentium, tum ad mysticam hominū eruditionem adinuenerūt? Negari tamen nō potest multa miratu dignissima verè à Magis esse facta. Nā scriptura in Exo-

*Arist.  
libr. 1.  
Metaph.*

*Exod. 7.*

tante sapienter aspidem, ob id obturantem aures suas: & Math. 24. *Surgent, inquit Dominus, pseudoprophetae, & dabunt signa & prodigia*, non utique alia arte quam magica. Ex historiis Ecclesiasticis notum est, quæ opera admiranda Simon Magus ediderit magicis incantationib. quamobrem (ut fertur) à Romanis publicam statutam meruit hac inscriptione: *Simoni Deo Sancto: ut narrat Iustinus martyr in Apologetico, Irenæus libro primo contra Valentinum, Tertullianus in Apologetico, Eusebius libro secundo historiae Ecclesiasticae. Propter quæ prodigia idem Simon tanta in admiratione fuit apud Samaritas, ut quæ admodum Lucas scribit in actis Apostolorum cap. octauo, de illo diceretur. Hæc est virtus Dei, quæ vocatur magna.* Narrat B. Hieronymus in vita Hilarionis, cum quidam iuuenis virginem Deo sacram ad turpes amores illicere nulla ratione potuisset, cum ad magicas artes conuersum, quas apud Mæphim Ægypti didicerat, adeo illis profecisse, ut virgo infano illius iuuenis amore fureret. Porro quæ de Strigib. vulgo circumferuntur, non sunt in totum falsa, sed multa illis admiranda accidere, qui ea compererunt, viri fide digni, sicut Syluester in opere suo de Strigibus, & Alphosus de Castro in eo quod scripsit de punitione hæreticorum, non illi quidem tanquam dubia & incerta, sed tamquam sibi notissima & exploratissima tradiderunt.

*Mirabilia  
Mago  
ex  
Philos-  
trato.*

MIRABILIA sūt quæ Philostratus in libris De vita Apollonij memorat vel Brachmanas Indorum, vel Gymnosophistas Æthiopum, vel ipsum Apollonium gessisse. Tale est illud quod is narrat libro

libro tertio & capite tertio, vidisse Apollonium apud Indos gemina dolia, vnum imbrium, alterum ventorum: illud, cum nimia siccitate India premebatur, apertum, nebulas emittebat vniuersam illam terram humectantes: nimios autem imbres occlusum cohibebat: alterum ad apertum, efflabat ventos regionem perflantes, quod salubrius esset cælum. Tale etiã est illud quod ab eodem proditur lib. tertio, c. octauo, cū Apollonius cum Iarcha & aliis Brachmanis mensē accubuisset, tripodes lapideos sua sponte fuisse motos, & ab æreis pincernis calices in gyrum circumlatos esse certa mensura vinum & aquã miscentes & cyathos proferentes. Nec sileri debet quod Philostratus libro quarto, capite decimosexto scribit de puella, quæ tanquã mortua portabatur ad sepulchrum: cuius funeri occurrens in via Apollonius, tanquã secreto quædam illi admurmurans & insusurrans, ad vitam & integram valetudinem reuocauit. Nec minus mirabile est quod idem auctor narrat libro sexto, capite tertio de statua Memnonis, quam cū radius Solis circa eius exortum attingebat, & ad os eius perueniebat, statua more hominum loquebatur. His adde quod ab eodē memoratur eiusdē libri sexti capite quinto, iussu Vespersionis, qui Princeps erat Gymnosophistarum apud Æthiopes, vnum quandã voce quidem clara & distincta, sed tenui admodū & quasi scæminea salutasse Apolloniū. Sed illud miratu dignissimum, quod Philostratus tradit capite secundo, libri octauo, Apollonium cū esset in prætorio Domitiani Imperatoris, vt putabatur, ab eo condemnandus, repente

repente ex omnium oculis, euanuisse. Quãobré tanto in honore fuit Apollonius apud posteros, vt eum Hierocles cum Christo Domino nostro conferre ausus fuerit. Sed eius audaciam fregit, *Eusebium* insaniamque coarguit Eusebius Cēsariensis: Alexander aut Mammeas Imperator Romanorum, *in lib. cō-* in suo Latario imagines Christi, Abrahę & Apol-  
*tra Hie-* lonij habebat, quòd hos tres maximè omnium  
*roblem.* miraretur & colleret.

VERVM, sicut à principio dixi, eorum quę Magi fecisse dicuntur, quam plurima falsa sunt, vel ab ipsis vel ab aliis conficta, & superstitiosis nimiũq; credulis hominib. persuasa, Quis enim verã concedat quę Maga illa apud Virgilium libro quarto Aeneidos promississe dicitur.

*Hac se carminibus promissit soluere mentes  
Quas velit, ast alijs duras imittere curas,  
Sistere aquam fluijs, & vertere sydera retro,  
Nocturnosque ciere manes, mugire videbis  
Sub pedib. terram, & descendere montib. ornos.*

*Plinio* Quocirca Plinius nullam esse putauit Magiæ vim  
*nulla est* atque potestatem, & quę de Magis feruntur, om-  
*magia.* nia esse vana falsaque: totãque Magiam reiicit  
& damnat. Nam libro 30. capite 2. Immensum,  
inquit & indubitatum exemplum est falsę artis  
quam dereliquit Nero. Non enim ad eam discen-  
dam Neroni defuit vel ingenium vel diligentia,  
vel quælibet facultas, nec studium cum eius dis-  
cendæ aujdiffimus esset: quĩ etiam ad eam do-  
cendã Tytides Armeniorum rex nobilissimõs  
Magos secum ducens venit ad eũ, canisq; ma-  
gicis eum initiauit: sed is regnum quidem à Ne-  
rone accepit, Magiam autem quæ nulla est doce-  
re cum

re eum non potuit. Proinde ita persuasum fit, in-  
 testabilem, irritam, inanein esse, habentem ta-  
 men quasdam veritatis umbras, sed in his vene-  
 ficas artes pollere, non magicas. Hæc Plinius. Cui  
 ut concedo plurima Magorum esse vana & falsa,  
 ita esse talia omnia non assentior. Esse autem ple-  
 raque Magorum promissa non solum inania &  
 falsa, sed etiam incredibilia & ridicula demonstrat  
 Plinius lib. 16. cap. 4. his exemplis, Magi aiunt *Æ-* *Figmē-*  
*thiopide* herba amnes ac stagna siccare cōiectu, *ta Ma-*  
*tactu*, clausa omnia aperiri. Achimenide coniecta *gorum*  
 in acie hostium, trepidare agmina, ac terga ver- *Plinio.*  
 tere: Laracem dari solitam à Persarum Rege Le-  
 gatis, ut quocunque venissent, omnium rerum  
 copia abundarent. Apud Democritum inuenitur  
 compositio medicamenti, quo pulchri, bonique  
 & fortunatigignantur liberi. Et lib. 25. c. 9. Circa  
 herbam, inquit, quā nostri Verbenacam vocant  
 Magi mire insaniunt: hac perunctos impetrare  
 quæ velint, febres abigere, amicitias conciliare,  
 nullique non morbo mederi. Lege apud Aul. Gel- *Aul. Gel-*  
 lium lib. 10. c. 12. & apud Plinium lib. 28. c. 1. quæ *lius.*  
 fabulantur Magi de Chameleonte tradita à De- *Plinius.*  
 moetito magicæ artis principe, qui, quo tem-  
 pore Hippocrates medicinam, eodē magicas ar-  
 tes in Græcia celebravit, hoc est circa bel-  
 lum Peloponesiacum, anno post  
 Romā conditam trecentesi-  
 mo: ut auctor est Pli-  
 nius libro 30.  
 capit. 1.

temporis experientia qua pollent, occultas & admirandas rerum facultates & virtutes, ipsarumque rerum inter se vel sympathiam vel antipathiam, & quemadmodum inuicem applicari & temperari debeant, quod mirabiles, & inusitados effectus producant, optimè norunt, & per Magos nostros suos præstare possunt. Atque hæc est doctrina B. Augustini lib. 3. de Trinitate, c. 7. & 8. in libro Octogintatrium questionum, q. 79. & in questione 22. in Exodum, à Christianis Philosophis, iuxta & Scholasticis Theologis. recepta. Neque possumus negare (sunt enim multis Romanæ historiæ scriptoribus prodita) duarum Romanarum mulierum duo facta perquam memorabilia. Cum enim Mater deorum ex Pessimunte Phrygiæ, naui adueheretur Romam, ita dicitur hæsisse in Tiberi, ut non hominum, non bouum vi moueri loco posset. Q. Claudia vestalis quod suam castitatem probaret, discinxit se, zonamque naui alligans, eam quo volebat, deduxit. Thucia quoque vestalis quod suam etiam probaret pudicitiam, aquam Tiberi haustam cribro tulit usque ad capitolium, anno urbis condite sexcentesimo nono, ut tradit Plinius lib. 28. cap. 2. Nec possumus inficiari, opera Magorum homines feminasue inflammari ad libidines, & ad amores antè exosos, cuius rei exemplum affert S. Hieronymus in vita Hilarionis à nobis supra commemoratum. Quamquam duo illa quæ virgines illas vestales egisse diximus, putat sanct. *Notabilis* Thomas in *Questionibus*, de potentia, quest. 6. art. 5. etiam ministerio bonorum Angelorum, Deo ita sic volente, castitatis virtutem & præstantiam *B. Tho.*



commendare & probare hominibus, fieri potuisse.

CÆTERVM plurima Magorum opera esse simulata, fallentia oculos spectantium, nudamq; tantum eorum quæ repræsentant imaginem, non autem veram naturam habentia, multi tradiderunt atque compererunt; & ego facile credo. Tales fuerunt (si tamen fuerunt) admirandæ metamorphoses, quas à Varrone proditas cōmemorat B. Augustinus lib. 15. de Ciuitate Dei, c. 17. & 18. de sociis Vlyssis à Circe mutatis in varias bestias, de sociis Diomedis in aues conuersis, de Arcadibus traiecto quodam stagno transformatis in Lupos, de stabulariis quibusdam mulieribus, quas narrat B. Augustinus suo tempore in Italia viatores quibus caseum dabant veneficiis imbutum, mutare solitas in iumenta, eorumque opera ad portanda onera aliquamdiu vsas, rursus in pristinas hominum figuras reformasse.

*Lamia-  
rum in-  
genium  
& libi-  
do.*

T A L E quoque fuit quod Philostratus lib. 4. pite 5. tradit accidisse Apollonio: erat enim quædā Lamia, quæ speciē gerens pulchræ mulieris, si mulabat se captam amore cuiusdam Menippi iuuenis formosi, eique velle nubere. Die igitur nuptiis dicato, mulier illa conuiuium apparauit lautissimum, maxima auri, argenti, ornamentorum, omnis generis vini & dapum copia instructissimum, quo cum ingressus esset Apollonius, ad eos qui aderant conuersus, inquit: Tantali hortos videris, qui sicut Homerus scribit, apparebant esse aliquid, cum nihil tamen essent: talem enim esse hunc omnem apparatus existimare deberis, neque enim quæ apparet materia, vlla subest, sed  
materiæ

materiæ duntaxat simulachrum est & imago. Hæc autem sponsa, vna est è numero lamiarum, quas aliqui laruas, aliqui lemures appellant. Sunt autem ad amorem & venerem pronæ, & humanas carnes vehementer expetunt, venerorum cupidine allicientes eos, quos cupiunt postea deuorare. Atque his dictis totus ille apparatus ex oculis omnium euauit: & illa mulier sese Lamiæ esse confessa est, & voluisse Menippum voluptatibus explere, vt eius postea corpus deuoraret: consueuisse enim pulchrorum iuuenum corporibus vesci, vbi ad summam sanguinis abundantiam peruenissent. Non sunt admodum dissimilia quæ 26. quæst. 5. cap. Episcopi, de nonnullis strygibus narrantur, quas dæmones delusa earum imaginatione credere faciebant, longa terrarum spatia per aëra equitando conficere, & cum Diana & Herodiade in amœnissimis locis iucundissimè epulari & ludere; cum neque verè transferrentur, neque personis, quibus credebant, adessent, sed tantum imaginationum ludificatione ista constarent.

Hoc etiam euentissimis rationibus probari potest. Magi enim promittunt se ex lapidibus vel lignis leones vel lupos subito producere posse, & nonnunquam in spectaculis ex terra faciunt subito existere leones vel lupos: constat autem eiusmodi animalia perfecta citra supernaturalem Dei potentiam nulla ratione gigni posse nisi ex semine, nec ad iustam magnitudinem, nisi statim temporum interuallis peruenire posse. Dicuntur etiam mortui à Magis reuocari ad vitam, sicut traditum est de puella illa quam Apollonius

giæ absolute & præcisè sumptum hoc significat, nec à principio sic fuit usurpatum, sed vniuersè pro quadam facultate, per quam homines efficiant res inusitatas & admirandas ratione quadam occulta, & aliis hominibus incognita. Sic generaliter sumpta Magia, dupliciter diuidi potest: altera enim est naturalis, altera non naturalis. Naturalem voco, quæ cognitione & applicatione quarundam singularium virtutum, quæ sunt in rebus naturalibus, quæque latent forè mortales, agentia & patientia suo loco & tempore, & sicut opus est inuicem componendū & temperando, effectus quosdam inusitados & admirandos, & quorum ratio videtur incomprehensibilis, moliantur. Magia autem non naturalis dicitur, quæ etiam mira efficit, verumtamen non vtens viribus agentium naturalium, sed sola dæmonum opera & ope. Naturalis autem Magia rursum triplex tradi potest: alia enim dici potest humana, quia humano studio & diligentia comparatur, altera Diuina, quæ per reuelationem vel à Deo, vel ab Angelis bonis percipitur: Tertia, Dæmoniaca quam dæmones tradunt iis hominibus, qui se illis impia societate & fœdere deuinxerūt.

Esse autem Magiā quandā naturalem, quæ est secretior quadam & abstrusior sapiētiae pars, & quæ occulta quadam cognitione & usu quarundam rerum naturalium mira perficit, nullo modo viris doctis dubitandum est. Quis enim vel tinctus duntaxat literis philosophicis, nescit esse multas virtutes rerum naturalium occultas, mirabilium rerum effectrices, quas si quis bene noscet, & ad vsum accommodare sciret, haud dubie

*Triplex  
Magia  
naturalis.*

*Esse naturalem  
quandā  
Magiā.*

quæ pluuiis acceditur, & c. 103. In Dodone Iouis  
 fons cum sit gelidus, & immerfas faces extin-  
 guat; si extinctæ admoueantur, accendit. In Illy-  
 riis supra fontem frigidum expatæ vestes accen-  
 duntur. Idem Plinius libro vltimo, cap. 4. Adamas  
 (sic Græcè dictus, quod nec ferro, nec igne do-  
 metur) hircino tamen rumpitur sanguine; & cum  
 magnete lapide in tantum dissidet, vt iuxta posi-  
 tus ferrum non patiatur abstrahi, aut si admotus  
 magnes apprehenderit, rapiat atque auferat. Ve-  
 rum nihil esset mirabilius magnete; si vis eius nõ  
 adeo nobis esset nota & explorata. Nam ratio-  
 nem cur ferrum ad se trahat, & acum nauticam  
 sua vi tactam eatenus agitet, quoad illa directo  
 Septentriones spectet, quis nobilium philoso-  
 phorum non diligentissime inuestigauit; quis au-  
 tem adhuc compertit aut satis explicauit? Sed om-  
 nia excedit miracula Echneis pisciculus quem  
 Latini vocant Remoram, cuius meminit Aristo-  
 teles lib. 2. De Historia animalium cap. 14. sed Plin-  
 ius libr. 32. cap. 11. non solum ab antiquis de eo  
 prodita, sed etiam sibi sui que temporis homini-  
 bus planè cognita & explorata tradens, ait eum  
 semipedalem esse, limaci magnæ similem, adhæ-  
 rentemque nauigiis, licet ea sint ingentia cursu-  
 que incitatissimo ferantur, eorum tamen ita fræ-  
 nare impetum, vt stare cogat, non labore vllò, nec  
 renitendo, nec aliter quam adhærendo. Fertur  
 Actiaco bello tenuisse Pratoriâ nauim Antonij  
 properantis circumire, & exhortari suos, donec  
 itet in aliam. Ideoque Casariana classis impetu  
 maiore protinus venit: Tenuit etiam eius memo-  
 ria Caij principis ab Astura Antium remigantis

*Remora  
piscis.*

quinquitemem quadringentorum remigum viri-  
 bus propulsam, cuiusque adhærens gubernaculo:  
 feruntque Casarem peculiariter miratum quo-  
 modo adhærens tenuisset, nec idem polleret in  
 nauigium receptus. Hactenus ex Plinio. Nec mo-  
 do quæ ratione carent, sed etiam homines mira-  
 edere & non cernentibus incredibilia cum alij  
 restificati sunt, tum haud dubium reliquit S. Au-  
 gustinus multis certisque eius rei positis exem-  
 plis. Nouimus, inquit, lib. 14. de ciuitate Dei, cap.  
 23. hominum quorundam naturas multum cate-  
 ris dispares, & ipsa raritate mirabiles, quædam ut  
 volunt de corpore suo facientium, quæ alij nullo  
 modo possunt; & audita vix credunt. Sunt enim  
 qui aures mouent, vel singulas, vel ambas simul.  
 Sunt qui totam cæsariem, capite immoto quan-  
 tum capilli occupant, deponunt ad frontem, re-  
 uocantque cum volunt. Sunt qui eorum quæ de-  
 uorauerunt, incredibiliter plurima & varia, pau-  
 lulum præcordiis contrectatis, quod placuerit, in-  
 tegerrimum proferunt. Nonnulli ab imò sine  
 pædore villo, ita numerosos pro arbitrio sonitus  
 edunt, ut ex illa etiam parte cantare videantur.  
 Ipse sum expertus sudare hominē solere cū vel-  
 let, notū est quosdam flere cum volūt, atq; vber-  
 tim lachrymas fundere. Presbyter fuit quidam  
 nomine Restitutus in parœcia Calamensis Eccle-  
 sia, qui quibuscunque volebat, ita se auferbat  
 à sensibus, & iacebat simillimus mortuo, ut non  
 solum vellicantes & pungentes minimè sentiret,  
 sed aliquando etiam igne vreretur admoto, sine  
 villo doloris sensu; nec in eo vllus inueniebatur  
 anhelitus. Hæc ibi Augustinus.

I A M verò Sphæram illam quam tradit Cice- *Sphæra*  
 ro primo libro Tusculanarum disputationum, & *Archimedis.*  
 secundo libr. de Natura Deorum ab Archimede  
 primùm, & deinde à Possidonio factam, omnes  
 cœlestium orbiũ cõuersiones suis motibus cla-  
 rissimè perfectissimèq; repræsentantem, quis hu-  
 manum ac non potius diuinum aut dæmoniacũ  
 inuentum & opus credidisset? Huc etiam referri  
 potest quod Albertus capite tertio libri sui De  
 moribus Animalium commemorat, duos in Ger-  
 mania natos esse pueros, quorum altero iuxta  
 domorum ostia incedente, omnia ostia versus  
 sinistrum, illius aperiebantur, tametsi clausa es-  
 sent; idemq; contingebat alteri puero illius  
 fratri, versus latus eius dextrum, & hoc dicit vi-  
 disse multos, negatq; id referri posse alio, quàm  
 in proprietatem occultam quæ vtrique in eorum  
 ortu indita est à cœlo: quanquam ego vereor ne  
 illud non fuerit verum: aut si fuit, nō puto id na-  
 turaliter sine interuentu & opera dæmonum fieri  
 potuisse.

S I igitur tam mira sunt naturæ opera, cur nō *Quales*  
 sapiens recõditori naturalium rerum cognitio- *Magi*  
 ne vsuq; præditus similia facere posset? Atque *Persarum.*  
 hæc est Magia naturalis. Tales erant apud Persas  
 Magi (ait Philo in libro, Quod omnis prob. sit  
 liber) naturæ scrutatores, præ veritatis cogno-  
 scendæ studio, qui per otium diuinas virtutes cõ-  
 templantur clariùs, & alios iisdem inuitant my-  
 steriis. Et in libro De specialibus legib. Veram,  
 inquit, Magiam, hoc est, Perspectiuam scien-  
 tiam, per quam Naturæ opera cernuntur clariùs,  
 vt honestam expetendamq; non plebeij solum

impositis, procul assidens, quæta impellens manu, vi quadam multifidæ machinæ, tranquillo quasi mari prolaberetur, ad se aduxit. Cumque Marcellus maximo exercitu terra marique Syracusas obsideret. Archimedes ad urbis propugnationem, mirabiles terribilesque omnis generis machinas telaque huius Magiæ naturalis scientia adinuenit, quibus tantas hostium strages passim edebat, ut Romani incredibili admiratione terroreque perculsi, diceret se non contra homines, sed contra Deos pugnare. Quid dicam de stupendo illo Architzæ Pythagorici commentor? à quo plerique nobilium Græcorum tradunt & apud Aul. Gellium lib. 10. cap. 12. Phauorinus. Philosophus pro certo confirmat, simulachrum columbæ è ligno ratione quadam mechanica factum, volasse, ita erat scilicet liberamentis suspensum, & aura spiritus inclusa atque occulta concitum. Hac etiam arte ferunt Albertum Magnum caput æneum, quod maxima spectantium admiratione loqueretur, fabricasse. Seuerinum etiam Boetium, in epistola quadam siue à Cassiodoro, siue à Theodorico ad eum scripta, dicitur, huius artis vi, miracula fecisse, hoc est, ut metalla mugirent, æneus anguis sibilaret aues simulatæ dulcissimè canerent, homines ærei in aëre buccinantur. Verum de his satis, illudque ratum & indubitatum sit, esse quandam Magiam naturalem, quam qui tenent (paucissimi autem bene tenet) possunt mira facere, quæ rude vulgus putat opera & auxilio dæmonum fieri: tum quia opera illa sunt inuisitata: tum quod secreta quadam ratione & aliis occulta fiant. Quamobrem plerique

*Plutar-  
chus in  
Marcel  
lo.*

*Colūba  
lignea  
volans.*

*Ca. ut  
aneā lo-  
quens.*

*Mira o-  
pera Buc-  
tij.*

que

que putant eiusmodi homines habere confortium cum dæmonibus, & non nisi eorum opem illa præstare. Talem de se fuisse hominum opinionem, quodā loco scribit Galenus: & Boëtius lib. 1. de consolatione, prosa quarta, queritur se, propter reconditoris Philosophiæ cognitionem, & quarundam rerum mirabilium effectum, tanquam magicis & maleficis artibus imbutum, fuisse, accusatum, & damnatum.

*Natura* M A G I Æ autem naturalis, non humano  
*lis Ma-* studio partæ, sed à Deo vel Angelis bonis accep-  
*gia Sa-* tæ, manifestum est argumentum perfectissima  
*lomonis.* rerum omnium naturalium scientia diuinitus in-  
 3. Reg. 2. fusa Salomoni: per quam verisimile est, eum  
 mira effecisse, aut certè si voluisset facere potuisset, Iosephus certè lib. octauo de Iudaicis antiquitatibus ait, Salomonem instituisse occulta quædam remedia ad pellendos morbos. & fugandos dæmones. Incantationes, inquit, composuit quibus morbi pelluntur, & coniurationum modos reliquit scriptos, quibus ita fugantur dæmones, ut deinceps nunquam reuerti audeant: atque id sanationis genus etiam suo tempore apud Iudæos in usu esse, & se vidisse Eleazarum Iudæum, præsentem Vespasiano aliisque Principibus, multos à dæmonibus vexatos, hac ratione liberasse. Modus curationis erat hic: admoto naribus dæmoniaci annullo, sub cuius sigillo inclusa erat species cuiusdam radicis à Salomone indicatæ, ad eius olfactum, per nasum, contrahebatur dæmonium, & collapsio mox homine, adiurabatur dæmonium ne amplius rediret, Salomonis mentione facta, & incantationibus eius recitatis. Dis-



cessus autem dæmonis ab hominis, illud erat indicium, quod iussu Eleazari egrediens, vas plenum aqua ibi positum, inuisibiliter euertebatur. Hæc ex Iosepho. Sed profecto illa ratio eiiciens dæmonem, non ex Magia naturali, sed ex superstitione & Diaboli artificio composita proficiscebatur, nec eam credibile est institutam esse à Salomone, nisi forte postquam is Dei gratiam *3. Reg. 11* perdidit, in cultum idololatriæ prolapsus. Iuuenis etiam Tobias, mirabilem vim eius piscis quem in Tigri ceperat, Angelo Raphael docente, cognouit: nam sic Tobias dixit Raphael (ut legitur, cap. 7. illius libri) *Cordis eius particula, si super carbones ponas, fumus eius extricat omne genus dæmoniorum, siue à viro, siue à muliere, ita ut ultra non accedat ad eos: fel autem eius, valet ad ungēdos oculos, in quibus fuerit albugo, & sanabuntur.* Simili remedio piscis, Gregorius Turonensis Episcopus cum puer esset, diuinitus admonitus, patrem suum à grauisimo morbo liberauit.

NON VNQVAM etiam Magiam naturalem discunt homines à dæmonibus. Sic enim Magos Pharaonis eam didicisse, certum est. Immo ferè, qui hanc Magiam tenent, cum sint homines minimè probi, & Philosophiæ aliarumque liberalium doctrinarum rudes, & imperiti, non dubium est quin vel ipsi eam artem à dæmonibus didicerint, vel ab his quibus eam dæmones tradiderunt. Vix enim ulli mortalium, aut certè paucissimis, nec nisi illis qui acerrimo fuerint ingenio, & longinquæ temporis diligenti obseruatione usi, talis Magia naturalis contingere potest.

quædam manifestant occultissima, & quæ ratione humana nota eis esse non potuerant, veluti furta clam facta, thesauros alicubi reconditos, res quæ in remotissimis regionibus geruntur, quæ quisque olim, vel dixit, vel fecit, denique prædicunt quædam futura: hæc autem opera sunt mentis, & quidem sublimioris atque præstantioris, quàm est humana. Præterea Magi cum volunt mira illa facere, ceteris quibusdam vestibus induuntur, ducunt quasdam lineas, describunt figuras, pingunt characteres, & alia quædam adhibent, quæ per se nec vim habent naturalem producendi illos effectus, nec præparandi materiam ad illos producendos, aut accipiendos: non igitur Magi opera illa faciunt per causas naturales.

AD HÆC, suprà omnis naturæ corporeæ potestatem est, illud quod nonnunquam faciunt Magi, vt ad eorum præsentiam, & fores & alia loca quæ clausa sunt, repente patefiant, interdum etiam se vel alios repente ex hominum conspectu subducunt, quod de Apollonio Tyaneo memoriæ proditum est: is enim cum sisteretur in Prætorio ante Domitianum Imperatorem, repente ex oculis omnium euanuisse dicitur. His accedit quod Magi non faciunt hæc, nisi pronuntiando certas quasdam voces & verba, in quibus totam illi, vel maximam vim artis Magicæ ponunt, voces autem & verba, cum ex se non habeant aliam vim quàm significandi, vel quodammodo afficiendi auditum, non possunt esse causa vt aliquid fiat, nisi dupliciter, vel ratione rerum, quæ illis verbis dicuntur, quæ res intellectæ

*Quomodo voces possunt esse causa efficiens aliarum rerum.*

intellectu ab audientibus, eos variè afficiunt & mouent, præsertim adiuncta decenti conuenientiq; actionis & pronuntiationis ratione, & hoc modo oratorum & concionatorum verba, mouere solent audientes, sed hic modus mouendi, non nisi ad audientes, qui intelligunt, pertinere potest. Vel mouent verba, propter suauitatem modi, quo modulatè, & arrifíciosè cum suauitate & dulcedine auditum afficiunt, qua ratione non solum homines, sed etiam animalia vocibus musicis variè affici, & permoueri cernimus: neutrum autem horum reperitur in vocibus Magorum, non igitur per illas voces, tanquam per causas naturales, illos suos effectus producant. Iam verò, cum Magi ad faciendum quod volunt, adhibeant quasdam inuocationes, obtestationes, comminationes, sacrificia, prostrationes corporum, & alia eiusdem generis, quis non liquido cernit hæc non posse referri ad naturam corpoream ratione & intelligentia carentem, sed ea naturæ alicui incorporeæ, & intelligenti, cuius Magi opem implorant, & sine cuius concursu, quod intendunt efficere non possunt, exhiberi?

POSTREMÒ, ne quis vel ambigendi, vel cauillandi reliquus sit locus, illud meo iudicio omnem tollit dubitationem, quod non solum Magi miranda illa opera per seipsos faciunt, sed quasi quædam dictata tradentes aliis, eadem per illos perficiunt: quin etiam vsu venit quosdam planè ignorantes, an illa essent, vel à Damone tradita, vel magicis prauitatibus infecta, fidem tamen habentes illis sibi dictatis, eisque videntes,

mira

mira etiam fecisse, quod apertè demonstrat, facultatem eiusmodi res perficiendi non esse naturalem. Non me fugit, Petrum Apponentem, Cardanum, maximè verò Pomponatium in libro de Incantationibus, eiusmodi opera Magorum exclusis dæmonibus, ad solas causas naturales conatos esse referre, sed frustra & infelice. Verùm eorum opinionem infra explicabimus, & refellemus. Sciendum autem est, hanc nostram sententiam quam hic docuimus & confirmauimus, ab omnibus Platonice fuisse probatam & literis traditam, hoc enim sensit Platinus, Porphyrius, Iamblicus, Proclus: hæc etiam fuit & Pythagoreorum doctrina, imò ante hos omnes idem in Primandro, sensit & docuit Mercurius Trismegistus, ap. 2. lib. 1. cap. 1. huiusmodi.

## CAPVT V.

*An spiritus illi Quorum opera & auxilio Magi mira faciunt, sint boni, vel an mali.*



**S**UBSTANTIAS incorporeas quæ fauent Magis, eosque iuuant, ad illa opera facienda, quæ non fiunt per causas naturales, sed excedunt naturæ corporeæ potestatem, non esse bonos

Angelos, sed malos, quos trito iam vocabulo Dæmones appellamus, multis sanè firmis manifestisque argumentis ostendi & concludi potest. Primò, eiusmodi spiritus lubent se à Magis adorari tanquam deos, libique sacrificia fieri, hoc au-

tem est proprium demonium, qui honorem diuinitatis, quem à principio affectantes assequi non poterant, decipiendis hominibus, aliquo modo obtinere cupiunt. Boni autem Angeli, eiusmodi honores non solum non optant, sed etiam vehementer auersantur. Vnde legimus in Apocalypsi,

*Apoc. 19* Angelum quendam prohibuisse ne Ioannes ipsum adoraret, dixisseque: *Vide ne feceris, conseruum enim tuus sum, &c. Deum adora.* Deinde Magi sunt homines flagitiosissimi, & artibus magicis abutuntur ad inferendum exitium aliis, hoc est, ad patranda adulteria, furta, homicidia, atque adeo infanticidia: boni autem Angeli, nec maleficis hominibus fauent, & ab eiusmodi celoribus abhorrent. Post hæc, Magi multa miscent mendacia multasque fallacias, quibus homines circumveniunt, & decipiunt: ad quod Angeli boni cooperari non possunt. Præterea, Magi inuocando eos quorum abutuntur opera, iunguntur illis quedam

*Quomodo Magi  
Dæmonibus im-  
perant.*

impossibilia nisi venerint: & cum venerunt, imperant illis, & cogunt ne inde discedant, hoc autem imperium non possunt habere homines in Angelos bonos: habent autem in Dæmones, vel quia superior dæmon, cum quo Magi habent societatem, & fædus fecerunt, cogit inferiores dæmones parere iussis Magorum, vel simulant dæmones se cogi à Magis, cum tamen id voluntarie faciant, nec ab illis cogi queant, quò facilius decipiant homines: tantam vim & auctoritatem Magorum adorantes, & illis fidem adhibentes.

*Mat. 12.  
Luc. 11.*

Quod attinet Dominis noster argumentatur, se non eiecisse dæmones potestate Principis dæmonum quia non potest Satanās Satanam eiecere,

alioqui regnum eius diuideretur, nec diu stare posset, intelligendum est de perfecta eiectione demonis ab homine, hoc est, tam ex corpore eius quam ex animo, vel de eiectione quæ proficiscitur ex odio demonis, & desiderio evertendi imperium quod habet in homines. His adde, quia ut bene, inquit Eusebius lib. 5. De præparatione Evangelica c. 7. vnde potuerunt Magi discere verba illa & caeremonias quibus demones aduocant, eosque vel loco, vel annulo, vel vasi, vel statua vel aliis rebus adesse cogunt. Vnde scire quibus sacrificiis, libamentis, aut sustumentis demones auertantur & fugentur, vel oblectentur & alliciantur? & alij quidem demones aliis rebus, vnde, inquam homines hæc discere potuissent, nisi ab ipsis demonibus?

Quod non est credibile, hominē posse imperare Angelis bonis, eosque vel reluctantes cogere & compellere ad aliquid faciendum, quod tamen Magos facere disertissimis verbis *Dubitationes* no-  
declarauit Porphyrius Philosophus in epistola ad Anebonum Aegyptum, quam Eusebius lib. 11. De præparatione Evangelica capite sexto scriptis suis inseruit, ex ea vero nonnulla quæ ad rem præsentem, maximè pertinent, hic adscribam. Proponit autem in ea epistola Porphyrius nonnullas dubitationes circa ea quæ Magi faciunt *Magi in*  
Demones inuocando. Prima dubitatio est, Quo modo Magi inuocant & obsecrāt demones tanquam superiores, & eisdem tamen tanquam inferiores imperant, & quod volunt, facere eos cogunt. Secunda: Cur Dij Magorum iubent homines esse iustos, ipsi autem à Magis iussi, multa

patrunt iniqua, & flagitiosa. Tertia: Nolunt illi exaudire Magum, qui non multis diebus ante se abstinerit à Venere, ipsi tamen iussu Magorum illicitiunt & incitant homines ad turpes & nefandas libidines. Quarta: volunt Magum inuocaturum ipsos, ante ab esu carniū abstinere, cum ipsi tamen nidore ac sanguine cariarum animalium maximè oblectentur. Quinta: ei qui mortuum tetigit, ad operationes magicas accedere non licet, cum tamen mortuis & cadaueribus animalium res magicæ ferè peragantur. Sexta: Magi minantur Soli & Lunæ & Diis cælestibus, dicentes se concisuros cælum & arcana Isidis educturos, & Osiridos membra Typhoni tradituros, nisi Dij adueniant & respondeant ipsis: absurdum tamen videtur, Deos quasi infantes, eiusmodi fictis minis & terroribus commoueri. Moueri autem eos istis minis, Cheremon sacer scriba restatur, & hæc esse illa inquit, quibus Dæmones maximè coguntur. Septima: preces autem & brationes, quibus vtuntur Magi inuocantes suos Deos, inanes & ridiculæ videntur, sic enim eos compellant: Tu, inquit, qui è limo emersisti, qui sedes in loco, qui nauigio nauigas, qui singulis horis formam commutas, & in singulis Zodiaci signis commutaris. Atque his precationibus & adiurationibus aiunt Deum se hominis visui subicere. Octaua: Quid sibi volunt verba illa barbara, & nihil planè significantia, quibus Magi vtuntur ad deos suos aduocandos? nam si ad verborum significationem Dij respiciunt, quacumque voce eadem res significetur, mouebuntur: non enim Dij sunt Ægyptij vel Scythæ; vel illis linguis

linguis vruntur, aut illas tantum norunt. Non enim Dæmones sunt supra ordinem rerum sensibilium, quomodo possunt rebus sensibilibus vel allici, vel etiam cogi? quare aut Magorum malignitate hæc omnia sunt excogitata, qui nostras passiones Deo attribuere ausi sunt: aut aliter homines de Deo cogitant, quam rei veritas habeat. Hæc in illa epistola Porphyrius. Iamblicus autem, quem Simplicius & alij ob magnam peritiam rerum diuinarum, cum incredibili studio & religione coniunctam, diuum prænominare solent, in libro, quem De Mysteriis Ægyptiorum scripsit, ad supradictas omnes Porphyrij dubitationes respondere conatur: sed eiusmodi sunt omnia eius responsa, ut mihi quidem videatur esse magis incredibilia & absurda, maioribusque implicata difficultatibus, quam illæ ipsæ, quæ ppositæ sunt dubitatione.

Sed quæret aliquis, cur Dæmones non nisi sub certis quibusdam cæli constellationibus & non nisi certis quibusdam, vel lapidibus, vel herbis, vel figuris, aut alijs signis adhibitis, aduocentur à Magis, nec aliter opera magica fiant? Respondendo, id quidem facere Dæmones varias ob causas. Primò ut inducant homines in eum errorem, ut credant esse aliquod numen & diuinitatem in stellis, easque pro Deo adorent & colant. Deinde, ut simulando per stellas multa maleficia, multaque incommoda & detrimenta inferri hominibus infament eas, & exosas reddant hominibus. Præterea, quia dæmones, cum non ita per causas naturales operentur, animaduertunt, secundum certas aliquas constellationes, tractatiam circa quam operari volunt, magis affici & preparari



præparari ad effectus illos accipiendos. Hinc fit, ut nonnunquam Dæmones, secundum incrementa Lunæ, maximè quosdam vexent, qui propterea vocantur Lunatici, quos Dominus sanasse dicitur, in Euangelio, Mathæi cap. 4. & 13. cum enim cerebrum hominis, auctore Aristotele, sit omnium corporis partium humidissimum, ideoque maximè subiciatur potestati Lunæ, quæ magnam habet potentiam & vim commouendi humores, in cerebro autem perficiantur actiones interiorum sensuum, hinc fit, ut Dæmones secundum incrementa Lunæ, maximè perturbent plerumque hominibus, quia vident tunc cerebrum eius ad id esse magis præparatum. Porro Dæmones, sicut dixit beatus Augustinus 21. De ciuitate Dei, cap. 6. alliciuntur herbis, lapidibus, animalibus, carminibus aliisque catemoniis, non tanquam animalia cibus, sed ut spiritus signis, ea ratione, ut hæc illis exhibentur in signum diuini honoris, cuius illi sunt cupidissimi. De hoc vide S. Thomam prima parte, quæst. 115. art. 5.

## CAPUT VI.

*Que opera admiranda possint facere Dæmones vel per seipsos, vel per Magos.*

Iob. 1. &  
2.



V o sunt hîc ponenda ex sacris literis satis manifesta, vnum est, Dæmones per se ex vno loco in alium moueri, & quidem maxima celeritate. Legimus enim in libro Iob, Satân Deo

Deo interroganti vnde veniret, respondisse: *Circuiui terram & perambulauit eam*, & Dominus in Euangelio ait quendam spiritum aegrum egressum ab homine quem tenebat, perambulasse per loca arida & inaquosa, & iterum assumptis alijs septem spiritibus nequioribus se, ad eundem illum hominem reuertisse: & Petrus admonet fideles vt sobrij sint & vigilent, quoniam aduersarius eorum diabolus, tanquam leo rugiens circuit, quarens quem deuoret. Alterum quod hoc loco ponimus est, dæmonē non solum posse mouere seipsum, sed etiam alia corpora, ex vno loco in alium transferendo. Id quoque ex sacris litteris certum est: Dæmones enim per peccatum non perdiderunt dona naturalia: sicut igitur Angeli naturali vi mouent orbes caelestes, sic Dæmones possunt mouere alia corpora: & sicut Angelus ille Prophetam Habacuch capillo capitis apprehensum, ex Iudæa, Babylonem vsque transportauit, indeque repportauit in Iudæam, ita postea Dæmon idem facere, quinimo id eum fecisse certum est: legimus enim diabolum, Dominum nostrum tulisse in pinna culum templi, & in mortem excessum. Nec hoc loco disputandum est, an talis virtus motiua dæmonis, sit distincta ab intellectu & voluntate eius: nam distinctam esse equidem arbitror, licet plerique negent. Verum eius quæstionis tractatio aliena est huic loco. Nec definitio nunc quantā sit virtus motiua dæmonis, vel quot corpora aut quantā mouere queat, & non amplius, id enim incognitum mortalibus puto: existimo tamen in dæmonibus superioribus maiorem esse hanc vim motiuam, inferioribus

*Duplex  
actio de-  
monum  
transiens.*

rrioribus verò minorem : sicut enim eorum natura sunt vel perfectiores vel imperfectiores, ita quoque eorum potentia sunt vel fortiores vel imbecilliores. Nam quia Angelus est terminatae speciei & definitae naturae & perfectionis, ideo nec potest esse ubique locorum, neque potest quantacunque velocitate quantumlibet corpus movere. Præterea sciendum est, duplicem esse demonum actionem, quæ à Philosophis vocatur transiens, alteram immediatam, quæ immediatè proficiscitur à dæmone, & hæc est motus localis quo movet corpora, nam sicut intelligentia non per aliqua media instrumenta, sed immediatè movent orbes cœlestes, sic demones immediatè possunt movere corpora secundum locum. Altera eorum operatio transiens, est mediata, nempe quæ motionem localem ab ipsis factam consequitur: demones enim afferendo ex varijs locis & invicem applicando causas naturales & agentia in vicem & patientia componendo, varios producant effectus, qui effectus immediatè quidem existunt ex causis naturalibus, mediata verò à dæmonibus qui illas causas præsentis fecerunt, & materijs quæ ab illis aptæ sunt pati accommodarunt. His positis, quænam opera, mira demones possint facere, demonstramus.

*Opera quæ possunt fieri a demonibus facere.* P R I N C I P I O, per motum localem multa possunt demones facere, quæ fidem excedere videantur, quorum nonnulla hîc subiiciam exempla. Primò possunt ignem ex superiore aëris parte demittere, quo multa consumant, & perdant: possunt etiam immittere vehementes, & turbulentos ventos, qui magna diruant ædificia, sicut

sicut fecisse legitur dæmon aduersus Iob, *Cecidit Iob 1.* (inquit scriptura) *ignis de cælo & tactas oues puerosque consumpsit, & repente ventus irruit a regione deserti, & concussit quatuor angulos domus, qua corruens oppressit liberos, & mortui sunt.* Potest dæmon grauissimas tempestates & procellas in mari excitare, vel aquas maris ab imo commouendo, vel per concitatissimos ventos. Potest terram magnis motibus concutere, vel immittendo vehementem aliquem spiritum in cauernas terræ, vel in illis inclusum vehementissime agitando. Sic fortasse fieri potuit, quod narrat Philostratus de duob. doliis, quæ vidit Appolonius apud Indos, quæ aperta, imbres & ventos emittebant; clausa verò eadē cohibebant atque compescebant. Secundo potest transferre ex vno loco in alium quantumuis remotum, vel homines, vel animalia, vel quæuis alia corpora. Sic *Mat. 4.* diabolus Christum tulit in pinnacula templi, & in motem excelsum, & historia Ecclesiastica narrat, Simonem Magum à Dæmonibus per aëra euectum esse in cælum. In historiis etiam Gentilium traditum est, nonnunquam visos esse serpentes, dracones, & homines per aëra volantes, quinetiam Albertus tradit nonnunquam boves, seu vitulos pluuisse: quod hac ratione factum esse existimandum est. Tertiò potest dæmon subito res præsentēs è conspectu hominum subtrahere, atque ita reddere inuisibiles, sicut Apollonius cū esset in conspectu Domitiani Imperatoris, repente ex oculis omnium excessit, & nisi volumus fabulam fuisse id, quod de Gyge *Plat. in 2. de rep. Cic. li. 3. d. offic. 3* memorant Plato & Cicero, hac etiam ratione

dicemus. Gygem cum volēbat, potuisse latere oculos præsentium & spectantium, idque fecisse, non vi & potestate eius annulli quem gestabat, ut illi tradunt, sed potius Dæmonum artificio.

*Statua per se incedentes* Quattō potest facere, ut statua, vel alia res inanimata ambulent, & incedant more hominū, Dæmonē illas mouente; & motum moderante:

sic factum est quod ex Philostrato supra commemorauimus, de tripodibus lapideis, & pinceris æreis, qui apud Iarcham præsentē Apollonio, in conuiuiū per se mouebantur, & more famulorum ministrantium mēsis, & pocula, & fercula conuiuii suo loco & tempore præbebāt.

*Statua loquētes more humano.* Quintō: possunt facere, ut statua, arbores animalia loquantur more humano; quā ratione fieri potuit, quod narrat Valerius Maximus libr. i. cap. vlt. de simulachro Iunonis Moneta, quod Romani Veis Roman transferre religionis ergo cupiebant.

Cum enim quidam militum petiōum interrogaret illud simulachrum, an Romā migrare vellet, velle se respondit: qua voce audita, lusus in admirationem & religionem versus est. Simulachrum etiam fortunæ muliebris, à matronis Romanis cum æde sua consecratum, bis locutum esse, idem Valerius auctor est, his verbis: Ritē me matronæ vidistis, ritē me consecrastis. Et Caio Volumnio, & Seruio Sulpitio Coll. dicitur, bos humano sermone locutus, bello etiam Punico secundo, fertur Cneo Domicio; bouem dixisse: Caue tibi Roma. Huc quoque pertinet quod narrat Philostratus, cum Apollonius esset cum Gymnosophistis Æthiopum, quorum Princeps erat Trespecion, eius tacito

tacito iussu, arborescens vltimum humana voce Apollonium saluauisse. Nec putandum est vel leones, vel arbores, vel alias res inanimatas modo hominum loqui posse, sed Dæmonem esse qui sermones illos articulatos & humanis similes in aëre formet, iuxta, vel intra illa corpora: Sic Angelus qui occurrit Balaam ei mortem intetans, fecit ut eius Asina loqueretur: nam etiam videmus esse quosdam qui per organa vel alia instrumenta musica, tanto artificio modificare ac temperare possint statim quo illa pulsantur & resonant, ut voces & cantus hominum æmulari & reddere videantur. Sexto possunt facere ut animalia mirabili quadam ratione seipsa moueant, & quædam agant, quæ sine intelligentia & ratione, nec ea quidem vulgari, sed admodum solerti & prudenti minimè fieri posse videantur: tale est quod narrat Valerius lib. i. cap. 8. quod est de Miraculis, de serpente illo Æsculapij, quem Romani quasi volentem & intelligentem, & quædam rationis ac religionis, nec non diuinitatis cuiusdam signa dantem, Epidaurum Romam aduexerunt. Huius etiam generis est quod narrat Philostratus lib. 5. c. 15. de Leone quodam mansuetissimo, qui loro, veluti canis, in Ægypto per vrbes ducebatur, contrectantibus se non modo non nocens, sed etiam blandiens, qui ad genua Apollonij modo supplicantium hominum humiliter se abiecit: quem aspiciens Apollonius, ad eos qui aderant, Hic, inquit, leo me rogat ut vos doceam hominis animam illum habere: fuit enim hic quondam Amasis Ægypti rex, quæ simul atque dixit Apollonius, leo miserabiliter fremens, lachryma

*Num.*  
 22.

*Fabula*  
*Leonis,*  
*Apollonij.*

chrymabilem rugitum edidit, tum dentibus infrendens, cum plorare videretur, vbertim lachrymas fundebat. Húc, inquit Apollonius Leonem, censeo Leontopolim mittendum, & in templo collocandum: regem enim in regiam belluam conuersum, tanquam egenum mendicare indignum iudico. Hæc ille, quæ omniâ arte magicâ Apollonij & opera Dæmonum facta sunt, quod facilius error Pythagoricus de transmigratiōe animarum humanarum in varia bestiarum genera, hominibus persuaderetur. Septimò: quod in historiis Romanorum legitur, & à nobis supra est commemoratum, Claudiam mulierem Vestalem, quò suam pudicitiam probaret, nauim ita hærentem in Tiberi, vt multi eam homines loco mouere non possent, Zona sua quo volebat, nullo labore traxisse: Et Tucciam item Vestalem, aquam Tiberi haustam, ad Capitolium vsque cribro tulisse, hæc inquam, facta sunt opera Dæmonis, qui & nauim occultè promouebat, & aquam ite per cribrum dilaberetur, suspensam tenebat. Octauò: potest facere, vt subitò globus aliquis igneus vel flamma appareat, vel citcum aliquem fulgeat, sicut Plinius lib. 2. cap. 107. Scruio Tullio dormienti, ex capite flammam emicuisse, & L. Martio in Hispania interemptis Scipionibus concionanti, & milites ad vltionem exhortanti, arsisse simili modo. Nonò: potest aquas

*Omnes* fluminum dirimere & eas retro pellerè, ita vt flumina retro fluere videantur: quod Plinius suo tēpore accidisse scribit, lib. 2. cap. 203. his verbis: Amnes retro fluere, & nostra vidit ætas Neronis Principis annis supremis, sicut in rebus eius retulit

*retro  
fluentes.*

retulit

retulimus. Decimò: potest Dæmon varia corpora variè formata assumere, eaque mouere, ita vt homo, vel Angelus, vel leo, aut aliud quoduis animal videatur, idque facit vel ad exterrandos, vel ad decipiendos homines. Legimus enim B. Antonio Dæmones in variis animalium formis, & quidem horribilibus ac terrificis, ad eum perterrefaciendum, & à sancto proposito remouendum apparuisse. Sic accipiendum est, quod scribit Valerius Maximus lib. i. cap. 8, Romanis apud lacum Rheginum pugnantibus cum acie Tusculanorum; Castorem & Pollucem Romanarum partium propugnatores, visos hostiles copias pœnitus fuisse; & Publ. Vatinio noctu urbem perenti, obuios esse factos duos iuuenes, excellenti formâ, albis equis insidentes, nunciâtes illo ipso die Persen regem à Paulo fuisse captum: quod ita euenisse postea compertum est. Vndecimò: potest Dæmon repræsentare varias figuras cuiuslibet rei, vel auri, vel gemmarum, vel dapum, vel hominum. Nam sicut fictores sculptoresue ex materiis sibi subiectis, varias formas & figuras rerum effingunt, *Plinius lib. 35.* & interdum tales, vt verè ac naturales videantur, sicut traditur de illis vuis à Zeuxide pictis, *cap. 10.* adeo perfectè naturales vnas reddentibus vt eas ab amicis appetitas esse dicatur. Sic Dæmon ex aëre condensato, vel alia quauis materia cuiuslibet rei figuram effingere potest: cuius rei supra ex Philostrato exemplum posuimus, lamia cuiusdam, quæ Menippo quem decipere volebat, maximas opes, prætiosa ornamenta, magnâ copiam vini & epularum ostentabat, quæ Apollonius



pollonius ostendit esse tantum inania simula-  
chra, & imagines earum rerum quæ videbantur.  
Duodecimo: possunt concitare & cōturbare hu-  
mores, vel spiritus qui sunt in corpore humano,  
distingere etiam atque distrahere partium com-  
pages & connexiones, qua re grauissimos mor-  
bos & acerbissimos cruciatus efficiunt; sicut in  
iis qui à Dæmonibus torquentur, cernere licet.  
Decimotertio: possunt etiam spiritus animales,  
qui interiorum sensuum functionibus peragen-  
dis inserviunt, ita mouere & conformare, vt  
res quasdam vel præteritas, vel præsentēs, vel fu-  
turas repræsentent: possunt etiam eosdem spiri-  
tus, quibus insunt species rerum sensibilibus, ex-  
trinsecus per sensus exteriores impressæ, vsque  
ad ipsos sensus exteriores deuoluere, ita vt etiam  
qui vigilant, videantur sibi aliquid videre, &  
audire, facere quod reuera non est: hoc enim vi-  
demus accidere phreneticis, quod igitur homi-  
ni vi alicuius morbi contingit, dubitandum non  
est etiam id dæmonum artificio in homine effici  
posse. Decimoquarto: possunt dormientiū phan-  
tasmata mouere & conformare ad repræsentan-  
dum aliqua futura quæ dæmones cognoscunt es-  
se futura, vt ita decipiant homines fidem habentes  
somnia, & ex ipsis actiones humanas vel suas  
vel aliorum cognoscere & dirigere velint: atque  
hinc quidem ortum duxit diuinationio per somnia,  
cuius diuinationis exempla sunt quamplurima  
apud Valerium Maximum lib. 1. & apud Cicero-  
nem in libris de Diuinatione. Simili Dæmonum  
artificio, fidem & veritatem inuenit apud Gen-  
tiles Augurum & Aruspicum disciplina, per vo-  
latum

latum vel garritum auium diuinans, vel per inspectionem extorſu animalium caſorum, vel per electionem ſortium: eiufmodi enim rebus Dæmō ſe ingerit & immiſcet, quoniam mentes hominū ſuperſtitionibus imbuat, & variis error. implicet. Nā quod in Romanis hiſtoriis traditur, in Victima opima: quā Iulius Cæſar immolauerat, extis non eſſe inuentū cor, & in aliis vel iecur, vel principem aliam partem corporis non eſſe repertam, non alia ratione quam Dæmonis occulta vi, partes illas ablataſ eſſe credendum eſt. Decimoquinto: poſſunt Dæmones ſenſus exteriores immutare & ſeducere dupliciter, Primò extrinſecus, obijciendo ſenſibus varia ſenſibilia non vera, hoc eſt, non talia qualia videntur, ſed ſolas eorū imagines & ſimblachra; vel intrinſecus commouendo ſpiritus & humores, quorum commotione etiam ſenſus exterioreſ variè afficiuntur & turbantur, vt non rectè iudicent de ſuis obiectis; id quod cernimus ſenſibus exterioribus phreneticorum accidere. Decimoſexto: poſſunt varias paſſiones vel amoris vel odij, vel timoris vehementer excitare in homine, idque facere dupliciter, vel obijciendo ſpecies rerum, quæ ad tales paſſiones excitandas plurimum valent; vel interiorius mouendo phantaſmata ad ſimiles reſ repreſentandas, vel agitando & accendendo humores qui ſunt harum paſſionum materia, nimirum vel languineam, vel aſcram aut flauam bilem. Atque hæc ſunt & alia horum ſimilia quæ Dæmones per motum localem facere poſſunt, & interdum quidem faciunt: neque enim quæcumque poſſunt facere, licet eis facere, ſed quantum eis per diuina

*Iob 1. &*  
*2.*  
*.Reg.*  
*12. sup.*  
*18.*

nam providentiam per missum est. Habent enim potentiam à Deo restrictam & quasi ligatam, quam eis interdum laxare solet Deus, vel ad exercendos bonos, ut aduersus Iob; vel ad puniendos malos ut aduersus Achab & Prophetas eius. Sicut enim Dæmones, permissu Dei, ingressi in porcos, præcipitarunt eos in mare: sic homines in omnia malorum tam culpæ quàm pænæ generatæ turbarent, si eis Deus quantam vellent potentia ac malitiæ suæ exercendæ potestatem faceret.

PER alteram, portio actionem Dæmonum, quæ non est motus localis eorum, sed eum consequitur, hoc est, per actiones causarum naturalium, quas Dæmones inuicem applicarunt & temperarunt, mira quoque Dæmones possunt efficere. Sunt enim singulares quædam virtutes occultæ & ignotæ hominibus, sunt, inquam, in certis quibusdam aquis, terris, succis, gemmis, lapidibus, herbis, lignis, animalibus, & in ipso hominis corpore mirabilium ac penè incredibilium operum effectrices: quarum rerum exempla, supratractando tertiam quæstionem, nonnulla posuimus, sed plurima reperiuntur apud Solinum, Plinium, & Albertum, in lib. de Mineralibus, & Animalibus. Hæ virtutes quibus in rebus naturalibus insunt, ubi locorum lateant, quibus cum rebus componi & misceri ac temperati debeant, quo tempore tempestiue & opportune ad operandum adhiberi oporteat, notissimum est Dæmonibus; quas etiam vndecumque & quocumque voluerint, maxima facilitate, celeritateque clam homines transferre possunt. Huiusmodi autem effectus, quatuor ob causas sunt hominibus admodum

mirabi

mirabiles. Primò, quia sunt noui, & inusitati. Secundò, quia modus quo Dæmon illos molitur, est occultus & inuisibilis. Tertiò quia sicut homines variè temperando & accommodando res naturales possunt aliquos effectus producere, quos nonnunquam per se causæ naturales produxissent: sicut patet in arborum insitionibus, in distillationibus aquarum, ciborum & condimentorum confectionibus, & in medicamentorum compositionibus: sic Dæmones, effectus aliquos singulares, per causas naturales possunt producere, quos ipsæ per se nonnunquam produxissent. Quartò quia ut inquit S. Thomas 3. lib. aduersus Gentes, c. 103. & prima parte, quæst. 110. art. 2. ad 3. cum Angeli vel Dæmones adhibent causas naturales ad effectus aliquos procreandos, vtuntur eis tanquam instrumentis, non secus quàm medicus vtitur herbis ad sanandum. Ex instrumento autem procedit effectus, non tantum virtuti eius respondens, sed etiam ea superior, & præstantior, nempe respondens virtuti principalis agentis à quo mouetur ad operandum illud instrumentum, quemadmodum securis non solum secat, sed etiam facit lectum vel mensam, vel hominis statuam, vt est instrumentum hominis ex arte operantis: & calor naturalis qui est in semine, vel in animali, non solum calefacit, rarefacit, aut segregat, sed etiam generat sanguinem carnes, & ossa, in virtute animæ vel animalis cuius est instrumentum. Sic etiam causæ naturales interdum produciunt effectus præstantiores suis ipsarum virtutibus, ex eo quod sunt instrumenta Angelorum vel Dæmonum à quibus

D

mouen

mouentur, & reguntur. Posset igitur Dæmon plurimos morbos arte medicinæ quam homines callent incurabiles, magna celeritate ac facilitate sanare: tum quia nouit optimè omnes morborum etiam abstrusorum causas, & affectiones; tum quia scit omnia genera remediorum, & idoneam eorum applicationem, sed non omnes tamen posset sanare: quia sunt morbi aliqui simpliciter incurabiles.

## CAPUT VII.

*Quas res Dæmon nec per Magos, nec per seipsum possit efficere.*

**P**ER motum localem, qui est immediata eius operatio transiens, multa non potest facere Dæmon. Primò enim, vt inquit S. Thomas in *Questionibus de Potentia*, q. 16. quæ est de Dæmonibus, art. 10. nō potest destruere aut subuertere ipsum vniuersum, sunt enim Dæmones partes vniuersi, pars autem non habet vim atque potestatem in totum cuius est pars, & vt inquit Paulus ad Hebr. *Non subiecit Deus Angelis orbē terræ.* Nec possunt pervertere ordinem vniuersi, cū auctore Aristotele, bonū vniuersi sit ordo. Non possunt item perturbare, vel suis locis commouere principes partes mundi, ex quibus eius integritas coalescit. Non possunt sūstere cælum vel motum eius in contrarias partes agere. Non possunt elementum aliquod ex vno loco in alium transferre.

transferte. Non possunt facere vt detur vacuum, cum vacuum tollat coniunctionem, connexionem atque subordinationem omnium partium vniuersi, in quo eius conseruatio atque gubernatio consistit. Dixi non posse Dæmonem eiusmodi res facere, vel simpliciter, vel secundum potentiam ordinariam ei à Deo concessam & quâ ei concedi poscit æquissima diuinę prouidentię ratio. Et cum Dæmones habeant vim motiuam definitam, alij quidem maiorem. alij verò minorem, non possunt quantumlibet corpus, quantalibet velocitate mouere, nedum in instanti. Non possunt facere vt duo corpora sint simul in eodem loco, vel vnum corpus, in duobus locis simul, vel vt vnum penetret dimensiones alterius. Nec potest Dæmon distans à corpore, illud mouere secundum locum: quia mouens & mobile debent esse simul: alioqui posset mouere per vacuum, & per quantamcunq; distantiam. Non potest transferre corpus de extremo ad extremum, & non per medium.

MULTA quoque suntque per alteram actionem Dæmonum quam mediatam diximus, cuiusmodi est naturalis alteratio, corruptio, generatio rerum naturalium, non possunt à Dæmonibus effici. Non enim potest Dæmon immediate producere vllam formam substantialem vel accidentalem, cum enim sit incorporeus, non potest immediate alterare materiam corpoream, vnde formę naturales educuntur. Secundò, non potest aliquid creare ex nihilo, tum quia id requirit infinitam virtutem actiuam, qualem Deus solus habet, tum quia nec motus localis

Dæmonis, nec operatio quam per causas naturales exercet, in nihilo recipi, aut circa nihil versari possunt. Tertiò, non potest ex quolibet facere quodlibet. Quartò, nec per quâlibet causam vel instrumentum potest quemlibet effectum producere: sicut medicus non potest per quamlibet medicinam, quemlibet morbum sanare, nec artifex per quâvis instrumenta quodcunque voluerit opus perficere: atque hoc est quod Augustinus compluribus locis docet, nec Dæmones nec Angelos esse creatores rerum, nec posse transmutare formas rerum, nec materiam corporalem ad nutum illis obedire. Quintò, nō possunt Dæmones producere formas substantiales non præviis alterationibus & præmissis dispositionibus. Sextò, nec possent eas in instanti, aut quantumlibet paruo tempore producere. Septimò, non possunt quamlibet rem naturalem immediate in quamlibet aliam transmutare, etiam adhibendo causas naturales. Octauò, nō possunt animalia perfecta sine semine producere quare si visi sunt vnquâ vel ex lapidibus & lignis producere equos vel leones, vel ex nubibus pluere vitulos, non est putandum sic eos fuisse generatos, sed vel aliunde inuisibiliter per Dæmones illuc translatos, vel non fuisse vera animalia, sed eorum tantum imagines & simulachra cernentium oculos fallentia. Nonò, nec potest animal producere subito secundum perfectam magnitudinem & virtutem eius: denique quod superat vires agētium naturalium, quodque naturali eorum dispositioni & ordini repugnat, & ad quod virtus agentium naturalium nullo modo se extendit;

tendit, id fieri à Dæmone nequaquam potest. Decimò, non potest pervertere atque immutare ordinem qui est inter formas & dispositiones rerum naturalium, vt possit posteriores inducere non inductis prioribus, aut extremas non inductis mediis. Vndecimò, non potest mortuos, ad vitam reuocare propter causam supradictam. Duodecimò, non potest impedire ne agens naturale habens omnia requisita ad agendum, non agat. Disputari posset hoc loco an vlla res naturalis habere possit vim in Dæmones, expellendo eos, vel etiam actiones impediendo, propter id quod dicitur in libro Tobie, cap. 6. & 8. de iecore cuiusdam piscis cuius fumo fugabantur Dæmones in perpetuum, & de melodía Davidis qua expellebatur spiritus malus à Saule Vide 1. Reg. cap. 16. & 4. Regum, cap. 3. Lyranū & Burgensem super primum Regum, cap. 16. & ibidem Tostatum quæst. 40. Vide Iosephū octauo Antiquitatū de radice Salomonis, cuius odoratu Dæmō exibat per nares eius hominis quem tenebat. Verum hac de re nostram lector disputationem & sententiam reperiet in libro. 4. notrorum commentariorum in Daniele in quo eam quæstionem tractamus explanantes illa

verba quæ sunt in Cantico trium

puerorum : *Benedicite cete*

*& omnia quæ mouentur*

*in aquis, Domino.*

\* \* \*



## CAPVT VIII.

*An opera Magorum sint vera miracula, & quomodo à veris miraculis differant ac dignoscantur.*



Exod. 7.

**ADMIRANDA** Magorum opera non solum Ethnici, sed etiam nostri Theologi interdum vocant miracula, vel quia verorum miraculorum sunt simillima, vel estimatione hominum, quod ea ipsi nec facere, nec quæ admodum facta sint intelligere possunt, non naturæ, sed diuinitatis opera existimantium. Et sane nonnulla faciunt Magi in speciem non dissimilia eorum quæ faciunt Sancti: namque Magi Pharaonis similiter vt Moses, & virgas suas verterunt in serpentes, & aquam mutarunt in sanguinem, & magnam tantum vim subito producerunt. Sanant interdum Magi ægrotos, & Demones ex corporibus hominum eiciunt. Nec tamen hæc operum similitudo facit vt Magorum opera vera sint miracula, alioquin miraculum non esset idoneum declarandæ probandæque Deitatis atque veritatis argumentum, quare ratio fidei & doctrinæ Christianæ, quæ miraculis tanquam veris diuinæ potentie sigillis obsignatur, & quasi quibusdam fulcris quodammodo sustinetur, omnino periret. Docere igitur conuenit hoc loco, cur eiusmodi Magorum facta non sint miracula, & quibus rebus differant, quibusvè notis atque insignibus à veris miraculis internoscantur.

TRIPLICITER igitur potest intelligi a- *Quid sit*  
 liquid esse miraculum. Primò simpliciter & ab- *miracu-*  
 solutè, nempe comparatione cuiuslibet naturæ: *lum.*  
 hac significatione, nullum planè est miraculum:  
 nihil enim est, quod diuinæ potentix & sapien-  
 tiæ comparatione, miraculum dici queat. Nam  
 miraculum alicui dicitur, quod eius & facultatem  
 & intelligentiam excedit: Deus autem nihil est  
 quod admirari possit, quippe cum & causas om-  
 nium quæ fiunt, optimò nouerit, & ipse princeps  
 causa sit efficiendi omnia. Nam qui per ludum & *Prou. 8.*  
 iocum (vt est in Prouerbiis Salomonis) ex nihilo  
 mundum condidit, quid ei magnum, nedum mi-  
 raculum esse queat? cum vt est apud Esaiam cap.  
 40. & in libro Sapientix, capit. 9. Omnes gentes  
 totusq; terrarum orbis apud ipsum sit tanquam  
 gutta roris antelucani, & quasi puluis, & tan-  
 quam inane, & nihil. Deinde potest appellari  
 miraculum respectu hominum, qui quæ sunt ip-  
 sis inusitata, & quorum causas ignorant, quoniã  
 ea maximè admirantur, dicunt miracula: quæ ra-  
 tione non modo Dæmonum, & Magorum, sed  
 etiam sapientum hominum inueta quædam no-  
 ua, & artificiosa opera, qualia fuerunt illa Ar-  
 chitæ, & Archimedis, quæ supra commemora-  
 uimus, miracula nominantur. Sed verè ac pro-  
 priè miraculum dicitur, opus quod ideo verè ac  
 meritò mirandum est, quia omnis naturæ crea-  
 tæ vim atque potestatem excedit. Hoc autè mul-  
 tis modis potest euenire: namque excessus natu-  
 ræ creatæ, vel est in eo quod fit, quale nullo mo-  
 do natura potest facere, cuiusmodi est, vt duo cor-  
 pora simul sint in eodem loco, & sic permeent,

*Tres gra-  
 dus vero-  
 rum mi-  
 raculo-  
 rum.*

vel ut corpus humanum eūdat immortale, impassibile, & gloriosum; atque hæc tenent primum locum, & gradum in miraculis. Vel excessus est nō in eo quod fit, sed in eo vel ex quo vel in quo res fit: potest enim natura producere aurum vel arborem, sed non ex nihilo: potest dare vitam, sed non mortuo, potest item facultatem videndi largiri; sed non nato cæco: & hæc secundum locum in miraculis tenent. Vel excessus nec est in eo quod fit, nec in eo ex quo, aut in quo fit, sed vel in modo, vel in ordine, vel in alia quāpiam circūstantia, aliisve rebus cum quibus omnibus naturaliter opus illud fit: Exempli causa, potest medicus sanare ægrotum; verū non subito, nec absque medicina: potest Magus vel Dæmon, vel etiam natura ex ligno producere serpentem, verum non immediatè: atque hic est infimus miraculorum gradus & locus. Sed quia hæc breuiter diximus, vereor ne obscurè dicta sint, quare quò melius intelligantur, latius explicabuntur. Dæmonum & Magorum miracula non vera, differunt à veris miraculis, quæ in scripturis & historiis Ecclesiasticis,

*Quin-* à seruis Dei facta legimus, his quinque modis,  
*que dif-* Dignitate virtutis efficientis, Qualitate eorum  
*ferentia* qui faciunt, Diuersitate factorum, Modo facien-  
*verorum* di, & Fine cuius gratia fiunt vera miracula, eūm  
*miracu-* (ut supra diximus) omnis naturæ creatæ vim  
*lorum* à exuperent, solius Dei potestate possunt effici:  
*falsis &* nam quamuis per Angelos vel seruos Dei fieri  
*simula-* videantur, illi tamen non agunt virtutē suā, sed  
*tus.* Dei cuius sunt administri & tanquam instrumē-  
 ta. Magi autem opera sua faciunt, vel virtute  
 quarundam

quarundam rerum naturalium quibus vtuntur occultè, vel opera Dæmonum, qui clam Magis auxiliantur. Vera miracula licèt interdum faciant etiam homines mali, rarò tamen, nec nisi ad confirmationem veritatis, & diuinæ virtutis declarationem: ferè autem magi homines sunt flagitiosi & malefici, quos proinde diuinis humanisque legibus consulere & adire prohibemur. Quæ faciunt Magi, vel sunt tantùm phantastica & simulata, & ideo nec diuturna, vel sunt perniciofa, vel inutilia. vera autem miracula, sunt opera solida & vera, vtilissima hominibus, & non nisi magna aliqua necessitate & vtilitate facta. Magi, opera sua faciunt vel per causas naturales, vel ope Dæmonum, vtuntur multis præstigijs, mendacijs, ludificationibus hominum, figuris, characteribus, verbis, vel nihil, vel absurda significantibus, aliisque superstitiosis caeremonijs, miscentq. sacra profanis: namque nonnulla verba sacra quæ vsurpant, adiunctis superstitionibus scædant & contaminant. Docent enim ea dici debere sub certo quodam constellationum situ, certoque loco & tempore, toties signo crucis facto, tot candelis accensis adhibitis, vel filis, aut velis, aut chartis, quas vel pueri vel virgines tantùm tetigerint: adhibent etiam quædam, quæ nihil prorsus ad effectum producendum pertinent, sed ridiculam habent vanitatem, dicunt enim oportere tali hora & toties, & tali aqua lavare faciem: radere capillos, hac, vel illa veste indui. Sed quod impietatis plenissimum est, sanguinem ex humano corpore mittunt, eoq. libamina quædam consecrant, nomina quorundam

dæmonum vsurpant , quibusdam animalibus familiariter vtuntur, & cum eis colloquuntur, Dæmonibus sacrificant, nomen & fidem Christi abjurant , prohibent homines signare se signo crucis, & alia faciunt partim superstitiosa, partim ridicula, partim penitus execranda. Nihil tale Sancti faciunt edendis miraculis , sed vel interiore vel etiam exteriori supplicatione & inuocatione diuinæ virtutis, vel facto signo crucis, vel aliquibus verbis sacris recitatis, miracula operantur. Ad extremum, cur vel Dæmones , vel magi faciant illa sua miracula, non est obscurum, nimirum, vel lucri , vel gloriæ & honoris cupiditate, sibi diuinum nomen & cultum aucupantes, vel vt veritatem pervertant & falsitatem hominibus persuadeant, vel ad patranda maleficia, Veluti furta, adulteria, homicidia. Sancti autem faciunt miracula, non sua causa, cum & diuitias contemnât, & honores fugiant, sed vt Deum honorent, Ecclesiam ædificent, hominesque nō solum corpore, sed multò etiam magis animo iuuent. Qui igitur sanè mētis est, & studiosus veritatis amatorque virtutis, non erit ei difficilè vera miracula à falsis discernere: qui autem flagitiosè viuitt, & Christi doctrinam odit, nec studio veritatis, sed vanæ curiositatis cupiditate miracula quærit ; is iusto Dei iudicio permittitur, vt quia veritati cōsentire & acquiescere noluit , circumueniatur mendacijs & falsis miraculis persuasus, peruersam doctrinam falsaque dogmata, pijs verisque repudiatis, amplectatur. Hoc est enim quod docuit Beatus Paulus in 2. Epist. ad Thess. c. 2. præmonens venturum Satanam vel Antichristum in  
omni

omni virtute, in signis & prodigijs mendacibus, & in omni seductione iniquitatis, non quidem omnibus, sed iis qui charitatem veritatis non receperunt, vt salui fierent, his. n. mittet Deus operationem erroris vt credant mendacio, & iudicentur omnes qui non crediderunt veritati, sed conserferunt iniquitati.

## CAPVT IX.

*Quotuplex sit Magia.*



**V**ARIAS Magiæ species, ne hanc artem in totum vel commendemus vel damnandā execrandāq; existimemus, & nō hoc institutz tractationi desit, vel tantum indicare conuenit. Ac primò, quā alij Magiæ varietatem tradiderint, ostēdamus. Plinius lib. 30. capit. 2. complures Magiæ species ab Osthane principe eius artis doctore traditas esse commemorat. Namque ait, & ex aqua, & ex sphaeris, & ex aëre, & stellis, & lucernis ac peluibus, securibusque & multis aliis modis, diuina promittit: præterea vmbra, inferorumque colloquia. Hæc ibi Plinius. Sed Iamblicus in libro suo de Mysterijs Ægyptiorum, Proclus in libro de Sacrificio & Magiæ, & Porphyrius in libro de Sacrificijs duplicem faciunt Magiam, sicut etiā ex Porphyrij doctrina refert beatus Augustinus lib. 10. de Ciuitate Dei, cap. 9. Alteram vocant Theurgiam, nempe bonam & laudabilem qua certis quibusdam hostiis & sacrificijs, munditia quadam animæ & corporis aliisque sacris

*Varia  
species  
Magiæ.*

care

ceremoniis, bonos ac beneficos Dæmones inuocant, quorum afflatu & auxilio, & occulta manifestant, & futura prænunciant, & mira edunt opera, quæ supradicti scriptores miris laudibus in cœluni efferunt. Alteram appellant Goëtiam, & Necromantiam quæ mortuos excitat & consulit, & per eos responsa de rebus occultis vel futuris reddit. Dicitur Goëtia à planctu, quo circa mortuorum sepulchra eorum animæ ex inferis euocantur: Necromantia verò, quia sit diuination ex mortuis euocatis petita. Suidas autem distinguit Magiam, quam ait Persarum esse inuentum, in Goëtiam, Magiam propriè dictam, & Pharmatiam. Magia, inquit, est inuocatio Dæmonum, scilicet beneficorū ad aliquod bonum cōficiendum, cuiusmodi Apollonij Tyanci prædictiones fuerunt. Goëtia fit per coactionem & inuocationem mortuorum, sic enim dicta est à planctu qui fit circa sepulchrum, Pharmatia verò fit, cum aliquid porrigitur alicui sumendum ore, quod mortem ei sit allaturum, vel vehementes aliquas perturbationes & mutationes, aut corporis aut animi in eo sit effecturum, certis incantamentis præparatum, Hæc Suidas:

N O B I S autem omnes Magiæ species hac ratione & ordine distinguit posse videntur: Magia, alia est Naturalis, quæ per res naturales singulari quorundam hominum artificio adhibita mira facit; Altera est non naturalis, quæ Dæmonum inuocatione & ope utitur ad operandum. Hæc in Treurgiam & Goëtiam & Necromantiam de quibus paulò ante diximus, rectè diuiditur. Nam si quæ sunt aliæ, ad has species commodè reuocan

reuocantur. Illa quam naturalem diximus, partim est physica, cuius nomine medicinā etiam complectimur, quæ circa occultas rerum naturalium virtutes, rerum mirabilium effectrices, versatur: partim est Mathematica, cuius excellenti peritia, quàm mira fecerint Architas & archimedes, supra commemorauimus. Rursus Magia tam naturalis, quàm non naturalis, bipartito diuiditur: altera enim habet veros & naturales effectus altera simulatos tantum; nec tales reuera quales videntur; hanc vno vocabulo Præstigiatricem appellamus, sui enim præstigiis adeo præstringit & eludit sensus humanos, vt faciat videre quæ non sunt, & non videre quæ sunt idque, vel interuentu & adminiculo Dæmonum, vel operatione naturalium agentium, vel incredibili tractu atque agitatione manuum. Itaque qui edit panem, videtur farinam spueri: qui vinum bibit, per frontem aut iugulum id reicere, videntur gladij vorari; ingens vis euomi acuum minorum, & zonularum, quarum rerum circulatorum miri sunt artifices. Hæc diuiditur in Opticam, & Pharmaticam: illa, manuum, digitorum aliarumque partium corporis incredibili agilitate, & motione, defixum in res obtutum spectatium frustratur, hæc collytiis, suffumigationibus, alligationibus, potionibusque sensus interiores & exteriores ita perturbat, vt secus quàm reuera est iudicent de sensibilibus exterioribus. Vtitur etiā illa prior laminibus, annulis, imaginibus, speculis vario situ varioque modo positis & transpositis. **M A G I A** porro Naturali, quidā duas alias species adiungunt, alteram vocant Astronomicam,



*Contra  
Magiā  
Astrono-  
micam.*

micam, alteram Cabalisticam, quæ an sint meræ nugæ & quorundam hominum commenta, an reuera aliquid solidi habeant & præstent, nunc paucis diiudicandum est. Astronomicam appellant, quæ certas quasdam imagines & figuras, annullos, sigilla, statuas & alia quædam horum similia fabricantur, in quibus, eius cultores & defensores affirmant, cœlestium corporum virtutes & influxus recipi, receptosque miris effectus præstare. Sed hæc vana sunt, nec modo à christiana veritate & pietate, sed etiam à philosophica ratione & disciplina lōgè remota. Virtus enim cœlestis per se vniuersalis est indeterminata ad hunc vel alium quemlibet effectum producendum, determinatur autem per causas naturales particulares: illæ autem imagines & figuræ astronomicæ, non sunt causæ naturales, nec habent vim, aut efficiendi quippiam, aut præparandi materiam ad hunc vel illum effectum recipiendum. Deinde cœlum naturaliter operatur, illæ aut imagines sunt ingenio & artificio hominum inuentæ, & pro eorum arbitrio adhibentur, non igitur per illas; virtus cœlestis modificari aut determinari potest. Postea, lignum quocunque modo figuretur, nō potest in se recipere immediate formam equi vel leonis: nec vitrum aut aurum formam plantæ; multò igitur minus huiusmodi materiæ, propterea quod ab ipsis Astronomis variè figurentur, idoneæ, habilesque reddentur ad certas quasdam virtutes syderum recipiendas, & ad aliquos mirabiles effectus producendos. Adhæc, quæ est naturalis conuenientia illarum Astronomicarum imaginum cum cœlo?

neque

neque enim est vel secundum figuram, vel secundum naturam, vel motum vel qualitates, quomodo igitur res naturales sine ipsis figuris non sunt idoneæ ad diuinos illos syderum influxus accipiendos, signatæ autem & adornatæ istis imaginibus, statim fiunt idoneæ? His accedit, quod insignia visu effectūque sydera, si Mathematicis demonstrationibus credimus, ampliora sunt quam vniuersa terra, quomodo igitur influxus illorum ad vnā imagunculam astronomicam restringitur, ut non etiam per alias res quamplurimas tali figura carentes diffundatur? Nullus igitur nouus effectus ab huiusmodi Magia Astronomica proficiscitur, & si quis fortè cernitur aliquando, is non earum imaginum aut syderum potentia, sed occulta dæmonū operæ, quod eiusmodi fraudibus mortales circumueniant, proficiscitur.

## CAPVT X.

*De Magia Cabalistica.*

E. D. venio ad Cabalisticam, quam Philosophi quidam ludæorum, & de nostris nonnulli vanitatis magis quā veritatis studiosi, & res curiosas atque inauditas quā veras & solidas discendi audiores, affirmāt scientiam esse Mosi primū à Deo in monte Syna traditam, deinde non quidem literarum monumētis, sed ore tenus à prioribus, per quādam veluti manuum traditionem & receptionem, posteris traditam, adhuc fuisse conserua

conseruatam, ideoque dictam esse cabala, quod verbum Hebraicè idem sonat quod Latine recipio, nimirum eam doctrinam posteriores à prioribus ore tenus auditione accipiebant, & animo memoriaque custodiebant; qua etiam ratione ferunt veteres, disciplinam Pythagoricam multis sæculis esse conseruatam. Complectitur autem hæc Magia Cabalistica vniuersam Philosophiã, diuinam & humanam, necnon & naturalem: omniumque rerum doctrinam mysticè ac symbolycè continet, non eam, more aliarum humanarum disciplinarum, rationibus & argumentis disputationibusque tractans, sed numeris, figuris, ac Symbolis: itaque in ea singulæ, literæ, figuræ, nomina, elementa, apices, lineæ, puncta, accentus, spiritus, & si quid aliud est minutius, profundissimam quandam & abditissimam ingenium rerum significatricem doctrinam habent.

Hanc Magiam qui benè teneat, cum nihil non pollere aiunt, omnia scire & præscire, naturæ imperare, cunctasque res ei obedire, hac Mosen *Exod. 4.* prodigia illa fecisse in Ægypto, & in deserto, hac *& seq.* Iosue, Eliam, Elizeum, Isaiam, Daniele, Samuelem *Gen. 2.* tot tantaque fecisse miracula. Dicunt enim, nomina quæ Deus per Adamum cunctis rebus secundum suas cuiusque rei proprietates imposuit fuisse Hebraica, quibus rerum omnium substantiæ, qualitates & proprietates exprimantur: quocirca his nominibus naturales res appellanti, cōfestim res omnes se illi subiiciunt, & eius obsequio se totas addicunt. Huius amentitiæ expers nō fuit Vviclef, qui vt memorat Thomas Vvaldensis in opere suo de Sacramentalibus, dixit, in statu in no

tu innocentiae Adam imposuisse nomina animalibus secundum naturales eorum proprietates, quibus nominibus appellata ab homine, statim ei obediissent, eiusque omnia iussa fecissent: & huius rei reliquias remanere in exorcistis, & incantatoribus, & ad id magnam vim habere voces Hebraicas. Cuius sententiae doctam copiosamque refutationem lege apud ipsum Vvaldensem.

VERVM adeò est inerudita, insulsa, & ridicula hæc Cabalistarum opinio, ut nihil æquè mirum sit quàm vlli hominum sanæ mentis aliquando eam probari, & persuaderi potuisse, sed ita est profectò, sunt ingeniorum similiter ut hominum monstra quaedam, & portenta è quibus eiusmodi opinionum commenta & deliramenta profiscuntur. Principiò, nonne incredibile est, Solem & Lunam, & cætera astra, elementa item & stirpes cum ratione careant, diuinam illam vim quæ latet in vocibus Hebraicis sentire, eaque sic affici & permoueri; ut homini pro eius arbitrio pareant? Sed esto, nouerint illam vim, vel omnes res naturales, vel certè animantes aut homines; num ideo eiusmodi nominum appellatione eas continuò moueri necesse est? Si quis mihi proponeret nomen, totam meam substantiam omnesque proprietates perfectissimè declarans, num eo nomine appellatus ab illo, cogèret eius imperio obsequi, & quæcunque ille vellet, faceret? Si reconditissimam illam vim & efficaciam vocum Hebraicarum quam iactant Cabalisticæ, paucissimi hominum intelligunt, nec nisi quia illa eadem ante sunt initiati, quomodo eam agnoscent & sentient bruta, cæteraque non ratione modo

*Refellitur Cabalistica ars.*

E sed

sed etiam sensu carentia? Cur tribuunt tantam vim vocibus & characteribus Hebrææ linguæ, quam omnium vetustissimam & primam fesiunt, cum certè cõstet alios esse characteres Hebræos qui nunc extant, quam qui olim fuerant ante captiuitatem Babylonicam? quod Beatus Hieronymus in Prologo Galeato affirmare scribit. Certum, inquit, est, Eisdram post captam Hierosolimam, & restorationem templi sub Zorobabele, alias literas sepeisse, quibus nunc utimur, cum ad illud vsque tempus iidem Samaritanorum & Hebræorum characteres fuerint. Nec verum est, in lingua Hebræa reperiri voces quæ omnium rerum naturas, infimasque differentias & proprietates exprimant, nec in declarandis rebus vberior est aut significatio Hebræa lingua quam Græca vel Latina: nec vllum est nomen in vlla lingua, quod simul alicuius rei & substantiam & differentias atque proprietates tam genericas quam specificas atque individuales aperiat: nec in vocibus Hebræis per se sumptis, plura maioraue latent mysteria, quam vel in Græcis vel in Latinis. Legimus in scriptura, quomodo Moyses & Aarõ per virgam eis à Deo traditam plurima maximaque fecerint prodigia. Legimus Iosue retinuisse cursum Solis & Lunæ, cum dixisset: Sol contra

*Iosua 10.* *Gabaon ne mouearis, & Luna contra vallem Aialon; Stetitq. Sol in medio Cæli & non festinauit occumbere spatio vnus dies. Nec fuit antea & postea tam longa dies, obediens Domino voci hominis & pugnante pro Israël. Narrantur etiam Samuelis, Eliæ, Elisæi & Daniëlis miracula, nec tamen vquam de istis Cabalisticis mysteriis vlla mentio*

aut

aut verbum fit, si tanta est Cabalistica Magia vis,  
& potestas, vt cælis impeter, Solem sistere aut re-  
trocedere cogat, maria diuidat, flumina siccet,  
totamque naturam commutet, & sibi ad nutum  
obedire faciat, cur isti sapientes Cabaliste; eius  
artis peritissimi, talia nunquam patrantur, vel  
etiam nunc patrare possant? Certè Philosophi  
Iudæorum qui sibi hanc sapientiam arrogant, si  
quid ea pollerent, ad excutiendum iugum dupissimæ  
seruitutis, quo miseri iam mille & quingenta  
annis oppressi tenentur, vix debuissent.

## CAPITULUM X I.

*De Necromantia.*

**D**E Necromantia nonnihil dicta-  
mus, vt qualis quantaque sit in-  
uis, vel potius, fraus, & fallacia,  
ostendamus. Necromantici pro-  
fiterentur se animas mortuorum evoca-  
re posse, ex iisque cognoscere multa, quæ sunt  
occultissima, vel etiam futura, animas autem  
mortuorum, præsertim eorum, qui flagitiose vi-  
xerunt, aut violenta morte de vita turbati  
sunt, Magis eas inuocantibus adesse, responde-  
re, multaque manifestare docet Porphyrius (1.)  
de Abstinencia animalium, nam cum de peccatis,  
& fallacibus demonibus dixisset, mox subdit hæc  
de animabus: Tales, inquit, sunt & animæ mor-  
tuorum, quæ vitiis oppleta à corpore migra-  
runt, conficiantur enim etiam tunc, & con-  
cupiscentiæ, perturbationibus, & in naturam

*Porphy-  
rius de  
evoca-  
tione ani-  
marum  
ex inse-  
ris.*

conuerſe Dæmonum, ſimiles illorum redduntur, noxiæ ac turbulentæ, in varias ſe vertunt formas, ac modo conſpicuas ſe oculis præbent, modo recondunt, & ita eludunt aciem tum intuentium, tum etiam cogitantium. Et quodam alio loco: Præua, inquit, anima quæ corpus ſuum violenter reliquit, expoliata ad hoc ipſum deinde ſe admonet, ibique moras trahit. Vnde nonnunquam viſæ ſunt animæ lamentari: nam animæ carentium ſepultura, circa corpora immorantur, quibus malefici ſæpius abutuntur ad miniſterium ſuum explendum, compellentes animas à poſitione corporis vel partis cuiuſdam aſſumptione. Quocirca qui vaticinantium animalium inſinuari ſibi animas oprant, præcipua illorum membra deglutientes, veluti ceruorum vel talparum, vel aliorum accipiunt, & ita præſentem ſibi faciunt animam, Dei ritu vaticinantem: talis enim anima vna cum ſui corporis integra ſumptione, in corpus humanum ſe penitus ingerit. Hæc Porphyrius.

*An fuerit verus Samuel qui per Pythoniſſam repreſentatus eſt Sauli.* M A G N A M ſanè huic arti fidem facere videtur, quod legitur primi libri Regum, capite vigefimo octauo, Pythoniſſam rogatu regis Saulis, excitaffe à mortuis animam Samuelis, ſecique, vt Sauli de euentu impendentis belli conſulenti, quæ mox ei euentura erant prænunciaret. Et quidem Beatus Auguſtinus libro 2. ad quæſtiones Simpliciani, reſpondens ad tertiam quæſtionem, & in libro de octo Dulcirii. quæſtionibus, quæſtione ſexta diſputat in vtramque partem, an fuerit ille verus Samuel, an potius Dæmon ſpecie, & figura Samuelis, propenſior tamen

tamen est ad credendum, illum non fuisse verum Samuelem, sed eius imaginem, & simulachrum, arte diabolica formatum, & aspectui Saulis præsentatum: appellari autem in Scriptura Samuelem, quod illum habitu, specie, & auctoritate repræsentaret. Non enim rarò, tum in communi hominum loquendi consuetudine, tum in Sacris literis rerum imagines, & simulachra, nominibus ipsarum rerum appellantur. Hoc idem citra dubitationem vllam traditur in libro secundo de Mirabilibus Sacræ Scripturæ, capite secundo, & in libro Quæstionum veteris, & noui Testamenti qu. 27. qui libri, nomine Beati Augustini in eius operibus numerantur. Tertullianus in libro de Anima, non solum hoc probat, sed contrariam sententiam omninò improbat: nam loquens de Samuele, hæc scribit: Ecce hodie eiusdem Simonis hæreticos tanta præsumptio artis Magicæ extollit, vt etiam Prophetarum animas ab inferis mouere se spondeant: & credo, quia mendacto possunt: nec enim Pythonicò tunc spiritui minus licuit animam Samuelis effingere post Deum mortuos consulente Saule. Absit autem vt animam cuiusquam Sancti, nedum Prophetæ à Dæmonio credamus extractam, certi quod ipse Sathanas trāsfiguretur in Angelum lucis; nedum in hominem lucis, etiam Deū se asseueraturus, signaque portentosiora editurus, ad euertēdos, si fieri possit, electos. Hæc Tertullianus. Quibus verbis aliisq; proximè consequentibus, apertè docet, nō fuisse illum verum Samuelem. S. Thomas prima parte quæst. 89. art. 8. & secunda secundæ, quæst.

2. Cor. 11



95. art. 5. ad 2. & quæst. 174. art. 5. ad 4. dubitanter de hoc loquitur, secutus nimirum Augustinum: idemque fit in Decretis 25. Quæstione 5. cap. Nec mirum. Sed ut Lyrano & Tostato, & ni fallor etiam, B. Augustino, lib. De cura pro mortuis agenda, capite 15. Sic etiam mihi probabilius est, imò certum est, fuisse veram animam Samuelis quæ Sauli apparuit, exercente quidem Pythoniſſa artem suam magicam, sed non eius artis vi & potentia, sed Dei imperio ab inferis excitatam, quæ dispensatione diuina Pythoniſſam & Sapientem latente, ostendit se aspectibus iniqui regis diuinam eum sententia percussuram, ut impius rex, quæ post mortem supplicia sue impietati debita passurus erat, iam tum acerbissimo doloris sensu prægustaret. Nec ad hoc probandum, aut persuadendum opus est testimoniis, vel argumentis, cum id in sacra Scriptura perspicue traditum sit. Nam in libro Ecclesiastici cap. 46. sic est: *Et post hoc dormiuit Samuel, & notum fecit regi, & ostendit illi finem vite sue, & exaltauit vocem illius de terra in prophetia, delere impietatem gentis.* Et sanè Beatus Augustinus libro illo De Cura pro mortuis agenda, & S. Thomas secunda secunda, non obscure significant, si liber Ecclesiastici tanquam sacer & canonicus recipiatur, necessariò sentiendum esse, verum Samuelem apparuisse Sauli. Loquuntur autem illi conditionaliter de auctoritate libri Ecclesiastici, non quod non eum pro sacro & canonico haberent: sed quia nec Hebræi eum recipiunt & reponunt inter libros Canonicos, & quidam Catholicorum olim, de eius auctori-

toritate dubitarunt. Quare nobis vt de eius libri fide & auctoritate, sic nec de verò Samuele Sauli post mortem prophetatè, dubitare licet. Nec obstat huic sententiæ, quòd ille Samuel dixisse legitur Sauli. *Cras tu, & filij tui mecum eritis*, cùm certum sit diuerfas esse sedes post mortem, bonorū, & impiorum; & in Euangelio legatur Abraham dixisse illi epuloni, inter se, & ipsum, maximum & intransibile chaos intercedere: hoc, inquam, non obstat. Nam illa verba Samuelis, vt bene interpretatur S. Augustinus respondens ad tertiam quæstionem Simpliciani, non ad aequalitatem felicitatis, sed ad similem conditionem mortis referri debent: vt sit sensus, Cras & non amplius eris inter viuos, sed inter mortuos, inter quos ego sum, quin etiam & tunc, & vsque ad Christi Domini resurrectionem, omnes tam boni quam mali, apud inferos, licet sedibus disclusi, detinebuntur.

Luc. 16.

SE D redeo ad Necromatiam, quæ olim multis locis & apud multas gentes celebratissima fuit. Osthanes apud Plinium lib 30. cap. 2. huius artis nobilissimus professor, promittebat quorumlibet mortuorum excitaciones & colloquia cum viuis; & sanè maioris est admirationis, quòd extremo illo capite subdit Plinius: Adulescentibus nobis, inquit, visus Appion Grammaticæ artis, prodidit Cynosephaliam herbam, quæ in Ægypto vocaretur Osyrites; diuinant non in viuos modo, sed etiam in mortuos habere potentiam, eaque, se euocasse vmbrias ad percunctandum Homerum qua patria quibusque parentibus genitus esset. Cicus Asculanus in commentariis

*Antiquum Necromantia vsus.*

quos in Sphērā edidit, nominat librum qui olim extabat, & inscribatur *SCRIPTURA CAM*, opus magicæ ac maleficæ impietatis plenum, cōtinens elemēta & praxim Necromantiæ. Tertulianus lib. De Anima, vbi de inforis, & defunctorum euocatione dillerit. Publica, inquit, iam licetatura est, quæ animas etiam iusta ætate sopitas, etiam proba morte disiunctas, & prompta huatione dispunctas, euocaturam se ab inferorum incolatu pollicetur. Fuerunt quondam multa apud varias gentes loca, Necromantiæ vsu nobilitata, vbi & à defunctis oracula & responsa petebantur. Homerus lib. 11. Odyssææ Cymmericum oraculum ad Auernum Campaniæ lacum celebrat, quo Vlysses concessit, vt Thyresiam de reliquo itinere suo consuleret, cuius etiam meminit Strabo lib. quinto Geographiæ. Thesprotium in Epiro Orpheus celebre fecit, in eo Manes cantu permulcendo, & Euridicæ coniugi ad superos reditum impetrasse creditum fuit. Vnde Virgilius libro sexto *Æneidos*.

*Si potuit Manes accersere coniugis Orpheus,*

*Treijcia fretus cythara fidibusque canoris.*

Apud Lucanū Erithone venefica Thessalā mortuum euocat, qui Sex. Pompeio exitum Pharsalicæ pugnæ denunciet. Phygaria Arcadiæ ciuitas, habuit huiusmodi Necromantas à quibus occulta & futura sciscitari vsitatum fuit. B. Aug. lib. 9. de ciuitate Dei, c. 11. citat Apuleium affirmantem animas hominum dæmones esse, & ex hominib. fieri Lares, si meriti boni sunt, Lemures autem aut laruas, si mali, qui nullis bonis sedibus in terra vagatione puniuntur, inane terri-  
culamen

culamentum bonis hominibus, cæterum noxiū malis. Cū verò incertum est quæ cuique sortitio obuenerit, utrū lar sit an larua, Manes Deos nominant, & fanis atque cæremoniis vulgò admittuntur, ut oracula reddant, ut in Bæotia Amphiarus in Africa Mopsus, in Ægypto Osiris, alius alibi gentium, Æsculapius vbique. Hæc ex Apuleio: quem ibi Aug. verè grauiterque refellit. Et apud Tertullianum in li. De Anima sic habet. Nosomanas propria oracula, apud parentum sepulchra mansitando captare, Eraclides scribit, Celtas apud virorum fortium busta, eadem de causa obnoctare, Nicander affirmat.

VERVM has omnes mortuorum, quæ arte *Confuta*  
Necromantica fiunt, apparitiones, vanas & fallaces esse non est dubitandum: plerāsque enim ab *tur Ne-*  
ipsis Necromantis aliisve fictas esse compertum *croman-*  
est. Si quæ autem reuera contigerunt, in his existi- *tia.*  
mandum est, non animas defunctorum apparuisse viuis, sed ipsos Dæmones tales se ostendisse Necromantis, vel eos consulentibus, tales inquā, habitu, specie, ætate, voce, & affectu, quales fuerant olim mortui, cū inter viuos versarentur. Hanc ego opinionem ut proculdubio veram putem, rationibus testimoniisque & experimentis adducor. Ratio nec obscura nec sanè infirma sit ea, qua Sanctus Thomas prima parte quæst. 117. art. 4. hoc ipsum confirmat. Non potest, inquit, anima separata, naturali virtute sua, mouere ali-  
*Argu-*  
quod corpus: cū enim sit naturalis forma hu- *mentatio*  
mani corporis, non habet vim mouendi secun- *B. Tho-*  
dum locum, nisi corpus quod informat & viuifi- *ma con-*  
cat: nam etiam cū est vnita corpori, si sit ali- *tra Ne-*  
*croman-*  
*tiam.*

E s quod

quod membrum mortificatum, non obedit animæ ad motum localem. Quare animæ defunctorum, nec assumere corpora, nec cum illis ad viuos venire possunt. Deinde, Necromantæ non habēt vim & imperium in animas defunctorum quæ sunt in cælo, nec quæ sunt in Purgatorio; non enim conuenit aut decet animas Sanctorum, impiis Necromantarum artibus subiacere: neque in animas quæ sunt in inferno; nam cū illuc sint à Deo, tanquam in carcerem detrusæ, vt æternas scelerum suorum pœnas luant, nulla inde vi possunt efferri, nec nisi Dei mandato egredi: non est autem credibile, Deum id concessurum Necromantis, per quos Damon satagit mortales decipere, & à veri Dei cultu auertere: sic enim Deus artem Necromanticam & per se infamē, & toties à se in sacris literis reprobata, extremoquē mortis supplicio condemnata, non solum honoraret, sed etiam fide cultūque apud mortales dignam redderet. Profectò, si cui mortuorum reditus ad viuos concedendus fuit, videbatur concedendus diuini illi, cuius mentio fit apud Lucam c. 16. qui obnixè rogabat Abraham, vt de iis qui simul erant in inferno, aliquem mitteret ad amicos cognatosque suos monendos, vt benè viuendo, diras, & perpetuas Inferni pœnas euaderent, nec tamen ei concessum est. Non inficior, animas quæ sunt in Purgatorio, nonnunquam apparuisse viuīs: id enim Beatus Gregorius in quarto libro Dialogorum nonnullis, & quidem certis probat exemplis. Nec equidem nego, etiam animas Beatas vel Martyrum, vel aliorum Sanctorum, descendere in tetras hominibus eorum auxilium

xilium implorantibus, opem, & solatium laturas: id enim confirmat B. Augustinus in lib. De cura pro mortuis agenda, cap. 16. exemplo B. Felcis Nolę Episcopi, quem ciuibus suis Nolanis, cum à barbaris oppugnaretur, apparuisse & subuenisse affirmat Augustinus, se non incertis rumoribus, sed certis testibus audiuisse: Hęc, inquam, non negō; sed aio animas mortuorum, cū apparent viuere, non id facere sua voluntate & arbitratu, nec naturali potestate, multoque minus vi & potentia artis Necromantie, sed id fieri singulari quodam Dei consilio, voluntate ac potestate. Nec animas defunctorum interesse rebus viuorum, minus est miraculum secundum B. Augustinum loco supra citato, & secundum B. Thomam prima parte, quest. 89. art. 8. ad 2. quam vel illuminatio cęci, vel alia quę in magnis Dei miraculis numerantur. Adscribam hęc in hanc sententiam B. Augustini verba ex eo loco quem proximè indicauī: Verū ista, inquit, diuinitus exhibentur, longè aliter quàm sese habet vsitatus ordo, singulis creaturarum generibus attributus. Non enim ideo putandum est viuorum rebus quolibet interesse posse defunctos, quoniam quibusdam sanandis vel adiuuandis Martyres adsunt: sed ideo potius intelligendum est per diuinam potentiam Martyres viuorum rebus interesse, quoniam defuncti per naturam propriam, viuorū rebus interesse non possunt. Hęc Augustinus.

*Augusti  
ni obser-  
uanda sen-  
tentia.*

SE D audiamus Tertullianum, qui in libro De Anima, vbi de inferis & animarum euocatione agit, hanc nostram sententiam grauissimis disertissimisque verbis comprobauit: Necromantia,

*Notabi-  
lis Ter-  
tulliani  
sententia.*

inquit,

inquit, secunda est idololatria, in qua se Dæmones perinde mortuos fingunt, quemadmodum in illa Deos. Quidni? cum & dii mortui sint? itaque inuocantur quidem defuncti, sed Dæmones operantur sub eorum obtentu. Hanc autem fallaciam Diaboli sub personis defunctorum delitescentes (ni fallor) etiam rebus probamus, cum in exorcissimis nostris, interdum Dæmon aliquem se ex hominibus affirmat, interdum gladiatorum vel bestiarum, sicut & alibi Deum nihil magis curans quàm hoc ipsum excludere quod prædicamus, ne credamus animas vniuersas malorum ad inferos redigi; vt & iudicij & resurrectionis fidem turbent. Et tamen ille Dæmon postquam circumstantes circumuenire tentauit, instantia diuinæ gratiæ victus, id quod in verò est, inuitus confitetur: Sic etiam in Necromancia quæ iam quiescentes animas euellere ab inferis creditur, & conspectui exhibere, non alia fallaciæ vis est, operatior planè, quia & phantasma præstatur, & corpus effingitur, nec magnum illi exteriores oculos circumuenire, cui interiorem mentis acie

*Luc. 16.* excæcare, perfacile est: Nulli autem animæ omnino inferos patere, satis Dominus in argumento illo pauperis requiscentis & diuitis ingemiscentis, ex persona Abrahæ sanxit, non posse telegari renunciatorem dispositionis infernæ, quod vel tunc licere potuisset & Moyfi, & Prophetis crederetur. Sed etsi quasdam reuocauit Dei virtus in documentum iuris sui, non idcirco communicabitur fidei & audaciæ Magorum & fallaciæ somniorum & licentiæ poëtarum: nam in hac mortuorum resurrectione qua Dei virtus in corpora animas

animas representat, solida & conrectabili & satiata veritate præiudicatum est hanc esse formam veritatis, vt omnem mortuorum exhibitionem incorporalem, præstigias iudices. Hæc Tertullianus. Simulant igitur Dæmones, animas defunctorum secundum Augustinum & Chrysostomum, quorum testimonia loco supra dicto memorat S. Thomas, quò facilius errores Gentilium animis hominum inferat ad eos decipiendos. Primum enim sic Dæmon facilius homini quicquid vult persuadet: namque homines animabus defunctorum, vel parentum, vel cognatorum, vel amicorum suorum quos diligunt, & à quibus se diligere non dubitant, libentius, & promptius credunt, quàm Dæmoni quem naturaliter horrent. Deinde, ita persuadet hominibus, infernum non esse carcerem perpetuum, ex quo non liceat aliquando egredi: nec esse adeo graues, & perpetuas inferni pænas, sicut homines putant. Adhuc sic facit, vt homines putent, animas etiam post mortem habere corpora, vel posse quælibet se in corpora induere, vel in quælibet hominum aut bestiarum corpora migrare: qua re concipitur error Pythagoricus de transmigratione animarum, eoque concepto labascit fides, & spes Christianæ resurrectionis. Præterea, hac ratione faciunt Dæmones, vt viui mortuos vel tanquam terrificos, & noxios sibi metuant, & variis superstitionibus placare sibi que conciliare studeant, vel tanquam beneficos sibi que vel amicitia vel necessitudine deuinctos, nimium superstitiosè diligant, & colant, vel tanquam animas hominum quorundam apud mortales, aut sapientia, aut fortitudine, aut

*Cur Dæmones simulant animas defunctorum.*

potentia



potentia clarissimorum, non humanis modo, sed diuinis etiam honoribus prosequantur atque venerentur.

*Varia species Magia secundum Hugonem* H v g o Sancti Victoris lib. 6. Eruditionis Didascalice, c. 5. numerosius, & enucleatius eam de qua disputauimus, Magia varietatem enarras, ad hunc modum scribit: Magica repertor primus creditur Zoroastes res Bactrianorum; quem nonnulli asserunt ipsum esse Cham filium Noë, sed nomine mutato, hunc postea Ninus rex Assyriorum bello victum interfecit, eiusque codices artibus maleficiorum plenos igne cremari fecit. Scribit autem Aristoteles de hoc ipso, quod usque ad bis, & vices centum millia versuum eius de arte magica ab ipso dictata, libri eius usque ad posteritatis memoriam traduxerunt. Hanc artem postea Democritus amplauit tempore quo Hippocrates in arte Medicinæ insignis habebatur. Magia, in Philosophia non recipitur, sed est extrinsecus falsa professione, omnis iniquitatis, & malitiæ magistra, de verò mentiens: & veraciter lædens animos, seducit à religione diuina, culturam Demonum suadet, morum corruptionem ingerit, & ad omne scelus ac nefas mentes sequacium impellit. Hæc generaliter accepta, quinque complectitur genera maleficiorum: Manticem, quod sonat diuinationem, & Mathematicam vanam, Sortilegia, Maleficia, Præstigia. Mantice autem quinque continet species sub se: Primam, Necromantiam, quod interpretatur Diuinitas in mortuis, *νεκρὸς* enim Græcè, id est, mortuus Latine, & *νεκρὸν* cadauer dicitur, vnde est diuinitas qua fit per sacrificium sanguinis humani, quem

Damo

Dæmones sitiunt, & in eo delectantur effuso. Secunda, est Geomantia, id est, Diuinitio in terra: Tertia, Hydromantia, id est, Diuinitio in aqua: Quarta, est Aerimantia, id est, Diuinitio in aëre. Quinta, est Diuinitio in igne, quæ dicitur Pyromantia. Varro enim quatuor dixit esse, in quibus diuinitio cōstaret; terram, aquam, aërem, ignem. Prima ergo, id est, Necromantia, ad infernum videtur pertinere, secunda ad terram; tertia ad aquam, quarta ad aërem, quinta ad ignem, Mathematica diuiditur in tres species, in Aruspicinam, in Augurium, in Horoscopicam, Haruspices sunt dicti quasi horuspices, id est, horarum inspectores, qui obseruant tempora in rebus agendis, vel haruspices quasi haras inspicientes, qui in extis & fibris sacrificiorum futura considerant: Augurium vel auspicium aliquando ad oculum pertinet: & dicitur auspicium, quasi auispicium, quia in motu & volatu auium attenditur: aliquando ad aures pertinet, & tunc dicitur augurium, quasi garritus aurium, quia aure percipitur. Horoscopia, quæ etiam Constellatio dicitur, est, quando in stellis facta hominum quæruntur, sicut Genethliaci faciunt, qui natiuitates obseruant, qui olim specialiter Magi nuncupabantur, de quibus in Euangelio legimus. Sortilegi sunt, qui sortibus diuinationes quæruntur. Malefici sunt, qui per incantationes Dæmoniacas siue ligaturas, vel alia execrabilia remediorum genera, cooperatione Dæmonum atque instructu nefanda perficiunt. Præstigia sunt, quando per phantasticas illusiones circa rerum immutationem sensibus humanis arte dæmoniacæ illuditur. Sunt ergo omnes simul vñdecim. Sub

Manti

Mantice, quinque, id est, Necromantia, Geomantia, Hydromantia, Aërimantia, Pyromantia. Sub Mathematica, tres, Haruspicina, Auspicium, Horoscopia. Postea tres aliae, id est, Sortilegium, Maleficium, Præstigium, Præstigia dicitur Mercurius primus inuenisse: Auguria Phryges inuenerunt: Haruspicinam & Sortilegia Tages primus Etruscus tradidit: Hydromantia primum à Persis venit. Hactenus Hugo.

## CAPVT XII.

*An per artem Magicam verum aurum fieri possit ab Alchymistis.*



*Scaliger  
contra  
Carda-  
nū exer-  
cit.*

327.

*Smerdes  
Magus  
inuasit  
regnum*

I verum & perfectum aurum ab Alchymistis potest effici, haud dubie chymica facultas vna de præcipuis Magiæ partibus censenda est; nimirum tale opus Magiæ, tum propter vim & potentiam artis maxime admirandum esset: tum propter magnitudinem vtilitatis; optatissimum atque gratissimum mortalibus accideret. Audiat lector quid eruditus vir Iulius Scaliger ea de re scriptum reliquerit. Triplex est, inquit, Magia; vna hæc infima & nostras, sanè & fœda & sordida cum cantiunculis, cadaueribus, & funibus suspendiosorum: quæ si quis attrectare audeat, etiã mereatur. Altera ex astris deducit vires in specula, sigilla, annulos, tabellas: Tertia diuina est. Nomen apud vulgus odiosum fecit colluicis impostorum. At Magus apud Persas, nihil aliud quàm sapien-

sapientem sonat: sed propter Smerdis proditionem & perfidiam, nomen Magorum infensum Herododiu fuit. Hac Magia Dominum Iesum fuisse promissum regem, cognouerunt Magi, qui ad eum adorandum longinquis è regionibus profecti sunt: E Syrorum libris hæc descripsimus. Aiunt Magiæ & transmutatorię artis vires, vias, & fines esse perquam similes. Opus & finem Chimistarũ, esse corpus in corpus: Opus & finem Magię, esse spiritum in corpore. Magi suas affectiones, violentias appellant, propterea quod vires suas, suprà eas quæ naturæ ordine fieri videntur, exercent. Chimistæ suum opus nominant fortitudinem: hoc enim significat decantatum illud, Elixir, in cuius fide omnem opignorât naturam. Sic eo loco Scaliger. Ergò digna cum primis inquisitione ac disputatione res est, vtrum nõ modo ex solis causis naturalibus, & in solis naturalibus locis, atque ordine tantum modoque naturali aurum generari queat, verum etiã per artificialem viam ac rationem, quam iactant Chimistæ, perfectum vsquequaq; aurum, & tale omnino, quale est naturale, possit effici.

DVPLEX circa hanc quæstionem Philosophorum est sententia: multi negant, quidam verò aiunt. Nos primo loco aliorum sententias enarrabimus, ac perpendemus: extremo autem loco etiam quid sentiamus ipsi, & similis vera iudicemus, brevissimè indicabimus.

F Exponi

*Exponitur sententia eorum qui negant verum  
aurum posse fieri ab Alchymistis.*

*Auicenna.*

**A**VICENNA in quibusdam suis cōmentariis in libros Meteororum, vt refert Ægidius in 3. Quodlibeto, quæst. 8. de Alchymistico auro ita scripsit: sciant artifices Alchimiæ, species metallorum mutari non posse, quauis similia illis fieri possint, & quauis Alchimiæ queant tingere ipsum æs colore quo volunt, donec sit multum simile auro, & abstergere immundicias plumbi, ita vt videatur argentum, semper tamen secundum substantiam manebunt æs & plumbum.

*Auerroes.*

**A**VERROES in Paraphrasi super primum librum de Generatione animalium, explanando primum caput, in eandem sententiam hæc scribit: Similiter etiam si datur aliquid artificiale valdè simile naturali, tanta poterit esse similitudo, quod existimabitur esse idem specie, & si ars Alchimiæ habet esse, hoc est, quod potest fieri in ea. Et ibidem Auer. declarat sicut se habent mures ex putri materia ad mures ex semine, inter eos enim est tanta similitudo, vt quauis reuera inuicem differant specie, tamen vulgò putentur esse eiusdem speciei, ita etiam aurum alchymisticum se habere ad verum & naturale aurum. Idem sensit Auicenna, cuius verba paulò infra memorabuntur initio capitis proximè sequentis.

*B.Tho.*

**S.** THOMAS in secunda secundæ conditionaliter loquens de auro alchymico quæst. 77.

art. 2.

art. 2. ad primum ait : Si aurum quod fit ab alchimistis , non sit verum & tale quale fit à natura , eius venditionem pro vero fraudulentam & iniustam esse , sin autem fiat verum aurum ab Alchimistis , id licitè pro vero auro vendi posse , nihil enim prohibere , artem vtendo causis naturalibus , naturales & veros effectus producere. Sed quid ipse simpliciter & absolutè sentiret de auro alchimico , satis perspicuè declarauit in 2. sent. dist. 7. quæst. 3. artic. 1. ad quintum , ita scribens : Potest quidem ars per virtutes naturalium agentium aliquas formas substantiales inducere in materiam : sunt tamen quædam formæ quas nullo modo ars potest efficere , quod propria actiua & passiuæ earum non potest inuenire atque adhibere , sed benè aliquid simile illis efficere , sicut Alchimistæ faciunt aliquid simile auro quantum ad accidentia exteriora , sed tamen non faciunt verum aurum , quod forma substantialis auri nō est per calorem ignis quo vtuntur Alchimistæ , sed per calorem Solis in loco determinato , vbi viget virtus mineralis , & idè tale aurum non habet operationem consequentem speciem , & similiter in aliis , quæ eorum operatione fiunt.

ÆGIDIVS in tertio Quodlibeto quæstion. 8. affirmat Alchimistas posse quidem facere metallum aliquod quod tantum constet ex permixtione aliorum simplicium metallorum , cuiusmodi est electrum , quod dicitur constare ex tribus partibus auri & vna argenti , & quia sæpè in venis metallicis vnum metallum confunditur & permiscetur cum alio , Alchimista per actionem

ignis segregando & separando aurum , quod erat permixtum cum alio metallo , videbitur de nouo facere aurum , tantum autem abest , vt possit verum aurum facere , vt ne simile quidem verò auro ita effici queat , vt non possit aliquo modo dignosci & discerni. Porro existimat Ægidius aurum alchymisticum non posse sine peccato vendi pro auro naturali ; non solum quia incertum pro certo, & falsum pro verò venditur , sed etiam quia in medicinis adhibetur aurum ad confortandum cor , & morbos quosdam profligandos ; maximum autem periculum esset, ne aurum Alchymisticum propter diuersam rationem constitutionis, nimium læderet complexionem humani corporis, eique insigne aliquod detrimentum afferret. Quod autem verum au-

*Ægidius negat aurum chymicum licite vendi posse pro vero.* rum confici nequeat Ægidius ita probat , vel potius declarat. Cernimus in vnoquoque genere entium , quædam illius generis esse perfecta, alia verò imperfecta , perfectorum autem generationem esse determinatam , tam secundum principium actuum , & secundum materiam , quam secundum locum in quo fit : Imperfectorum autem minime ; Exempli causa , in genere animalium , quæ sunt perfectiora , ita se habent natura , vt. equus non generetur nisi ab equo , & ex sanguine menstruo equæ , & intra matricem , at mures possunt generari ex semine , & sine semine , intra matricem , & extra. Idem perspicitur in plantis , idemque similiter contingit in elementis : nam purus ignis elementalis , nec generari , nec conseruari potest , nisi in suo loco naturali , id est , in concauo Lunæ : ergo simili-

ter etiam eueniet in metallis, quare cùm aurum sit perfectissimum omnium metallorum, habebit determinatum agens, & materiam, & locum naturalem, & propriam venam quæ latet intra sinum, & ventrem terræ, extra quem locum, aurum nullo modo confici possit. Neque valet illud, quod posset afferri contra hoc quod diximus, nimirum si mures, qui sunt perfectiores auro, possunt generari extra matricem, multò magis aurum effici poterit extra suum locum naturalem, & si serpentes fuerunt arte magica producti à Magis Pharaonis, vt legimus in Exodo, cur nam etiam poterit effici verum aurum *Ehod. 7.* industria, & beneficio artis? Hoc inquam non valet: nam eadem ratione probari posset, cùm mus sit perfectior quahbet planta, & mus generari queat sine semine, quamlibet etiam plantam posse absque semine procreari, quod falsum est: nihil ergo prohibet quod est imperfectius alio simpliciter, esse perfectius illo secundum quid. Quamobrem quod aurum requirat determinatum locum suæ generationis, non arguit ipsum simpliciter esse perfectius aliquo animali, sed tantum secundum quid. Hæc ex Ægydio.

CONCILIATOR in differentia 209. sic ait: Metallum non potest fieri per artem, & in aliud transmutari; cùm ars solum faciat permutationem in accidentibus, non autem in substantia, vel fortasse si possibile est, tamen id est homini ignotum, vnde Commentator tertio De anima, ait; Dicitur de multis artificiis, quod videntur esse possibilia, sed sunt causarum ignotarum, vt verbi gratia, Alchimia, et huiusmodi ars constitueret,



fortassè hoc erit per accidens, & inspiratione diuina, potius quàm artis humanæ sapientia. Non enim ( inquit Conciliator ) ars eò peruenire potest, vt agentia, & materiam, cum tempore, modo, & aliis circumstantiis sciat ita proportionare, vt inde nouum constituatur metallum. Quod si apparenter videatur, id erit, quia ars fallaciam eius humano ingenio nequit detegere. Vnde aurum arte constructum, vim non puto habere confortandi cor, sicut habet aurum à natura productum. Fideles mihi tamen experti, dicunt argentum decoctione per artem fieri verum, non tamen videtur apparenter lucrari, probationibus omnibus quibus vtuntur, exploratum.

Q V I D A M rerum metallicatum peritissimi, de quibus etiam subtiliter & accurate scripserunt, dixerunt, primum atque summum fundamentum, quo nritur ac sustentatur ars Alchimix, nullum esse: ex quo licet intelligere, ipsam artem ( si tamen ars dicenda est, quæ in se nihil veri & certi habet ) inanem & fallacem esse. Et enim Alchimistæ putant materiam omnium metallorum esse sulphur, & argentum viuum, quam obrem profitentur se ex varia sulphuris & argenti viui inuicem permixtorum temperatione,

*Nō esse materiam omnium metallorum sulphur & argentum viuum.* posse quodlibet metallum efficere: in quo sanè vehementer falluntur. Nam, si sulphur & argentum viuum est materia auri & argenti, ergo in venis in quibus generatur aurum & argentum, apparerent aliqua vestigia sulphuris & argenti viui, similiter etiam in venis sulphuris & argenti viui, reperirentur aliqua indicia auri vel argenti, sed ipsi qui totam pœnæ vitam curiosissi

curiosissimè lustrandis, & considerandis venis, locisque metallorum consumpserunt, nunquam tale aliquid reperire potuerunt, quare falsa est opinio Alchymistarum, & aurum quod ab ipsis fit ex sulphure & argento viuo, non est verum aurum: non enim, vt dictum fuit, talis est materia veri & naturalis auri. Aurum autem quod fit ab Alchymistis, licet simillimum videatur vero auro, falsum tamen esse multis modis cognosci & iudicari potest, nempe vel ex pondere, vel ex eo, quia non sustinet vim ignis, vel ex eo, quia iniectum in vinum, amittit colorem suum, vel quia non est ductile in tenuissimas laminas, vel denique, quia non habet naturalis auri proprietates, quatum in primis illa commendatur, confortandi cor humanum. Hæc illi.

CARDANVS lib. 17. de subtilitate hæc Carda- scribit: sunt verò chimica inuenta, vitrum ducere nus. in longissimas lineas, tenax aut prædurum efficere posse. Inuenta Vidi ego dudum sphæram exiguum ex & opera vitro, quæ omni conatu illi sola lapideo, non artis chimica. comminuebatur, sed resiliebat ad trabes. Etusdè facultatis chimicæ est, vitrum albis lineis interstinguere, calare in eo imagines, falsas fabricare gemmas, purgare caphuram, metalla miscere, immutare, aut nobiliora imitari, Exempla verò fallacis Alchimicæ, vide apud eundem in 10. lib. De verierate rerum, cap. 51. Quo in loco etiam hæc subiungit: aurum & argentum facere, seu ex aliis metallis ea conficere, aut gemmas factitare, aut viles in nobiliores transmutare, nemo non optare debet, vt sciat, at quid horum fieri possit, difficile scitu admodum est, & si hoc etiam sciuerit-

mus, longè difficilior est scire, quomodo fiat. Quæ autem ab Alchymistis fiunt, ea vel ad voluptatem pertinent, vel ad vsum, ad voluptatem sunt gemmæ & metalla nobiliora, ad vsum tincturæ, colores, materiæ vasorum & alia similia. Circa quodlibet autem horum, tria excogitari possunt, vel ut fiat, quod maximum est, vel ut purgentur, vel ut perficiantur. Horum primum, de metallis, adhuc sub iudice lis est, an fieri possit, secundum & tertium, fermè inuentum est ad summam perfectionem, ac licet ars chimica non faciat verum aurum, quattuor tamen præstat magnas utilitates. Prima est, quia potest vnum metallum facere simillimum alij, vt ferrum, æri, & æs auro & argento, idque clariùs apparet in gemmis. Secunda, cum id quod in aliquo potentia continetur, per vium ignis excitat, extrahit, & ad perfectionem perducit. Tertia cum ea quæ superflua sunt, vt sua absumendo detegit, vt cum ex calce alumen excipitur, quod non genitum est vi ignis, sed exceptum, ita fit id quod vocant multiplicationem, cum ex terra ipsa quæ aliquid continet, quod continetur, excipiunt. Quarta, Ars chimica vi ignis multas facere potest compositiones atque separationes, non minus vtilis & lucrosa iis quæ ab Alchymistis tam anxie quærentur & ambitione promittuntur transmutationibus. Hæc Cardanus. Ex quibus verbis perspicitur eum arbitrari chemicam illam auri generationem, vel esse impossibilem, vel propemodum impossibilem.

*Utilitates artis  
chimica.*

*Declara*

*Declaratur opinio eorum qui defen-  
dunt Alchimiam.*

**A**LBERTVS, in libro suo 3. de Minerali-  
bus ca. 9. hanc de facultate Alchimix qua-  
stionem pertractans, primum exponit sententiam  
Auicennæ, quæ fuit hæc: sciant (inquit Auicenna)  
artifices alchimix species metallorum permutari  
non posse, quamuis aliquid illis simile fieri pos-  
sit, quod enim differentia specifica aliquo tolla-  
tur ingenio, non credo possibile, sed expoliatio  
accidentium non est impossibilis, vel saltem di-  
minutio eorum: non enim permutatur species  
metallorum, nisi prius in primam materiam me-  
tallicam reducantur, & sic iuuamine artis dedu-  
cantur in speciem metalli quod voluerit. Atque  
idem quoque sensisse, ait Hassem Philosophum  
præcipuum in Physicis & in Mathematicis, dein-  
de Albertus subiungit ea quæ sequuntur: Opor-  
tet nos dicere, Alchimicos peritos, nō aliter ope-  
rari quā peritos medicos, qui per medicinas  
purgatiuas purgant materias corruptas & nocen-  
tes sanitati, & postea per remedia confortantia  
naturam, iuuant virtutem naturalem, vt digerendo,  
sanitatem inducant: quæ sanitas est effectus &  
naturæ & artis, sed illius effectiue & principali-  
ter, huius autem organicè & instrumentaliter: sic  
Alchimistæ primò benè purgantes materiam ar-  
genti viui & sulphuris insitam omnibus metallis,  
confortant, deinde deducunt virtutes elementa-  
res, & cælestes tali materiæ inherentes ad pro-  
portionem mixtionis metalli quod intendunt in-

*Opinio  
Auicen-  
na.*

*Sentētia  
Alberti  
Magni.*

ducere, & tunc ipsa natura operatur, & non ars nisi organicè iuuando & expoliendo vt diximus, & sic verum aurum & argentum educere, & facere videntur: quod enim virtutes elementares, & cælestes faciunt in valis naturalibus, hoc etiam faciunt in valis artificialibus, si artificialia formantur ad modum vasorum naturalium: & quod facit natura calore Solis & Stellarum, hoc faciet ars calore ignis, dummodo sic contemperetur, vt non excedat virtutem se mouentem & informantem quæ est in metallis: huic enim cælestis inest virtus, quæ primò commiscuit eam, & hæc inclinatur ad hoc vel ad illud per artis iuuamen. Alchimia igitur per hunc modum procedit, id est, corrumpens vnum, à sua specie remouendo, & cum iuuamine eorum, quæ in materia insunt, alterius speciem inducendo, quare omnium operationum alchimicarum melior est illa quæ procedit ex eisdem, ex quibus procedit natura, sicut ex purgatione sulphuris, per decoctionem & sublimationem & expurgationem argenti vini, horumque bona permixtione cum materia metalli, in his enim & ex virtutibus horum, omnis metalli species inducitur. Qui autem per alba albificant, & per citrina citrinant, manente specie prioris metalli in materia, procūldubiò deceptores sunt, & verum aurum atque argentum non faciunt, & hoc modò ferè omnes vel in toto, vel in parte procedunt, propter quod ego experiri feci aurum alchimicum quod ad me delatū est, & postquam sex aut septem ignes sustinuit, tandem ampliùs ignitum consumitur & perditur, & quasi ad fecem reuertitur. Hæc Albertus. Ecce supradictis verbis

verbis Albertus, non solum docet verum aurum  
 posse fieri per Alchimiam, sed etiam quis modus  
 eius sic efficiendi sit possibilis, & quis impossibilis,  
 manifeste declarat.

QV I D A M Ianus Lacinius, qui de faculta-  
 te chimica in transmutandis metallis multa dis-  
 putauit, eiusque disputationis summam memo-  
 rat Cardanus loco supradicto, probat arte chimi-  
 ca posse confici verum aurum, his rationibus. *Quin-  
 que ra-  
 tiones  
 pro Al-  
 chimi-  
 stis.*  
 Primò, metalla sunt quædam pura & concocta,  
 vt aurum & argentum: quædam cocta sed impu-  
 ra, vt æs, ac ferrum: quædam cruda & impura, vt  
 vtrumque plumbum, sed impura repurgari, cruda  
 concoqui possunt, igitur ex ære, ferro & plumbo,  
 aurum & argentum fieri potest. Quod autem ra-  
 lia concoqui possint, demonstrat ex sententia Ari-  
 stotelis 4. Meteororum, vbi de concoctione agit.  
 De purgatione dubium non est, quippè cum pro-  
 prium sit ignis separando purgare. Deinde pro-  
 pinquitas, paruumque causarum discrimen, hoc  
 idem suadet, cum ab iisdem omnia fiant. Suppo-  
 nit autem omnia metalla constare sulphure &  
 argento viuo; quæcumque verò similia sunt, faci-  
 le inuicem transmutantur, eoque magis, quod na-  
 tura videtur semper perfectissimum intendere in  
 omni genere, velut aurum, quæ igitur imperfecta  
 sunt, artis beneficio perfici posse videntur, tum vt  
 ad finem, tum vt ad motus ipsius perfectionem  
 perducantur, Postea, si ars auctore Arist. in. 2.  
 Phys. & 4. Meteororum est imitatrix naturæ, cum  
 natura concoquendo purgandoque ex sulphure  
 & argento viuo, autum argentumque perficiat,  
 ut non etiam idem simili ratione operans ars  
 possit

possit efficere? Adhæc, ea dici debent secundum naturæ ordinem copulata & inuicem transmutabilia, quæ non habent omninò diuersas operationes sed easdem, in eo tantum differentes, quod quædam habent eas imminutas & imperfectas, velut fœtus, infantis comparatione, ouum pulli, aut elia papillionis. At plumbum, æs, ferrum, argentum, nullas habent operationes ab auto distinctas, sed quas illud habet, vt pote liquefcere, duci, graue esse, nitere, ignibus resistere, easdem habent hæc, sed vitiatas & imminutas, non enim ita splendent, non sunt adeò grauias, minus resistunt ignibus, non tota liquefcunt, non tam reuoluerunt, igitur hæc dici debent aurum imperfectum, & beneficio artis perducere queunt ad perfectionem auri. Atque hoc putat Cardanus esse maximum argumentum quod pro Alchimiis afferri possit. Postremò, idem astruit exemplo ranarum, quæ statim, ob præparationem materis, ex puluere generantur. Sunt autem ranæ perfectiores auto, & vt animalia perfecta, non solum partium similiarium compositione, sed etiam instrumentorum compositione indiguerunt. Aui-cennam quoque citat dicentem, vitulum in nubibus generatum semiuuum excidisse inter imbres. Generantur etiam ex iuenculo strangulato apes, ex Basilico scorpiones, ex exilatura Anatis sub dio exposita bufones, ex Asinis vespe, ex equis Scarabæi, ex mulis locustæ, aquæ, quibusdam in locis conuertuntur in lapides: ær concussus inter duriora corpora, repente transit in ignem, fumus metallorum, præcipue plumbi, cogit argentum viuum, cortex mali punici ferrum mutat

mutat in chalybem. Si igitur hæc tam admiranda & penè incredibilia fieri possunt, atque adeò quotidie fieri videmus, cur incredibile videatur, posse ab Alchimis verum aurum confici? Hæc ille disputat pro Alchimis.

ANTONIUS Mirandulanus, Philosophus *Antonius Mi-*  
nostræ memoriæ præstans, & in Aristotelis do-*randula*  
ctrina excellenter versatus, in illo suo opere quod *nus.*  
scripsit de Euerfione singularis certaminis, libro

19. lect. 7. hanc de Alchimis sententiam pronuntiat. Dicimus veram esse Alchimarum opinionem quod aurum possit fieri, & ab arte, & à natura, quia transmutare possunt argentum viuū, & alia quæ ad id requiruntur, ita vt fiat eadem materia: sicut non solum à natura sed etiam ab arte animalia, vt scorpionies generari possunt. Verum quia illud aurum sit rarissimè, & cum maxima difficultate, multa enim quæ ad id concurrunt, facillimè impediri possunt, idcirco non videtur fieri posse, sed rei difficultas non arguit impossibilitatem. Non est autem danda opera illi arti, non quia non sit vera, sed quia tantæ est difficultatis, vt sit vtilius eam omittere quàm exercere: & multi quidem ditissimi ad magnam inopiã redacti sunt, propterea quod maximis sumptibus impensis, vel nunquam assècuti sunt, quod hæc ars pollicetur, vel certè raro, & parum, ita vt sumptus longè sit maior lucro, quare satius est aliis artibus certioribus operam dare, quæ maiori ex parte operam suam præstant, quàm huic quæ rarissimè propter res naturæ absconditas, finem suum assequitur. Hæc Mirandulanus.

*Explica*



*Explicatur breuiter opinio auctoris.*

*Sentētia  
auctoris  
de auro  
alchimi-  
stico.*

**N**O B I S autem propositam quæstionem philosophicè considerantibus atque perpendentibus, tria videntur hac de re valdè probabilia dici, & firmari posse, vnum est, nullam esse rationem philosophicam, vel necessariam, vel etiam admodum probabilem, qua demonstretur rationem chemicam efficiendi verum aurum ? esse impossibilem. Cur enim putetur impossibilis ? An quia nihil eorum, quæ fiunt à natura potest fieri ab arte ? at hoc in generatione multorum animalium, aliarumque rerum, quæ opera, & ministerio artis non secus generantur quàm à sola natura, falsum esse cognoscitur. An quia (vt volebat Ægidius) nihil eorum, quæ sunt in genere suo perfectissima, potest produci nisi vno modo, id est, solùm ab agente suo naturali ? Verùm si Ægidius verisimili aliqua ratione hoc probaret, aliquantulum fortassè valeret ad persuadendum : cum autem nullà huius rei probationem afferat : qua facilitate ab eo id dicitur, eadem planè à nobis contemni, ac reiici potest. An denique, quia aurum naturale generatur virtute caloris cœlestis, aurum verò chemicum efficitur à calore igneo, qui duo colores cum multum inter se differant, non poterunt eundem effectum præstare ? sed hæc ratio dupliciter peccat. Primum enim falsum est calorem cœlestem & igneum speciem inuicem distingui : cum enim ab eodem contrarium, hoc est, à frigore similiter corrumpantur

*Calor cœ-  
lestis, &  
elemēta-  
ris non  
differunt  
specie.*

tur

tur, cùm ab eâdem causa interdum producantur nimirum à lumine, cùm se inuicem intendant atque augeant, cùm ad productionem ignis, & mixtorum simili ratione conducant, fieri non potest, vt ea ratione qua colores sunt, specie distinguantur inter se: differunt igitur ea re solum, quòd calor cœlestis propter ordinatum cœli motum, est valdè temperatus & accommodatus ad generationem & conseruationem rerum sublunarium, quam ob causam appellatur salutaris & viuificus; calor autem igneus ex se non est temperatus, sed agit quantum potest agere, & res sibi subiectas tandem destruit atque interimit, quocirca vocatur à Philosophis destructiuus & corruptiuus rerum. Verùm si hic calor aliunde corrigatur atque temperetur, nimirum vel à facultate animæ, vt in animalibus contingit, vel ab arte, vt fit in multis mixtis & medicamentis, quæ à calore igneo moderatione artis procreantur; efficietur, profectò vt calor igneus talis prope modum euadat, qualis est cœlestis. Deinde, experientia manifestè ostendit quædam animalia similiter generari posse calore igneo atque calore cœlesti. Nam apud Ægyptios pulli calore igneo ex ouis excluduntur atque procreantur. Quam rem Iulius Scaliger, vir propter excellentem omnium disciplinarum eruditionem admirandus, in iis quæ scripsit contra Cardanum exercitatione 23. pulchrè describit his verbis: In Ægypto ad Cayrum fumos construunt alij alio multiplici fornice imposito: in quorum tholi supremi medio, foramen est, per quod caloris vis, quæ immo dica possit officere; subit atque exhalat: in imò ignem

*Animalia genera  
rari posse solo  
calore  
ignis, argumētū  
Iulij Scaligeri.*

ignem accendunt temperatum: Quorum multas centurias in fornicum superiore planitie disponunt: statis diebus erumpit pullorum turba, quos illi non numero sed mensura venales habet, modiolum statuunt sine fundo: quem ut implerunt, tollunt, neque hæc fabula est, sed fabulæ ipsi qui negant. Hæc Scaliger. Cæterum posse ex aliis metallis verè aurum effici, probari argumento & experimento posset auri pigmenti, ex quo perfectum

*Ex auri pigmento, teste Plinio,* aurum posse fieri, testis est Plinius, qui rem non priscis temporibus sed sua ætate factam testaturamque commemorans, ita scribit lib. 33. cap. 4. Aurum faciendi est etiam una ratio ex auripigmento quod in Syria foditur pictoribus, in summa tellure, auri colore, sed fragili lapidum specularium modò. Inuitaueratque ipse Cæsar Principem avidissimum auri, quatinobrem iussit excoqui magnum pondus: & planè fecit aurum excel-lens, sed ita parui ponderis, ut detrimentum sentiret, illud propter avaritiam expertus, quanquam auripigmenti libræ 14. permutarentur, nec postea tentatum ab ullo est. Sic Plinius.

ALTERVM verò, quod eadem de re probabili-  
 ssimè potest asseri, illud est, chemicam rationem efficiendi verum aurum non quidem physicè, sed moraliter ut aiunt, loquendo, vel impossibilem, vel propemodum impossibilem videri, non propter ullam rationem philosophicam quæ adhuc ab ullo sit allata, sicut ostensum est, sed propter ipsam experientiam quæ in rebus naturalibus, moralibus atque artificialibus, summi argumenti firmissimæque rationis vim debet obtinere. Etenim cum plurimi in chemicæ facultatis translatione

*Cui non videatur esse vera ars Alchimia.*

Statione & exercitatione diu multumque laborauerint, & in veri auri effectiōem acerrimis studiis atque incredibili cupiditate incubuerint, nemo tamen adhuc fuit præter vnum aut alterum probatis proditum historijs, quem liquido constet verū aurū & omni ex parte probatū ac perfectum effecisse. Quod si effectio auri per artem chemicam est possibilis, cur ea cum tam diu & tam multum optata, quæsitā, & procurata fuerit, nondum tamen reperta & vsitata fuit? nam quia possibilis est generatio animalium, medicamentorum, aliarumque multarum rerum non solum per naturam, sed etiam per solertiam & industriam humanā, iam pridem inuētæ sunt artes, quæ huiusmodi res & verè & facillè possunt perficere, cur igitur idem non contingit in auro chmico? nisi quia vel talis modus efficiendi tale aurum simpliciter est impossibilis, vel si est possibilis, nondum tamen is est humano ingenio, & fortasse non potest esse, exploratè perfectèque cognitus. Atque hoc argumētum ab experientia ductum, non solum apud Philosophum naturalem, qui nunquam à rebus sensarīs experientiaque cōprobatīs, vel transuersum (vt aiunt) digitum discedit, sed etiam apud quemcumque hominem sanæ mentis rectiq; iudicij plurimum valere debet. Quod si habent isti, vt iactant, veram certāque artem faciendi aurum, cur sibi primū non faciunt tantum auri, vt nullus egeant, sed bonis omnibus quæ parari auro possunt, abundant? At enim videre licet istos, semper egentes & mendicos, qui per vana promissa alienis opibus exhauriēdis, suā quoquomodo egestatē subleuare,

suamque famem explere cupiant.

*Nō esse  
permittere  
da in Re  
publica  
usum  
Alchi-  
mia.*

A d extremum, illud non tantum probabiliter dici, sed etiam pro vero certoque confirmari potest, artem chemicam, licet ea fortassis sit utilis in distillationibus & aliis reb. quas superius ex sententia Cardani memorauimus, tamen in eo quod spectat ad effectiōem veri auri quam illa proficetur atque in primis pollicetur, vanam esse, noxiam, ac perniciosam Reipublicæ, Primò, Quia, aut nunquam, aut rarissimè præstat quod promittit, ex quo non semel factum est, ut multi ad extremam inopiam atque paupertatem redacti fuerint, unde rectè quidam ait, Alchimistas nō efficere aurum, sed absumere, non implere crumenas, sed magis deplere & exhaurire. Deinde, quia faciunt falsum aurum falsamque monetam, atque falsas gemmas pro veris passim distrahunt, atque diuendunt, ex quo Respublica hominumque societas magnum caperet detrimentum. Postremò, quia verum aurum non rarò adhibetur in medicinis ad exhilarandum & roborandum cor: aurum autem chemicum cum vel non sit verum aurum, vel certè imperfectius sit auro naturali, vel non utique habebit eiusmodi proprietates, aut certè non ita vitales & salutare humano corpori, quare non sine discrimine salutis & periculo vitæ, in medicinis adhiberetur. Hæc igitur nobis visa sunt de chimica facultate efficiendi verum aurum probabiliter posse disputari.

CAPVT

## CAPVT XII.

*De origine Magia & ijs qui in ea clari fuerunt.*



**M**AGINEM Magiæ, præsertim eius quàm diximus non esse naturalem, variè tradunt scriptores. Philo libro De specialibus legibus censet ex vera, & naturali Magia adulterata, & corrupta, natâ esse fallacem, & quæ vulgò propriè dicitur Magia, ita scribens: Ex hac adulterata, & deprauata, *Philo de origine Magia.* descendunt quas proprio maximè vocabulo malas artes dicimus, circulatorum, ariolorumque studia, mulierû, mancipiorumq; nequissimorum expiationes, & lustrationes profitentium, mutationesque amoris in odium, aut ex aduerso in amorem odij, per quasdam potiones amatorias, & incantamenta idonea: atque his dolis circumveniunt homines, & ingentium malorum atque ruinarum sunt causæ, nō priuatis modò hominibus aut familiis, sed ciuitatibus, regnis, & prouinciis. Quamobrem huiusmodi artes meritò lege Moisaica, grauissimis propositis pœnis prohibentur. Hæc Philo. Vetus tamen opinio est plurimorum scriptorum probata consensu, principem huius Magiæ doctorem, & quasi parentem fuisse Zoroastrem, vel Persam, vt Plinius, & Diogenes Laërtius vocant: vel Bactrianum, vt Diodorus Siculus, & alij nominant. Et Plinius lib. 30. cap. 1. ita *Zoroastres Magia parentis.* de eo scribit; Sine dubio in Oriente orta est Magia, in Perside à Zoroastre, vt inter auctores conuenit. Eudoxus Zoroastrem hunc, sex millibus annorum ante Platonis mortem fuisse prodidit: sic

& Aristoteles, Hermippus, qui de tota ea arte diligentissimè scripsit, & vicies centum millia versuum à Zoroastre condita, indicibus quoque voluminum eius positis explanauit, præceptorem à quo institutus est Zoroaster, tradidit Azonacem quinque millibus annorum priorem bello Troiano. De quo Zoroastre mira alijs locis scri-

*Plin. li. 7.* bit Plinius: Vnum enim eum (inquit) mortalium eodem quo natus est die risisse, cerebrumque ita ei palpasset, ut impositam repelleret manum, futura præfagia scientiæ, viginti annis in deserto Magiæ vacantem, caeco vixisse ita temperato, ut vetustatem non sentiret. Iustinus quoque historicus libri primi initio, inuentorem artis Magicæ facit Zoroastrem: idemque sentit B. Augustinus lib. 21. De ciuitate Dei, cap. 14. Solum inquit, Zoroastrem quando natus est, ferunt, risisse, nec ei boni aliquid monstruosus ille risus portendit: nam magicarum artium fuisse perhibetur inuentor, quæ quidem illi nec ad præsentis vitæ vanam felicitatem contra suos inimicos prodesse potuerunt, à Nino quippe Assyriorum Rege, cum esset ipse Rex Bactrianorum, bello superatus est. Suidas etiam ait, Magiam inuentum esse Persarum, apud quos Magi magnam fidem, & auctoritatem habuerunt. Auctor Historiæ Scholasticæ enarrans historiam libri Geneseos, cap. 39. Ninus, (inquit) vicit Cham, qui adhuc viuebat, & regnabat in Bactria, seu in Thracia, ut alij volunt, & vocabatur Zoroaster inuentor artis Magicæ, qui & hæc, & septem liberales artes in quatuordecim columnis scripsit: septem æneis, & septem lateritiis, contra duplex orbis excidium, quod timebatur,

vnum

*Chā idē  
qui Zo-  
roaster.*

Vnum per aquas, alterum per ignem. Ninus verò libros eius combussit. hinc etiam orta sunt idola. Hæc ille. Verum de antiquitate Zoroastris non conuenit inter scriptores, nam Eudoxus, & Aristoteles, vt ex Plinio retulimus, volunt eum antiquiorem fuisse Platone sex millibus annorum, Hermippus autem vel (vt citat Laërtius) Hermodorus Platonicus libro de disciplinis, facit eum quinque millibus annorum bello Troiano vetustiores, è contrario autem Xantus Lydius, vt refert Laërtius, multò recentiores eum facit; hoc est, sexcentis duntaxat annis ante Xerxis transitum in Græciam. Sed illi nimium multos computant annos, hic nimium paucos. Constat enim Zoroastrem fuisse tempore Nini primi Assyriorum regis, quo regnante natus est Abraham: ab ortu autem Abrahæ, vsque ad primam Olympiadem fluxerunt anni mille ducenti sexaginta octo: nam qui plures quàm ceteri annos monarchiæ Assyriorum & Medorum vsque ad Cyrum attribuerunt, illi mille trecentos sexaginta, huic trecentos quinquaginta assignarunt. Cœpit autem Cyrus regnare initio quinquagesimæ quintæ Olympiadis: Secundum hanc igitur laxissimam computationem, à Nino & Zoroastro vsque ad primam Olympiadem, numerantur anni mille quadringenti nonaginta quatuor. Bellum porrò Troianum septem & quadringentis annis præcessit Olympiades: Xerxis transitus in Græciam, in 75. excessus Platonis in 108. Olympiadē incurrit. Ex q̄to apparet multitudinem illam annorū, quā Eudoxus, Aristoteles & Hermippus tribuūt antiquitati Zoroastris, vel esse fabulosam,

*Laërtii  
initio O-  
peris.*



vel annos illos non quales nostri sunt, sed quales Ægyptij & Arcades habuerūt, hoc est, trimestres, esse cēsendos. Nec dissimile fuit eodē in loco Plinij quippe qui ait Moysē multis annorū millib<sup>9</sup> posteriorē fuisse Zoroastre, cū subtilissima Chronologia ratione cōmpertum sit, paulò ampliùs sexcentis annis Moysē priorē fuisse Zoroastrem.

*Cassiani  
de origi-  
ne Ma-  
gia opi-  
Gen.6.*

A R V D Cassianum Serenus Abbas collat. 8. cap. 21. originem Magiæ & omnium maleficarū artium altius repetit, nimirum etiam ante diluuium, ex eo tēpore quo filij Dei, vt scriptura narrat, permisti sunt filiabus hominum, ait enim, scientiam omnium rerum cœlestium & sublunarium quam Adam à Deo acceperat, tradidisse ipsum filio suo Seth, cuius semen eam seruauit incontaminatam, & donec diuisum à sacrilega propagine Cain perdurauit, eam doctrinam ad Dei cultum, & ad vtilitatē vitæ communis exercuit: cū verò fuisset impiæ generationi permixtum, ad res profanas atque noxias, quæ piè didicerat, instinctu Dæmonis deriuauit, curiosasque ex ea maleficiorum artes atque præstigias ac magicas superstitiones audacter instituit. Sed quomodo hæc curiosa & malefica doctrina diluuium non perierit in causa fuit Cham, vt antiquæ ferunt traditiones, qui superstitionibus & sacrilegis artibus fuit infectus, easque artes, cū in arcam in quam cum Noë patre suo iustissimo, & sanctis fratribus ingressurus erat, inferre non auderet, diuersorum metallorum laminis, quæ scilicet aquarum non corrumpentur iniuria, & durissimis lapidibus qui vim ignis non sentirent, insculpsit: quæ diluuium peracto, eandem qua ille

celaue

celauerat curiositate perquirens, sacrilegiorum ac perpetuæ nequitiæ seminarium transmiſit in poſteros. Hac itaque ratione illa opinio vulgi qua creditur. Angelos vel maleficia, vel diuerſas artes hominibus tradidiſſe, in veritate completa eſt. Haſtenus Abbas Serenus.

Sed mihi verius ſentite videntur, qui Diabolum primum Magicarum artium auctorem & parentem faciunt, à quo mortales earum cognitione acceperint, & uſum didicerint. Et ſanè primum Magiæ uſum effectum memoria repetentibus, haud improbabiliſſe videri poteſt, Magiæ uſum vnâ cum mundo cœpiſſe, & quidem in Paradifo, ſalua etiam tunc & integra illibataque hominis innocentia. Ibi enim Diabolus formam ſibi induens ſerpentis, vel occultè per verum & naturalem ſerpentem Euam alloquens, blandiſſimis deceptam promiſſis, ad veritum pomũ maximo ſui ſuæque totius humanæ ſobolis exitio, edendum induxit. Nec mirum videri debet ſi Diabolum Magiæ auctorem faciamus, cùm ipſe, vti apud Ioannem capite octauo Dominus noſter dixit: *Homicida ſis ab initio, & in veritate non ſteterit. quia nō eſt veritas in eo* Cùm loquitur mendaciũ, ex propriis loquitur, quia mendax eſt & pater mendacij. Rectè igitur Lactantius lib. 2. Diuinarum institutionum: omnium maleficarum artium inuētores & magiſtros fuiſſe Dæmōnes, confirmat, his verbis: Eorum inuenta ſunt Aſtrologia & Aruſpicina & Auguratio, & quæ dicuntur Oracula, & Necromātia & ars Magica, & quicquid præterea malorum exercent homines vel palam, vel occultè, quæ omnia per ſe falſa ſunt, vt Sibilla

*Prima origo Magicarum artium à D. mone.*

*Lactantius.*

*Praecla-  
ra Cy-  
priani  
sentētia.*

Erythræa testatur. Hæc & alia multa in eadē sententiam eo loco Lactantius commemorat. Sed nemo grauius & elegantius omnes Magiæ species omnesque fallacias ex Dæmone profectas esse ostendit quàm Cyprianus in libro de Idolorum vanitate: Nequissimi, inquit, spiritus, sub statuis ac imaginibus consecratis delitescunt hi afflatu suo vatū pectora inspirant extorum fibras animant, auium volatus gubernant, sortes regūt, oracula efficiunt, falsa vetis semper inuoluunt: nam & falluntur & fallunt, vitam turbant, somnos inquietant, irrepunt in corpora, mentes terrent, membra distorquent, valetudinem frangunt, morbos lacesunt, vt ad cultum sui cogant, vt nidore altarium & rogis pecorum saginati, remissis quæ constrinxerant, curasse videantur. Hæc est de illis medela, cū illorū cessat iniuria, nec aliud illis studium est, nisi à Deo homines auocare, & ad superstitionē sui, ab intellectu veræ religionis auertere: cū sint ipsi pœnales, quærunt sibi ad pœnam comites, quos ad crimen suum fecerint errore participes. Hi tamē adiurari per Deum vnū à nobis, statim cedunt, & fatētur & de obsessis corporibus exire cogūt. Videas illos nostra voce & operatione, quasi flagris cædi, igne torreri, ciulare, gemere, deprecari, vnde veniant, aut quādo discedāt, ipsis etiā qui se colant audiētibus cōfiteri, & vel exiliūt statim, vel euanescūt gradatim, prout fides patiētis adiuuat, aut gratia curantis adspirat. Hinc vulgus in odiū nostri nominis cogunt, vt nos odisse incipiant homines antequam nosse, ne cognitos aut imitari possint, aut damnare nō possint. Hæc Cyprianus.

S E D

Sed ne Christianorum hominum duntaxat hæc videatur opinatio, excitabo etiam testes Philosophos Græcorum, & quidem nobilissimos. Aristoteles in primo de Philosophia libro, ut Laërtius initio sui operis memorat, Magos Ægyptis antiquiores esse prodidit, duoque iuxta illos esse principia, bonum Dæmonum, & malum: alterum ex his Iouem & Onomasdem, alterum Plutonium & Arimanium dici: quod Hermippus quoque in primo de Magis ait, atque Eudoxus & Theopompus, qui & reuicturos homines, iuxta Magorum sententias dicit, immortalesque futuros: & vniuersa illorum mysteria & effectus præcationibus quibusdam constare. Ista Eudemus quoque Rhodius tradit. Hec Laërtius. Verum nihil luculentius testimonio Porphyrij: quod libro 5. De præparatione Euangelica, cap. 7. his verbis refert Eusebius Magicæ artis Dij Gentilium & inuentores & doctores fuerunt. Vnde namque homines quibus rebus Dæmones colantur & cogantur, quam ab ipsis Dæmonibus discere potuissent? Neque putes id à nobis tantum dici: Porphyrius testis citetur, qui in libro de responsis sic ait: Non solum fælicem conuersationem suam, verum etiam quibus rebus gaudeat & quibus alligentur, Dij hominibus significarunt. Adhæc quibus rebus cogantur, & quæ sibi afferenda sint, & quos dies vitare oporteat, figuras quoque ipsas simulachrorum quales esse debeant, & in quibus locis ipsi versentur, & omnino nihil est, quod ab ipsis Diis homines non didicerint, Atque hæc Porphyrius ex variis Procræpinæ responsis demonstrat & confirmat. Quid

*Porphyrius.*

ergo mirum, Magicæ artis & inuentionem & studium & vsum fuisse antiquissimum? Certè nos supra à Mundi vsque primordiis, Magicæ originẽ reperiuimus, & liber Exodi satis clarè ostendit, iam tempore Moylis, hoc est, plus quàm trecentis annis ante bellum Troianum, Magiam claram & celebrem fuisse, Magosque magna apud eam gẽtem, & sapientiẽ & diuinẽ cuiusdam virtutis auctoritate & existimatione floruisse, utpote qui se Moyli opponere auli fuerint, similiter illi mira quædam operantes. Nec Deus per Moysen tam graues pẽnas aduersus Magos constituisset, nec tam seuerè eorum consuetudinem & congressum Iudæis interdixisset, nisi iam tunc eorum ars, sicut hominibus exitiosa erat, sic nota & celebris fuisset. Porro circa belli Troiani tempora claram fuisse Magicæ famam, non obscurè indicat Homerus, præsertim in Vlyssis erroribus, adeò ut totum opus non aliundè constet. Siquidem Protea & Syrenum cantus apud eum, non aliter intelligi volunt, Circe vtique & inferorum, euocatione hoc solùm agi. Deinde apud Thessalas vrbes diu Magia, magna celebri-  
*Exod.7.* tate viguit. Orpheus quoque magnam ei fidem & auctoritatẽ addidit. Sed primus extat, ut inquit Plinius, de eo commẽtatus Osthantes Xerxem Regem Persarum bello quod Græcis intulit comitatus, qui velut semina artis portetosa sparsit, obiter infecto quocunq; commeauerat mûdo, & hic maximè ad rabiẽ, nõ auiditatem modo sententiæ eius Græcorum populos egit. Sed ante hunc clarissimum in ea arte Pythagoræ nomen fuit. Is autem quem dixi Pythagoras, & post

post eum Empedocles, Democritus & Plato ad hanc discendam nauigare, exiliis verius, vt inquit Plinius, quàm peregrinationibus susceptis, hanc reuersi prædicauêre, hanc in arcanis habuêro. Sed maximè omnium Democritus, & aliorum suisque editis de ea voluminibus, eodem tempore in Græcia, quo medicinam Hippocrates, hoc est, circa Peloponesiacum Græciæ bellum, & annum Romæ conditæ trecentessimum, eam illustrauit. Multis post hos sæculis, Apostolorum temporibus apud Brachmanas Indorum Iarchas, & apud Gynnosophistas Æthiopum, Tespesion Magiæ existimatione illustres fuerunt: quo tempore Simonem cognomento Magum, propter hanc artem multum claruisse, omnis loquitur Ecclesiastica historia. Is Apostolorum æmulus, non apud Samaritas modo, sed apud Romanorum quoque Principes: ad Magicas eius præstigias attonitos, honores etiam diuinos obtinuit: ex quo velut parente, multiplex hæreticorum soboles prognata, & sub Christiano nomine Magicas artes professâ, religionem & disciplinam Christianam apud ignaros, infamem & odiosam fecit. Verùm omnes ante se postque eius artis famæ celebres, longè superauit Apollonius Tyaneus, eius prædiscendæ studio totum penè orbem peruagatus, & cum iis congressus quicunque tunc in ea clari habebantur. Is Magiæ scientia tantam nominis claritatem gloriamque sibi comparauit, tantaque sui admiratione hominum animos impleuit, vt à multis eius sapientiam operaque æstimantibus, & uiuus & mortuus quasi Deus haberetur. Taceo hîc Plotinum, Porphyrium

*Simon  
Magus.*

*Act. 1.*

phyrium, Iamblicum, Proclum, Apuleium aliosque Pythagoricæ ac Platonicæ sectæ plurimos, qui Magiam & coluerunt studiosissimè, & pugnacissimè defenderunt, & tanquam inter omnes sapientiæ partes clarissimam, vtilissimamque, summis laudibus prædicauerunt. Sed quæret aliquis, quomodo Magia artium omnium vanissima & fraudulentissima, tantum in toto terrarum orbe totque sæculis valuit? Huic quæstioni respondens Plinius primo capite trigesimali libri. Auctoritatem, inquit, ei maximam fuisse nemo miratur, quandoquidem sola artium, tres alias imperiosissimas humanæ mentis complexa, in vnam se redegit. Natam primum è Medicina, nemo dubitat ac specie salutari itrepisse, velut altiorè sanctioremque medicinâ ita blandissimis desideratissimisque promissis, addidisse vires religionis, ad quas maximè etiâ nunc caligat humanum genus. Atque, ut hoc quoque suggererit, miscuisse artes mathematicas, nullo non auido futuræ de sese sciendi, atque ea è cælo verissimè peti credente. Ita possessis hominum sensibus triplici vinculo, in tantum fastigium adoleuit, ut hodiæque etiam in magna parte gentium præualeat, & in Oriente Regum Regibus imperet. Hæc Plinius.

*Religio & disciplina Christi tenebras Magia & veterum male-* CATERVM illud hoc loco magno nostro gaudio ingenti que gloria Christianæ religionis considerandum est, cum primum Euangelicæ doctrinæ lux mundo affulsit, omnium magicarum fraudum caliginem fuisse discussam atque dissipatam. Simul enim fides Christi prædicata & recepta mundo fuit, omnis Magicarum artium, oraculorum, vaticinationum cæterarumque diabolica

bolicarum fraudum vis concidit, defecit, euaficarum  
 nuit. Post Euangelium ( inquit Tertullianus in *artium* è  
 libro de Idololatria ) nusquam inuenies aut So- *mundo*  
 phistas, aut Chaldæos, aut Incantatores, aut Cō- *discussit.*  
 iectores, aut Magos, nisi planè punitos. Vbi sa- *Esa. 29.*  
 piens? vbi literator? vbi conquiritor huius æui? *1. Cor. 1.*  
 Nónne infatuauit in Deus sapientiã huius sæcu- *Ibidem.*  
 li? Sic Tertullianus. Atque hæc ita fore, vti cerni-  
 mus euenisse, multò antè Christus Dominus dis-  
 cipulos suos docuerat: nam apud Ioannem cap.  
 12. dixit: *Nunc iudicium est mundi, nunc Prin-*  
*ceps huius mundi eicietur foras: & ego si exaltatus:*  
*fuero à terra, omnia traham ad meipsum:* Et  
 apud Lucam capite 11. *Cùm fortis armatus cu-*  
*stodit atrium suum, in pace sunt ea, qua possides.*  
*Si autem fortior eo superveniens vicerit eum, uniuersa*  
*eius arma aufert in quibus confidebat, & spolia*  
*distribuit.* Quantum (inquit Eusebius libri primi  
 De præparatione Euangelica, c.2.) recepta Chri-  
 sti fide mundus profecerit, ipsis oculis cernimus.  
 Non enim Persæ, qui eū secuti sunt matres suas  
 nefandis nuptiis cognoscunt, non humanis ves-  
 cuntur carnibus Scythæ, nec charissimos, falsa  
 religione impulsî liberos iugulant: non Massä-  
 getæ ac Derbices propinquos atque affines suos  
 senectute confectos immolant, aut eorum car-  
 nes epulantur: non Tybareni senes suos præci-  
 pitare, Hyrcani rapaci auium generi; non Cas-  
 pij canibus proicere solent: quæ quidem antea  
 religiosissimè faciebant: nunc verò Euangelica  
 virtute vndique hæc terra, fæda & immania fla-  
 gitia explosa sunt. Quis iam doctrinam Christia-  
 nam amplexus, Deos putat aut inania, & surda  
 simula



simulachra, aut maleficos Dæmones in eis habitantes, aut partes mundi, quæ conspiciuntur, aut mortuorum vmbra, aut etiam animalium vel abiectissima, & nocentissima? quibustamen rebus vniuersæ pænè gentes ante prædicationem Euangelij diuinos honores cultusque tribuebāt. Non satis existimari potest, inquit Plinius lib. 30. cap. 1. quantum Romanis debeatur, qui sustulere monstra, in quibus hominem occidere religiosissimum erat, mandi etiam saluberrimum. Quis ergo satis æstimet, quantum debeāt Christo, cùm aliæ gentes, tùm in primis, & gens, & vrbs Romana, cuius fidei ac doctrinæ beneficio, maximis est malis liberata, summisque beneficiis affecta? Roma enim (vt ait B. Leo sermone primo De natiuitate Apostolorum Petri, & Pauli) Deum suum ignorans, cùm pænè omnibus dominaretur gentibus, omnium gentium seruiebat erroribus: & magnam sibi videbatur assumpsisse religionem, qui nullam respuebat falsitatem, in qua diligentissima superstitione habebatur collectū, quidquid vsquā fuerat vanis erroribus institutū, vnde quantò est per Diabolū tenaciùs illigata, tantò fuit per Christū mirabiliùs absoluta.

## CAPVT XIV.

*An Magia studium & vsus sit licitus.*



VPLICEM supra Magiā fecimus, vnam naturalem, alteram non naturalem. Naturalis cùm sit doctrinæ Physicæ, Medicæ, ac Mathematicæ pars nobilissima, per se bona & honesta est, hominum

minumque studio & cognitione dignissima. Fortasse autem eius studium & tractatio publica merito prohiberi posset in Republica, videlicet, si timeretur ne ea in vulgus prodita, multi (quæ est humani ingenij ad mala procliuitas) ad perniciem exitiumque aliorum abuteretur. Nam licet medicina quoque abuti possint medici, & ob eandem causam etiam prohibenda videretur, atamen alia est ratio Medicinæ, alia Magiæ: nam Medicina, & eius vsus est per se necessarius mortalib. & abusus manifestior est, quàm vt omnino celari queat, ideoque punitu ac emendatu faciliior. Magiæ verò, nec vsus societati hominum est per se necessarius, & est abusus occultus: latet enim per quas res & qualiter Magia operetur. Quamobrem valde timeri potest, ne, quò est occultior in operando, eò magis fiducia impunitatis, lubrica sit ad nocendum.

MAGIA verò non naturalis, præsertim quæ *De studio Ma-*  
 commercio & fœdere inito cum Dæmone niti-  
 tur, dupliciter addisci potest, vel speculatiuè tan-  
 tum, vel etiam practicè, hoc est, vel noscendi  
 tantum causa, vel etiam vtendi & exercendi,  
 Nuda cognitio Magiæ per se mala non est: om-  
 nis enim cognitio veri bonum quoddam & per-  
 fectio est intellectus, si enim cognitio malorum  
 bona non esset, Deus eam non haberet, atqui  
 Deus omnium bonorum pariter atque malorum  
 sciẽptiam perfectissimam habet, si per se mala  
 esset cognitio huius Magiæ, ergo nulli prorsus  
 eam discere aut nosse liceret. Quomodo igitur  
 Ecclesiæ Doctores & rectores, huius Magiæ va-  
 nitates, fallacias, maleficia, impiasque superstitio-  
 nes.

nes detegere & confutare possent? quomodo probare, mira illa quæ faciunt Magi, vel esse meras imposturas vel opera Dæmonum, vel occultarum virtutum naturalium effecta? quomodo demonstrare, nullum opus Magorum verè posse dici miraculum? quomodo docere, Christi miracula multum differre ac præstare Magorū miraculis, & nec Magos virtute diuina operari, nec Christum eiusque seruos miracula magicis artibus edidisse? Atque hoc animo & consilio nonnullis Magiæ studere cōcessum est. Nos Christiani (inquit Tertullianus libro de Anima) fallacem Magiam non socia conscientia, sed inimica sciētia nouimus, nec inuitatoria operatione, sed expugnatoria dominatione tractamus multiformē hanc lucem mentis humanæ, totius erroris artificem, salutis pariter, animæquē vastatricem. Itaque mihi quidem videtur rectè dixisse Ioan. Picus Mirandulanus: Quò quis est magiæ peritior, eò clarius eum cernere quantum inter Magorum & Christi atque Sāctorum miracula interlit. Sed studium eius potest tripliciter non esse bonum, vel si quis illud præferat studiis vtilioribus, & tantum propter inanem quandam curiositatem illuc capeſſat, vel si ad male agēdum id referre velit, vel si propter imbecillitatem mentis periculum sit, ne huius Magiæ fraudibus & superstitionibus circumueniatur. Moritò igitur id studij publicè Christianis vetitum est, nec vlli nisi permissu rectorum Ecclesiæ conceditur.

*De usu* V s v s autem huius Magiæ in totum damnatus est & vetitus, non solum lege diuina & Ecclesiastica, sed etiam ciuili, nec Christianorum  
tantum

tantum, sed etiam Gentilium. Non est autem  
 vsus Magiæ licitus: aut enim ibi est peccatum  
 infidelitatis, si quis Dæmoni credens, tribuat ei  
 diuinum numen: aut est peccatum idololatriæ,  
 si oblationibus, & sacrificiis cultum dæmoni-  
 bus adhibeat: aut saltem est peccatum inobe-  
 dientiæ: quia tam Magus, quàm qui opera Ma-  
 gi vtitur, facit contra prohibitionem diuinam  
 & Ecclesiasticam. Causa autem huius prohibi-  
 tionis triplex est. Primò, quia is peccat in se-  
 ipsum, coniiciens se in magnum discrimen: scili-  
 cet deceptum Magicis fraudibus in graues erro-  
 res labendi. Deinde iniuriam facit Ecclesiæ, cum  
 Dæmone habens commercium & familiarita-  
 tem, qui est omninò præcisus ab Ecclesia eiùque  
 aduersarius. Postremò grauissimè Deum offen-  
 dit, dum confugit ad Diaboli opem & auxilium;  
 quasi non sit omnipotès & homini abundè pro-  
 uident & consulens Deus Christianorum. Quàm  
 grauibuscumque, & minacibus verbis Deus &  
 vsu & studium huius Magiæ prohibeat, ex va-  
 riis scripturæ locis liquido cernitur. In cap. 19.  
 Leuitici sic habes: *Non augurabimini, nec ob-*  
*seruabitis somnia. Non declinetis ad Magos, nec*  
*ab Ariolis aliquid sciscitemini; ut polluamini per*  
*eos.* Et cap. sequenti 20. *Anima que declinauerit*  
*ad Magos & Ariolos, ponam faciem meam contra*  
*eam, & interficiam illam de medio populi sui.* E. ca.  
 18. Deuteronom. *Non inueniatur in te qui scis-*  
*tur Ariolos, & obseruet somnia & auguria: nec sit*  
*maleficus, nec incantator, neque qui Pythones con-*  
*sulat, aut quærat à mortuis veritatem.* Omnia enim  
 hac abominatur Dominus, & propter istiusmodi

*Magia  
 vetita di-  
 uinis le-  
 gibus.*

*scelera delebit has gentes in introitu tuo. Et 4. lib. Reg. cap. 1. Ochozix regi Israël qui miserat nuncium ad consulendum Beelzebub Deum Accaron de ægritudine sua: Elias hæc renunciari iussit: Nunquid non est Deus in Israël, ut eatis ad consulendum Beelzebub Deum Accaron? Quamobrem hæc dicit Dominus, De lectulo super quem ascendiisti, non descendes, sed morte morieris. Et libro 2. Paraliponi. cap. 33. inter alia scelera Regis Manassis; hæc connumerantur: Observabat somnia, sciscitabatur auguria, maleficis artibus inferviebat, habebat secum Magos & incantatores, multaque mala operatus est coram Domino, ut irritaret eum.*

*Egregia  
Philonis  
sententia.*

Cuius severissimi præcepti hanc rationem reddit Philo in libro De specialib. legibus: Non finit noster legislator procrastinari veneficorum supplicia, sed absque mora vult exigi: quod dilatio, noxiis opportunitatem peccandi præbeat, cæteris metum afferat, existimantibus quicquid illorum vitæ accedit suæ securitati decedere, idcirco sicut viperas, scorpiones, aliasque venenosas bestio- las priusquam mordeant, aut sauciant, aut etiam se commoveant, sine mora ad primum aspectum occidimus, præcauendo naturalem eorum malitiam priusquam noceant, eodem modo, huiusmodi homines plectendi sunt, qui Magicis suis: artificiis & maleficis artibus incautos homines non solum errore implicant, sed in graves calamitates inrudunt. Sic Philo. Quam essent autem hæc artes Magicæ, & Apostolis, & nascentis Ecclesiæ Christianis abominabiles, & exosæ, vel vnus locus, qui est in 19. cap. libri de Actis Apostolorum, apertissimè declarat, vbi sic legimus:

*Muli*

*Multi ex his , qui fuerunt curiosa sectati, contulerunt libros & combusserunt coram omnibus. Vt autem , & multitudinem , & pretium librorum intelligeremus, subditur eos quinquaginta denariorum millibus fuisse æstimatos, illos autem libros de rebus curiosis, Chrysostomus, Augustinus, Beda, Oecumenius aliique de rebus Magicis scriptos fuisse interpretantur. Restat vt de Magis Pharaonis , qui se opposuerunt Moyfi, nonnulla disputemus.*

---

*De Magis Pharaonis. Exod.7.*

**S**A C R A Scriptura narrat Pharaonem ad *Exod.7.*  
 Suerus Moysen iussisse accersiri sapientes , & maleficos , qui per incantationes Ægyptiacas, & arcana quædam similia fecerunt , tribus prioribus prodigiis à Mose factis: sapientes vocat, vel Astrologos, vel philosophos, præsertim Magiæ naturalis peritos: Maleficos autem , qui Magiam illam quam suprà nominauimus , non naturalem, tenebant, & exercebant. Itaque horum nomine significatur præstigiatores, Necromantici , & qui Magicis artificiis abutuntur ad patranda scelera, velut adulteria, furrà homicidia, atque ob id dicuntur malefici: nam & faciunt mala, & malo modo, nimirum Dæmonum auxilio cum multis item fraudibus, mendaciis, & hominum deceptionibus. Dicuntur autem , vt refert Iosephus libr. 2. Antiquitatum, illi Magi fuisse sacerdotes: apud Ægyptios enim tales erant estimatione omnis sapientiæ sacerdotes, quales apud

Indos Brachmanes, apud Æthiopes Gymnosophistæ, apud Græcos Philosophi, & apud Iudæos Propheta. Dicit autem Scriptura, eos operari solitos per incantationes Ægyptiacas, & per quædam arcana: nam operabantur, cantando quædã verba modo carminum: sed quia vel verba illa erant secreta, Onkelus vertit, susurrationes: vel modus quo operabantur, erat secretus, & occultus: ideo vocantur arcana. Dicuntur autem Ægyptiaca, non quod primum in Ægypto inuenta fuerint, sed quia verbis, & ritibus Ægyptiacis constabant, vel quia non idem est genus, & modus incantationum apud omnes gentes, sed alius alibi gentium. Septuaginta interpretes vocant Sophistas, & Pharmacos, id est veneficos, & incantatores, Onkelus Magos, Aquila vertit *magiasas*; id est occultorum cognitores, & pattores.

## CAP. V. T. XV.

*Qui fuerunt illi Magi qui restiterunt Moyse  
coram Pharaone.*



**S**CRIPTYRA neminem eorū nominatim appellat: Sed Beatus Paulus posterioris Epistolæ ad Timotheum cap. 3. ait Ianne & Mambre restitisse Moyse. Chrysostomus illum locum exponens ait, Paulum illorum duorum nomina comperta habuisse ex antiqua certaqué Hebræorum traditione, vel ex Spiritus

tus

tus sancti reuelatione. Sic etiam Theodoretus & Theophylactus. Alij dicunt fuisse librum quendam apocryphum, qui inscribatur liber Iannis & Mambres, ex quo libro volunt Paulum transcripsisse illorum Magorum nomina. Quod probare videtur Origenes tractatu 35. in Matthæum, vbi exponens verba illa Pauli, ait nomina illa Magorum non inueniri in scripturis publicis, sed in secreto quodam libro, qui inscribitur Liber Iannis & Mambres. Quapropter nonnulli epistolam illam Pauli reiicere ausi sunt, tanquam apocryphis vtentem testimonis: cum tamen, inquit Origenes, nemo adhuc ausus sit reiicere priorem epistolam ad Corinthios, in cuius cap. 15. citatur sententia quædam ex Menandro Poëta. Hactenus ex Origene, à quo non discrepat vulgò putatus Ambrosius, eundem illius epistolæ locum explanans, exemplum, inquit, hoc de apocryphis est: Iannes enim & Mambres fratres erant Magi, vel venefici Ægyptiorum, qui arte Magiæ suæ, virtuti Dei quæ per Moysem operabatur, æmulatione commentitia resistere posse putabant. Sed cum Moyse virtus operibus cresceret, humiles facti cum dolore vulnerum fateri coacti sunt Deum in Moyse operari. Gelasius Papa distinet. 15. sancta Romana Ecclesia, hunc librum Iannes & Mambres inter apocryphos numerans reprobatur. Horum etiam Magorum meminit Plinius libr. 30. cap. 1. & vocat Ianne & Iotape, falsò dicens eos fuisse Iudæos, sed in eo præterea fallitur, quòd istos multis annorum millibus fuisse dicit post Zoroastrem cum Iustini libro primò constet Zoroastrem fuisse tempore

Exod. 8.



Nini primi Assyriorum Regis, quo regnante natus est Abraham, à cuius ortu vsque ad tempus istorum prodigiorum, nonnisi quingentiquinque anni fluxerunt, quin ab ipso diluuiò non amplius sepringentis nonaginta septem præterierunt. De his quoque Numenius Pythagoricus in 3. lib. De bono, ita scribit Iannes & Mambres, Ægyptij erant, magicis artibus adeò præpotentes, vt Musæo Iudæorum duci viro Deo coniunctissimo, soli resistere posse à cunctis Ægyptiis iudicati sint: multas enim calamitates quas Musæus Ægypto intulit, soluere visi sunt. Hæc refert Eusebius lib. 9. De præparatione Euangelica, cap. 3. Hos autem Magos fratres fuisse, & Ambrosius loco supradicto affirmat, & ex narratione Beati Macharij Palladius commemorat. Sed quia in Macharij & Palladij mentionem incidimus: non alienum fuerit hoc loco quæ narrat Palladius, vitam Macharij scribens de mirabili horum Magorum sepulchro ab ipso Machario visa & comperta, & deinde narrata Palladio, hic adscribere. Dicebat Macharius Iannem & Mambrem fuisse fratres, propter Magicæ artis excellentiam, maximam apud Pharaonem & Ægyptios tunc temporis habentes auctoritatem atque potestatem: qui dum viui essent, intra quandam Ægypti solitudinem, in hortis quibusdam sepulchrum sibi construxerunt ex lapidibus quatuor pedum magnitudine, multumque auti illic condiderunt, & omnis generis arbores plantauerunt, & maximum aquæ puteum foderunt, sperantes fore, vt post suum obitum in illo Paradiso deliciis fruerentur. Hic autem locus, vt

*Memo-  
rabilis  
historia.*

communi illius regionis fama ferebatur à Dæmonibus tenebatur, atque custodiebatur. Incessit Macharium cupido visendi locum profectusque, cum iam propè accessisset, obuiam illi occurrerunt ad septuaginta Dæmones variis formis, alij clamantes, alij exilientes, alij magno cum fremitu in eum stridentes dentibus, alij figura coruorum in eum inuolantium, quibus euanescentibus, ingredienti iam in Paradisum, occurrit Diabolus cum districta romphæa ei militans: quem facto crucis signo repellens, ingressus est locum, omniaque contempletus, reperit cadum æneum catena ferrea pendentem ex puteo, iam tempore consumptum, & fructum malorum punicorum, quæ nihil intus habebant, fuerant enim arefacta Sole, & plurima aurea donaria. Hæc Palladius de sepulchro horum Magorum ex Macharij relatione.

## CAPVT XVI.

*An prodigia quæ Magi illi fecerunt, fuerint vera, an tantum simulata.*



**M**AGNA quæstio est, variis scriptorum sententiis in utramque partem agitata, an serpentes illi seu dracones, in quos scriptura narrat virgas à Magis proiectas, fuisse Ægyptiacis incantationibus atque arcanis conuersas, fuerint veri & naturales serpentes, non minus quam is in quem virga Aaron mutata fuit,

H 4 an

an potius fuerint simulachra quædam tantum  
& imagines serpentum, qui à Dæmonibus, ser-  
*Exod. 7.* pentum modo mouebantur, Quod autem de  
*& 8.* serpentibus Magorum diximus, de aqua muta-  
ta in sanguinem, & ranis productis itidem intel-  
ligi volumus.

*Prima opinio.* M V L T I & graues scriptores existimarunt  
serpentes illos fuisse naturales: hoc enim docet  
*fuisse ve- ros ser- pentes.* Theodoretus in Quæstionibus suis in Exodum,  
quæst. 18. idemque apertius & copiosius B. Au-  
gustinus libro tertio de Trinitate, cap. 7. & 8. &  
in lib. octogintatium quæstionum, quæst. 79.  
quem in hoc ferè secuti sunt Theologi Schola-  
stici. S. Thomas affirmatissime hoc tradit in  
Commentariis super 24. cap. Euangelij secundum  
Matthæum, & prima parte, quæst. 114. art. 4. in  
eandem inclinat sententiam Beatus Bonauentu-  
ra 2. Sententiarum distinct. 7. quæst. 2. Caietanus  
adeò clarum id esse inquit in Scriptura, vt in du-  
bium minimè verti possit. Hoc etià sentiunt Ly-  
ranus, Tostatus, & Paulus Burgensis, & cōfirmari  
potest argumentis B. Thomæ desumptis ex prima  
parte, loco supra citato.

*Alteræ opinio.* V E R V M ex aduerso multo plures & anti-  
quiores, nec minus doctrina & antiquitate præ-  
*fuisse ve- ros serpē- tes.* stantes, prodigia illa Magorum non fuisse veros  
& naturales effectus, sed tantum simulatos, & ap-  
parentes, & artificio quodam magico ac diabo-  
lico spectantium oculis imponētes, & senserunt,  
& scriptis suis prodiderunt. Nam Iosephus lib. 2.  
Antiquitatum ait illos serpentes Magorum, spe-  
cie verorum serpentum reptasse, sed fuisse præsti-  
gias, veritatis specie hominibus non admodum  
cautis

cautis imponentes. Simile quippiam innuit Philo lib. primò De vita Moyſis hoc factum Magorum enarrans. Iuſtinus martyr in libro Reſponſionum ad quæſtiones Orthodoxorum, in reſpõſione ad quæſtionem 26. Quæ, inquit, à Moyſe facta ſunt miracula, quia diuina virtute ſunt edita, facta ſunt mutatione rei propoſitæ, in naturam eius quod efficiebatur: at, quæ à Magis, opera Dæmonis ſunt facta, ſpectantium oculis præſtigias offundebant, vt qui ſerpens non eſſet, eum viderent quaſi ſerpentem, & non ſanguinem quaſi ſanguinem, & non ranas quaſi ranas. Tertullianus in libro De anima: Poſſunt, inquit, & ſolent Dæmones phantaſmata præſtare, & corpora fingere, quibus exteriores oculos circumueniant. Corpora enim videbantur Pharaoni & Aegyptijs magicarum virgarum dracones: ſed Moyſis veritas, mendacium eorum deuorauit. Gregorius Niſſenus: Qui ex virga Moyſis, inquit, factus eſt ſerpens, verè animatus, Magorum virgas reuera ligna, viſus autem deceptione ſerpentes, facilè deuorauit. Græcus interpres, quem citat Catena in Exodum ait, illos ſerpentes Magorum fuiſſe meras præſtigias, nihil verorum ſerpentum præter ſpeciem & imaginem habentes, hoc etiam ſuper cap. 7. Exodi affirmant Rupertus, Rabanus, & Hugo de S. Victore. Idem quoque ſatis indicat Ambroſius interpretans cap. 3. poſterioris epiſtolæ ad Timotheum: Iannes, inquit, & Mambres virtuti Dei quæ per Moyſem operabatur, conimentitia æmulatione reſiſtere conati ſunt. Eundem Pauli locum explanans Beatus Hieronymus: Sicut, inquit, illi Magi artis magiæ

gica præstigiis Moyſi, ſic nonnulli argumentorum falaciis, Chriſtianæ veritati ac ſimplicitati reſiſtere, ac illudere conantur.

*Aucto-  
ris ſen-  
ſentia  
fuiſſe ve-  
ros illos  
Mago-  
rum ſer-  
pentes.*

NEUTRA hæc opinio euidenter ex ſacris literis, aut humanis rationibus, vel probari vel reprobari poteſt: videtur tamen aliquanto probabilior B. Auguſtini ſententia. Scriptura enim Exodi 7. iſdem verbis eodemque modo narrat virgam Aaron verſam eſſe in ſerpentes, & item virgas Magorum: ergo ſi ille Aaron fuit verus ſerpens, pariter etiam ſerpentes Magorum veri fuiſſe videntur. Ibidem quoque dicitur, virgam Aaron deuoraſſe virgas Magorum, hoc eſt, ſerpentem ex virga Aaró factum, deuoraſſe ſerpentes ex Magorum virgis factos, non diceretur autem deuoraſſe illos, niſi fuiſſent veri ſerpentes. Deinde ſequenti capite octauo traditur Magos defeciſſe in tertio ſigno, nec potuiſſe producere ciniphes: ex quo ſatis intelligitur, verè & non in ſpeciem tantum eos duo priora ſigna feciſſe. Moyſes item detexiſſet fallaciam, ſi non fuiſſent veri ſerpentes. Quid quod ſcriptura vocat ſimpliciter ſerpentes, & ex nulla circumſtantia narrationis colligi poteſt eos non fuiſſe veros ſerpentes: nec repugnat fuiſſe veros, ergo probabile valde eſt veros & naturales ſerpentes fuiſſe.

## CAPVT XVII.

*Quomodo Magi fecerint illos ſerpentes.*



QUATVOR vel quinque modis cogitare poſſumus Magos feciſſe ſerpentes, ſanguinem, & ranas; duobus vel tribus in ſpecie tantum & ſimulatè,

latè, duobus aliis, verè. Primò enim species & phantasmata virgarum & serpentum, aquæ & sanguinis & ranarum quæ erant in phantasia & imaginatricè facultate, Dæmones commouendo & turbando spiritus in quibus erant illæ species, potuerunt facere vt illæ species refluèrent ad sensum communem vel etiam ad sensum visus; verbi gratia, primò species virgæ mox ea sublata, species serpentis: ita vt videretur virga conuersa in serpentem. Vide hæc tractata apud S. Thomam prima parte, quæst. 114. & 111. artic. 3. & 4. idem. que in aliis fieri cernitur. Namque in somno motu vaporum ascendendum in cerebrum, atque descendendum, refluentibus speciebus rerum sensibilibus ad primum sensitium, dormientes videntur sibi & videre & audire, & vi morbi idè contingit phreneticis. Deinde potuit fieri, vt Dæmon virtute aliqua naturali occulta, spectantium visum ita inficeret vel turbaret, vt viderentur esse quæ non erant, & non esse quæ aderant: quemadmodum ægrotus corrupto palato & gustatu, dulces cibos iudicat amatos. Tertio modo potuerunt Dæmones virgas illas Magorum subito conuertere in serpentes, applicando illis inuisibiliter aliqua agentia naturalia nobis ignota, ad producidos serpentes potētissima & efficacissima. Quarto modo fieri potuit vt Dæmones non aduertentibus qui spectabant, virgas à Magis proiectas, subito è conspectu illorum clàm auferrent, & pro illis serpentes mole æquales ipsis, vel ante præparatos, vel àliunde tunc celerrimè asportatos, intuentium oculis subiicerent, ita vt virgæ in serpentes viderentur esse conuersæ. Potuit etiam

quinto

quinto modo illud fieri, ut Dæmones virgas illas in modum & formam serpentum figurarent, vel figuram serpentum illis affingerent, & in illis motum qualis est verorum serpentum, ipsi efficerent.

Qui negant illos serpentes magorum, fuisse veros & naturales, eos necesse est sequi, vel duos priores modos, vel certè quintum modum.

Sed contra priores duos modos illud pugnat, quod scriptura ait factos esse serpentes: non igitur solùm erant in imaginatione vel aspectu intuituum, sed extra quoque erant serpentes: non enim dixisset scriptura, Magorum virgas versas esse in serpentes. Contra quintum modum facit quod scriptura dicit, serpentem factum ab Aaron deuorasse serpentes Magorum: quomodo autem deuorasset illos, nisi fuissent veri serpentes? B. Augustinus, S. Thomas, Bonauentura, Caietanus, & Burgenſis sequuntur tertium modum, qui tamen sicut nec Lyrano, nec Toſtato, nec mihi fit probabilis. Certum enim est, nec Dæmones potuisse immèdiatè producere serpentes, sed tantùm adhibendo causas naturales eorum productrices. Certum etiam est, nullum agēs naturale naturaliter operando posse subito producere formam ex materia non ante disposita, & præparata. Certum etiam est, diuersas formas exigere diuersas materiæ præparationes, & quò formæ sunt nobiliores, eò plures, & operosiores præparationes deſcunt: maior enim præparatio fit materiæ ad formam mixti quàm ad formam elementi, & maior ad formam animalis perfecti, quàm vel mixti inanimati vel plantæ. His positis, quæ secundùm veram Philosophiam negari

negari non possunt, quæramus an Dæmones produxerint illos serpentes immediatè ex virgis: at materia virgæ est admodum remota, & aliena recipiendæ formæ serpentis. Si dicant non immediatè ex virga productos esse serpentes, sed variis transmutationibus præmissis: at tot, & tam variæ transmutationes subito fieri non potuerunt, statim enim atque Magi proiecerunt virgas, apparuerunt serpentes. Quidquid, cum naturaliter producitur serpens, non statim producitur magnus, sed primò parvus, deinde paulatim acquirit iustam magnitudinem: at illi serpentes statim producti sunt magni, nimirum æquales virgis Magorum, non enim visum fuisset virgas mutatas esse in serpentes, nisi serpentes fuissent æquales virgis.

C A I E T A N V S : vt vim harum rationum ab ipso, vt arbitror, præuisam effugere, duo repetit effugia: alterum est, eo tempore quod effluxit, dum Pharaon vocauit Magos, & ipsi ad eum adierunt, Dæmones vltimam dispositionem pro forma serpentis induxisse in illas virgas, atque ita cum proiectæ fuerunt, statim potuisse produci serpentes: alterum est, licet agens naturale per se non possit ex virga, & subito producere serpentem, tamen vt est instrumentum Dæmonis, illud posse, sicut motus, & lumen cæli multa producunt quæ sunt ipso nobiliora, quatenus sunt instrumenta intelligentiæ mouentis. Sed contra primum effugium facit illud, quod sic non fuissent illæ virgæ, non enim potest manere forma virgæ cum vltima & proxima dispositione materiæ, & formæ serpentis, præterea dubium est an illi serpentes

*Caietanus refellitur.*



pentēs, seu vt alij vertunt, dracones, potuerint aliter generari quàm ex semine. Secundùm effugiū nihil valet: nam licet agens naturale vt est instrumentum vel hominis, vel Angeli, possit vel citius vel mēlius aliquid facere, tamen non ob id potest ex qualibet, & in qualibet materia effectum suum producere, nec potest posteriorem formam inducere non inductis prioribus. Posterior enim, & nobilior forma, præsupponit necessariò priores, & sicut inter formas, ita inter earum dispositiones est ordo naturaliter immutabilis, vt non possit esse posterior in materia nisi antea fuerit prior. Præterea verus sanguis naturaliter non potest produci nisi in animali, & per calorem animalis, & per certa instrumenta quæ in solo sunt animali.

*Auctoris  
sententia,  
quomodo  
facta  
sit a Ma-  
gis illa  
virgarū  
in serpē-  
tes muta-  
tio.*

RES TA Rigitur quartus modus supra expositus, qui & Lyrano & Tostato mihi quæ sit verisimilior: nam secundum eum modum defendimus fuisse veros serpentes, atque ita euadimus difficultates obiectas contra primum, secundum & quintum modum: nec tamen dicimus eos productos fuisse ex virgis, ne vrgeamur illis rationibus quibus tertius modus premitur. Vnus tantum scrupulus hæret, quomodo si non fuerunt serpentes producti ex virgis, dicantur virgæ conuersæ in serpentes? sed respondendum est, scripturam id dixisse, non quod ita fuerit secundum veritatem, sed quia ita videbatur & æstimabatur spectantium iudicio. Nam & hoc quoque dicere oportet eos, qui negant illos fuisse veros serpentes, & Caietanum qui vult illas virgas habuisse vltimam dispositionem pro forma serpentis: sic enim

enim non poterant esse verę virgę, vt ostēdimus, sed secundum speciem tantum, quare secundum eum, nec magi proiecerunt veras virgas, nec verę virgę sunt conuersę in serpentes.

**S**ed dicet aliquis, cur permisit Deus vt Magi *Cur Deus* qui contradicebant Moyſi prodigia facerēt, cum *sit pas-* ea res & diuinam virtutem quę per Moyſen *sus illa* operabatur, obscurare videretur, & Pharaonis *prodigia* animum magis in perfidia & inobedientia obfir- *fieri à* matum & destinatum redderet? Ad hoc Chry- *Magis.* sost. homil. 46. in Acta Apostolorum, ita respon- det: Permisit Deus magis aliquid aduersus Moy- sen, ne Magus putaretur esse Moyſes: permisit il- los docere omnes quantum Magia imponat sen- sibus: vltra autem non deceperunt, sed ipsi se vi- ctos confessi sunt: & non potest, inquit, sine cer- tamine clara esse victoria, & quod potentior est hostis, eò illustriorem reddit eius gloriam à quo se victum esse ipse confitetur, sicut Magi victos se à Moyſe confessi clariorem eius gloriam effece- runt. Theod. in Quęst. suis in Exod. quęst. 18. Ne quis, inquit, suspicaretur Moyſen arte Magica mira illa fecisse: permisit Deus Magos similia ali- qua facere, vt quantum inter diuinam virtutem & magicas operationes interesset, tum euidentia rerum, tum etiam Magorum confessione, clarissi- mē innotesceret. Mutat Aaron virgam in serpen- tem, mutant etiam Magi virgas suas in serpentes: *Exod. 7.* sed serpens Aaron præualens, Magorum serpen- tes deuorauit. Mutat Magi aquam in sanguinem: sed non rursus possunt sanguinem mutare in aquam, sicut fecit Moyſes: produciunt ranas, sed eas auferre sicut Moyſes non possunt: & qui ma- iora

iora animalia fecerunt, minora, id est, ciniphes, facere non potuerunt. Denique nec vlcera ipsi cauere, nec vlcerum dolorem quo vehementer afflictabantur mitigare, nedum auferre potuerunt. Quamobrem Moysen longè superiorem quàm ipsi essent, & diuinam virtutem quæ operabatur, artibus suis magicis præstantiorem confessi, dixerunt: *Digitus Dei est hic.*

Verum nos quia hunc de Magia librum, vt perspicuitate orationis, & varietate atque ordine disputationum, delectuque probabiliorum sententiarum, firmiorumque rationum; sic breuitate (quæ magna est legendi discendi que illecebra) commendatum lectori & probatum esse cupimus, expositis iam quæ ad propositi à nobis argumenti tractationem & explicationem pertinebant, hinc ei finem imponamus.

BENEDICTI



# BENEDICTI

P E R E R I I,

LIBER SECVNDVS,

qui est

*De observatione Somniorum.*



ON vnū est genus nec vna  
somnia ratio, quocirca  
nec par est omnium causa,  
vt æquè omnia vel appro-  
bari vel improbari debeāt.

Multa quidē somnia deridēt sacræ lite-  
ræ: alia etiā dānant: quædam verò com-  
mēdant ac venerātur. Sunt enim plera-  
que inania: nec pauca sunt naturalia, ex  
certis naturę causis profecta. Sūt itē alia  
Dæmonis calliditate ac malitia mortali-  
bus iniecta; denique nonnulla diuinitus  
hominibus data sunt. Diligens porro sō-  
niorum tractatio, pulcherrimam per se.

I ac

ac iucundissimam parit cognitionem, & ad obscuros diuinę scripturę complures locos illustrandos valet plurimum: regendę verò ac moderandę hominum vitę vtilissima esse potest. Sed in primis ad redarguendam quorundam hominũ incisciam (sed verius dixerim stoliditatem & vecordiam) qui nimis curiosè & anxie ac superstitiosè observant somnia, permagno est adiumẽto. His ergo rebus adductus, de somniorum natura, varietate ac veritate: nonnullas quęstio-

nes scitu maximè dignas  
atque vtilis hoc libro  
explicandas  
suscepi.

INDEX



# INDEX QVÆSTIONVM

## LIBRI SECVNDI QVI

### est de Somniis.

- I. **Q**uestio, *An somnijs habenda sit fides.*
- II. *De causis verorum Somniorum.*
- III. *Quibus signis dignosci queant Somnia diuina à non diuinis.*
- III. *Cur Deus in somno arcana homines doceat.*
- V. *Cur à Deo somnia dentur indoctis hominibus sæpius quàm sapientibus.*
- VI. *Cur diuina somnia nonnunquam sint obscura & perplexa.*
- VII. *An licitum sit homini Christiano obseruare somnia.*
- VIII. *Cuius hominis sit ritè interpretari somnia.*
- IX. *An in somno vsurrationis & voluntatis liber esse queat.*
- X. *De somnio Salomonis, in quo donum sapientiæ à Deo promissum ei, & tributum est.*

## QVÆSTIO PRIMA.

*An ulla Somnijs habenda sit fides.*



**I**N diuersa, vulgi ac sapientum super hac re distrahuntur sententię: quamquam vno verbo ea quęstio posset expediri facta: somniorũ distinctio-  
ne nonnullis enim somnijs sine dubitatione fi-  
des habenda est; plerisque tamen, pænitus dero-  
ganda. Nimirum, aut omnibus, aut nullis crede-  
re somnijs, par est vecordia, & videtur extremæ  
vtrumque vel stoliditatis, vel contumacię. Sed

*Cic.in 2.  
de Divi-  
natione.*

*Omnia  
somnia  
esse ve-  
ra, Pro-  
thagora,  
& Stoi-  
corũ opi-  
nio,*

profecto, & scitum, & verum est illud Cicero-  
nis dictum: nihil tam absurde dici posse, vt non  
ab aliquo Philosophorum dicatur. Quid enim  
esse potest magis ἀλογον ἀδύνατον, quàm omnia  
somnia vera, & credenda esse arbitrari? Ecce ti-  
bi Prothagoras, vnus sanè ex illo priscorum Phi-  
losophorum Senatu, omnibus, somnijs fidem ar-  
rogat, magna auctoritate decernens, veritatem,  
& falsitatem non ipsa natura rerum, sed sola exi-  
stimatione hominum constare; hominem esse  
mensuram omnium, & tale vnumquodque esse  
quale videtur homini, siue sobrio, siue vinolen-  
to, siue sano, siue insano, siue vigilanti, siue dormi-  
enti. Affines huic errori fuere quidam Stoici, nimio  
plus superstitiosi, ac penè fanatici Philosophi qui  
nulla reſciunt somnia, in omnibus esse rati vim si-  
gnificandi, ac denotandi aliquid. Existimari ta-  
men aiunt, quędam somnia inania, & falsa quod  
sint admodum tenuiter expressa ob idque ob-

*scura*

seura, & ad intelligendum difficilia: & quia propter ambiguitatem, varias ad res videntur posse applicari, propterea nihil certum ex eorum observatione nobis constate: præsertim verò, quòd ad eorum somniorum vim dispiciendam, par hominũ solertia, & sagacitas non faciliè inueniatur.

Ex aduerso, his contraria sentientes Xenophanes Colophonius, vel ipsa vetustate memorabilis Philolophus (nascentis enim in Græcia Philosophiæ propemodum æqualis fuit) molis item ac delicatæ Epicuræ disciplinæ sectatores, omnium somniorum fidem & auctoritatem sustulerunt. Non esse autem ullis credendum somniis sic illi argumentabatur. Vna vis est, eademque natura omnium somniorum: par igitur credendi aut omnibus, aut nulli ratio esse debet. Sed

*Xenophanis, & Epicuræ omnia somnia esse vana.*

plerisque somniis non esse credendum, confessio est omniũ: nihil ergo causæ est, cur plerisque reiectis, aliquibus præcipuè credere debeamus. Adiice, quòd, si quædã somnia & vera, certa sunt, aliquas esse certas ipsorum effectrices causas necesse est. At quas: naturam, inquit, & Deum. Sed natura quidem amica est ordinis, & constantiæ, in somniis nullus ordo inest, sed plena temeritatis inconstantia. Dei autem maiestate alienum, & indignum videtur, obire Deum lectos dormientium, concurrere grabatos, & stertentibus iniicere somnia, quæ illi expergiscentes, vel non recordentur, vel non intelligant, vel etiam contemnant, vel si curanda sibi putent, stulta impleri superstitione, dies noctesq; animi pendeant, aut inani impendentium malorum metu perterriti, aut fallaci futurorum expecta-



tione bonorum elati. At quantò & rationi conuenientiùs, & Dei præstantia digniùs, atque vtilitati hominis consultiùs fuisset, visa dare nõ sordidis & indoctis hominibus, sed optimis & sapientibus viris, non dormientibus, sed vigilantibus, nempe magis ad intelligendum idoneis: nec per circuitiõnem, & anfractus, atque ænigmata, sed propriè, apertè, & explicatè significare Deum, quod ab homine veller intelligi.

*Vera sententia de somnijs.*

Hæc isti de somniis balbutiunt, in totum ea vel approbantes, vel damnantes, videlicet per extrema, veritati deuia, inertantes. Sed vera sententia, quasi media insistentes via, varia facit somniorum genera, quorum plurima tanquam inania, & ab omni ratione vacua, nec vlla fide di-

*Pleraq; somnia esse vana.*

gna planè abiudicat & reiicit. Hòc, cum luce Solis clarius sit, superuacaneum est argumentari. Id enim quotidiana docet experiètia, totas quotidie noctes somniamus, quorum igitur quodque de tot somniis, verum euadit? Euadit quidè aliquod nonnunquam verum, sed quia id rarissimè, ac sine ratione vlla contingit, nihil afferri potest, cur non casu & temèrè accidisse credatur.

*Causa somniorum.*

Idem quoque ratio ipsa fateri cogit. Nam quæ alia est istiusmodi somniorum causa, nisi quia spiritus, sentienti animæ, præsertim autem phantasiæ, cuius est fingere somnia, deseruientes, in quibus insidèt atque inhaerent, rerum in vigilia perceptarum reliquiæ, ac vestigia, quas in scholis appellamus species, eiusmodi inquam spiritus, in somno vaporib. cibi potusque caput subeuntibus agitati, & huc illac iactati, varia reddunt visa & somnia, sed propter inordinatam

eorum

eorum Spirituum iactationem, valdè incomposita, sæpè etiam turbulenta & distorta, denique talia, ut nullam vim significandi aliquid habere queant. Sic profectò sunt somnia, ut quæ in nubibus variè figurantur, vel animantium, vel aliarum rerum similitudines & imagines, quas cernimus brevissimo tempore in alias, atque alias commutari, & mox dissolui omnes, ac pærītus evanescere. Has imagines, qui certam ullius rei significationem facere putaret, obtusus & excors haberetur, at non minoris videtur inscitia, certas significandarum rerū notas, & signa eiusmodi somniis attribuire. Si ebriorum, phreneticorum & insanorū visa negligimus, & pro nihilo ducimus, æque profectò ridenda, & cōtemnenda sunt somnia, quin eò magis, quòd plerumque magis ipsa sunt inordinata, confusa, & monstruosa. Facetè quidam, sed verè tamen dixit, si natura sic esset comparatum, ut ea dormientes agerent, quæ somniant, fore omnino necessarium, ut alligerentur omnes, qui cubitum irent, quippe magis ridicula & absurda, magisq;ue incredibilia, quàm ulli faciant insani, facturos esse somniantes. Hanc quoque sententiam confirmat diuina scriptura, deridens leuitatem & vanitatem eorū, qui Somniis hoc est, rebus futilissimis ac mendacissimis credendo, dignos se præbent, qui omnium irrisione ludātur. Itaque in libro Ecclesiastæ capite quinto sic est: *Ubi multa sunt somnia, plurima sunt vanitates, & innumeri sermones.* In lib. item Ecclesiastici capite 34. ita legimus: *Somnia extollunt imprudentes, quasi qui apprehēdit umbram, & persequitur ventum, sic & qui attendit ad insomnia,*

*Testimo  
nia diui  
na scri  
ptura de  
vanitate  
somnia  
rum.*

*multos errare fecerunt somnia, & exciderunt sperantes in illis.* Denique, cùm scriptura vult significare aliquid vanum, instabile, fugax, & fallax, somniorum comparatione, ac similitudine persèpè declarat.

*Multa somnia esse vera.* CÆTERTVM, vt plurimis somniis abesse veritatem, fidemque, non est negandum, ita quædam esse vera, & certa somnia, tatendum est. Nā si nullis in somniis, quidquā veri & certi esset, inscienter profectò, ac superstitiosè clarissimi medicorum, somnia, quæ frequenter ægris contingunt, ad eorum morbos diiudicandos curandosque tam subtiliter & curiosè obseruarent. Stulto item labore phisiologi se fatigarent, somniorum causas, vires, ac significationes tanto studio, & diligentia venando ac speculando. Mēdaces præterea essent tot superiorū tēporum historiarum, clarissimis testatæ cōsignatæq; monumentis, refertæque exēplis verorum somniorum, quæ ad verbum cum rerum euentis mirificè conuenerunt. Quid in sacris literis quot memorantur somnia, non vera & certa modò, sed etiam diuinorum mysteriorum plenissima, repetat memoria lector somnia Abraz, Abimelech, Iacob, Laban, Ioseph, Pharaonis, Salomonis, Regis Nabuchodonosor, Danielis, Mardochæi, Iudæ Machabæi. in nouo autē Testamento, somnia Beati Ioseph, Magorū, vxoris Pilati, deniq; somnium D. Pauli, quod à Luca in lib. de Actis Apostolorum narratur. Hanc somniorum distinctionem, etiam *Homē* Homerus poëtico more, fabularū integumentis velatam, significauit, cùm duas finxit portas, vnā corneam per quam emitterentur ad homines vera som

ta somnia, alteram eburneam, per quam ederenda ver-  
tur falsa. Homerum imitatus, ut ferè solet, Vir-  
gilius lib. 6. *Æneidos*, eandem sententiā expref-  
sit his versibus. *que fal-  
sorū som*

*Sunt geminae somni porta, quarum altera fertur niorū di*  
*Cornea, qua veris facilis datur exitus umbris, stinētio-*  
*Altera candenti perfecta nitens elephantos, nem.*

*Sed falsa ad cælum mittunt in somnia manes. Odyf. 7.*

Cur autem poëta, veris somnijs corneam por-  
tam, falsis eburneam assignauerit, causam exponit  
Macrobius in eo commentario, quo somniū Sci-  
pionis explanauit. *Mac. li.*  
*1.6.3.*

## QVÆSTIO II.

*De causis verorum somniorum.*



**D**ICTUM est, alia esse somnia fal-  
sa, & alia vera: reiectis igitur falsis,  
vera contemplemur: Verum, quia,  
quæ sint vera sōnia, & quo insigni  
atque nota internoscantur à falsis,

planè intelligi non potest, nisi verorum somnio-  
rum causas omnes rimemur, & aperiamus. Pro-  
pterea quid ab alijs de huiusmodi causis creditū  
& proditum sit, hoc loco docere conuenit. Hip-  
pocrates in libro de Insomnijs, duo statuit som-  
niorum verorum genera, alterum nominat di-  
uinum, alterum naturale. Diuina somnia, inquit  
à Deo mitti, & semper memorabiles aliquos cas-  
us insignesque vel ad lætitiā & tristitiā, vel  
ad fœlicitatem & miseriam, siue priuatam, siue  
publi

*Varia de  
somnia-  
rum cau-  
sis ancto-  
rū sentē-  
tia Hip-  
pocrates.*

*Somniū  
Cyri.*

publicam, euentus portendere, horū autem somniorum interpretationem, ex variis, rerumque diuinarum interpretibus petēdam esse. Tale fuisse dicitur somnium Cyri maioris, qui monarchiā Persarum condidit ad cuius pedes dormientis, Solvisus est, terque ab illo appetitus manibus, ter se conuoluēs, elapsus est. Quo somnio Magi Persarū sapientes, significari respōderunt, eū triginta annos, & ita sanè cōtigit, imperio potiturum. Naturalia sōnia, ex causis ferè intra corpus dormiētis latētibz, existere putat Hippocrates, atq; hisce somniis affectiones ipsius corporis aut bonas, aut malas, indicari, hoc est vel plenitudinē ac redundantiam, vel contra inopiam atque inanitatem, vel aliquem eorum, qui sunt in corpore humorum, aut corruptum, aut suo loco motum, aut inordinatē & immoderatē agitatū. Horum verò somniorum obseruationem & coniectationē spectare ad medicum, eamque ad dirigendas ordinandasque curationes permagni referre arbitrat.

*Plato.*

*Demonum natura & munus secundū  
Platonem.*

Plato in conuiuio, somnia vera & prænūtia futurorū, à Dæmonibus proficisci existimat. Dæmones enim esse medios inter Deum, qui est immortalis & incorporeus, atque homines corporatos & mortales, quippe cū sint ipsi & corporei, quales nos sumus, & immortales, qualis est Deus (Deum namque censet Plato non immiscere se rebus humanis) nec proximē cū hominibus societatem aliquam & cōsuetudinem habere, sed comercia & colloquia inter Deum, hominesque, siue vigilantibus ipsis, siue dormiētibus, per Dæmones agitari & confici. Nimirū, Dæmonum munus & officiū esse inquit, preces & vota hominū referre ad Deū, & Dei munera & auxi-

lia deferre ad homines: per hos, vaticinia, incantationes, Magia, omnisque diuinandi ratio, & prodigiorum effectio, ad homines peruenit. Itaque Demones esse Dei nuncios, interpretes, & ministros: hominum verò esse quasi patronos, aduocatos: magistros, & ut fictitio Apulei verbo dicam salutigerulos. Atque hæc non solius Platonis, sed ante Platonem etiam Empedoclis & Pythagoræ fuit sententia: de qua, & contra quam, in libro 8. de ciuitate Dei ca. 20. & 21. & in lib. 9. acutè doctèque disputat Augustinus. Aristoteles in libello quem inscripsit de Diuinatione ex somniis ducta, negat vlla dari hominibus à Deo somnia. Vera autem somnia, inquit, vel esse naturalia, quædam signa, & ex naturalibus causis proferta quæ scilicet periti Philosophi & Medici vtiliter observant: vel esse quodammodo principia quædam eorum, quæ postea vigilantes acturi sumus: nonnunquam enim in quiete quædam occurrunt, quæ videntur ad aliquid agendum posse conducere, quibus post, à somno excitati ad benè agendum accommodatè vtimur, & iuuamur. Stoici tres causas verorum somniorum constituunt. Primam Deum, qui cum sit rerum omnium scientissimus, & prouidentissimus hominibus; beneuolus ac beneficus, quò sit homo cautior, dat ei somnia, quæ sint ipsi futurorum indicia, & eorum, quæ agenda ipsi cauendaque sunt, documenta. Alteram causam ponunt fatum, quo cuncta sunt velut æterna quædam serie, nexuque colligata: siquidem rerum omnium futurarum, putant Stoici, & antecedentes causas, & præcurrentia signa tum aliis in rebus, tum etiam in ipsis somniis præmitti.

Tertiam

*Aristoteles.*

*Stoici.*

Tertiam causam faciunt naturam animi nostri, quæ diuina est: animus enim hominis, exterioribus sensibus per quietem consopitis, & ab omni actione vacantibus, ipseque negotiis curisque omnibus solutus ac liber, vegetior fit, & habilior ad intelligendum: tunc enim clarius præterita meminit, præsentia sentit, futura prouidet.

*Porphyrius, veritatem somniorum refert, partim ad innatas animis hominum notiones, & velut insignitas rerum omnium notas quas ex altera vita detulit animus, ad hoc corpus veniens: sed eò vehementer obrutus, atque oppressus, non potest eas vigilantibus sensibus cernere: in quiete vero clarius ei apparent, atque innotescunt. Partim refert somnia ad Dæmones: ad bonos quidem bona & veracia, ad malos autem, praua, fœda, & fallacia.*

*Synestius multa disputat de spiritu phantastico, quod est vehiculum animæ, eo namque medio, ceu quodam vinculo, cum terrestri hoc corpore colligatur & copulatur in quo item solutus corpore animus, ex vno loco in alium mouetur, atque in eo maleficiorum pœnas persoluit apud Interos, nec sine eo dum est in corpore, quicquid potest intelligere: in hunc porro, spiritum, omnium quæ sunt, fuerunt, et suntque simulachra imprimuntur, & in eo lucent tanquam in speculo, præsentium quidem rerum, clariora, præteritarum autem, quo sunt vetustiores, minus perspicua, minima verò futurarum, quæ scilicet nec sunt, nec fuerunt vnquam. Sed quia futuri effectus, in potestate causarum cohibentur, quasdam habent prægressiones, & præcursiones signorum, quæ hoc minus manifesta sunt, quo illa longius absunt, atque*

atque in hoc genere, ponenda censet somnia, Quapropter, ferè obscuris imaginibus & similitudinibus, res per somnia significantur, non æqualiter tamen, sed prout varia est illius phantastici spiritus tēperies & ratio similiter vt in speculis, pro varietate eorum materiæ aut figuræ, varia ac dissimiles redduntur imagines. Monet præterea Synesius non parum conferre ad quietam & veraciam in somno visam percipiendam, benè præparare hunc spiritum phantasticum, moderato nempe victu honesti studiis, & actionibus, sedandisque animi perturbationibus. Pythagoras certè iturus *Mos Py* cubitum, cantu & sono lyre somnum captabat, *thagora.* atque hac ratione ad bona lætaque somnia accipiendam se ipse comparabat; ob eandemque causam, esu fabæ suis interdicebat; quod haberet is cibus inflationem magnam, tranquillitati mentis vera quærentis contrariam. Verum hæc de spiritu phantastico à Sinesio prodita, nugæ sunt, & Pythagoræorum ac Platoniorum figmenta, vel ipsis poetarum fabulis inaniora veritatis, atque incredibilia.

S E D, vt aliquid etiam ex auctoribus, Ecclesiasticis delibemus, B. Gregorius in quarto libro *D. Gre-* Dialogorum cap. 48. sex causas colligit somniorum. *gor. sex* Aut enim, inquit, ex plenitudine, vel inanitate causas *rum: Aut enim, inquit, ex plenitudine, vel inanitate causas* corporis somnia existunt, aut ex antecedentibus diurnis *corporis somnia existunt, aut ex antecedentibus diurnis* cogitationibus, & turis: aut ex illusione Dæmonis, rum tra *nis cogitationibus, & turis: aut ex illusione Dæmonis, rum tra* aut ex reuelatione Dei, aut denique ex cogitatione ho *aut ex reuelatione Dei, aut denique ex cogitatione ho* minis simul, & reuelatione Dei, Eadem sex causas *minis simul, & reuelatione Dei, Eadem sex causas* somniorum; cum idem Gregorius commemorasset in lib. 8. Moralium. c. 13. mox eas aptis *somniorum; cum idem Gregorius commemorasset in lib. 8. Moralium. c. 13. mox eas aptis* diuinæ scripturæ somnijs, & exemplis illustrat atque *diuinæ scripturæ somnijs, & exemplis illustrat atque*

que



nijis, narrat quendam somniasse alterum crus factum esse sibi lapideum, mox autem cepisse illum ea parte corporis fieri paralyticum. Præterea, qui instate crisi sudaturi sunt, sæpè somniât se sudare, aut in balneo calidis aspergi aquis aut in flumine lacuve natâre, Illud quoque nonnunquã vñ venit, vt quod dormientes agimus, aut patimur, etiã somniemus, vt qui in somno sudant, aut febri corripuntur, itidem se affici somnient. Proditum est Plinio in libro 7. capite 50. P. Cornelium Ruffinum dormientem amisisse visum, idque cùm sibi accideret, etiam ipsum somniasse.

ALTERA causa somniorum spectat ad aliquem vehementem concitatumque animi affectum, & perturbationem, amorem dico spem, metumque, & odium. Nam qui ardenter amant, frequenter amores suos somniant: qui timent, minacibus, & terrificis in somno vilis sæpè turbantur. Huc etiam pertinet vetus consuetudo, & vitæ, quam agimus, exercitatio. Piscator enim ferè somniat maria, lacus, flumina, retia, pisces: venator, nemora, saltus, montes ferasque: miles turbarum sonitus, fragores armorum, vulnera, sanguinem, cædes. Lepidè quidam apud Theocritum piscator, *omnis, inquit, canis panes somniat, & ego pisces.* Continet eadem causa antecedentes vigilantium curas, & sollicitudines, & quæcunque nos vehementer premunt, & angunt: quarum rerum, sæpissimè in somno, similia visa contingunt. Quamobrem in lib. Ecclesiastici, C. 5. scriptum est *Multas curas sequuntur somnia.* In hoc genere somniorum, equidem reponerem somnium illud Annibalis, & proditum, & creditum à multis. Ardebat

*Secunda  
animi  
vehemēs  
pertur-  
batio.*

*Somniū* debat Annibal insatiabili odio Romani nominis  
*Anniba* omnique cupiditate perdendi funditus imperium  
*lis Italia* Romanum flagrabat, quo autem facilius id per-  
*vastita-* fieret, bellum ex Hispania transferre in Italiam  
*tem per-* cupiebat, arcem imperij Romam, periturus: Cū  
*tendens.* igitur varijs super ea re cogitationibus ac delibe-  
 rationibus æstuarer, visum habuit in somnio, mirè  
 proposito suo, voroque respondens. Visus ipsi est  
 iuuenis, specie supra humanam, qui se diceret à  
 Ioue missum ducem ei ad inuadendam Italiam,  
 iussitque ne respiceret, quid retrò & à tergo fie-  
 rer. Pavidus primo Annibal, non est ausus oculos  
 ab illo quoquā deflectere. Sed, prout est humanū  
 ingenium ad verita pronum, diu temperare ocu-  
 lis non quivit, respiciensque vidit, horrendum nō  
 visu modo, sed etiam dictu ostentum, belluā va-  
 stam & immanem, multis circumplicarum serpē-  
 tib. quacunque incedebat, omnia proterentem, at-  
 que peruertentem: cælum item nigerrimis vnde-  
 quaque occæcatum nubibus densosque ac fulgu-  
 ribus mixtos præcipitare nimbos. Attonito An-  
 nibal, percontantique ex illo suo duce, quid il-  
 lud monstri & porrenti esset, respondit ille, va-  
 stitatem esse Italiæ, pergeret ipse porrò ire, quò  
 parabar, nec præterea quicquam inquireret, sine-  
 retq; in occultò esse fata. Atque hoc quidem som-  
 niū ex antegressis in vigilia Annibalis cogi-  
 tionibus & curis extitit: sed eius tamē somnij veri-  
 tatem, rei euentus satis superque comprobauit  
 plus enim mali Annibal Italiæ attulit, quàm illo  
 fuerat viso præmonstrarum.

*Tertia*  
*Damo-*  
*nium cal-*  
*liditas.* TERTIAM causam somniorum, ego pote-  
 stati & calliditati Dæmonis adiudico. Is enim  
 multa

multa dormientibus inspirat, & suggerit somnia, semper insidiosè ac malitiosè, quo videlicet quacunq; possit ratione incòmodet, ac noceat homini. Esse autem quorundam somniorum Dæmonem architectum, atque effectorem, còliquet, quòd ex sacris literis planè intelligitur, oblationem somniorum adeo exosam esse Deo, ut eam magorum, augurum, & incantatorum maleficijs aggregata, extremis damnetur suppliciis. Nimirum non aliam ob causam, ut interpretatur Beatus Gregorius in lib. 4. Dialogorum, cap. 48. nisi quia dæmon plerumque se somnijs immiscet, implens noxia superstitione hominum animos, eosque nò tantum variè deludens, sed etiam perniciosè decipiens. Hoc genere somniorum solitum esse olim Dæmonem gètibus impietate cecis multifariam illudere, constat argumento Æsculapij, Serapidis, & Amphiarai: Nam ut apud Philostratum, Pausaniam, & Strabonem scriptum est, templa eorum adeuntibus, qui variis morborum generibus afflictabantur, fama erat tres illos vulgò existimatos, quasi Deos singulorum morborum curationes per somnia præscribere consueuisse. Ex hoc genere fuisse reor nobile illud somnium Alexandri Magni, scriptorum, qui res eius prodiderunt, auctoritate, apud multos fidem promeritum. Cum enim in quodam prælio Ptolemeus, qui prius post Alexandrum Ægypti rex fuit, venenato telo ictus, summo cum dolore ex eo vulnere moreretur: assidens ei Alexander, somnoque sopitus, vidit in quiete draconem radiculam ore ferentem, simulque còmonstrantem, quòd illa loci nasceretur, quæ scilicet præsentissimam vim

*Quedam  
somnia  
mitti a  
Dæmo-  
ne.*

*Somnia-  
rum A-  
lexand.  
Magni.*

haberet Ptolemæum, multosque milites eodem tali genere vulneratos, protinus sanandj. Quæ sita est herba, inuenta, adhibita, mox consecuto, qui promissus fuerat effectu. Sunt autem duo somniorum Dæmonis præcipua genera, alterum

*Duo genera somniorum Dæmonis.*

pertinens ad occultarum rerum demonstrationem & significationem. Potest enim Dæmon naturales effectus ex certis causis aliquando necessariò prouenturos, potest quæcunque ipsemet postea factururus est, potest tam præsentia, quàm præterita, quæ hominibus occulta sunt, cognoscere, & hominibus per somnium indicare. Alterum somnii genus vim habet cõcitadi perturbationes animi, agitatæ turbatisque, qui sunt in corpore humoribus & spiritibus, quo nimirum inflammentur homines, vel ad libidinem, vel ad odium & vindictam, vel alios prauos animi affectus.

*Quomodo inter nosci possint somnia Dæmonum ab alijs somnijs.*

DVPLICITER porrò, & quidem satis probabiliter, coniectari potest, quæ somnia missa sint à Dæmone: primò quidem, si frequenter accidant somnia significantia res futuras, aut occultas, quarum cognitio non ad utilitatem, vel ipsius, vel aliorum, sed ad inanem curiosæ scientiæ ostentationem, vel etiam ad aliquid mali faciendum conferat: eorum somniorum auctorem esse Dæmonem, non temerè crederetur: quippe qui ea ratione tentet animos hominum vana imbueret superstitione, quin etiam crimine impietatis obstringere. Deinde, si sobrijs, castis, & religiosi viris, tetra, obscena, plenaque crudelitatis, & impietatis somnia sæpenumerò contingant, ea proficisci à Dæmone, non immeritò existimabitur. Dæmon enim conatur impuris somnijs polluere

Polluere ac fœdere dormientium corpora, vt eius fœditatis, etiam animos expergilſcentium, quodammodo participes faciat. Quod ſi ne hoc quidē aſſequi poteſt, illud ſaltem curat, vt pios homines talibus viſis contriſtando, petturbando, & aſſigendo, ad orationem, ad charitatis officia, ad diuinorum ſacramentorum perceptionē, ſegniores, frigidioresque reddat. Cuius diabolicæ calliditatis & malitiæ, luculentiffimum in vigesima ſecunda Collatione ca. 6. Caſſianus narrat exemplum. Verum hac de re Iuſtinus Martyr, in reſpoſiſione ad quaſtionē vigesiſimam primam Orthodoxorum, diſertē doctēque ſententiam ſuam expoſuit. Nam cū hac ſibi ab illis poſita eſſet, quaſtio, ad eam ipſe quaſtionem ita reſpondet, vt nos hic diximus. Reſtat quarta, & vltima ſomniorum cauſa, quam diuinam rite nominare poſſumus: cuius potiſſimum gratia omnis hæc noſtris inſtituta eſt diſputatio, huic enim: vel declarandę vel illuſtrandę, adhuc prædicta deſeruiunt. Somniorum autē, quæ à Deo miſſa ſunt, exempla, paſſim indiuiſis libris ſunt obuia: nos ſuprà ex ſacris libris multa protulimus, pluraq; poſſēt afferri, ſi quis omnia vellet colligere. Cæterū vt vis, & natura diuinorum ſomniorum plenius planiuſque cognoſcatur, quaſtiones aliquot more ſcholæſtico diſtinctē quidem, ſed carptim breuiterque præſtringam, multa etiam breuitati ſeruiens, lectoris cogitationibus integra, illibataque reſeruabo.

*Quart  
cauſa ſomniorum  
diuina.*

## QVÆSTIO III.

*Quibus signis cognosci queat, sit aliquod somnium à  
Deo missum, necnè*



*Duplex  
ratio co-  
gnoscēdi  
diuina  
somnia.*

**D**VPLICITER, prout nunc mi-  
hi succurrit, deprehendi potest,  
quodnā à Deo sit missum somniū.  
Primò quidem, ex præstantia rerū,  
quæ per somniū significantur: ni-  
mirum si ea per somnium innotescant homini,  
quorum certa cognitio solius Dei concessu ac  
munere potest homini contingere, huiusmodi  
sunt quæ vocantur in scholis Theologorum, fu-  
tura contingentia, arcana item cordium, quæque  
intimis animorum inclusa recessibus, ab omni  
penitus mortalium intelligentia oblitescunt, de-  
nique præcipua fidei nostræ mysteria, nulli, nisi  
Deo docente manifesta. Somnium igitur, quod  
eiusmodi rerū cognitionem, & demonstracionem  
continebit, diuinū esse existimari poterit. Deinde  
hoc ipsum maximè declaratur interiori quadam  
animorum illuminatione atq; commotione, qua  
Deus sic mentē illustrat, sic voluntatē afficit, sic  
hominem de fide, & auctoritate eius somnij cer-  
torem facit, vt Deū esse ipsius auctorem, ita per-  
spicue agnoscat, & liquidò iudicet, vt id sine du-  
bitatione vlla credere, & velit, & debeat. Huc spe-  
ctat memorabilis illa in li. 4. Dialogorum, c. 48. B.  
Greg. sententia: *Sancti viri*, ait Gregorius. *intēr il-  
lusiones, atque reuelationes, ipsas visionum voces, &*

*Memo-  
rabilis  
sentētia  
D. Gre.*

imagines, quodam intimo sapore discernunt, ut sciāt quid à bono spiritu percipiant, & quid ab illusore patiantur. Nam si erga hac mens hominis cauta nō esset per deceptorem spiritum, multis se vanitatibus immergeret, qui nonnunquam solet multa vera prædicere, ut ad extremum valeat animam ex una aliqua falsitate laqueare. Hactenus Greg. apud quem hanc ipsam sententiam, sed plenius ac luculētius tractatam in li. 8. *Moralium*, c. 13. lector inueniet.

Quemadmodum igitur naturale mētis nostræ lumen facit nos euidenter cernere veritatem primorum principiorum, eamque statim, citra vllā argumētationem, assensu nostro complectis sic in somniis a Deo datis lumen diuinum animis nostris affulgēs, perficit, ut ea somnia, & vera, & diuina esse intelligamus, certoq; credamus. Rectē igitur illud traditur in lib. *Eccles. c. 34. Nisi à Domino missa fuerit visitatio, ne des in somnis cor tuū.* ex quo significatur, nonnulla somnia datī hominib. à Deo animos eorum mirabiliter visitante.

*H*ÆC autem Dei per somnia visitatio, sicut ex diuinis literis colligitur, multis & diuersis modis fieri solebat. Nonnunquam enim Deus per somnia turbabat, & terrebat hominem, sicut de Abimelech, & Laban narratur in lib. *Genesis*, *Terrebis me*, inquit Iob, 47. *per somnia, & per visiones, horrore concuties me.* Aliquando in somno hortatur & incitat hominem Deus ad magnum quidpiam & arduum subeundum, certam spem prosperi exitus præsignificando: velut in Gedeonis & Iudæ Machabæi somniis euenit. Sæpè monet, & docet, quid hominem agere, aut fugere oporteat, talia fuere B. Ioseph & Mago

*Varijs modis Deus afficit homines per somnia.*  
*Gen. 20.*  
*& 31.*  
*Iud. 7.*  
*2. Ma.*

- Matt. 2.* rum somnia:huc spectant illa verba, quæ sunt in c. 33. libri Iob. *Quando homines dormiunt in lecto, tunc aperit aures virorum, & erudiens eos, instruit disciplina.* Quin etiam solebat olim Deus spiritum propheticum nonnullis in somno largiri; nam in lib. Numerorum, c. 12. ait Deus. *Si quis fuerit inter vos Propheta Domini, apparebo illi in visione, aut per somnium loquar ad illum.* Et apud Iosephum in c. 2. inter alia Spiritus sancti dona, numerantur
- 3. Reg. 3.* somnia. Legimus etiam in 3. Reg. Salomoni fuisse à Deo promissum in somno prudentiæ & sapientiæ donum, Interdum quoque futura alicuius viri excellentia, dignitatis & gloriæ, præmonstrata est per somnium, id quod adolescenti Ioseph, & Mardocheo accidisse legimus in sacris
- Gen. 37.* literis. Quibusdam præterea in somnis patefacta sunt diuina mysteria, cuiusmodi fuit somnium Iacob de illa mystica scala, & Daniëlis de regno Christi. Denique præsignificauit aliquando Deus, & prædocuit futuros rerum humanarum euentus: cuius generis fuere somnia Abraham, Gen. 15. Pharaonis, Gen. 41. & Nabuchodonosor, Danielis 2. & 4.
- Variis* VARIIS item modis diuina somnia hominibus contigerunt, interdum cum magna corporis & animi commotione & horrore, sicut accidit Abraham, & Nabuchodonosor. Nonnunquam datum est alicui somnium, sed non eius somnij intellectus, sicut in somniis Pharaonis & Nabuchodonosor animaduertere licet: Daniëli tamen cæterisque prophetis, simul cum somniis, intelligentia eorum diuinitus suggerebatur. Quamquam duorum somniorum, quibus Ioseph supra fratres ipsius futura dignitas & potestas præsignabatur



signabatur, nulli tūc datus est intellectus: sed po- *Gen. 37*  
 stea ipso euentu, successūque rerum veritas eorū *Matth.*  
 somniorum cognita est, atque comprobata. Illa *1. & 2.*  
 quoque in somniis diuinis varietas cernitur: alia *Aētor.*  
 enim clara sunt, & aperta, euidenter res ipsas si- *16.*  
 gnificantia, vt fuere somnia beati Ioseph, trium *Gen. 41.*  
 Magorum, & D. Pauli: alia verò sunt inuoluta: & *Dan. 2.*  
 obscura, per varias similitudines rectè aliquid in- *Gen. 40.*  
 sinuantia, huiusmodi fuere somnia Pharaonis de  
 septem spicis, & bobus, & Nabuchodonosor de  
 statua & arbore, necnon & pincernæ, atque pi-  
 storis ipsius Pharaonis. Ad hæc, interdum videtur  
 in somno loqui cum homine, vel Deus ipse, vt in  
 somnio Iacob, & Salomonis, vel angelus, vt in *Gen. 2.*  
 somniis beati Ioseph, vel homo aliquis, vt in som- *3. Reg. 3.*  
 nio D. Pauli. Præterea sæpè Deus vltro mittit *Matth.*  
 somnia, nonnūquam etiam rogatus, quemadmo- *1. & 2.*  
 dum interpretationem somnij, quod acciderat *Aētor.*  
 Nabuchodonosor, Deus in quiete tradidit Daniē- *16.*  
 li, qui eā ab ipso vigilans intentissima precatione *Dan. 2.*  
 postulauerat. Quin fuisse quōdā apud Hæbræos  
 admirabilem quandam rationem & consuetudi-  
 nem in rebus maximè dubiis atque grauissimis,  
 consulendi Deum, vt quod verum esset, aut quod  
 factū esset opus, per somnia indicaret, ex cap. 28.  
 primi libri Regum, intelligitur. Postremò quadā  
 somnia diuinitus data respondent antecedenti-  
 bus in vigilia hominum cogitationibus & curis,  
 ad hoc genus referri debet primum somniū Na-  
 buchodonosor, à Daniēle 2. capite narratum,  
 itemque primum beati Ioseph, quod in capite  
 primo narrat Diuus Matthæus, atque illud Anni-  
 balis supra memoratum, illud quoque Scipionis

Æmiliani, à Cicerone, vel acutè confictum, vel  
disertissimè narratum.

## QVÆSTIO IV.

*Cur Deus in somno arcana sua hominibus referet.*



V. M. animus hominis in somno, mi-  
nimè docilis, minimeque habilis ad  
percipiendas res diuinas esse videat-  
tur, dignum sanè videntur inqui-  
sitione, cur Deus per somnia & arcana suæ pro-  
uidentia, & mysteria rerum cœlestium non ra-  
rò docere homines voluerit. At enim verò, mul-  
tas eius rei, variasque causas afferre possumus.

*Quin-* *que cau* Primam causam tangit Hippocrates in principio  
*sa cur* libri de Insomniis, animam hominibus in vigi-  
*dormiē-* lia variis distringi occupationibus, grauib. disti-  
*tibus* neri negotiis, curisque distrahi: per sensus item  
*multa di* exteriores euocari ad ea, quæ extra ipsum sunt,  
*ninitus* & per varia eorum sensuum spectacula diuaga-  
*renelen-* ri, multiplicique rerum humanarum strepitu  
*tur.* interpellari, & à sui, rerumque cœlestium con-  
*Habi-* sideratione auocari, incertis præterea fluctuare  
*lior ani-* deliberationibus, variisque studiis & affectibus  
*mus no-* æstuarè, qui non sinunt eum, quod verum & re-  
*ster in* ctum est, id aut liquidò cernere, aut incorruptè  
*sōno ad* iudicare. Contra verò in quiete & somno, ab  
*percipiē* eiusmodi omnib. interpellationib. & impedimē-  
*das dini-* tis vacuus & liber animus, sibi totus præsens &  
*nasrene-* præsto est, sibi que attendit, in se suas omnes vi-  
*lationes.* res, atque facultates collectas & coniunctas ha-  
bet

bor, expeditus & acer ad intelligendum, atque  
 omnium quæ illi extrinsecus obiecta sint, am-  
 plissimè ac facillimè capax. Alteram eiusdem rei  
 causam hanc ponere licet, quæ vigilantes accipi-  
 mus, ea solemus subtiliter ratiocinando discente-  
 re & examinare, reuocare ad calculos, atque hu-  
 manæ rationis trutina diligenter expendere: ad  
 rationis enim normam exigimus omnia: cui si  
 congruant, quæ nobis oblata sunt, à nobis appro-  
 bantur, si discrepent, abiudicantur atque reiici-  
 untur. In somno autem res sibi obiectas ani-  
 mus hominis citra examē accipit, paratior prom-  
 ptiorque ad visis diuinitus datis credendū, atque  
 obsequendū. Constat autem inter omnes qui de  
 reb. diuinis scripserūt, ad eas res nō tantū intelle-  
 ctu, sed etiā affectu, & quodā animi quasi sensu,  
 gustuq; percipiēdas, satius esse agi & Regi homi-  
 nem extrinsecus, quàm ipsum agere se, & audi-  
 torē esse potius, quā arbitrum, & existimatorem,  
 denique simpliciter credere potius, quàm causas  
 credendi disquirere & expēdere. Tertia causa ex *Aristoteli*  
 Aristotelis libello, qui inscribitur de Diuinatione *les.*  
 ne, quæ fit ex somniis, desumpta est: ait ille, *Quē-*  
*cunque motū, quo animus dormiētis extrinsecus pul-*  
*satur & cietur, quamuis leuem & exiguū, magnam*  
*tamen habere vim commouendi animum, vehemen-*  
*tēque in ipsum imprimi, atque aliē in eo inharere:*  
*id autem fieri propter noctis silentium, & sensuum*  
*exteriorum vacationem & quietem, atque om-*  
*nium, qua animi intentionem remittere solent, va-*  
*cuitatem, tunc enim sensibus somno consopitis, lan-*  
*guentēque corpore, quæ extrā sunt nequaquam*  
*sentiuntur.* Quapropter opportunissimè Deus eo  
 K 5 tempo

tempore docet hominem sine vlla eius perturbatione, sine aliorum hominum obseruatione, denique sine vllius rei interpellatione: præsertim autem, quia quò magis animus noster à sensuum confociatione, & corporis contagione abstrahitur, tantò videtur effici vegetior, & acrior ad res diuinas intelligendas. In somno autem, qui est imago quædam & repræsentatio mortis, videtur animus quodam modo seiugari à consortio corporis, eiusque vinculis, si non omninò, certè aliquatenus relaxari. Quartam causam esse arbitror, vt ea re ostendatur, quantò sit Deus potentior, & efficacior ad hominem docendum & erudiendum, quàm sit alius quiuis homo: quippe homo hominem docere, nisi vigilantem, audientem & attendentem non potest: Deus autem, etiam altissimè dormientem, atque somniantem. Quo satis declarat se in omnes humani animi vires, ac facultates summum imperium, & efficacitatem habere. Quintam causam equidem posuerim, ne videlicet quispiam existimaret, mortem auferre homini omnem scientiam: aut non esse aliam viam rationemque comparandi scientiam, quàm per sensum, discursumque rationis, & ex antecedenti aliarum rerum cognitione. Auerroës quidem super libello Aristotelis de Diuinatione per somnia, in commentario suo, non audet inficiari prophetiam posse homini accidere, vel in somno, vel per reuelationem, negat tamen ea ratione vel artes, vel scientias speculatiuas posse vlli còtingere. *Vna*, inquit, *est natura hominis: unus igitur duntaxat erit intelligendi, & discendi modus, scilicet internuntijs sensibus,*

*Contra  
Auen-  
roem.*

*sensibus, varijs item praeceptis, experimentis, diligentique ratiocinatione. Nam si prater communem, & vſitatum discendi modum, eſſet hic alter per ſomnia, vel reuelationem, cum is multò ſit facilior, atque praſtantior, ille alter quò difficilior & laborioſior eſt, eò magis fuiſſet ſupernacaneus, non igitur datus eſſet homini. Deus namque, & natura nec fruſtra quicquam faciunt, & de ijs, quæ poſſunt fieri, quod melius & praſtabilius eſt, nunquam non faciunt. Sic ille. Quæ ſanè argumentatio, non eſſet planè infirma, ſi quiſquam diceret, nemo tamen noſtrum id dicit, modum illum discendi per ſomnia, vel per reuelationem, aut eſſe homini naturalem, aut eſſe frequentem, & vſitatum. Verùm hæc Auerrois commenta, vt alia eiſdem, de ſcientia, potentia, & providentia Dei, & humani animi natura, ex inſcitia diuinarum rerũ, & impietatis fonte redundantia, quàm ſint inerudita, obtuſa, falſa quæ ſatis liquet vel ſolis exemplis quæ memorantur in ſacris literis; Adami, Salomonis, Danielis, multorumque Prophetarum, quibus multarum rerũ ſcientia ſubitò data eſt à Deo. quin etiã Beſeleel, & Oliab, quos in libro Exodi proditum eſt, ſubitò diuinitus edoſtos,*

*Mofaycum tabernaculum, ſimul*

*cum omnibus eiſus inſtrumentis atque ornamen-*

*tis, ſumma arte*

*perfeciſſe.*

\*\*\*

Q V Æ S

## QVÆSTIO V.

*Cur à Deo somnia dentur obscuris & indoctis hominibus, non autem sapientibus.*

*Error Aristotelis & Ciceronis.*



EL hac vna ratione Aristoteles & Cicero omnium somniorū, quæ diuina creduntur, fidem & auctoritatem eleuari, & eludi posse putauerūt. *Nā, si qua somnia*, inquiūt.

*darentur hominibus à Deo, ea non obscuris & indoctis hominibus, sed viris sapientia prudentiāq; præstabilib. dari, par erat.* In quo fefellit eos q̃ distinctionē diuinorū somniorū, eorū dico, quæ verè diuina sunt ab iis, quæ nō sunt, esse tamē falsò putantur,

*Cur Damones sō* planè ignorauerūt. Enimuerò Dij Gentiliū, quos  
*mones sō* fuisse Dæmones nobis Christianis nequaquā du-  
*bia olim* bium est, quemadmodum futuros rerum huma-  
*da e soli* narum casus & euentus certò providere, ac scire  
*is fuerint* non poterant, id enim solius Dei est, ita nec eos  
*nō Do-* certis, aut verbis, aut signis prædicere, ac præmō-  
*ctis &* strare poterant: Quapropter somnia, quibus præ-  
*Prudenti* significabantur futura, non dabant viris doctis &  
*bis, sed* prudentibus, videlicet ne illi eorum somniorum  
*imper-* vanitatem, ac falsitatem deprehendentes, aucto-  
*ris, & cō* ritatem ipsorum Deorum apud alios contererēt,  
*temptis-* eorūque oracula tanquam diuinitatis vacua, &  
*simis ho-* inania veritatis, in publicum etiam vulgi ludi-  
*minib.* brio & contemptui exponerent: dabant igitur ea  
somnia indoctis, & veri falsiq; discernendi im-  
peritis

peritis, maximè verò superstitiosis, ob idque ad credendum quiduis, fatis per se paratis atq; propensis. At verò somnia; quæ à vero Deo missa sunt, ea legimus plerumque data viris sanctitate, ac sapientia eximii, vt Abraham, Iacob, Salomoni, & Danieli. Data sunt tamen etiam nonnulla viris non admodum doctis, sed pietatis tamen, ac innocentiae præstantia clarissimis: excellens autem virtus & pietas dociliorem reddit hominis animum, aptiorémque ad rerum diuinarum perceptionem, quàm humana vel prudentia, vel sapientia. Qui enim mundana excellent potèntia, vel sapientia, hi ferè sunt aut impij aut superbi, aut turpissimis inquinati flagitiis: quæ res cœlestibus doctrinis diuinisque illustrationibus, aditam ad animos hominum, penitus occludunt. Nec me fugit, etiam quibusdam sceleratis atque impiis hominibus, vt Pharaoni, & Nabuchodonosor, quædam diuinitus somnia contigisse, sed hæc illis, nec ipsorum præcipuè causa, neque cum intelligentia eorum somniorum data sunt: quo scilicet, illi eorum interpretationem, cum apud suos sapientes inuenire non possent, à veri Dei cultoribus eam petere cogerentur, atque ea ratione verum Deum agnoscerent, ac venerarentur, eiusque seruos in administratione, & honore haberent: id quod somnia

*Cur quædam somnia etiã impijs hominibus à Deo sint data.*

Pharaonis, & Nabuchodonosor à Iosepho, & Daniele interpretata manifestè declarant.

QVÆS

## QVÆSTIO VI.

*Cur diuina somnia nonnunquam sint obscura,  
& perplexa.*



ED cur diuina somnia non semper  
sint clara, & aperta, sed obscura, &  
perplexa, & aliarum rerum imagini-  
bus, ac similitudinibus inumbrata, &  
& offuscata, nec aliis tantum, sed etiam iis, qui-  
bus dantur, minimè conspicua, causas rimemur,  
& aperiamus. Dij gentilium, hoc est Dæmones,  
quia certam futurorum euentuum scientiam ha-  
bere non poterant, ad significanda futura, dabant  
illi quidem non rarò somnia, sed obscura tamen,  
& ambigua, quæque ad diuersos, etiam contra-  
rios euētus facilè detorqueri, & applicari possent,  
vt ad quodcunque cecidisset, somnium quadrare  
videretur. Quod si somnia euētis minimè respō-  
derent, id non falsitati somniorum, sed interpre-  
tationis inscitiae, qui somnia propter obscuritatem,  
ambiguitatem non ritè essent interpretari adscri-  
beretur. At verò somnia, quorum auctorem fuisse  
Deum ex sacris literis cognouimus, sæpenu-  
merò distinctè, & explicatè tradita sunt, qualia legimus  
fuisse Abimelech, Laban, Iudæ Machabæi, Salo-  
monis, B. Ioseph, & trium Magorum. Non est ta-  
men negandum quædam somnia esse data rectè,  
& obscurè, sed hominibus gentilibus, ad eum  
nempe finem, vt intelligentiam eorum somnio-  
rū, cum nō ab aliis, quàm à viris sanctis accipere  
possent

*Astutia  
Dæmo-  
nū in dā  
dis som-  
niis fu-  
ra signi-  
ficantib.*

*Qua  
tuor cau-  
sæ cur in  
terdum  
diuina  
somnia  
sint val-  
de obscu-  
ra.*



possent, & ipsos Dei seruos honorarent, & summa Deum reuerentia, ac veneratione prosequerentur. Si quæ verò somnia etiam seruis Dei obscura data sunt, propterea id factum est, vt eorum sensum atque intellectum, summo illi studio, assiduis precibus, multisque lachrymis à Deo flagitantes, tandem impetrarent, & propter difficultatem impetrandi, pluris facerent, & cariores haberent. Denotatur præterea obscuritate somniorum, earum rerum, quæ significantur somniis obscuritas. Adde quod per imagines, & similitudines, breuissimè plura, & sublimiora mysteria significantur, quàm si apertis, & propriis fuissent expressa vocabulis. Nam quàm multa, quàm varia, quàm profunda mysteria, vna illa statua Nabuchodonosor in quiete visa adumbravit, quæ si fuissent propriis verbis efferenda, vix longissima oratione declarari potuissent. Deniq; vult Deus nōnunquā, somnia esse ad aliquod tempus occulta, & incognita, quoad nimirū, ipso euentu, rerūque successu, eorum veritas agnoscat, & cōprobetur: quod in duobus illis Iosephi somniis, pro moitionem eius ad summā potentiā & dignitatem præignantibus, liquidò cernitur.

---

### QVÆSTIO VII.

*An licitum Christiano homini, sit obseruare somnia.*

**D**VÆ tāguntur his verbis difficultates, & prior quidē est, an sit fas Christianis, curiosè somnia obseruare: ad quam facilis est, & in prōptu respōsio. Etenim quædā somnia  
licitum

*Qua-  
mor ge-  
nera sō-  
niorū, si-  
ne vitio  
possunt  
observa-  
ri & cu-  
rari.*

licitum est obseruare, quādam verò minimè. Principiò, somnia quæ bonam, vel malam corpo-  
ris affectionem aliquam, morbosque tam animi,  
quàm corporis significant, vtiliter à medicis tam  
animi, quàm corporis obseruantur & expendun-  
tur. Tum, somnia, quæ nos crebrò infestant, ter-  
ritant, conturbant, & vexant, animaduertere qui-  
bus ex causis accidunt, vt vel noti effectus igno-  
tas nobis causas scrutemur, ac teneamus: vel vt  
rationem aliquam ineamus eam à nobis mole-  
stiam depellendi, licitum est, & à sanctis viris sæ-  
pè vsurpatum. Legimus enim apud Cassianum in  
Collatione 22. veteres illos monachorum magi-  
stros & rectores, in perquirendis, & excutiendis  
quorundam somniorum causis, diligenter esse  
versatos. Postea obseruare somnia, quatenus in  
illis pernotescit homini veritas aliqua pertinens  
ad scientias speculatiuas, vel ad res gerendas con-  
ferens, nec vt superstitiosum, nec vt vanum dam-  
nari debet. Denique, somnia quæ nos sæpè com-  
mouent, & incitant ad flagitia, considerare num  
à Dæmone nobis subiiciantur, sicut contrà, qui-  
bus ad bona prouocamur & instigamur, veluti  
ad cælibatum, largitionem eleemosynarum, &  
ingressum in religionem, ea ponderare num à  
Deo nobis missa sint, non est superstitiosi animi,  
sed religiosi, prudentis, ac salutis suæ satagentis  
atque solliciti.

At verò, cuiuscunque somnij, quoquomo-  
do nobis contingat, etiam si rarò, si temerè, si  
fortuitò eueniat, putare habendā esse rationem,  
curamque suscipiendam, stolidi hominis est, ne  
dicam stulti. Supra enim ostensum est, maximam  
partem

partem somniorum nihil veri, & certi habere, sed vanitatis, ac temeritatis esse plenissimā. Præterea observare somnia, quasi esset in ipsis aliquid divinum, scilicet quale Gentiles existimabant esse in garritu, volatu, cibatuque avium, & in extis animantium, atque ex illis prænosse, ac divinare velle futura, non modò non est licitum, sed est in scriptura gravissimè reprehensum, damnatum, & interdictum, non minus sanè quàm Magorum, & Incantatorum maleficia, quod ex cap. 19. Levit. ex 18. Deuteron. ex 33. posterioris libri Paralipomenon, aliisque sacrorum voluminum locis perspicuè intelligitur. Et verò scire velle futura, quæ Deus in sua solius potestate posuit, arrogans & impia est curiositas. Putare autem certa futurorum signa contineri in somniis, quæ nullam cum rebus futuris connexionem & convenientiam habent, fatuum est: parum dixi, planè impium, & stultum est, hoc enim arguit eiusmodi somniorum observatores, stultis, impiis, & absurdis opinionibus esse infectos, atque depravatos. Nam, vel isti putant res omnes futuras, ex naturalibus causis pendere, & hoc falsum est, vel eas res quibuslibet somniis significari posse, quod planè stultum est: vel futura omnia certò provideri, & sciri à Dæmonē, quod est perquam impium: vel denique à Deo promiscuè, atque indiscretè per quælibet somnia, & quibuslibet hominibus, præmonstrari futura, quod esse absurdum, nemo non videt. Ad extremum, tanti facere somnia, & vsque adeò pendere ex illis, ut ad eorum quasi normam dirigat quis omnē vitæ suæ rationē, & respectu habito ad somnia, actiones,

L

&amp; negotia,

*Maiores  
vanitas  
est obser-  
uantium  
somnia,  
quam  
astra.*

& negotia, vel suscipiat, vel omittat, non modo præstantia hominis indignum est, sed olet etiam fatalem illam Stoicorum, toties in Ecclesia damnatam, & à melioribus philosophis explosam reiectamque necessitatem. Quod si merito vituperantur, & à sapientibus redarguuntur. Astrologi, quasi res humanas ex astris, quali suspensas & religatas omnino pèdere arbitratur: ed magis profecto, reprehèdendi sunt superstitionis somniorum obseruatores, quò magis astra dignitate naturæ æquabilitate motus, constantia ordinis, amplitudine potestatis, & præstantia efficacitatis, somniis antecellunt.

## QVÆSTIO VIII.

*Cuius hominis sit ritè interpretari somnia.*



AD posteriorem quæstionē, qua quæritur, cuius hominis sit benè interpretari somnia, hunc in modum respondemus. Somniorum quæ vim habent ad aliquid significandum, & obseruatione, atque interpretatione digna sunt, ea non cuiusvis hominis est interpretari. Tria enim huiusmodi somniorum genera distingui possunt: nam multa sunt naturalia, quædam humana, nonnulla etiam diuina. Naturalium somniorum interpretatio, non est dubium, quin solertium & doctorum physicorum, ac medicorum sit propria: eorum maximè, qui norūt similitudines in somniis ostensas cōparare inter se, & quarum rerum similitudi

similitudines esse, & ex quibus causis proficisci soleant, discernere, similiter, ut qui figuras aliquas & imagines dilaceratas sumens in manus, earumque partes dissipatas, bene componens invicem, apteque conformans, cuius rei fuerint similitudines, hominisve, an equi, an aliarum rerum, acutè dispicit, vereque iudicat. Humanorum autem somniorum, ita erit quisque sagacissimus coniector, & idoneus, ac veridicus interpret, ut fuerit rerum humanarum peritissimus, & callidissimus, & ingeniorum item, studiorum, morum, & propensionum, quæ in variis hominibus magnam quoque varietatem habent exquisitam, multisque confirmatam experimentis notitiam sit adeptus, quasi venas omnes rerum civilium & humanarum tenens. Cuius autem sit exponere diuina somnia, in proprium est intelligere: patet enim neminem interpretari ea posse, nisi diuinitus afflatus & eruditus. *Nemo enim novit, inquit Paulus primæ ad Corinth. secundo, quæ Dei sunt, nisi spiritus Dei.* Præsertim verò cum diuinorum somniorum significationes, ex solius Dei consilio, & voluntate sint institutæ, ob idque solius Dei revelatione, notæ hominibus esse possint. Quocirca regem Nabuchodonosor somnij sui, quo maxime territus fuerat, sollicitum, & anxium, quod eius somnij rationem ex nullo suorum sapientum cognoscere potuisset, sic affatus est Daniel, *Mysterium, quod res interrogat, Magi, arioli, aruspices, & sapientes nequeunt indicare regi: sed est Deus in cælis revelans mysteria.* Dan. 2

IAMBLICVS existimat diuina somnia fere non contingere hominibus: nisi aut primò aut

*Iamblici* extremo somni tempore, videlicet, quia tunc  
*opinio, de* animus hominis, aut nondum est cibi potusque  
*tempore* vaporibus occupatus, & oppressus: aut iam eua-  
*quo diui* nesciente somno, vaporumque discussa caligine,  
*na sōnia* ex illis sordibus emersus animus, purior & a-  
*cōtingat* crior est ad diuinas illustrationes accipiendas,  
*homini-* Quapropter vates, ac somniorum interpretes,  
*bis resu-* in more habebant, ex deferentib. ad ipsos som-  
*tatur.* nia sciscitari, quo ea tempore ipsis contigissent;  
 nam si profundo somno accidissent, ea planè ab-  
 iiciebant, rati non esse consentaneum, animo  
 tunc obruto, & demerso, dari cœlitus somnia: sin  
 autem somnia illis accidissent, exeunte somno,  
 & animo ad suas functiones propè iam expergit-  
 cente, tunc ea somnia diuinitus missa, Deoque  
 auctore digna iudicantes, ponderanda sibi, & in-  
 terpretanda suscipiebāt. Legendus etiam est Phi-  
 lostratus in cap. 14. lib. 2. de vita Apollonij Ve-  
 runtamen Iamblici documenta ex superstitionis  
 Ægyptiorum sacerdotum obseruationibus, vel  
 vt dicam veriùs, figmentis, quorum fuit ille stu-  
 diosissimus, exprompta sunt Deus nempe, istius-  
 modi temporum legibus non est alligatus, nec  
 opportunitate temporum eget ad operandum,  
 vbicunq; enim vult, quâdocunq; & quibus-  
 cunq; vult, sua inspirat somnia: potest. n. quo-  
 uis tempore, imò etiam sine tempore sedare sub-  
 itò agitationem humorum, trāquillare spirituum  
 animalium iactationem, purgare phantasiā, men-  
 tem illustrare, animumque ad percipienda diui-  
 na somnia idoneè comparare;

QVÆST

## QVÆSTIO IX.

*An in somno, liber usus rationis, & voluntatis  
esse queat.*



**S**ÆPENV MERO in somniis, præfertim quæ doctis, prudētibus, & sanctis viris cōtingūt, animus hominis, quod pertinet ad usum rationis, & agitationem mentis, solutus, expeditus, ac liber est. Etenim nōnunquam ratio dormientis planè cognoscit res simplices, easque vel cōponit in vicem, vel disiungit, ratio- cinatur, iudicat, miratur, noua quædam inuenit: quin etiam ad se ipse animus conuertitur, & ad suas actiones considerandas, & diiudicandas acie suam, vimque reflectit, cunctatur, hæret, dubitat, secum ipse disceptat, an tunc homo dormiat, necne. Hæc autem liberum esse tunc rationis usum, manifestè demonstrant. Non propterea tamen existimandum est, quia in somno interdum soluta est vis rationis, esse itidem perfectum liberi arbitrij usum. Nam ad plenum & perfectum liberi arbitrij usum opus est perfecta hominis libertate, hoc est, solutione omnium sensuum, & potentiarum, ita ut sit ipse homo, qui tunc agat, nec aliundè agatur, sitque dominus sui, atque suarum omnium actionum, & in potestate eius sit tunc hoc, vel illo modo agere, aut etiam nihil agere: id quod in somno nequam euenit.

*Sæpè in  
somnia li-  
ber est ra-  
tionis u-  
sus.*

*Nūquā  
in somno  
est perfe-  
ctus libe-  
ri arbi-  
tri usus.*

## QVÆSTIO X.

*De somnio Salomonis, in quo donum sapientie  
à Deo promissum ei, & tributum est.*



**C**ETERVM nōnihil habet difficul-  
tatis, quod legitur in 3. lib. Regum,  
cap. 3. Deum in somno visum esse  
Salomoni, iussisseque vt, peteret ab  
ipso quodcunque omniū maximè, optaret: ipsum  
autem petiisse sapiētiam, & prudentiam benè re-  
gendi populū, cui præerat posthabitis omni-  
bus aliis bonis, quæ tamen Principibus huius,  
mundi, super omnia, concupiscenda, & expe-  
tenda videntur: eam, porrò petitionē vsque adeo  
placuisse Deo, vt summā ei daturum sapien-  
tiam, & præterea quæ non postulasset bona, cu-  
mulatissimè largiturum polliceretur. Ex qua nar-  
ratione ipsius scripturæ, satis intelligi videtur,  
Salomonem in illo somnio solutè ac liberè, non  
tantum ratione, sed etiam voluntate esse visum:  
neque enim illa eius petitio facta in somno, rā-  
topere Deo placere, tantumque sapientiæ mu-  
nus prometeri potuisset, nisi esset ex libera vo-  
luntate profecta. Hæc difficultas tribus modis  
*Solutio* posset discuti, ac dissolui. Nam primò quidem  
*triplex.* responderi posset illam Salomonis in somno pe-  
titionem, placuisse Deo, non per se, sed propter  
antegressam eiusdem in vigilia similè quandam  
petitionem, ex qua scilicet illa in somno extitit.  
Salomon enim ardentissimè expetierat, & à Deo  
postulauerat donū sapientiæ, ac prudentiæ: hanc  
eius



eius petitionem, Deus illo somnio declarauit fuisse sibi gratissimam, & optatum habituram effectum. Sed hæc fortasse cuiuspiam videbitur nonnihil dura, & contorta responsio. Quocirca subiiciam alterum responsum: posset enim dici, à principio fuisse illud quidem somnium, sed postea Deo mirabiliter operante, conuersum esse in ecstasim seu raptum, qualis nempe diuo Paulo, & Prophetis sæpe contigit: in quo animus Salomonis, licet à corporis, & rerum externarum sensu abstractus & similis dormientium esset, per Dei tamen potentiam factum est, ut solutus, & liber tunc fuerit ad exercendas actiones, tum rationis, tum liberi arbitrij, ita ut liberè peteret à Deo Salomon quod vellet, & petendo, quæ grata erant Deo: ea quoque mereretur ab ipso consequi. Sed non placet hoc responsum. Mitto nunc examinare, an in raptu & ecstasi, perfectus liberi arbitrij vsus esse queat: tantum dico huic responso minimè suffragari diuinam scripturam, quippe, supra dicto loco narratura visionem illam Salomonis, præfatur, Deum apparuisse Salomoni per somnium, & narratam visionem, subiungit, *igitur enigilaui Salomon, & intellexi, quod esset somnium.* Quo perspicue significatur, illam visionem nullatenus fuisse raptum, vel ecstasim, sed totum fuisse somnium, diuinum tamen somnium, scilicet à Deo ad erudiendum docendumque Salomonem datum. Atque duas hæc solutiones propositæ questionis tractat D. Thomas in 1. 2. quæst. 113. art. 3. ad 2.

ER 1. 1. igitur mihi fallor, similis & proprius vero tertium responsum, quod etiam Tostato super

3. cap. lib. 3. Regum, 19. qu. 12. maximè probatum est. Dicimus, cum Salomon, tunc verissimè dormierit, & illa eius visio fuerit somnium, quemadmodum scriptura testatur, hinc necessariò effici, quicquid ibi factum esse dicitur, non reuera, sed per imaginariam tantùm dormientis visionem esse factum. Videbatur igitur tunc sibi Salomon petere sapientiam à Deo: videbatur etiam ei Deus petitionem ipsius approbare, cum reuera tamen nulla fuerit tunc petitio, nullum meritum Salomonis, nullum item responsum, nullumque Dei promissum. Cur igitur, inquires, somnium illud à Deo datum est Salomoni? Videlicet, nisi mea esset coniectura, tres ob causas. Primò, ut intelligeretur omnium bonorum auctorem, & largitorem esse Deum, & ab eo esse omnia bona expetenda & postulanda. Deinde ut manifestum fieret, quæ bonorum electio, & petitio, grata esset, & accepta Deo: ea nimirum, qua spiritalia bona corporalibus, cœlestia terrenis, denique ad communem aliorum vtilitatem & salutem pertinentia, inanibus & infructuosis præoptantur, atque præferuntur. Ad extremum, ut exemplo Salomonis appareret & extaret, quanta sit Dei benignitas & munificētia erga seruos suos, quorum optata & postulata non solum impleat, sed etiam longè superet, & abundanter excedat. Ecce Salomon solam à Deo sapientiam postulauerat, præ hac cæteris bonis, quæ hominibus pretiosissima, & carissima sunt, contemptis: cui tamen Deus, & sapientiam supra ipsius votum, & reliqua bona, præter votum ipsius, largissimè donauit. Verum hæc nostra de somniis disputatio, hunc

*Cur somnium illud datum fuerit Salomoni.*

hunc habeat terminū. Vereor enim ne si longius producta sit, molesta & odiosa lectori esse incipiat. Quemadmodum enim somnus, quoad quietus & placidus est, membra dulcissimè refouet ac recreat, viresq; reficit ac redintegrat, si tamen in eo nimis longa nimisque seria, & graua contingant somnia, corpus pariter atque animū languescit, & debilitat: sic omninò cauendum nobis fuit, ne nostra hæc de somniis disputatio,

præter modum longa; gratiam perderet  
 legentium, & quant ex ipsa fortasse

voluptatem cœperant, in

fastidium, odiumque

conuerteret.

\*\*\*

L

BENE





## BENEDICTI

PERERI,

LIBER TERTIVS,

qui est

*De Diuinatione Astrologica.*

ANTA est Astrologorū (qui vulgò Iudiciarij appellātur) vel imprudētia, vel amentia, vt etiā sibi diuinā Scripturā suffragari, suāq; Astromantiæ fidem & auctoritatē firmare iactent. Etenim verba illa quæ dixit Deus creans luminaria cæli; *Et sint in signa, & tempora, &c.* ad suā referunt diuinationē Astrologicam, per quā ipsi profitentur ex obseruatione syderum futura rerū euēta posse prædici. Quocirca B. Basilius & Ambrosius alijq; permulti Patres in explanatione eorum verborū, benè longā & accuratam, in refellendis istiusmodi Astrologorū prædictionibus, orationē posuerunt. Quorum nos Patrum exemplis prouocati, & grauissimis Dei sententiis cōtra Astrologos multi

multifariam in diuina Scriptura proditis  
 permoti, quin etiam iustissimo aduersus  
 Astrologos odio, propter fraudulenta, &  
 perniciosa eorū figmēta, incensi, librum  
 hunc ad confutandas eorū prædictiones  
 à nobis scriptū, gratū multis atque vtilē  
 fore existimauius. Scripsit aduersus  
 Astrologos copiosè quidē & eruditè Io.  
 Picus Mirandulanus; sed multos ab eius  
 lectione deterret prolixitas operis. Nos,  
 licet in prædiuiti atque vberi versemur  
 argumētō, eò tamē breues erimus, quòd  
 non omnia quæ disputari possent, sed  
 aptiora dūtaxat causæ firmioraq; tracta-  
 bimus. Quinq; autē erunt huius libri &  
 disputationis aduersus Astrologos capi-  
 ta: Primò enim docebimus, Sacræ & Ec-  
 clesiasticæ doctrinæ diuinationē Astro-  
 logicā esse contrariā: Tum ostendemus,  
 Astrologos esse rerū cælestiū imperitos:  
 Deinde, diuinatricē istam artē rectæ ra-  
 tionis ac Philosophiæ aduersari demonstrā-  
 bimus: Adhæc, probabimus, astra nō solū  
 nō esse causas efficientes rerū futurarū,  
 verum nec esse certa signa quæ res futu-  
 ras prænotent ac præmonstrent: Ad ex-  
 tremum, cur nōnulla Astrologorū præ-  
 dicta sint vera, causas exponemus.

## INDEX DISPUTATIONVM

QVÆ SINGVLIS IN PRÆDICTIS capitibus explicantur.

## CAPVT I.

1. **S**ententijs diuinæ Scripturæ, antiquis item Ecclesiæ institutis & exemplis, rationibus etiã Theologicis refelluntur Astrologi.
2. De vanitate oraculorum Appollinis.
3. Cur Demones prædicēdo futura sæpè fallant.
4. Non posse veritatem Christianæ religionis coherere cū veritate Astrologiæ iudiciariæ.
5. Quàm seuerè olim Ecclesiæ in istiusmodi Astrologos animaduertit.
6. De multis perspicuè falsis & impijs Astrologorum sententijs.

## CAPVT II.

7. Astrologos iudiciarios esse rerum celestium imperit os.
8. Aduersus fictitiā antiquitatem obseruationum quam iactant Astrologi.
9. De noua stella quæ superioribus animis visa est.
10. Quàm sit difficile aspectum syderum in ortu cuiusque hominis exactè annotare.

## CAPVT

## CAPVT III.

11. Probatur octorationibus, non posse Astrologos ex arte & scientia sua prænoscere ac prædicere futura contingentia.
12. Præter causas cælestes, necessariam esse notitiã causarum particularium ad prænoscendos earum effectus.
13. De simili ortu & dissimilibus euentis Geminorum.
14. Pulcherrima disputatio Bardesanis aduersus Astrologos.
15. Vtrum sit facilius, diuinare quid facturus sit vir bonus, an vir improbus.
16. Quam sit vana ac futilis prædictio Astrologorũ de aliquo, quod sit futurus summus Pontifex.
17. Nullam posse esse scientiam vel artem istius Astrologiæ.
18. Vanitas & falsitas multarum prædictionum astrologicarum.
19. Errores Astrologorum in Chronologia.
20. Astrologiã iudiciariã omni tempore à prudentibus & sapientibus viris esse contemptam & damnatam.
21. Cui generi hominum arrideant prædictiones Astrologiæ, quas S. Ambrosius comparat telis aranearum.
22. Disputa

22. *Disputatur contra tria fundamenta Astrologiæ iudiciariæ.*
23. *Vtrum astra natalitia cuiusque, possint esse certæ causæ omnium quæ ei euentura sunt.*
24. *Vtrum sit plus momenti in conceptu, an in ortu hominis ad diuinandum.*
25. *De vanitate Astrologorum diuinationem suam extendentium etiam ad ciuitates, non solum ad homines.*
26. *Cur Astrologi non, vt de hominibus, sic etiam de stirpibus & alijs animantibus ex obseruatione astrorum vaticinentur.*
27. *De antiquitate istius Astrologiæ apud Aegyptios & Chaldeos.*

---

 CAPVT IIII.

28. *Vtrum astra, si non sunt causæ, saltem sint certa signa omnium futurorum.*
29. *Vtrum secundum Augustinum astra sint signa omnium rerum humanarum.*
30. *De natura & varietate signorum.*
31. *An cometa signa sint humanarum rerum.*
32. *An qui astra faciunt signa rerum futurarum, simul etiam necessario inducant & astruant Fatum.*

---

 CAPVT V.

33. *De Quatuor causis propter quas euenit vt nonnulli*



*nonnunquam Astrologi vera prædicant.*

34. *Instinctu Demonum agi nonnunquam homines ad diuinandum.*

35. *Quot modis Demon futura prænoscat, & hominibus præmonstrare soleat.*

36. *Quot modis, & quàm grauius peccent, qui Demonum vel istorum Astrologorum opera vtuntur ad diuinandum.*

37. *Istiusmodi Astrologos ferè improbos, & flagitiosos esse.*

38. *De usu sortium apud Antiquos ad diuinandum futura.*

39. *Permissu Dei, nimis cupidos sciendi futura, laqueis Demonum irretiri, & varijs ac perniciosis erroribus implicari.*

40. *Multos diuinare futura, magis ex prudentia, & usu rerum humanarum, quàm ex arte Astrologica.*

41. *Nimiam credulitatem ac leuitatem consulentium Astrologos, interdum conducere vt eorum prædicta vera cadant.*

DIVINATIONEM ASTRO-  
LOGICAM DIVINÆ SCRIP-  
TURÆ, disciplinæ Ecclesiasticæ, ac dō-  
ctrinæ Theologicæ esse  
contrariam.

## CAPVT PRIMVM.

§. 1. *Sententijs diuina Scriptura, antiquis item Ec-  
clesia institutis, & exemplis, rationibus etiam  
Theologicis refelluntur Astrologi.*



**C** L A M A T multis in locis diuina  
Scriptura certam futurarum rerum  
præscientiam, & prædictionem, &  
non esse hominum, sed ne Dæmonū  
quidem, verūm vnius Dei propriam. Quapro-  
pter apud Isaiam cap. 41. ita scriptum est, *An-  
nunciate qua ventura sunt in futurum, & sciemus  
quia dy estis vos:* & cap. 44. *Ego sum Dominus ir-  
rita faciens si g.ra diuinorum, & hariosos in furorem  
vertens, conuertens sapiētes retrorsum, & scientiam  
eōrum stultam faciens:* cap. autem 47. deridens  
Deus Babylonios, & Chaldæos syderalibus suis  
obseruationibus præsidentes, *Sta, inquit, cum in-  
contatoribus tuis, & cum multitudine maleficio-  
rum tuorum, in quibus laborasti ab adolescentia  
tua, si f.rte quid prosit tibi, aut si possis fieri fortior.  
Defecisti in multitudine consiliorum tuorum: stent,  
& saluent te Augures cæli, qui contemplabantur  
sydera, & supputabant menses, ut ex eis annuncia-  
rent ventura tibi.* Et paulò ante dixerat: *Sapientia*

*tua, & scientia tua, hac decepit te.* Hieremias quoque cap. 10. monet Iudæos, vt Astrologicas observationes pro nihilo ducant, nihil enim sibi à stellis vel sperandum vel timendum esse, sic autem ait: *Iuxta vias gentium nolite discere, & à signis cæli nolite metuerè, quæ timent gentes, quia leges populorum vanæ sunt.* Salomon autem Eccl. cap. 10. scientiam futurarum rerum denegat homini, *Ignorat homo*, ait ipse, *quid ante se fuerit: & quid post se futurum sit quis poterit indicare?* idem cap. 8. eiusdem lib. *Homo*, inquit, *ignorat præterita, & futura nullo scire potest nuncio.* Liquet igitur diuinationem Astrologicam in sacris literis contemni, derideri, ac reprobari.

Cum doctrina sacrarum literarum, etiam iudicium Ecclesiæ, vt par erat, mirè congruit. Semper enim Ecclesia inde vsque à primordiis suis, iudiciarios Astrologos odit, fugit, damnauit. Extant aduersus ipsos plurima & seuerissima decreta Ecclesiæ, quæ legere licet in secunda parte Decretorū c. 26. per primas quinque quæstiones, & in Concilio Bracarenſi l. cap. 9. & 10. & in Toletano I. in assertionem Fidei contra Priscillianistas. Fertur Alexander Papa huius nominis III. quendam presbyterum qui semel duntaxat consuluerat Astrologum de quodam furto in Ecclesia sua factò, in vnum annum priuasse altaris ministerio. Crebras item reperimus in scriptis sanctorum Patrū aduersus Astrologos, quos illi nunc Chaldaeos vel Genethliacos, aliàs Mathematicos aut Planetarios appellant, disputationes, ex quibus apparet quam fuerit maiorib. nostris genus hoc hominū exosum & abominatū. Multa cōtra illos

*Decreta  
Ecclesiæ  
contra  
Astrologos  
Iudiciarios.*

*Alexādr  
Papa.*

M disputat

*Basilium* disputat Basilius hom. 6. in Genesim, Chrysostomus & Gregorius Magnus in cap. 2. Matth. sed *Chryso.* præter ceteros Augustinus lib. 2. super Genesim *Greg.* homi. 10. ad literam cap. 7. lib. etiam 2. de doctrina Christi- *homi. 10.* ana c. 21. & aliquot proximè sequētibus, capitibus subtiliter tamē & copiosè primis aliquot capitibus lib. 5. De ciuitate Dei Eodē pertinet quę *Aug.* contra Mathematicos in lib. 14. cap. 4 & in lib. *Euseb.* 6. cap. 9. de Præparatione Euangelicā argumentatur Eusebius.

*Julian.* RIDICVLVS fuit, vel potius amens Iulianus Apostata, qui in libris quos aduersus Christianos effutiuit, probare voluit, ex his quę scripta sunt in cap. 15. Genes. Abraamum & Astrologiam & aruspiscinam coluisse. Astrologiam quidem eius, significari putat illis verbis: *Eduxit Deus Abraam foras, & ait illi, Suspice cælum & numera stellas si potes. Sic erit semē tuū.* Aruspicinæ verò scientiā eius, illis etiam verbis denotari ait, *Sume mihi vacam triennem, & capram trimam, & arietem annorum trium, turturem quoque & columbam. Qui tollens vniuersa hæc, diuisit ea per medium, & utrasque partes contra se aliternsecus posuit: aues autem non diuisit. Descenderunt quæ volucres super cadauera, & abigebat eas Abraam.* Deinde, subiicitur prædictio peregrinationis & seruitutiſ posterorum eius per quadringentos annos. Sed hunc Iuliani errorem vel potius furorem, egregiè confutat Cyrillus extremo lib. 10. eius operis quod aduersus Iulianum edidit. Alij fidē huic vanissimæ Astrologiæ asserere & astruere conantur ex illa stella quæ nato Christo apparuit, cuius aspectu excitati tres illi Magi, ductu-  
que

que ad adorandum Christum venerant. Sed istos *Greg.*  
manifestis argumentis Chrysostom. & Gregorius *homi. 10.*  
in homiliis super illud Euāgelium scriptis, redar- *in Euāg.*  
guunt & conuincunt. *Argu-*

CÆTERVM, errorē Astrologorū etiam ra- *mētis ex*  
tionib. ex doctrina Theologica contextis refu- *sacra*  
tare possumus. Principiò, *Nemo*, vt ait Pau. 1. *Theolo-*  
Corint. 2. *Novit quæ sunt hominis, nisi spiritus ho-* *gia di-*  
*minis*, sed homo nescit quid ipsemet post multos *ctis, a-*  
annos aut etiā dies acturus sit: nā vt inquit Scri- *strologi-*  
ptura, Prouerb. cap. 27. *Ne glorieris in crastinum ca diui-*  
*ignorans quid superuentura pariat dies. &c. Non est natio re-*  
*via hominis in manu eius: homo enim proponit, Deus fellitur.*  
*autem disponit.* Est namque non modò quorumli-  
bet hominū, sed etiam Regum cor in manu Dei,  
flectit. illud quocumque vul. Si igitur ipsemet ho-  
mo nescit quid futuro tempore facturus sit quan-  
to minus id scire potest Astrologus? Deinde, ne  
ipse quidem diabolus certò potest nosse res futu-  
ras: si enim futura omnia Dæmon sciret, nunquā  
profecto impulisset Iudæos ad crucifigendum &  
occidendum Christum Dominum, quippe præ-  
uidisset per crucem & mortē Christi, imperium  
quod tamdiu habuerat in homines, fore labefa-  
ctandum & funditus euertendum, nec saue Dæ-  
mon tentaret & infestaret seruos Dei à quibus  
in tentatione vincitur, ne videlicet propter vi-  
ctoriam tentationum crescente Sanctorum glo-  
ria, & magis ipse, quæ eius est superbia & inui-  
dia, torqueretur.

---

§. 2. De vanitate oraculorum Apollinis.

Hoc etiam patet argumento oraculorum,

M 2 quæ

*Porphyrus.*

quę olim reddebant Dæmones, cuiusmodi erant  
 responsa & oracula Apollinis Delphici, quo-  
 dam apud Græcos nobilissima & clarissima: quę  
 ad diuinationem Astrologicam pertinuisse, locu-  
 ples auctor & testis est Porphyrius in libro de  
 Oraculis (refert autem hoc Eusebius li. 6. de Prę-  
 paratione Euangelica, cap. 1.) vbi tradit, quacun-  
 que dii ceu fatis definita prædicunt, ea ipsos stel-  
 larum motu ita esse futura significare, id quod  
 maximè Apollo multis responsis aperuit. In his-  
 ce autem oraculis & diuinationib. sæpè mentitū  
 esse Apollinem, idem auctor est Porphyrius, ex-  
 quisitam enim futurorum cognitionem ait non  
 hominibus modo, sed multis etiam deorum in-  
 comprehensibilem esse, vnde interrogati men-  
 tiuntur nonnunquam, sed non sponte: solēt enim  
 præmonere, se tunc vera respondere non posse,  
 homines tamen ex amentia perseuerant vrgere  
 & cogere eos, vt respondeant Apollo igitur Del-  
 phicus, cum eiusmodi esset cæli & continentis  
 affectio, vt verum præuidere non posset, retine,  
 dicebat per Vatem, vim istam, & potentia ver-  
 ba hæc ne proferas, falsa enim dicam, si coges.  
 Et in alio responso, Nihil hodie, inquit Apollo,  
 stellarum mihi via dicendum præstat. Deinde  
 concludens Porphyrius ait, Manifestum iam  
 fecimus vnde falsitas ad deorum oracula subre-  
 pta. Hæc ex libro Porphyrij de Oraculis, in li-  
 bro sexto de Præparatione Euāgelica. cap. 4. Eu-  
 sebius commemorat, Fuit etiam olim quidā Oe-  
 nomaus, vir apud Græcos tam philosophia quā  
 eloquentia nobilis, qui respōsis Delphici Apolli-  
 nis sæpè delusus atque decēptus, diligēter &  
 curiosè

*Oeno-  
 maus ve-  
 hemēs &  
 disertus  
 oraculo-  
 rum A-  
 pollinis  
 confuta-  
 tor.*

curiosè colligit quamplurima eius oracula, ea-  
que vt vana, futilia, & falsa confutauit, vt refert  
Eusebius lib. 5. de Preparatione Euangelica. c. 10.

*§. 3. Cur Dæmones prædicendo futura sæpè fallant?*

QVATVOR porrò ob causas vsu venit in  
prænuntiando futura falli Dæmonem. Primò,  
quia nimis asseueranter affirmat quæ pendent ex  
libero arbitrio hominis, quod cum sit admodum  
mutabile, & ad omnia flexibile, & planè libe-  
rum, nonnunquam extraordinaria quadam ratio-  
ne operatur. Deinde, quod nos sæpè diuinitus  
incitati, & adiuti Dei gratia, contra facimus quàm  
antea facere cogitabamus, & quàm nostro inge-  
nio, nostroq; arbitrato facturi eramus. Fit etiam  
interdum, vt quod dæmon agere constituerat,  
& prædixerat, prohibente impediensque Deo,  
non possit exequi, Denique, multa Deus solet  
aliquando præter communem ordinem naturæ,  
præterque generalem suam & ordinariam prou-  
identiam agere. Atque his rebus crebro dæmon  
in errorem inducitur. Quis ergo credet Astrolo-  
gos prædicendis futuris rebus veraces esse, cum  
in eo vel Dæmones falli sæpè cōtingat? Sed quod  
ego de Dæmonibus loquor? Theologi docent,  
ne ipsos quidem spiritus cœlestes, ac beatas mē-  
tes, quæ liquidò cernūt, & clarissimè vident Deū,  
tenentque perfectissimam cognitionem cœlorū  
cunctarumque rerum naturalium, certò scire fu-  
tura, quæ nimirū pendent ex libero arbitrio, nisi  
earū rerū Deus singularē ipsis notitiā impertiat.

Cuius autē amētię est, Astrologis tribuere, quod nec Angelis, nec beatis mentibus concessum est?

§.4. *Non posse veritatem Christiana religionis co-  
harere cum veritate Astrologia Indiciaria.*

*Egregia  
ratio ad-  
uersus A-  
stroman-  
tiam*

SE D illa in primis fortis est argumentatio. Si Christiana religio, & disciplina vera est, vt est profectò verissima, non potest esse vera, nec Christianis probari potest illa opinio Astrologorum, vt quam illa vanitatis, fallitatis, & impietatis per sæpè damnauit: sin autem falsa est doctrina Christiana, cū ipsa totum ferè orbem complexa sit, omnesque propemodum gentes suo imperio subiecerit, & plus mille quingentos annos vigeat, & regnet in mundo, si omnia quæ apud homines sunt ex cælo proueniunt ac pendent, necesse est tantā hominum ad fidem Christi accipiendam tuendamque propensionem tantūque studium, ex insigni aliqua, & præpotenti constellatione prouenire: quare cælum inclinaret, & induceret homines ad malum. Si enim fides Christi esset falsa, magis profectò esset falsa, & detestabilis, quàm alia quælibet secta: ea namque docet de Deo, & rebus diuinis, quæ si falsa sunt, nefariam sanè superstitionem, & execrandam impietatem contineant necesse est. At verò, cum vita, quæ ad normam fidei Christianæ agitur, sit optima, & inculcata, nec laude tantum, sed summa etiam admiratione dignissima, hinc necessario efficeretur, ab eadem constellatione proficisci bonum, & malum: malum quidem



quidem propter falsitatem doctrinæ Christianæ: bonum autem, propter vitæ, quæ ad eius doctrinæ regulam informatur, & dirigitur, probitatem atque præstantiam.

Ad hæc, maxima probatio, & confirmatio fidei nostræ, & clarissimum diuinæ providentiæ argumentum illud est, quæcunque circa Christum Dominum, & eius Ecclesiam euenerunt, ea multis ante sæculis fuisse per Prophetas, ad vnū omnia propriè, distinctè, explicateq; prædicta: si autem eiusmodi prædictio per Astrologiā fieri posset, rueret funditus & ad nihilū recideret firmissimū nostræ religionis fundamentum. Ne multa, istiusmodi Astrologorū doctrina verā Philosophiā morālē nedum sacrā Scripturā & Theologiā, quantū in ipsa est planè peruertit qui enim certū habet omnia pendere è cælo, ob idq; cūcta hominū opera facta, casus, & euenta ex cæli obseruatione præsentiri & prædici posse, huic quoque necessariò persuasū esse debet, materialē & mortalem esse animū nostrū, nullumq; esse liberum arbitriū, nec talē esse providentiā Dei quālē Fides nostra prædicat, mysteria item Christianæ religionis pendere è cælo, cunctaq; miracula tā in veteri, quàm in nouo Testamento edita, licèt dicantur, vt re vera sunt, supernaturalia, ad cælestes nihilominus causas & virtutes reuocari. Huic quoq; opinacioni consequēs est, neglectio & prætermissio bonorū operū, licentia omnium cupiditatum, quorūlibet flagitiorū excusatio, denique inutilitas atque crudelitas humanarum pariter atque diuinarum legum. Caietanus in Summula vbi agit de Astrorum obseruatione,

*Præclara argumentatio:*

*Caietani breuis, sed vera*

*me-* simillima docens eorum quæ diximus, verè ma-  
*morabi-*gis & doctè quàm eleganter & ornatè ita scribit,  
*lisaduer* Astrorum observatio circa natiuitates hominum  
*sus præ-* & occurrètia humana tripliciter peccato subiici  
*ditiones* potest. Primo, si ea quæ fidei Christianæ mysteria  
*Astrolo-* sunt, tanquam subsint cælestibus causis, habeant  
*gorū sen-* tur: secundo, si futura cōtingentia quærantur vel  
*tentia.* habeantur vt certa ex cælestibus causis, tertio, si  
 electiones suas quis subiiciat cælestibus causis  
 tanquam legi illarum ita vt vitam & actiones  
 suas regulet secundū cælos. Et quodlibet horum  
 trium est ex suo genere peccatum mortale: quia  
 primum est contra spiritualitatem Christianæ re-  
 ligionis, quæ super cælos est, immutare potens  
 etiam ipsos cælorum cursus, iuxta id quod scri-  
 ptum est in Psalm. 148. Confessio eius super cæ-  
 lum & terram: & hoc experientia testata est. Se-  
 cundum verò, est contra veritatē doctrinæ Chri-  
 stianæ & liberi arbitrij, quo domini sumus no-  
 strorum operum. Tertium est contra dignitatem  
 gratiæ, legis diuinæ, ac humanæ mentis, qua su-  
 per omnia corporalia sumus constituti. Et sicut  
 erraremus subiiciendo nos passionibus iræ, odij,  
 spei, timoris, ita quod haberemus impetus pas-  
 sionum pro lege: ita vilificamus nos, si inclina-  
 tiones cælorū pro lege habeamus: corpora enim  
 sunt, & per modum passionum inclinant nos.  
 Hæc Caietanus.

In actis autem Apostolorum cap. 19. refert  
 Lucas, multos de his qui Ephesi concionibus &  
 sermonibus B. Pauli conuersi erant ad Christum,  
 & curiosa prius fuerant sectari, attulisse libros  
 suos, & coram omnibus combussisse: fuisse autem

eos libros de rebus ad iudiciariam Astrologiam  
 pertinentibus, grauis auctor in Commentariis  
 super Psalmos dixit Augustinus, qui etiam: Ma-  
 thematicum quendā, hoc est, istam Astrologiam  
 professum, postea pœnitentem professionis suæ  
 cupientemque reconciliari Ecclesiæ, nisi publica  
 & solenni pœnitentia præmissa, non recepit, ve-  
 rum sententiam Augustini, quod ea maximè at-  
 tingit id quod nunc agitur, totidem verbis hic  
 ascribam. Post enarrationem igitur 61. Psalmi,  
 cum Mathematicus ille veniam publicè petens  
 coram sisteretur, hæc dixit Augustinus: Iste ex *Notabi-*  
 Christiano, & fideli pœnitens redit, & territus *lis oratio*  
 potestate Domini, conuertitur ad misericordiam *quā ha-*  
 Domini: seductus enim ab inimico cum esset, fi- *buit Au-*  
 delis diu. Mathematicus fuit, seductus seducens, *gust. in*  
 deceptus decipiens, illexit, fefellit, multa men- *roconci-*  
 dacia locutus est contra Deum qui dedit homi- *liatione*  
 nibus potestatem faciendi, quod bonum est, & *cuiusdā*  
 non faciendi quod malum est. Iste dicebat, quod *Mathe-*  
 adulterium non faciebat voluntas propria, sed *matici*  
 Venus; & homicidium nō faciebat voluntas pro- *cū Eccle-*  
 pria, sed Mars: & iustum non faciebat Deus, sed *sia.*  
 Iupiter: & alia multa sacrilega non parua. Quam  
 multis cum putatis Christianis nummos abstu-  
 lisse? Quam multi ab illo emerunt mendacium?  
 quibus dicebamus, Filij hominū vsquequo graui *Psal. 4.*  
 corde, vt quid diligitis vanitatem, & queritis  
 mendacium? Modo sicut de illo credendum est,  
 horruit mendacium, & multorum hominum in-  
 teritum: sed aliquando à Diabolo sensit illectum,  
 cōuertitur ad Deū pœnitens. Nostis in Actibus  
 Apostolorum esse scriptum, capit. 10. quia multi  
 M      petditi,

perditi, id est, talium artium homines, & doctrinarum nefariarum sectatores, omnes codices suos ad Apostolos attulerunt, & incensi sunt libri tam multi, vt pertineret ad scriptorem æstimationem eorum facere, & summâ pretij conscribere. Hoc vtrique propter gloriam Dei, ne tales etiam perditi desperarentur ab illo qui nouit quærere quòd perierat. Perierat ergo iste, nunc quæsitus inuentus, adductus est: portat secum codices incendendos, per quos fuerat incédendus, vt illis in ignem missis, ipse in refrigerium transiret. Ante Pascha enim cœpit petere de Ecclesia Christi medicinam, sed quia talis est ars in qua exercitatus erat, quæ suspecta esset de mendacio atque fallacia, dilarus est ne tentaret, & aliquando tamen admissus est ne periculosius tentaretur. Hactenus Augustinus.

---

*§. 5. Quàm seuerè olim Ecclesia in istiusmodi Astrologos animaduernerit.*

CERTE in primitiua Ecclesia istiusmodi Astrologia nō secus quàm ars Magica, reprobata, vetita, & damnata erat. Narrat Epiphanius in libro de mensuris & ponderibus, Aquilam Ponticum Scripturæ interpretem ob eam maximè causam fuisse à patrib. ex Ecclesia pulsum, quod natiuitatum obseruationibus cæterisq; diuinationibus Astrologicis studiosè vacaret. Non est pro derelicto habendum, cum sit admodum memorabile, quod Origenem in commentariis super Genesim de ista Astrologia prodidisse, libro 6. de Præparatione Euangelica, capite 9. tradit

Euse

Eusebius, sic enim scripsisse illum ait: Nō solum Gentiles stellarum coniunctione atque aspectu quæ in terris sunt, necessariò accidere credunt, quàm vim Fatum appellant, verum etiam multi ex fidelibus conturbantur, impossibile aliter fieri credentes quam stellarum cursus effecerit, unde sequitur nullam in nobis esse libertatem, nullam operationem nostram laudari aut vituperari iure posse, ita prædictum à Scripturis Dei iudicium quo alij ad æterna supplicia, alij ad æternam beatitudinem prædestinantur, falso fore prædicaretur. Quid plura? ipsa quoque fides & Saluatoris nostri aduentus, & omnis Prophetarum labor, ac Apostolorum in constituendis Ecclesiis prædicatio, inania erunt, nisi forte Christum quoque quis audeat dicere, cælestium corporū vi coactū fecisse quæ fecit, passumq; fuisse quæ passus est, nec eius Deitatis potentia, sed stellarū virtute cūcta euenisse: his impiis verbis etiā illud cōficitur, ut fideles Fato ducti in Christū credant: denique, ut vel nullum sit boni & mali discrimen, vel etiā malorum auctor sit Deus: nullusq; hominū propter bene vel male facta præmio aut pœna dignus censerī debeat, nec orationibus, votis, & Dei obsecrationibus locus aliquis relinquatur. Sic Origenes.

Eat igitur nūc Petrus de Aliato, & istā Astrologiam amplectetur, exosculetur, præfracteq; defendat, atque obnixè conetur eam cum Philosophia, quin etiam (si Deo placet) cum Theologia consociare atque coniugare, scilicet falsitatem cum veritate, tenebras cum luce, Dæmonē cum Deo, qui nec veritus est scripto prodere, diluuium,

*Animad-  
uersio in  
Petrū,  
de Aliato.*

diluvium Noëticum, & ortam Christi Domini, aliâque summa prodigia & miracula, etiam syderalis scientiæ peritiâ ex altorum obseruatione prænosci ac prædici potuisse.

---

*§. 6. De multis perspicuè falsis, & impijs  
Astrologorum sententijs.*

S E D quò manifestius appateat quàm sit impia, & execranda istorum doctrina, ponam hîc paucas quasdam eorum sententias, & decreta, è quibus iudiciû fiet de illius artis impietate. Quidam istorum, ex Marte in nona cœli regione fœliciter cõstituto, tantû præstari nobis contédunt, vt ab obsessis corporibus sola præfêria Dæmones expellamus. Alij iactant se hac arte, de eius qui nascitur conscientia arcanis, & secretis sine errore iudicatuos. Vulgatum quoque apud illos est duos esse planetas auctores fœlicitatis humanæ, Venerem quidem præsentis, Iouem autem post hanc vitâ futuræ. Maternus porrò eiusmodi figmentorû, & mēdaciôrû studiosissimus, & curiosissimus, & cû multa memoret quæ à Saturno cõstituto in Leone accidunt hominibus, subdit, eiusmodi homines longæuos fore, & post mortem animas eorû in cælum Diis applicatas euolaturas. Saturnus enim, inquit, in Leone positus, animas eorum, qui sic se habuerint in terra, innumeris augustiis liberatas, ad cælum, & originis suæ primordia reducet. Denique Albumazar scribit, qui Luna Ioui coniūctus in capite Draconis, Deo supplicauerit, eû quicquid petierit à Deo certif

certissimè impetraturum, id quod Petrus Ap-  
 ponensis expertum se esse confirmat: nam cum *Petrus*  
 vigente illa coniunctione, scientiam rerū à Deo, *Appone*  
 postulasset, ait se post eam diem, magnam sibi *sis.*  
 factam esse scientiæ accessionem, sentisse. Hæc  
 autem & alia eorum similia, quàm sint nefaria,  
 detestanda, Christianæ religioni exitialia, quan-  
 tumque valeant ad eleuandam, vel potius delen-  
 dam fidē eorum quæ diuina Scriptura docet im-  
 mediatè, supernaturaliter, ac miraculosè fieri à  
 Deo, nemo est tam hebes ingenio & tardus in-  
 telligentia, vt non clarissimè intelligat. Si quis  
 autem hæc plenius atque subtilius scire auet, le-  
 gat quæ in hanc sententiam cum alibi, tum lib.  
 2.c.5.& li.5.cap. 11.& inde vsq; ad finem eius li.  
 Picus Mirandulanus diligēter & copiosè tractat.

*Astrologiam iudiciariam à Philosophia redargui  
 & conuinci, primò quidem ea ratione, quod  
 istiusmodi Astrologi cœlestium  
 rerum sint imperitissimi.*

## CAPVT II.

**D**IVINATIONEM Astrologicam  
 futilem esse nulloque nixam funda- *Multi*  
 mento. Philosophus quidem ad hūc *plex &*  
 modum argumentabitur, Astrologi *pranali-*  
 nec certò sciunt omnes Astrorum vires de flu- *da cōtra*  
 xus, & effectus, nec si eas res scirent, satis id fo- *Astrolo-*  
 ret ad certam rerum futurarum præsentionem, *gos ex*  
 ergo prædictiones Astrologicas inanes & falla- *Philoso-*  
 ces esse necesse est. Duo in hac argumentatione *phia ar-*  
 sunt posita, explicatiùs à nobis tractanda & cō- *gumen-*  
 firman *tatio.*

nobis tractanda & confirmanda: alterum est imperitos esse Astrologos rerum cœlestiū, alterum vero est, vt essent illi peritissimi earum rerum non propterea tamen posse eos futura omnia prænosse, de priori autem dicamus prius.

---

§. 7. *Astrologos Iudiciarios esse rerum cœlestium imperitos.*

ESS E igitur Iudiciarios Astrologos syderalis doctrinæ ignaros, patet ex his quæ subiiciam, Principiò, valde arduū & operosum est, etiā quæ de cœlo videntur minus difficilia magisq; nobis obuia, perfectè cognoscere: veluti quæ sit cœli natura, magnitudo, numerus orbiū, & inter eos ordo & differētia dignitatis, varietas motuum, denique Astrorum numerus, eorumq; inter se in magnitudine, luce, potestate & effectu comparatio, atque huius difficultatis facit clarissimū indicium tanta opinionū varietas quantā esse his de rebus inter maximos Philosophos cernimus.

*Aristoteles.* Aristoteles certe, Philosophorū omnium facile princeps, ingenuè fatetur se multarū rerum cœlestium non exquisitam scientiam, sed opinabilem, & coniecturalem tantū noticiam tenere; Et quia manifestis certisq; rationibus destituitur, cogi se non raro probabilius duntaxat argumentis & coniecturis. Videre hæc licet apud ipsum Aristotelem in secundo libro de Cœlo textu 17. 34. 60. & 61. hoc si est, quis credet Astrologis, quos Solis luce clarius est nulla re comparandos esse maximis illis Philosophis, quod est in cœlo abstrusissimum, & iudicio summorum Philoso



Philosophorum mortalibus incomprehensibile, veritatem dico rerum omnium futurarum, esse liquidò cognitam exploratèque perceptam? Deinde, rogemus istos Astrologos, ut faciliores quasdam quæstiones de cælo nobis enodent: percunctemur ex ipsis, an cælum sit natura quædam simplex, an composita ex materia, & forma, vtrum talis sit materia cæli qualis est rerum omnium sublunarium, an omninò diuersa, sitne cælum animatū an inanimatum, num sua vi, & à se moueatur, an extrinsecus ab Angelo: vnde potissimum in cælis æstimari & iudicari debeat dignitatis eorum præstantia: quid causæ sit cur non omnes orbes vno motu circum agantur, sed alij vno tantum, alij pluribus, alij verò paucioribus: aperiant nobis quam habebant propriam vim, & potentiam singulæ stellæ in elementa, metalla, stirpes, atque animantes, hæc, inquam, & alia horum similia sciscitemur ex istis Astrologis, profecto reperiemus ipsos doctrinæ harum rerum planè rudes, & prorsus expertes. Qui sit igitur credibile, planiora hæc, & apertiora ignorantibus, mortaliū intelligentiæ remotissima, & occultissima, esse comperta, & explorata? Postea, doceant nos isti defluxus, & effectus, qui nunc ex variis astris dimanant ad diuersas, & dissitas mundi regiones, sic enim fortasse credemus illis futuros syderum effectus prænunciantibus, quis enim nescit procliuius, & propensius esse præsentia nosse quàm futura, præsertim mutabilia, & quæ variè possunt contingere, ob idque incerta? Exponant item nobis occultas proprietates, & vires quas habet res sublūares, quas miramur magis quàm intelligimus

telligimus in multis lapidibus, herbis & animalibus: hæc enim cum proxima sint, atq; nobis cōiuncta, & cunctis penè sensibus nostris subiecta, & quæ quotidianis experimentis peruestigari, & explorari possunt, planiorem intelligentiam, & faciliorem habent explicatum: cognitio verò rerum cælestium maximi laboris, & difficultatis est, cū tam longè distet à nobis cælum, nec alio quàm vnico oculorum sensu mortalibus pateat: quem tamen sæpè falli contingit propter tantam interualli longinquitatem, vel summam vertiginis cæli velocitatem, vel prauam affectionem medijs aut visus, vel propter vitium astrolabij, tabularum, & instrumentorum Astronomicorum. Atque hoc etiam apud sacras literas in c. 9. libr. Sapientiæ testatum legimus: *Corpus, inquit, quod corrumpitur aggrauat animam, & terrena inhabitatio deprimit sensum multa cogitantem. Et difficile æstimamus, quæ in terra sunt, & quæ in prospectu sunt inuenimus cum labore, quæ autem in cælis sunt, quis inuestigabit? Sensum autem tuum quis sciet, nisi tu dederis sapientiam, & miseris Spiritum sanctum tuum de altissimis?* Extremum autem huius sententiæ, omninò redarguit Astrologos, qui humana omnia euenta, quorum multa ex secretissimo Dei consilio, & voluntate pendent, diuinare se posse profitentur.

---

§. 8. *Aduersus fœtisiā antiquitatem obseruationum quam iactant Astrologi.*

PRÆTEREA, iactant Astrologi, habere se innumerabilium annorū obseruationes rerum euentis

euentis comprobatas, è quibus ars ipsorum collecta, & confecta sit: nam cum in omni præteriti temporis spatio, pænè innumerabiles res eodem modo euenirent, iisdem signis antegressis, ars est effecta eadem sæpè animaduertendo atque notando: quare Chaldaeos ferunt quadringenta septuaginta millia annorum, monumentis huiusmodi obseruationum astrologicarum comprehensa habuisse. Verùm, hoc quàm sit commentitium & improbable, vel ex eo liquet quòd Astrologi nō potuerunt eiusmodi obseruationes & experientias, non dico millies vt ipsi iactitant, sed ne ter quidem bisue colligere & comparare potuerunt, nam cæli facies, & omnium signorum cælestium positura quæ semel fuit, eadem omnino vel nunquam, vel non nisi post immensa annorum spatia redire potest: quippe octauus orbis in quo sunt inerrantes stellæ, non ante sex & triginta annorum millia circuitum suum absoluit, quin doctissimi quidam Mathematici, optimis rationibus probarunt, motus cæli esse inter se incommensurabiles, ob idque eandem cæli faciem, eundemque stellarum positum sæpius euenire non posse.

Hanc rationem Phauorinus philosophus apud *Phauorinus cō*  
 Gellium lib. 14. cap. 1. paulò enucleatius, certè *tra Astro-*  
 culentius & elegatius tractat his verbis, Si Chal-  
 dæorū isto modo cæpta fieri obseruatio est, vt ani-  
 maduerteretur quo habitu, qua forma quaq; po-  
 situra stellarum aliquis nasceretur; tū deinceps ab  
 incunte vita, fortuna eius & mores & ingenium  
 & circumstantia rerū negotiorūque, & ad  
 postremum finis etiā vitæ spectaretur, eaque  
 omnia, vt vsu venerant, ligetis mandarentur: ac

N                      postea

postea longis temporibus, cum ipsæ illæ eodem in loco eodemque habitu forent, eadem cæteris quoque euentura existimaretur qui eodem illo tēpore nati fuissent: Si isto, inquit, modo obseruari cœptum est, ex eaque obseruatione composita quædam disciplina est, nullo id pacto potest procedere, dicant enim quot tandem annis, vel potius quot sæculis orbis hic obseruationis perfici quiverit. Constare quippe inter Astrologos dicebat, stellas istas quas erraticas dicerent, quæ esse omnium rerum fatales dicerentur, infinito propè & innumerabili numero annorū ad eundem locum, cum eodem habitu simul omnes vnde profectæ sunt, regredi, vt neque vllus obseruationis tenor, neque memoria vlla, neque effigies literarum tanto æuo potuerint edurare, sic Phanorinus. Adhæc, licèt Astrologi cognoscere possent singulares viros & defluxus cuiuslibet astri separatim, tamen quam vim habeant sydera, cum defluxus diuersorum astrorū vna coeunt & permiscentur, vt in cœlo vel in aëre vel in terra vel etiam cum causis sublunaribus earumque actionibus, ab ipsis nequaquam sciri potest. Audiat lector Origenem, cuius ex Commentariis super Genesim, hanc Eusebius extremo lib. 6. de Præparatione Euangelica citat sententiam: Quæ autem, inquit, commistione, compositione, ac temperie diuersorum aspectuum fieri asserunt, profectò cōcedent nullo modo sciri posse. Quomodo enim quantum diminuatur de latione maligni aspectus propter aspectum benigni syderis percipies? & vtrum auferat malignus quod à benigno cōceditur, quoniā locū eius aspexerit,

*Origen.*

aut mutet, aut imminuat, aut mistura quædam inde fiat, quis percipiet? quæ omnia si quis altius inspiciat, facile credat non posse ista humano ingenio penitus percipi. Vnde si quis harum rerum periculum fecerit, videbit in pluribus errare, quàm veritatem consequi Genethliacos. Quamobrem Elaias etiam quasi hæc omnibus impossibilia sint, ad filiam Chaldæorum qui maxime ista profitentur ait, *Adsim & salua te faciant* *Esa. 47.* *Astrologi, cæli Augures annuntiēt tibi quid euenturum sit.* His enim verbis docemur, vel diligentissimos in hac re Chaldæos, non posse prædicere quæ velit vnicuique genti Deus attribuere. Hactenus Origenes.

His accedit, multas esse stellas quæ vel non clarè cernuntur, vel etiam nullatenus cernuntur: earum verò quæ cernuntur, paucas sibi esse cognititas, permultas verò necdū exploratas fatentur Astrologi. Qua ratione igitur ex paucis astris quorum vires norunt tam confidenter prænunciant futura, cum per aliorum syderum quæ nesciunt influxus, notorum sibi syderum effectus, aut impediri aut variari possint? nisi fortè Astro- rum quæ latent ipsos nullas esse vires nullos- que defluxus, impudenter & absurdè mentian- tur. Certè constat inter Astrologos numerari in octauo cælo mille præterquam viginti duas stel- las, quarum cum quælibet maior sit terra, neces- se est ingentem esse earum vim & potentiam, huiusmodi stellarum, vel nullam vel perexiguam notitiam habent Astrologi, quippe cum ars eo- rum iudiciaria ferè constet ex planetarum ob- seruationibus, in quibus tota propemodum

versatur & consumitur. Vidit hoc, quæ erat perspicacia ingenij Seneca, & in lib. 2. Natural. quæstionum, cap. 32. eleganter exposuit. Quid est aliud, inquit, quòd errorem incutiat peritis natalium, quàm quod paucis nos syderibus assignant, cum omnia quæ supra nos sunt, partem sibi nostri vèdicent? Submissiora forsitan in nos propius vim suam dirigunt, & ea quæ frequentius mora, aliter nos, aliter cætera animalia prospiciunt, cæterum, & illa quæ aut immota sunt, aut propter velocitatem vniuerso mundo parem, immotis similia, non extra ius dominiûmque nostri sunt. Hæc Seneca.

§. 9. *De noua stella, quæ superioribus annis visa est.*

SUPERIORIBVS annis vidimus stellam, nouam ante illud tempus nunquam in cælo visam, & iudicio Astrologorum in eodem loco vbi stellæ fixæ lucent positam: hæc cum ad aliquod tempus conspicua fuisset, repentè tora ex aspectu nostro discessit & prorsus euauit hanc stellam: necesse est, vel in cælo esse generatam, & postea corruptam, idemque in aliis sæpius euenire, longis tamen temporum interuallis verisimile est: vel esse supra septem planetas alia sydera errantia quæ proprios quidem meatus, sed nobis tamen ignotos habeant: vel denique quas nos in octauo orbe stellas inerrantes, & infixas putamus, eas

*Hipparchus.* quoque proprios circuitus & motus agere, de quo addubitalle olim Hipparchum nobilissimum in

in astrologia virum, locuples auctor & testis est Plinius, in cap. 26. lib. 2. Hipparchus, inquit, nunquam satis laudatus novam stellam, & aliam in ævo suo genitamprehendit: eiusque motu qua die fulsit, ad dubitationem est adductus, annè hoc sæpius fieret, mouerenturque, & ex quas putamus affixas. Quid quod per magni ad artem suam referre censent Astrologi, conuenientiam, & discrepantiam quæ est inter duos *Duplex Zodiacos*, alterum octauæ, alterum noni cæli, exploratam habere? quæ tamen ipsis nota esse *cus apud Astrologos.* non potest: quippe cum nonum cælum omni stella lucéque careat, nec aliud de ipso quàm motus, isque ex motu octauæ cæli deprehendi possit. Latet etiam Astrologos quemadmodum isti duo Zodiaci se habuerint in exordio mundi, cum tempus ab origine mûdi ad hanc diem exactum, certo teneri nequeat: nam vt annorum eius temporis ratio aliqua iniri, & numerus colligi possit, dierum tamen, & horarum non potest: quorum tamen subtilis, & certa computatio, isti doctrinæ Astrologicæ opus est.

---

10. *Quam difficile sit, aspectum syderum qui in cuiusque hominum ortu viget annotare.*

I A M verò vix potest sine errore vllò notari, & cognosci positus astrorum, qui est in eo momento quo quisque nascitur. Etenim difficillimum est, vel punctum temporis, in quo quispiam oritur, vel in eo ipso puncto aspectum syderum omnium, qui tunc viget, obseruare: sæpè namque

cæli, & stellarum aspectum, nubila & crassorum vaporum interpositus, vel adimunt nobis, vel interturbant, & infuscant, & quod caput est, rapidissima cæli vertigo facit vt constellatio prius trāsuolet, quàm à nobis propriè annotetur: quippe per singula ferè momenta, alia, & alia cæli facies, & identidem diuersa astorum positura existit. Proferuntur isti Astrologi se cuiusvis hominis euenta omnia prænunciare posse, dummodo sibi ortus eius certum tempus pernotescat: at eiusmodi tempus subtiliter, & propriè, ita nimirum vt opus esset Astrologo, ferè nescitur. Nā vt dicatur, exempli causa, Petrum esse narum vigesimo ab hinc anno, die Septembris ultimo, hora noctis decima, vel ineunte vel media vel iam exeunte, at momentum illud, vel potius minimum illud tempus quo Petrus aluo matris fusus, & in lucem editus est, nec obstetrix, nec parentes seu cognati, subtilissimè annotatum, & perspectum habent: qua tamen temporis illius subtilissima obseruatione, & cognitione, ad diuinandum eget Astrologus.

*B. Basilij  
argu-  
mentatio  
contra  
Astrolo-  
gos.*

Non possum facere, vt adscribere hoc loco prætermittā verba Basilij quibus ipsa hæc ratio quam nos strictim attigimus, latius ab eo explicatur, & acrius vrgetur. Sic enim ille homil. 6. super Genesim scriptum reliquit, Genethliacæ artis inuentores, cum in temporis amplo spatio complures figuras suam ipsorum scientiam fugere percepissent, in angustum admodum temporis contraxere mensuras, vt minutissimo quoque, & subitaneo articulo, quale est quod Apostolus dicit; *In momento temporis, in iktu oculi,* pluri



plurimum differentiæ sit inter natiuitatem, & natiuitatem. Vt is quidem qui hoc in momento genitus est futurus sit Rex ciuitatum, populorumque princeps, locupletissimus, præpotens: Is autem qui natus est temporis sequentis momento, pauper quidam sit futurus, aut mendicus circulator, vel præstigiator, ex ostiis quæstia permittans quotidiani consequendi causa victus, quamobrem eo orbe qui signifer appellatur duodecim in partes diuiso, cum in triginta dierum spatio partem Sol eius globi transeat duodecimam quem inerrantem appellant, triginta in portiones singulas illas duodecim partes secuerunt, tum singulis portionibus illis in sexaginta minuta diuisis, minuta hæc singula rursus in alia sexaginta modo simili diuisere. Posito igitur enixu eorum qui in lucem eduntur, videamus, obsecro, si hanc exactissimam temporis diuisionem Auctores hi sibi valeant conseruare. Nam simul atque editus pulso est, mas an femella sit, obstetrix exploratum vagitum expectat infantis, nimirum indicium vitæ eius qui natus recens est. Quot hoc tempore vis sexagesima præterisse minuta? Dicit obstetrix deinde Chaldaeo partum qui editus est: quot minutissima momenta vis interea dum obstetrix loquitur prætercurrisse? præsertim si fortè fortuna fuerit non in conclauis mulierum Chaldeus ille præfens, sed in ædium atrio, aut vestibulo, tempus horamque reponens. Et cum cum qui definiturus est diligenter tempus ac horam, exploratoria nimirum horarum percipere oporteat instrumenta, siue diurna sint siue nocturna: quot

minutorum hoc quoque tempore, quæso, præteruolat præteritque examen? Compertam enim eam esse stellam qua tempus horæque sit exploranda, non solum quanta in parte sit duodecima, sed etiam quàm iuxta duodecimæ portionem partis, in quotóque minuto sexagesimæ eorum, in quæ subdivisa sunt singula sexagesima illa prima, necesse est. Atque hanc tamen adeò tenuem subtilémque temporis inuentionem, quàm attingere nequeunt, singulis in stellis errantibus faciendam esse necessariò dicunt, ut qualem ad cælo adfixas stellas ipsæ dispositionem habitudinémue haberent, qualisque ipsarum esset inter sese figura, cum in lucem ederetur fœtus, compertum sit tandem ac exploratum. quæ cum ita sint, si fieri non potest ut tempus illud exactissimè quisquam attingat, variationeque, vel breuissimi temporis sit ut tota via penitus aberretur, deridendi profectò non mediocriter esse videntur, tam ij, qui studio huius indulserunt artis duam in ratione rerum nusquam esse constat, quàm illi qui hiantes ab illorum ore pendent intenti, perinde quasi omnia illi scire possint quæ ipsis sunt euentura. Hactenus sunt quæ Basilii eo loco ad-

uersus Astrologos.

disputat.

\*\*\*

*Etiam si Astrologi summam rerum cælestium cognitionem tenerent, non posse tamen eos futura diuinare, probatur octo rationibus.*

## CAPVT III.



ED cōcedamus Astrologis, quod ipsi falso & impudēter sibi arrogant, perfectam videlicet Astorum & cæli scientiam: hanc ipsam nunc contendo non posse certam futurarum rerum prænotationem & diuinationem efficere, idque multis & validis rationibus confirmo.

11. *Octo rationes, quibus probatur ex cognitione Astorum etiam perfecta, non posse diuinari omnia quæ futura sunt.*

PRIMA Ratio. Vera & trita est in scholis illa Philosophorū sentētia, Sicut res se habet ad esse, ita quoque se habet ad cognitionem, hoc est, propter quas causas quæque res fit, & est, per eas cognosci debet, si quidem perfectam eius rei scientiam adipisci volumus: ad generationem autem futurorum effectuum particulatium, non modo concurret cælum, sed etiam causa particularis, est enim cælum causa vniuersalis, quo fit ut eius vis & efficientia sit etiā vniuersalis & indeterminata ad producendum quoslibet effectus particulares: determinatur autem vis cæli per causas particulares, quamobrem verissimum

N 5 est

est illud quod dixit Aristoteles, Sol & homo generant hominem quin effectus particulares, licet quod attinet ad eorum effectiōem & conseruationem, maximè pendeant ex causis vniuersalibus, tamen quod pertinet ad propriam cuiusque eorum naturam & ad naturales proprietates, tam specificas quàm indiuiduales, magis particularem causam quàm vniuersalem emulantur atque imitantur.

*Sicut ad 12. Præter causas cœlestes, & necessariam esse noti-  
genera- tionem causarum particularium ad prænosce-  
tionē re- earum effectus.*

*rum fu-  
turarum*

C V M igitur præter causas cœlestes, ad pro-  
ducendos effectus futuros opus sit etiam causa  
cōcurrit particulari efficiente, & materia idoneè præpa-  
cœlū sed rata, quorum si desit alterutrum, prorsus nullus  
etiā cau- futurus est effectus, ex his necessariò concludi-  
se parti- tur, ad prænotationem futurorum effectuum, cœ-  
culares, lestium causarum notitiam non esse satis. Atque  
ita ad hoc etiam quotidianis & manifestis experimen-  
ceriā ea- tis constat. cernimus enim agricolas eodem tem-  
rūdem pore & sub eodem syderum aspectu varia scemi-  
rerū præ num genera in terram iacere, ex quibus tamen  
notiōē, diuersa nascuntur: quæ sanè diuersitas non ad  
nō solius causas cœlestes, sed ad diuersas tantum species &  
cœli no- vires seminū referri potest. Ad hanc eadē senten-  
titiā sa- tiam, in libro secundo de Genesi ad literam,  
tis esse cap. decimo septimo ita scribit Augustinus: Cum  
posse B. multa corpora diuersorum generum, vel ani-  
August. mantium, vel herbarum & arborum, vno simul

puncto

puncto tēporis seminentur, vnoque puncto tēporis innumerabiliter multa nascantur, non tantū diuersis sed etiam iisdem terrarum locis, tantæ sunt varietates in progressibus, in actibus, & passionibus eorum, vt verè isti (sicut dicitur) perdant sydera, si ista considerent. Quid autem insulsius & haberiis, quàm cum istis rebus conuincuntur, dicere ad solos homines sibi subiiciendos fatalem stellarum pertinere rationem? sic Augustinus: cuius extremū dictū paulò vberius tractat apud Gellium libro 14. ca. primo Phauorinus: Si vitæ, inquit, mortisque hominum rerumque humanarum omnium tempus, & ratio, & causa in cælo & apud stellas foret, quid de muscis aut vermiculis aut echinis, multisque aliis minutissimis terræ marisque animantibus dicerent? an ista quoque iisdem, quibus homines legibus nascerentur, iisdemque itidem exstingerentur? vt aut ranunculis quoque & culicibus nascendi fata sint de cælestium syderum motibus attributa, aut si id non putarent, nulla ratio videretur cur ea syderum vis in hominibus valeret, si deficeret in cæteris.

---

13. *De simili ortu & dissimilibus euentis  
Geminorum.*

*Secunda  
ratio.*

SECUNDA ratio. Si vera esset istiusmodi Astrologorum doctrina, necesse esset Geminos qui vno tempore concepti & nati sunt, simillimos omnino fore: quod falsum esse, satis perspicuum est: nam vt cæteram eorum dissimilitudinem taceam, euenit nonnumquam vt alter  
sit

fit mas, alter verò fœmina. Cicero quidē in altero libro de Diuinatione, Proclum & Euristhenem reges Lacedæmoniorum fratresque geminos cōmemorat, quorum tamen & exitus vitæ dissimilis, & gloria rerum gestarum dispar fuit. Verūm, in sacris literis luculētissimum eius rei habemus exemplum: Iacob enim & Esau eodē concubitu, vt inquit Paul. Rom. 9. satis eodēque tempore nati, dissimillimis tamen ingeniis, studiis, moribus, & euentis fuerunt. Nec verò firmū est illud præsidium in quod refugiunt Astrologi, cū hoc argumento vrgentur, videlicet breuissimā illā morā quæ inter Geminorum ortus intercedit, licet ea nobis perexigua videatur, in cælo tamen, ob eius vastitatem & rapidissimam conuersionem, esse admodū insignem magnamq; facere variationē.

*Similitu  
do Ni-  
gidij Fi-  
guli.*

Hoc Nigidius Figulus declarabat exemplo rotæ, quā incitatissimè contortant, cū is eodem signare atramento vel percutere summa celeritate conatus esset, cessante ipsius rotæ circumactione, reperta sunt duo illa loca ab ipso percussa vel signata, haud paruo inter se intervallo disioncta. Hoc inquam, præsidium & refugium infirmū est, parumque tutum Astrologis. Etenim, licet in ortu Geminorum aliqua fuerit mora, in eorum tamen conceptu prorsus nulla fuit. Deinde, si tam breui variatur ratio constellationis sub quā quisque nascitur, erit profectò proprium tempus ortus cuiuslibet Astrologis incomprehensibile. De-

*B. Greg.  
hom. 10.  
super E-  
uangel.*

nique, valebit hoc loco aduersus Astrologos argumentatio illa Beati Gregorij: Si propterea Iacob & Esau non censentur nati sub eadem constellatione, quod nō simul nati sunt, sed vnus post

alter

alterum: ob eādem profectò causam iudicandum  
erit nullum hominum sub eadem constellatione  
totum nasci. Non enim totus simul ex vtero  
procedit, sed particularim & membratim: primò  
enim effert caput, tum collum, deinde pectus, po-  
stremò pedes. Iacob enim proximè natus est post  
Esau, manu plantam pedis eius tenens, perinde  
quasi, sicut inquit Augustinus libro secundo de  
Genesi ad litteram, capite 17. vnus infans instar  
duorum, vel duplo longior nasceretur.

*August*

*Phauo-  
rinus*

*apud*

*Aulum*

*Gell. lib.*

*14. ca. 1.*

**V E R V M**, hanc rationem admodum disertè  
Phauorinus aduersus Chaldaeos disputans exe-  
quutus est. Atque id velim etiam, inquit, vt re-  
spondeat, si tam paruum atque rapidum est mo-  
mentum temporis in quo homo nascens Fatum  
accipit, vt in eodem illo puncto sub illo circulo  
cæli, plures simul ad eandem comperentiam na-  
sci non queant: & si idcirco Gemini quoque non  
eadem vitæ sorte sunt, quoniam non eodem tem-  
poris puncto editi sunt: peto, inquit, respondeant  
cursum illum temporis transvolantis qui vix co-  
gitatione animi comprehendere potest, quoniā pa-  
cto aut consulto assequi queant, aut ipsi perspi-  
cere & deprehendere, cum in tam præcipiti die-  
rum noctiumq; vertigine, minima momenta in-  
gentes facere dicant mutationes: Sic Phauorinus.  
Ipsam hoc argumentum de Geminis diligenter  
& subtiliter pertractat. August. lib. 5. de Ciuit.  
Dei, primis aliquot capitibus, atque in 2. lib. de  
doctrina christiana, cap. 22. & vero maximum fa-  
cessit negotium Astrologis si enim tam breui tē-  
poris momento mutantur omnia, vt non diuer-  
sa modo, sed etiam aduersa plerumque eueniant,  
quis

*August.*

quis de nato puero possit quicquam certi prædicere, cum illud temporis punctum quo vel conceptus vel natus est ita uti est, nemini possit esse cognitum: Itaque, ut magna in homines vi & potestate pollerent astra, quid ea tamen in singulorum hominum generatione & ortu, efficerent, incompertum esset nobis: quippe cum aspectus cæli & positus astrorum qui est tēpore quo quisque nascitur, certo deprehendi nequeat: incertissimus enim cæli & astrorum motu, tarditatem nostræ considerationis & observationis præteruolat & anteuertit.

*Tertia  
ratio.*

**TERTIA** Ratio Missos nūc facio Geminos, quorum interruptus partus aliquam præbuit latebram Astrologis, consideremus in præsentia quamplurimos prorsus eodem tempore, & in eadem regione, eodemque syderum aspectu & positura, ex diuersis tamen parentibus progeneratos: de istis non potest Astrologus ex observatione syderum, non eadem euenta prænunciare, cū simul concepti & nati fuerint, & sub eadem constellatione. At lōgè secus esse, quotidiana demonstrat experientia, quam multi enim toto orbe simul & generantur in vterò & in lucem eduntur, quorum deinde maxima est ingeniorum, studiorum, morum, religionis, casuum, denique vitæ ac mortis euentorum dissimilitudo? Omnium Romanorum qui Cannensi pugna quamplurimi cæsi sunt ab Annibale<sup>1</sup>, idem fuit vitæ exitus & interitus: quis autem existimet, eodem illos omnes stellarum aspectu, posituque fuisse natos: idē dico de tot millibus Turcarum qui nauali pugna ab hinc octo & decē annos, memorabili ad immorta-



mortalitatem victoria, à Christiana classe profligati, & internecone deleti sunt, quorum omnium eandem fuisse rationem ortus, eandemque in generatione eorum viguisse cœli constellationem, stultum est dicere, An quo tempore natus est Homerus, Hippocrates, Aristoteles, & Alexander, non eodem quoque alios complures natos esse putabimus? at quis, illorum similis adhuc extitit Phauorinus sic argumētationem hanc cō-textebat. Quàm multi homines<sup>i</sup> vtriusque sexus, omnium ætatum, diuersis stellarum motibus in vitam editi, regionibus sub quibus geniti sunt longè distantibus, omnes tamen isti, aut hiantibus terris, aut labentibus tectis, aut oppidorum expugnationibus, aut eadem in naui fluctu obruti, eodemque genere mortis, eodemque ictu temporis intererunt; Quod, scilicet nunquam eueniret, si momenta nascendi singulis attributa, suas vnumquodque leges haberent. Quod, si quædam in hominum morte atque vita & diuersis temporibus editorum, per stellarum pares quosdam postea conuentus paria nonnulla, & consimilia posse dicuntur obtingere, cur non aliquādo possint omnia quoque paria vsu venire, vt existant per huiuscemodi stellarum concursiones, & similitudines, Socrætes simul, & Antisthenes, & Platonēs multi, genere, forma, ingenio, moribus, vita omni, & morte pari? quod nequaquam, inquit, prorsus fieri potest. Non igitur hac causa Chaldaei probè vti quæunt aduersus hominum impares ortus, interitus pares. Hæc Phauorinus.

*Phapho  
rinus a-  
pud Au-  
lum Gel-  
lium lib.  
14. c. 1.*

14. *Pulcherrima disputatio Bardeſanis  
aduerſus Astrologos,*

*Quarta  
ratio.*

QVARTA ratio. Bardeſanes Syrus in doctrina rerum caeleſtium excellenter verſatus, in eo dialogo, quem rogatu amicorum de Fato, & aduerſus Chaldaeos conſcripſit, ſutiliſſimas eſſe Astrologorum obſervationes, & rarò non emen- tientes eorum prædictiones, ad hunc ſerè modum (vt memorat Euſebius lib. 6. de Præparatione Euangelica, cap. 8.) demonſtrabat: Apud Seras lex eſt prohibens occidere, fornicari, & adorare ſimulachra: vnde in illa regione nullũ templum conſpicitur, nulla mulier meretrix, nulla adultera, nemo fur, nemo homicida: nec voluntatem alicuius illorũ ardentiffima ſtella Martis in medio cœli conſtituta ad cædem hominis coëgit; nec Venus Marti cõiuncta, vt alienam quiſpiam ſolicitaret vxorem potuit efficere. Atqui, ſingulis etiam apud eos diebus in medium cœli Martem peruenire neceſſe eſt, & in tanta regione ſingulis horis naſci homines non eſt negandum. Apud Indos autem, & Baëctros, multa millia hominum ſunt, qui Brachmanes appellãtur: hi tam traditione Patrum quàm legibus nec ſimulachra colunt, nec animatum aliquid comedunt, vinum aut ceruiſiam nunquam bibunt, ab omni demũ malignitate abſunt, ſoli Deo attendentes. At verò, cæteri omnes Indi in eadẽ ipſa regione adulteriis, cæde, temulentia, ſimulachrorum cultu inuoluuntur: inueniunturque ibi nonnulli, immò verò gens quædam Indorũ eſt in eodem climate habitans,

habitās, quæ homines venantes atque sacrificantes deuorant: nec vlli planetarum quos felices ac bonos appellant, à eadē ac sceleribus istis eos prohibent: nec maligni, Brachmanas pellere ad malefaciendum potuerunt. Apud Persas lex erat, filias, sorores, matres quoque ipsas in matrimonium ducere, nec in Perside solū, verum etiam quicumque Persarum ad alia climata orbis ē patria exiuerunt, nefanda hæc diligenter matrimonia celebrant: quos, alię gentes hoc scelus abominatæ, Magusæcos appellant. Suntque vsque ad hodiernū diem in media Ægypto, Phygia, Galatiæque plurimi Magusæi successionē patrum, eisdem celeribus contaminati. Nec dicere possumus in terminis & domo Saturni, cū Saturno ipso in natiuitatibus omnium, Marte aspiciente Venerem fuisse. Amazones viros non habent, sed tempore veris fines suos egredientes cū vicinis conueniunt. Vnde omnes naturali lege eodē tempore pariunt, masculisque interfectis, solas fœminas alunt, bellicosæque omnes siniliter sunt, magnam exercitationis bellicæ curam gerentes. Stultum autē est opinari, omnes istiusmodi fœminas prorsus iisdem natalitiis astris esse genitas. Fit hoc confirmatius argumento exemploque Iudæorum, qui vbi cūque terrarum & gentium sint nati aut versentur, inuiolabili obseruatione & infantes suos octauo die circumcidunt, & omnem diem sabbathi feriatum festūque religiosissimè agunt. Non sunt autem Iudæi omnes sub eadem constellatione procreati, nec eos à patriis legibus & institutis vlla vis & potentia cælestium corporum abstrahere potest. Sed quid

O

dicemus

dicemus de Christianis? qui innumerabiles toto orbe sparsi, idem vitæ genus atque doctrinæ custodiunt, nec à disciplina quam ipsis Christus Dominus tradidit vel promissis vllis, vel minis aut suppliciis vel latum vnguem amoueri possunt, an dicturi sunt, Christianos omnes eodem astro esse natos? Sed illud maximum est argumentum, qui ante susceptâ Christi disciplinam patrias leges & instituta studiosissimè acerrimeque tenebant, eos postea factos Christianos, illis desertis abiectisque longè diuersam vitam agere, diuersos mores induere, & diuersissimam religionem & doctrinam colere. Itaque nec multas Parthi Christiani ducunt vxores, nec Medicis mortuos obiiciunt, nec Indi mortuos suos cremant, nec Persæ cum sororibus aut cum filiabus nefario matrimonio miscentur, nec Ægyptij Apin, aut canem, aut hircum, aut felem colunt, sed vbicumque sunt, eisdem legibus, moribus & institutis viuunt. Quid plura? singulis horis apud omnes gentes homines nascuntur: vbique autem leges atque mores propter liberam hominis potestatem præualere videmus. Nec natalitia sydera nolentes Seras ad homicidium compellunt, aut Brachmanas ad esum carniæ, nec Persas à sceleratis nuptiis remouent, nec Medos prohibent vita defunctos canibus exponere, nec Parthos multas ducere vxores. Singulæ namque gentes, vt volunt & quando volunt, libertate sua vtuntur, legibus, moribusque obedientes. Hactenus sunt quæ ex disputatione Barthesanis aduersus Astrologos commemoranda hoc loco censuimus.

Q V I N T A ratio. Stante libero arbitrio *Quinta*  
 hominis & immortalitate animi nostri, ars ista *ratio.*  
 nullo modo stare potest. Si autem ea stet, illa  
 funditus corruere necesse est, quo intelligere li-  
 cèt qualis istiusmodi ars existimanda sit, quæ  
 nisi pessundata & obtrita, sublataque nostrorum  
 animorum libertate atque immortalitate, nihil  
 progredi, nec vlllo modo consistere queat. Quod  
 autem, si animus noster immortalis & in agen-  
 do liber sit, diuinationo Astrologica nulla esse pos-  
 sit, his argumentis concluditur. Primò, Astrolo-  
 gi profitentur se futuras hominũ actiones euen-  
 taque, ex suæ artis obseruationibus præsentire  
 & prænuntiare posse: hoc autem falsum est; fu-  
 tura enim quæ ex libera hominis voluntate pro-  
 ficisci debent, nullo modo possunt esse nota  
 Astrologis: nam vel cognoscerent futura in se-  
 ipsis, quod fieri non potest, quippe, quæ, futura  
 sunt, nondum per se actu sunt, quod autem non  
 est, prout non est, non intelligitur, sed prout ali-  
 quo modo est; nimirum potestate in suis cau-  
 sis. Nec prænosci queunt futura in ipsorum cau-  
 sis quæ tres sunt, Deus, cœlum, voluntas huma-  
 na, quæ autem ex Dei proposito, consilio & ab-  
 soluta voluntate euentura sunt, ea nulli mortali-  
 um vel ex cœlo, vel alia quacunque ratione,  
 nisi cui Deus ea voluerit aperire, cognita esse  
 possunt. *Quis enim, inquit Scriptura, cognouit*  
*sensum Domini aut quis consiliarius eius fuit? & ut* *Rom. 11.*  
*scriptum est in 9. cap. lib. Sapientię: Quæ in pro-* *& Esa.*  
*spectu sunt, inuenimus cum labore, quæ autem in* *40.*  
*cœlis sunt, quis inuestigabit? sensum autem tuum*  
*quis sciet, nisi tu dederis sapientiam, & miseris*  
*O 2 Spiritum*

*Spiritus sanctum tuum de aliissimis?* Ex cælo autem futura quæ pendent ex voluntate hominis non possunt cognosci, tum quia cælum est causa vniuersalis, quare futuri effectus particulares non nisi vniuersaliter & indeterminatè in cælo contineri & cognosci possunt: tum etiam quia cælum est causa corporalis & materialis, quare animus noster qui per se incorporeus & expers materiæ est liberque in agendo, cæli efficientiæ ac operationi directè & necessariò minimè subiacebit. Voluntas porrò humana quæ est proxima causa humanarum actionum, respectu futurorum quæ ex ipsa proficisci debent, per se indifferens & indeterminata est: multa enim acturi sumus, de quibus nihil dum cogitauimus, nedum deliberauimus; quomodo igitur causa indeterminata & indifferens potest definitam certamque futuri effectus cognitionè parere? Confirmatur hoc: exteriores actiones hominis pendent ex interioribus, ex deliberatione dico & electione, non potest igitur futura hominis actio exterior prænosci, nisi cognita sit futura voluntatis electio, vnde illa proficisci debet: at futura hominis electio non potest alteri homini esse cognita, si enim propositum animi & deliberationem quam quis in præsens habet mente conceptam, nemo alius scire potest, quantum minus scire poterit consilium, propositum, & voluntatem alterius hominis, quæ multos post annos futura est?

\* \* \*

15. Virum

15. *Utrum sit facilius, dininare quid facturus sit-  
vir bonus, an vir improbus.*

DEINDE, aut consideratur homo ut vivit *Homi-*  
& operatur secundum rationem, aut secundum *nem, ut*  
sensum, & appetitum: si secundum rationem, *operatur*  
sic homo non pendet à cœlo, est enim mens & *secundum*  
ratio expers materiæ, & incorporea: nullum au- *rationē*  
tem corpus per se agere potest in id quod est *nō è cœ-*  
incorporum: ratio item libera est, suarumque *lo, nec a-*  
actionum domina, & suo arbitratu ac volunta- *lia ex*  
te potest ad hoc vel illud agendum se ipsa appli- *causa ut*  
care: nam quamvis vel à cœlo, vel ex naturali *la præ-*  
constitutione, & temperatione sui corporis, *ter Deū,*  
vel à Diabolo, vel aliunde instigetur ad malè *per se ac*  
agendum, potest ea tamen reniti, & vi sua omnes *necessa-*  
instinctus, impulsus, & irritamenta extrinsecus *riò pen-*  
ei obiecta, comprimere, & irrita facere: quin- *dere.*  
etiam contra quam incitatur agere. Hoc mani-  
festum fit vel vnius Socratis exemplo, qui ex na-  
turali corporis affectione, & comparatione, &  
bardus, & mulierosus erat, sed eiusmodi vitio-  
sas naturæ propensiones, ad eò animi robore, &  
diligentiæ magnitudine emendavit, ut omnium  
sui temporis prudentissimus, & continentissi-  
mus sit habitus. Homo autem vivens secun-  
dum sensum, & appetitum carnalem, tam varia-  
bilem, & incertam vitam agit, ut qualis futu-  
rus sit, nullo modo prædici queat. Quamobrem  
Salomon (quod est in 30. capite libri Prouer-  
biorum) dixit; Alia quædam sibi esse cognitu dif-  
ficilia, illud autem esse prorsus ignotum, qualis

*Quàm* sit via adolescentis in adolescentia sua. Est enim  
*fit instabi-* ea etas adeò lubrica ad quodlibet viriù, adeò mól-  
*lis vi-* lis, & flexibilis in omnes partes, adeò vagans, &  
*ta, & a-* errans per omnia, & nulla in re diu perseuerans,  
*etiones* vt nulla certà ratione modoque regi & duci, sed  
*hominis* quocunque impellit cupiditas, illuc inconsultè,  
*viuentis* & temerè rapi videatur: quò fit, vt facilius sit di-  
*non secū* uinare quid acturus sit qui viuit secundum ratio-  
*dū ratio-* nem, & virtutem, quàm quid sit acturus, qui ra-  
*nē, sed se* tionis, & virtutem regula, & lege posthabita,  
*cundum* suas duntaxat cupiditates sectatur. Sic etiam fa-  
*sensum.* cilius est diuinare quid facturus sit Rex, qui se-  
 cundum rectam rationē iustasque leges imperat,  
 quàm quid facturus sit Tyrannus, qui omnia pro  
 suo commodo, & libidine administrat. Qua ra-  
 tione igitur Astrologi certa scientia rōsequi pos-  
 sunt ea quæ nihil ratum, firmum, fixumque, &  
 certum habent?

*Pulchrū* Adhæc, aut istud Fatum cœleste, & potentia  
*dilema* syderum potest ab homine impediri, ita vt effe-  
*aduer-* ctus eius non eueniat, aut nullo modo impediri  
*sus A-* potest: Si potest impediri, & non euenire, ergo  
*strologos* sicut effectus est incertus, ita prædictio eius cer-  
 ta esse non potest. Si non potest impediri, ergo  
 Si Astrologorum prædictiones  
*logorum* veræ, & sicitur animum nostrum esse materialem atque  
*prædi-* mortalem, vt pote syderum potestati necessariò  
*ctiones* subiectum. Nec verò si ita res se haberet, quic-  
*vera, &* quā prodesse hominibus prædictiones Astro-  
*certa es-* logorum: quid enim iuuaret nosse tanto ante fu-  
*sēt, pro-* tura, si ea nullo modo declinari, & caueri pos-  
*fecto inn-* sent? quin, vt ergo censeo, plus mali quàm boni  
*odiosæf-* afferrent nobis, quos necesse esset nō solum præ-  
*sēt homi-* sentibus



sentibus malis torqueri, sed etiam tam loginqua, & ineuitabili eorum expectatione acerbissime cruciari. Probè hoc intellexit Seneca, licèt non minorem quàm Astrologi syderibus in homines vim & potentiam tribueret: in libro enim decimo tertio epistolarum, octogesima nona epistola, ita scripsit: Venio nunc ad illum qui cælestium notitia glo riatur.

*Frigida Saturni quo sese stella receper,*

*Quos ignis cæli Cyllenius erret in orbes.*

Hoc scire, quid proderit? vt sollicitus sim, cùm Saturnus & Mars ex contrario stabunt, aut cùm Mercurius vespertinum faciet occasum vidente Saturno Potius hoc dicam, vbicumque sunt ista, propitia esse nec posse mutari. Agit illa continuus ordo Fatorum, & ineuitabilis cursus. Per statas vices remeant effectus rerum omnium, aut mouent sydera, aut norant: sed siue quicquid euenit faciunt, quid immutabilis rei notitia proficiet? siue significant, quid refert prouidere, quod effugere non possis? scias, ista nescias, fient. Hæc Seneca. Sed vide quàm argutè ac philosophicè hanc ipsam sententiam breuissimis verbis conclusit Phauorinus: Aut aduersa inquit, euentura dicunt, aut prospera. Si dicunt prospera, & fallunt, miser fies frustra expectando. Si aduersa dicunt & mentiuntur, miser fies frustra timendo. Si vera respondent, eaque sunt non prospera, iam inde ex animo primo miser fies antequam è Fato fias. Si scelicia promittunt, eaque euentura sunt, tum planè duo erunt incommoda, & expectatio te spe suspensum fatigabit. & futurum gaudij fructum spes

*Phauorinus apud Aul. Gell. li. 14. c. 1.*

tibi iam deflora. Nullo igitur pacto vrendum est istiusmodi hominibus res futuras præfagientibus: Sic Phauorinus.

*16. Quam sit vana ac frivolis prædictio Astrologorū de aliquo, quod sit futurus summus Pontifex.*

V N V M, illud maxime arguit prædictionum Astrologicarum vanitatem: etenim audent etiam Astrologi prædicere & promittere, aliquem futurum verbi gratia summum Pontificem: atqui profectio alicuius ad summum Pontificatum, non ex ipsis vel alterius vnius hominis voluntate aut potestate pender, sed ex voluntate atque suffragiis plurimorum Cardinalium, quorum munus est creare summum Pontificem. Quapropter ut certò prænunciari possit. Petrum, verbi causa, fore Papam, non satis est nosse compositionem Astrorum quæ in cælo fuit nascente Petro, sed simul etiam opus esset, Astrologo perspectos & cognitos esse omnes syderum positus & constellationes, sub quibus nati sunt quorumcunque voluntatum & suffragiorum concursus ad creandum illum Papam futurus est necessarius. Quare, si verum est quod narrat in Augusto Suetonius. Nigidium Figulum eiusmodi Astrologia nobilissimum apud Romanos, accepta hora partus Augusti, observatisque natalitiis eius astris, exclamasse, Dominum orbis esse natum; profectò existimandum est id eum nec scienter, nec certa aliqua ratione, sed temerè ac fortuito dixisse, & casu factum esse ut ita contingerit sicut ille prædixerat: Promotio namque Augusti

*Inanis prædictio Nigidij Figuli de futuro Augusto dominanti.*

Augusti per multos honorum gradus ad summum vsque principatum & Monarchiam, ex multorum hominū studio, gratia, & opera pendebat; vt ad tantum Augusti dominatum & imperium certò prænoscēdum atque prænunciandum, solius Augusti generationis & ortus consideratio satis esse nequaquam potuerit: neque enim natalitia Augusti sydera vim vllam habere potuerunt in eos qui fuere Augusti suffragatores adiutoresque ad consequendum principatum; scilicet multi eorum compluribus annis, vel ante vel post Augustum nati fuerant.

17. *Nullam posse esse scientiam vel artem  
istius Astrologia.*

*Sexta  
ratio.*

*Ars &  
scientia  
in his ver  
santur,  
qua sem  
per aut  
plurimū  
eueniūt,  
qualis nō  
est Astro  
mantia.  
Phauori  
nus apud  
Aulūm  
Gellium  
libr. 14.  
cap. 1.*

**S E X T A** ratio. Omnis scientia, & ars ver-  
satur in iis rebus quæ aut semper, aut certè fre-  
quenter ita contingunt vt ab ea docentur: quæ  
autem extra hæc sunt, & rarissimè accidunt, ea  
quia nihil habent fixum & certum, propterea  
nullam possunt scientiam vel artem efficere.  
Cum igitur prædictiones Astrologorum ferè  
sint falsæ, nec nisi per quam raro veridicæ sint,  
satis liquet eas non ex arte aliqua & certis ob-  
seruationibus proficisci, sed inscienter & incon-  
sultè ac temerè ab illis effuriri. Quamobrem  
Phauorinus identidem commonebat, vt caue-  
rent homines ne quà ipsis Chaldæi ad facien-  
dam fidem irreperent, quòd viderentur quædam  
inrerdu[m] vera effurite aut spargere. Non enim  
comprehensa, alebat, neque definita, neque

percepta dicunt, sed lubrica atque ambagiosa coniectatione nitentes, inter falsa atque vera pedetentim quasi per tenebras ingredientiſcunt: & aut multa tentando incidunt repente imprudentes in veritatem, aut ipſorum qui eos conſulunt, multa credulitate ducente perueniunt callidè ad ea quæ vera ſunt: & idcirco videntur in præteritis rebus quàm futuris, veritatem faciliùs imitari. Iſta tamen omnia quæ aut temerè aut aſtutè vera dicunt, præ cæteris, inquit, quæ mentiuntur, pars ea non ſit milleſima. Hæc Phauorinus apud Gellium. Sed audi qui in eandem ſententiã libro ſecundo de Diuinatione ſcriptum ſit apud Ciceronem. Quid plura inquit? quotidie refelluntur Chaldæi quàm multa ego Põpeio, quàm multa Crasso, quàm multa huic ipſi Cæſari à Chaldæis dicta memini, neminem eorum niſi ſenectute, niſi domi, niſi cum claritate eſſe moriturum: vt mihi permirum videatur, quenquam extare qui etiam nunc credat iis quorum prædicta quotidie videat re & euentu refelli. Seneca in eo libello cuius inſcriptio eſt: Ludus in mortem Claudij Cæſaris, initio introducit Mercurium apud Parcas mortem Claudij procurantem, & vt obiter Chaldæorum illudat vanitatì, inter alias rationes quib. conatur Mercurius Parcas inducere ad necem Claudij, hanc affert, ne toties videlicet miſeri Chaldæi mentiantur. Patere, inquit Mathematicos aliquando verum dicere, qui illum poſtquam princeps factus eſt, omnibus annis, omnibus menſibus efferunt. Prædicebant enim illi Mathematici Claudiũ ſingulis annis & menſibus moriturum: quod etiam noſtri temporis

*M. Tul-  
lius.*

*Seneca.*

ris Asttologis contingit, à quibus mortes sum-  
morum Pontificum in singulos annos atque  
adeò menses prænuntiari audimus, & ridemus.  
Beatus Ambrosius lib. 4. in Hexameron, cap. 7. Cum, inquit, ante dies paucos esset sermo *B. Amb.*  
de pluia, quæ fore utilis diceretur, ait quidam,  
Ecce Neomenia dabit eā, & quamvis cupidi es-  
semus imbrum, tamen eiusmodi assertiones  
veras, esse nolebam. Denique, delectatus sum  
quod nullus imber effusus est, donec precibus  
Ecclesiæ datus, manifestaret non de initiis Lu-  
næ sperandum esse, sed de prouidentia & mise-  
ricordia Creatoris, quo exemplo & vanitas istius  
Astrologiæ confutata est, & efficacia Chri-  
stianæ pietatis visque religiosarum precum re  
ipsa comprobata.

---

*18. Vanitas & falsitas multarum prædictio-  
num Astrologicarum.*

ALBVMAR princeps huiusce super-  
stitionis, Astrologica ex obseruatione & præce-  
ptis huius artis, prædixit Christianam legē dura-  
turam non plus annos mille quadringentos sexa-  
ginta, sed bene habet, quod post id temporis, exa-  
cti iam anni centum vigintiocto, falsā esse illius  
prædictionem apertè demonstrant. Abraam, Iu- *Abraā  
Iudæus.*  
dæus prænunciauit ex obseruationibus Astrolo-  
gicis, expectatum à Iudæis Messiam venturum  
anno post Domini nostri ortum millesimo qua-  
dringentesimo sexagesimoquarto, quod nimi-  
tum

*Petrus  
de Aliaco.*

tum futura esset eadem Astorum cōpositio, quæ fuerat olim cū Moses ex Ægypto populū Hebræum eduxit: cuius prædictionis vanitatem dies ipsa redarguit. Petrus de Aliaco scriptum reliquit, quo anno generale Concilium celebratum est Constantiæ ad tollendum schisma quod multos annos afflixerat Ecclesiam, prædixisse Astrologos eius temporis, nullam fore in Ecclesia pacem & concordiam, sed habitu cæli & conformatione astorum præsignificari maximas fore dissensiones ingenti cum religionis Christianæ detrimento & exitio. Atqui, per illud Concilium Constantiense, diuturnum illud & perniciosum schisma eo anno extinctum est, pace ac tranquillitate Ecclesiæ reddita: qui euentus planè contrarius prædictionibus Astrologorum, sanè multum mouere debuerat Petrum Aliacensem, vt his nullam deinceps isti Astrologiæ fidem haberet, præsertim verò, cū ipsemet vel suis deceptus observationibus, vel alienis occupatus & circumuentus opinionibus, veritus fuerit, ne illud tantæ graue & odiosum schisma breui Antichristum mundo pateret.

---

19. *Errores Astrologorum in Chronologia.*

*Albuzar.*

ALBUZARistorum Astrologorū coryphæus, nescio quas Saturni reuolutiones dilaudat: affirmat enim, quoties Saturnus denas sui orbis conuersiones perfecit, hoc est expletis annis trecentis, semper magnas quasdam res & admo

admodum insignes euenire. Post Alexandrum enim, inquit, annis trecentis apparuit Arelasor filius Bel qui Persas contriuit: & proximè post transactis aliis trecentis annis, apparuit Iesus magister & dux Christianorum. O turpem ἀνιστογνήσιαν, O incredibilem temporum inscitiam; nam nec tunc fuit iste filius Bel qui Persas fregerit & Afflixerit, & Christus Dominus noster non sexcentis annis post Alexandrum vt iste mentitur, sed trecentis duntaxat & viginti annis post Alexandri mortem natus est. Quamquā quis miretur in hoc lapsum Albumazarem, cum tam insigniter errauerit in Ptolemaeo Mathematico, quem facit vnum de Ptolemæis Ægypti regib, qui post Alexandrum Magnum Ægyptiis imperarunt? cum in confesso sit, nec Ptolemæum Mathematicum fuisse regem, & cum Hadilano Imperatore floruisse, nouissimo Ptolemæorum Ægypti regum pluscentum & sexaginta annis posteriorem. Iactant item Astrologi, nullam fuisse apud homines vlllo tempore mutationem legum, nullius Prophetæ nobilis aduentum, nullam nouæ religionis introductionem, nullam magnorum regnorum conversionem, denique nullum insignem & memorabilem casum aut euentum, quin magna aliqua coniunctio syderum, præcipuè verò Saturni & Iouis præcesserit. Hæc inquirunt, constellatio, nascentem orbem initiauit: illa præparauit diluuiū, alia Abrahami vel Moysæ genuit: illa Iesu aduentum prænuntiavit, alia Mahumeti legem antecessit, quæ quàm sint futilia commentitia, & erroris plena, vel vno hoc argumento constare potest.

*Quam multa peccauerit cōtra veram Chronographiā Petrus Aliacen- sis in suis rationib. Astrologi- cis.* Petrus Aliacensis istiusmodi figmentis stultissimè credens ac vanissimè gaudens, in libro suo de concordia historię & Astrologię, ad id quod ex sensu Astrologorū proximè docuimus probandum, hoc quasi fundamentum supponit: Ab initio mundi vsque ad diluuium fluxisse annos bis mille ducentos quadraginta duos: à diluuiio autem ad Christi Domini aduentum & ortum, tet mille centum & duos annos hoc posito, probare nititur quicquid in orbe terrarum valde memorandum & insigne quocunque tempore acciderit, eodem tempore magnam aliquam constellationem in cælo apparuisse. At enimvero, cum perspicuè falsa sit computatio annorum qua velut fundamento illorum ratio & doctrina fulcitur, nōne consequens est quæ ducuntur & pendent ex illa computatione esse falsa? Etenim ab Adamo ad diluuium, non plus mille sexcentos quinquaginta sex annos preterisse constat ex sacris literis, pauciores nempe quam illi numerant, annis propè sexcentis: quo fit, vt constellationem, quam aiunt isti fuisse in exordio mundi, sexcentis annis mundum præcessisse necesse sit. Deinde tempus quod inter diluuium interfuit & Christi Domini aduētum, ne numerum quidem bis mille quadringentorum annorum impleuit. Ex quo efficitur vt coniunctio Astrorum quam aiunt ducentis annis antegressam diluuium, non nisi sexcentis octogintaquatuor annis post diluuium potuerit existere. Præterea, dicunt quartam coniunctionem maximam fuisse annis nongentis quadraginta duobus post diluuium, sexdecim nimirum annis ante



ante natum Abraam : quem tamen liquet ex sacra Chronologia , ducentis nonagintaduobus annis natum esse post diluuium , quare necesse est, quartam illam coniunctionem sexcentis triginta annis post Abraæ ortum contigisse. Ad hæc, notarunt illi sextam coniunctionem magnam ducētos viginti quinque annos fuisse ante Christum , nimirum falso : nituntur enim supradicta computatione annorum à diluuiio ad Christi aduentum, quam nos mēdosam esse ostendimus, quin, si veram sequamur Chronologiam , necesse esset sextam illam coniunctionem sexcentis fermē annis post Christi Domini ortum contigisse. Postremò , quàm fuerit Petrus Aliacensis veræ Christianæ Chronographiæ rudis, & prorsus expertus, vel hoc vno indicio manifestum esse potest: affirmat anno ab ortu Christi septingentesimo, ad quod tempus septimam coniunctionem magnam refert , natam esse in Ecclesia pestem Hæreticorum , maximè verò eam quæ fuit Artianorum , quorum tamen hæresis circa annum Domini trecētesimum exorta, ante sexcentēsimum extincta est. Quis igitur tam multas istorum prædictiones nixas mēdacissimis Chronologiis, inanes & mendaces esse dubitet?

Sed quid ego falsarum prædictionum exempla colligo , quorum plena est , & historia omnium temporum, & referta vita cōmunis? Equidem reor, quàm difficile est prædictiones aliquas Astrologorum de futuris rerum humanarum euentis, etiā casu ac fortuito, veras inuenire; tam faciliè reperiri posse innumera eorum prædicta perspicuè falsa , & rebus ipsis euentisque  
confusa

*Lepidū  
Catonis.  
dictum  
ut refert  
Cicco. lib.  
2. de Di-  
uinatione,  
in Astro-  
logos  
bellè cō-  
petens.*

*Notet  
hoc Le-  
ctor.*

confutata. Scitè dixit Cato, mirari, se quod non rideret Aruspex, Aruspicem cū vidisset: quoniam enim quæque res euenit prædicta ab his? aut si euenit quippiam, qui afferri potest, cur non casu id euenierit? Quod de Aruspicibus Cato dixit, id profectò per quam bellè quadrat in Astrologos, ut mirum videri debeat, cū mendaci homini ne verum quidem dicenti credere soleamus, quomodo illis, si vel vnum eorum prædictum verum euasit, simpliciter credamus: & non ex multis potiùs falsis vni fidem derogemus, quàm ex vno quod casu verum euenit velimus innumera fabulosa falsa cōfirmare? Verùm dicet aliquis, Astrologos nonnunquam esse veridicos, & ea prædicere quæ rei confirmet euentus: prædicunt sanè, sed inconsultè, inscianter temerè, quis enim est qui totam diem iaculans, non aliquando collimet? Verissimè dici potest de Astrologis, quod olim dixit quidam de oraculis Apollinis, quæ vera fuissent memoria teneri, & prædicari, quæ autem falsa, neminem recordari, aut taceri ab omnibus: nam qui veritatem illorum oraculorum defendebant, pauca quædam vera crebro sermone vsurpabant, pleraque falsa silentio præmebant, qui autem omnia contemnebant, nec vera nec falsa curabāt. Sed causas cur prædicta Chaldaeorum sæpè vera esse videantur, extrema hac disputatione aperiemus.

---

20. *Astromantiam omni tēpore à viris sapientibus,  
& prudentibus esse contemptam & damnatam.*

SEPTIMA ratio. Si hæc diuinatrix Astrologia vera esset & certa, sine dubitatione vlla *Septima ratio.* pars esset Philosophiæ omnium nobilissima & hominibus optatissima atque honoratissima: tum propter materiæ quam tractat, cælum dico & sydera, dignitatem atque præstantiam: tum propter futurarum, rerum potissimè autem vitæ hominum & mortis casuum & euentorum prænotionem, quas res noscendi auidissimi sunt & curiosissimi mortales: at cùm ea doctrina omni tempore à præstantissimis quibusque Philosophis, quinetiam Astrologis, contempta, derisa & damnata fuerit, maximum profectò argumentum est, eam futilem & inanem, & ab omni ratione, fide ac probabilitate vacuum ab illis esse iudicatam. Xenophon in libro de dictis Socratis, quod etiam refert Eusebius lib. 14. de Præparatione Evangelica capite 4. tradit Socratem dicere solitum, cognitionem futurarum rerum quæ in potestate Dei sunt, non esse hominibus procurandam: neque enim posse homines eas res, cognoscere, nec Deo gratum esse, si quæ illæ occultauit, ea mortales velint nimis studiosè cuciosèque rimari. Pythagoras, Democritus & Plato longissimis peregrinationibus susceptis, Persarum *Democritus* magos, sapientes Chaldæorum, Ægyptiorum, quæ sacerdotes adierunt, à quibus occultiora quædam vel ad disciplinas Mathematicas, vel ad religionem cultumque deorum pertinētia cognouerunt: diuinatricem autem Astrologiam, vel *Plato.* *Xenophon,* discere ab illis neglexerunt, vel si eam quoque *Socrates* didicerunt, certè nunquam ea vsos esse ipsos, ex *Pythagoras.* eorum scriptis manifestè perspicitur. *ras.*

*Aristoteles.* ARISTOTELES, qui vir & quantus? quā solers, quā subtilis & copiosus in doctrina rerum cœlestium? quam cū aliquot libris diligenter explicuerit, nusquam tamen de istiusmodi Astrologia verbum vllum fecit. Cū autem in libris Meteororum, & de Partibus atque Generatione animalium, præsertim autem in libro Problematum, multarum rerum obscurarum & admirabilium causas perquirat, ad nullius quæstionis enodationem vel admirandi cuiusquam effectus explicationem, istius Astrologiæ opera & præsidio est vsus. *Sententia Aristotelis, quæ Astro-mantiæ è medio tollunt.* Quin multa sunt in eas scriptis quæ istam Astrologorum doctrinam omnino conuellant, veluti est illud, Futurorum contingentium non esse certam, & definitam veritatem: Quæ per accidens quæque raro vel ad vtrumlibet contingūt, non posse scientia comprehendi: Versari in rebus humanis casum & fortunam quæ fugiant certam hominis intelligentiam: Particularium & corruptibilium effectuum causas proximas & proprias esse particulares, atque corruptibiles, ob idque ad perfectam eorum cognitionem non satis esse cœlestes & vniuersales causas contemplari: Cœlum non aliter agere in ea quæ sunt infra lunam, nisi per motum & lumen. Nec vsquam ferè indicauit Aristoteles præter solem & Lunam, vim & efficientiam aliorum syderum, illud quoque docuit decretis Astrologorum valdè contrarium, cœlestia signa etiam corporeorum & sensibilibus effectuum, per alias causas auerti & impediti posse.

Cicero libro 2. de Diuinatione, laudat Eudoxum

xum ætate Platonis & Aristotelis principem *Eudo-*  
 Astrologorum: item Panætium Stoicum, Arche- *xus Pa-*  
 laum etiam & Cassandrum, ac Scilacem Hali- *natus.*  
 carnasseum, Astrologorum sui temporis nobilif-  
 simos, qui totam hanc rationem Astrologiæ re-  
 pudiarunt. Auicenna qui post Hippocratem & *Auicē-*  
 Galenum principatum medicinæ obtinet, libro *na.*  
 vltimo primæ Philosophiæ, negat Astrologis  
 esse credendum in diuinatione futurorum: quia  
 ipsi nec puncta cœlestia teneant, neque naturas  
 rerum inferiorum planè necessarias ad facien-  
 dum iudicium de rebus futuris, perspectas ha-  
 beant, neque nitantur demonstrationibus sed  
 probationib. oratoriis & poëticiis. Ptolomæus, *Ptole-*  
 quem isti huius artis principem & ducem sequi *maus.*  
 se dicunt, in libro primo de Iudiciis, capit. se-  
 cundo Non est, inquit, putandum, omnia à su-  
 pernis causis directo deriuari necessitate qua-  
 dam inuiolabili, vt nulla alia vis quin ita ope-  
 rentur obistere valeat. Idem tractatu suo quem  
 vulgo appellant Centiloquium, hoc est, Centum  
 sententiarum, prima eius sententia sic habet,  
 Soli numine diuino afflati prædicunt futura  
 particularia. Quinta verò sententia huiusmodi  
 est, Potest is qui sciens est multos stellarum  
 effectus auertere quando naturam earum no-  
 uerit, ac seipsum ante illorum euentum ritè  
 præparauerit vnde manauit illa multorum ser-  
 monibus trita sententia, Sapiens dominabitur  
 astris. Porphyrius in libro de Oraculis confes-  
 sus est, exquisitam rerum futurarum scientiam *Porphy-*  
 ex inspectione syderum, non mortalibus modo, *rius.*  
 sed multis etiam deorum esse incomprehensibi-

*Plotinus*

lem. Idem in vita Plotini scribit, eum, cùm in ista Astrologia fatis multum temporis, studij & operæ posuisset, deprehendisse tandem Astrologorum iudiciis & diuinationi futurarum rerum non esse credendum, eamque diuinationem, tum sermonibus, tum scriptis confutauisse: quod manifestum est cuius legenti eius libro de Fato & de Providentia, maximè verò eum qui inscriptus est, An stellæ aliquid agant.

21. *Qui generi hominũ prædictiones Astrologorum arideant & probentur, quas S. Ambrosius comparat telis aranearum.*

*Profes-* Si hæc porrò Astrologia vera esset & certa plu-  
*fores di-* rimum sanè adiumenti afferret, prouisione fu-  
*uinando* tutorum, ad bene regendam, & administran-  
*futura* dam rempublicam, ob eamque causam magno  
*ex astris,* in honore, & gloria fuissent Astrologi apud Re-  
*publicis* ges & rerum publicarum Principes: at contra  
*multorũ* prorsus euenit; nam seuerissimis multorum Prin-  
*Princi-* cipum decretis, & edictis explosam, & damna-  
*pum de-* tam, & grauissimis suppliciis addictam, eam ar-  
*cretis es* tem inuenimus. Quoties Astrologi seu Chaldæi  
*secuuta-* Roma eiekti sunt principe Tiberio, Doilectiano,  
*rib. eie-* Constantino, Theodosio, Valentiniano, præser-  
*ctos.* tim autem Iustiniano, quibus huius artis studiũ,  
 & exercitatio, non solum vt inanis, & veritatis  
 expers iudicata est, sed etiam vt ciuitatibus, &  
 socierati hominum noxia, & pestilens, semper  
 visa est detestabilis: Sed quid attinet in re mani-  
 festa, quæ turbam testiũ non desiderat longiorem  
 oratio

orationem ponere? Audeo dicere post hominum memoriam vix fuisse quenquam vlllo tempore vel magnitudine ingenij, vel præstantia doctrinæ, vel prudentiæ ciuilibus excellentia, vel eximia morum integritate, vel denique insigni aliquo nobilem ac memorabilem virum, qui natalitia Chaldæorum prædicta non quasi meras nugas, & quisquilias floccifecerit, penitusque contempserit. Vulgus modo stolidum, ad intelligendum hebes, infirmum ad iudicandum, facile credulum, & noua mira que audiendi, & noscendi curiosum, istis nugatoribus, & aures, & fidem libenter adhibet. Gaudent etiam hisce commentis leuissima quedam ingenia, lucri magis, quam veritatis cupida, in republica literarum turbulenta ac seditiosa, & sapientiæ optimatibus semper infensa, rerumque vtilium, & aliis notarum fastidiosa, nouarum autem, & ignorarum, atque adeo etiam incomprehensibilium audidissima: denique quibus non tam cordi, & curæ est vera nosse quam videri vulgò ea ipsos scire, quæ summi Philosophiæ antistites nescire se confitentur.

*Cui generi hominum prædictiones Astrologorum arideant, & probentur.*

H A N C rationem egregio S. Ambrosij dicto concludam. Ita scribit Ambrosius li. 4. Hexameron cap. 4. Sapientia Chaldæorum telæ aranæ comparatur, in quam si culex aut musca incidat, exuere se non potest: si verò validiorum animantium vllum genus incurrisse visum est, comperttransiuit, & casses rupit, infirmos atque inanes laqueos dissipauit. Talia sunt retia Chaldæorum, vt in his infirmi hæreant, validiores sensu offensionem habere non possint. Itaque vos qui

*B. Ambrosius prædictiones Astrologorum comparat telæ aranæ.*

validiores estis, cum videritis Mathematicos, dicere: Telam aranearum texunt, quæ nec usum aliquem potest habere, nec vincula, si tu non quasi culex aut musca lapsu tuæ infirmitatis incurras, sed quasi passer aut colūba casses inualidos præpetis volatus celeritate dissoluas.

---

22. *Disputatur contra tria fundamenta  
Astrologia Iudiciaria.*

*Octava  
ratio.*

OCTAVA ratio Fundamenta, & firmamenta huius artis, aut nulla sunt, aut certè infirmissima, & fragilissima: hæc igitur ars nulla ratione firma, & stabili videtur ad diuinandum, quamobrem nullam quoque apud homines auctoritatem, fidem, ac probabilitatem habere debet. Primum fundamentum istius doctrinæ est, astra habere qualitates omnes elementorum: partim enim esse frigida: partim humida & sicca, si non formaliter, saltem virtualiter, hoc est, si non actu saltem effectū, si non in se habendo eas qualitates, certè habendo facultates earum qualitatū effectrices: Saturnum aiunt esse frigidum, Martem siccum, Lunam humidam. Verum hoc, & ratio confutat & experientia, Ratio quidem, quoniam sicut astra omnia sunt lucida & ex se lucem fundunt, ita quoque calida esse omnia & calefacere necesse est: lux enim, non sicut omnis per se calefacit, ita frigere facere aut per se humectare vel exsiccare potest. Stemus decretis Astrologorum aientium: ut Lunam, itidem cetera sydera luce à sole mutuata fulgere.



fulgere. Si igitur omnium Astrorum vna est eademque lucis origo & ratio, qui potest esse tam multiplex, dissimilis atque discrepans ratio & potestas agendi? Experientia item hoc ipsum redarguit: in plenilunio enim cum est lumen Lunæ plenissimum, noctes quoque, Aristotele & experientia teste, calidiores existunt. Sed Astrologi præter lucem, alias in cælo & syderibus vires atque facultates, & à luce & inter se multum diuersas, mirandorumque operum causas, quas influentias appellant, commenti sunt. Notitium sanè inuentum, nulli veterum vel Philosophorum vel Astrologorum vnquam probatum: ac si licet ex eorum scriptis coniecturam facere, ne notum quidem illis. Postquam verò à recentioribus Astrologis influentiæ inuentæ & palam probatæ, ab alijs quoque doceri & defendi cœptæ sunt, quis ex Lycæo paulò grauior & probatior Philosophus non eas repudiavit atque damnauit? Festiuè quidam Asylum ignorantiae eas appellauit ad influentias enim quali ad vnicum perfugium sese recipiunt, & hanc se in latebram coniiciunt. quicunque mirabilium effectuum proprias & naturales causas, vulgaribus ingenijs nec in Philosophi exercitatis occultas, solerter investigare ac reperire non possunt. Et verò, si admittuntur influentiæ, vix dici potest quâto perè debilitetur robur Philosophiæ, deteratur eius dignitas, auctoritas eleuetur, minuatur existimatio, denique studium ei apud homines cultusque languescat, Quid enim attinet in occultis rerum causis perquirendis & eruendis præclara ingenia Philosophorum

*Aristoteles.*

*Non esse ponendas in cælo influentias.*

tanto studio & conatu laborare, cum in procliu<sup>9</sup> sit, cuiuslibet effectus ex cœlestibus influentii rationem petere & afferre? quis enim effectus est, cuius naturalis & vera causa paulò obscurior & abstrusior est, quem non per istiusmodi influentias nullo negotio liceat explicare? Cur magnes ferrum ad se rapit? confestim respondebitur: quia propria eius influentia cœlestis eam illi virtutem indidit. Vnde Remora tantulus piscis vim habet sistendi incitatissimū nauigium? in promptu est responsio, nimirum à cœlesti quadam influentia, quæ tanta pisciculum illum vi ac potestate roborauit. Quid moror? nullū erit problema, nihil in natura rerum adeò reconditum, & ab intelligentia nostra remotum, denique nihil de his quorum peruestigatio summorum Philosophorum ingenia fatigauit, & torfit, quod non quiuis è circulo Astrologorum, & indoctorum hominum vno verbo, scilicet per istas influentias expedire queat.

*Argu-  
mentatio  
cōtra in-  
fluētias.*

Verum labor equidem longius, reuertar igitur ad propositum. Si Saturnus, quia lucidus est, per lucem calefacit, quomodo idem per influentiam frigefacit? nōne absurdum est in eodem astro duas esse facultates, vnā calefaciendi, alteram frigefaciendi, non diuersas modo, sed etiam aduersas, & contrarias? cernimus ita esse natura comparatum, vt omnibus in rebus in quibus dux insunt differentiæ, vel proprietates (vt more Philosophico loquar) vna generalis, & quæ vni rei communis est cum aliis multis, altera specialis, & propria eius rei (cuiusmodi sunt in homine sentientem esse, & rationalem)

vt

vt semper differentia, & proprietas specialis, nobilior, & perfectior sit generali, vt quæ illam cōtrahit, & determinat, nouæ perfectionis gradum & rationem ipsi adiungens: sicut pater in prædicto exemplo hominis, in quo rationale nobilius est quàm sentiens. At contra omnino se habet res in hac mirabili Astrologorum doctrina. Etenim docent ipsi, in Saturno, exempli causa, duas esse proprietates seu facultates agendi, vnā generalem, & communem ei cum omnibus astris, quæ est vis illuminandi, & per illuminationem calefaciendi: alteram specialem, & propriam Saturni, qua ratione differt ab aliis astris, quæ est facultas frigefaciendi, vel aliqua alia vis alicuius influentiæ. Certum autem est, lucem cœlestem multò nobiliorem esse quacunque alia qualitate cœlesti, & facultatem calefaciendi præstantiorem esse facultate refrigerandi. Præterea, duas esse in re quapiam facultates & proprietates ei rei naturales, quatum altera, vt diximus, sit generalis, altera particularis, inter se contrarias, quales sunt in Saturno secundum istos potestas calefaciendi per lucem, & refrigerandi per influentiam, nec fert natura rerum, & id fieri non posse ratio ipsa decernit. Nam vt in corpore multiformi, & quod Græci vocant Heterogeneum, secundum diuersas partes inesse queant contrarię qualitates, & facultates, quemadmodum contingit corpori humano in cerebro, & in corde, id tamen conuenire non potest in astrum Saturni quod est secundum omnes partes vnius formæ ac naturæ: neque enim vna pars eius habet lucem, altera yerd influentiam,

sed vt totum est præditum luce, ita conuenit in eo toto esse influentiam. Ne multa ( non enim consentaneum est alieno loco de Influentiis aduersus Astrologos subtiliter disputare ) satis argumenti est ad tollendas influentias omnium quæ in natura rerum efficiuntur, tametsi noua, singularia, & mirabilia videantur, veras, naturales, & proprias causas, atque rationes ex duobus principiis cælestibus, quæ omnibus sunt conspicua, & experimentis quotidianis explorata, motum dico, & lucem, plenè cumulateque ac probabilissimè peti & duci posse. Figuras porro & effigies stellarum quas designant Astrologi in Zodiaco, similitudinem reddentes quorundam animalium vel hominum, magna vim habere in ortu cuiusque censent Astrologi, cùm tamen per se ac natura sua non sint tales, sed sola eorum imaginatione constant, ab ipsis eo modo confictæ & figuratæ: possent enim fingi etiam ad similitudinem aliorum animalium, domuum, turrium, mensarum, aliarumve rerum quare valde friuolum & ridiculum est, in eiusmodi figuris quicquam momenti ad diuinandum esse positum existimare.

---

23. *Virum astra natalitia cuiusquam, possint esse certa causa omnium qua ei euentura sunt.*

*Alterū mentum.*

*Astro-* S E C V N D V M fundamentum Astrologorum est; natalitia cuiusque astra esse obseruanda; *mancia* ex his enim omnes vitæ casus & euentus prouideri & prænotari posse. Sed quis non videt *funda-* *mentum.* *damen*

damentum hoc esse infirmissimum? cur enim *Quā in*  
 Astrologi non potius obseruent tempus, & cæ- *anno sit,*  
 li atque syderum statum quo quisque in vtero *natali-*  
 conceptus, formatus, & animatus est? cum in eo *tia cuius*  
 plus momenti esse videatur ad diuinandū: quip- *que homi*  
 pe tunc primum existit homo, & tunc pri- *nis astra*  
 mum vis cælestis in homine recipitur & impri- *obserua-*  
 mitur: Etenim, ante ortum per nouem menses *re ad di-*  
 quisque fuit in vtero, potestati & actioni cælo- *uinādū.*  
 rum subiectus. Cur item non considerant Astro-  
 logi alias constellationes & defluxus cælestes,  
 qui contingunt homini sæpius post ortum? Cū  
 plerūque vsu veniat vt illæ virtutes cælestes  
 insigniores sint effectū, & valentiores ad immu-  
 randum hominē, quā quæ tempore ortus eius  
 fuerunt: effectum enim illum & defluxū Astro-  
 rum nascenti homini impressum, necesse est va-  
 riarī commutata sapiētia humani corporis tem-  
 peratione, vel ob alias potentes constellationes,  
 vel ob educationem, vel ob variā viuēdi con-  
 suetudinem & rationem, vel ob leges patrias, ad  
 quarum normā cogitur quisque vitam, mo-  
 res, studia, & actiones conformare. Quid quod  
 fortasse nihil illius materiæ primogeniæ quam *An ali-*  
 quisque in ortu habuit, reliquum fit in extrema *quid pri-*  
 ætate? hoc enim visum est & multis & magnis *migenia*  
 Philosophis, nec S. Thomas in 1. par. quæst. ult. *materia*  
 art. 1. abnuere videtur. Quo concessō, vis illius *hominis*  
 primi defluxus & effectus cælestis in ortu ho- *maneant*  
 minis ei indita & impressa, necessariō tandem *per totā*  
 euanescet tota, nisi fingat quispiam eiusmodi *vitam.*  
 virtutem cælestem migrare ex subiecto in sub- *S. Tho.*  
 iectum, tanquā ex domo in domum mutando  
 domici

domicilia : aut cùm præsentit interitum suum, aliam pro se sui similem & quasi vicariam virtutem substituere.

24. *Virum sit plus momenti in conceptu hominis, quam in eius ortu : ad diuinandum.*

P L V S autem esse ponderis , aut certè non minus, in conceptu hominis quàm in ortu , magister istorum Ptolemæus locuples testis est. Is enim in tertio Apotelesmatum ita scribit : Cùm principium temporale hominis aliquod statuatur, natura quidem & per se illud erit principium cùm semen vtero genitali admittitur , potentia verò & secundùm accidens cùm hora partus infans egreditur. Qui igitur horam admissis seminis vel casu vel obseruatione deprehendit, illam sequi potius debet in proprietatibus corporis & animi dignoscendis , considerando quæ sint eo tempore stellarum configurationes , cùm enim semel à principio semen ex ambientis aëris affectione, certa qualitate disponitur , licèt per consequentis cōformationis tempora varietur, quoniam tamen propriam cognatamque materiam naturaliter sibi asciscit , magis etiam primæ suæ qualitatis dispositioni assimilabitur. Hæc inibi Ptolemæus. Quibus verbis non obscure docet, primum & naturale atque efficacissimum hominis principium, esse seminis admissionem hominisque conceptum ; atque huic principio potissime insistendum & inhaerendum esse ad prænoscentas hominū affectiones & euentus, tam  
qui

qui ad corpus quàm qui ad animã pertinent. Sed quia benè nouerat Ptolemæus, punctũ illud temporis vel admissi seminis, vel conceptus, vix cognosci posse ab Astrologis, ne illorum iudicia & diuinationes quas ipsi ducunt ex ortu hominis infirmare videretur, mox subiecit, Qui autẽ horam ighorant principij seminalis, eos necesse est sequi principium natiuitatis. Haly nobilis Astrologus in eo libro quem scripsit de electionibus, ingenuè faterur, efficaciam decernendi Fatum hominis esse in hora conceptionis, sed quia hæc nescitur ab Astrologis, propterea eos ad horam natiuitatis confugisse. Quin cùm Astrologi præmuntur argumento Geminorum, quorum cùm idem sit ortus, dispar tamen euentus & exitus est; respondere solent diuersitatem euentuum qui sunt in Geminis, ex diuersitate conceptus eorum esse profectam.

---

25. *De vanitate Astrologorum diuinationem suam extendentium etiam ad ciuitates, non solum ad homines.*

S E D vide quousque progressa sit istorum audacia & impudentia: etiam vrbiũ, non hominum modò, facta profitentur hac arte posse prænosci & prænunciari; obseruata enim Astro- rum compositione quæ fuit cum vrbes conde- rentur, posse earum casus euentusq; omnes pro- spici ac prænotari. Fecit hoc in vrbe Roma ro- garu Varronis, quidam Tarutius Mathematicus *Taru- tius Ma- themati-* vt in Romulo tradit Plutarchus: quam historiam *cus, om-* lib. 2. de Diuinatione his verbis Cicero enarrat, *Quidam*

*omnia* Quidam L. Tarutius Firmamus familiaris noster  
*qua urbi* in primis Chaldæis rationib. eruditus, vrbis etiã  
*Romæ* nostræ natalem diem repetebat ab iis Parilibus,  
*contige-* quibus eam à Romulo cõditam accepimus: Ro-  
*runt ad* mamque, cum esset in iugo Luna natam esse di-  
*vima stro* cebat, nec eius fata canere dubitabat. O vim ma-  
*rum, sub* ximã erroris, etiã ne Vrbis natalis dies ad vim  
*qua ea* stellarum & Lunæ pertinebat? fac in puero refer-  
*urbs à* re, ex qua affectione cœli primũ spiritum duxe-  
*Romulo* rit: num hoc in latere aut in cæmento ex quibus  
*conduca* Vrbis effecta est, potuit valere? Ita Cicero.  
*est refe-*  
*rebat.*

26. *Cur observatio Astrologica non valeat  
 æque in stirpibus, & animalibus,  
 quàm in hominibus.*

VERVM, quærerem equidẽ ex istis Astro-  
 manticis, num velint eorũ diuinationem etiam  
 in animantibus & stirpibus valere, vt in homi-  
 ne? Si negent, prodent scilicet suam inscitiam; &  
 suę artis infirmitatem, inanitatẽ atque fallaciam.  
 Cur enim non æqualiter valeat in stirpib. atque  
 in homine? immò cur non plus valeat? stirpes  
 namque multò magis quàm homo, à cœlestium  
 corporum potestate, & efficientia naturali ne-  
 cessitate pendent. Et cùm minus multa, & varia  
 atque incerta stirpibus quàm homini soleant ac-  
 cidere, facilius profectò esse deberet eorũ diui-  
 natio, quæ stirpib. quàm quæ homini sunt euen-  
 tura. Sin verò annuunt, similiter in stirpibus vt  
 in hominibus valere Astrologicam diuinationẽ:  
 amicè rogarem ipsos, vt diligentissimè observa-  
 rent statum cœli, & Astorum, eo videlicet tem-  
 pore



pore, quo vel prunus, vel cerasus, vel pyrus fere-  
retur, aut cum semētis tritici fieret, & ex illa cæli  
obseruatione promerent etiā prognostica de illis  
arboribus, scilicet vt diuinarent quantā illæ ar-  
bores prunorum, cerasorū, & pyrorum copiam  
essent laturæ: quantus item ex illa tritici semente  
spicarum, & in singulis spicis quantus granorū  
numerus esset prouenturus, hæc si negent à se  
posse prænosci, fateantur etiam necesse est, non  
posse ab ipsis futuros, hominum casus euentus-  
que prouideri.

---

27 De antiquitate istius Astrologia apud  
Ægyptios, & Chaldaeos.

TERTIVM fundamentum eorundē Astro- *Tertium*  
logorum est, artem hanc suam certissimis innu- *furda-*  
merabiliū sæculorum experimentis, & constan- *mentum*  
tissimis obseruationibus esse comprobarā, aiunt *Astro-*  
enim, hanc disciplinam profectam esse ab Ægy- *mantia.*  
ptiis, & Babylonis seu Chaldaeis, mortaliū om-  
nium antiquissimis. Tradit enim Aristoteles in *Aristot.*  
lib. 2. de Cælo, textu 60. & extremo lib. 1. Mete-  
reorū, Ægyptios omniū hominū vetustissimos  
haberi: & in principio operis Metaphysicorum  
affirmat, Ægyptios omniū hominum vetustissi-  
mos Mathematica studia tractare, & colere cœ-  
pisse. Iactabant etiam olim Astrologi Chaldaeos  
quadringēta, & septuaginta annorū millia in pe-  
riclitandis experiendisque pueris quicunque na-  
scerentur, posuisse. Verū adedò in aperto, & in  
promptu sunt omnibus istorum mendacia, vt à  
nobis ea vel confutari vel etiam indicari non sit  
opus.

*Non modo Astra non esse causas; sed nec esse  
signa rerum futurarum.*

## CAPVT IV.

**B**EATVS August. in lib. 5. de Ciuitate Dei, c. 1. tradit fuisse opinionem quorundam non mediocriter doctorum hominū, quibus visum est non esse quidem astra causas humanorum euētuū, sed esse tamen eorum vera & certa signa.

*28. Virum astra, si non sunt causa, saltem sint  
certa signa omnium futurorum.*

ORIGENES quidem certè in tomis suis super Genesim, (sic enim memorat Euseb. lib. 6. de Præparatione Euangelica, capit. 9.) cū explanaret verba illa quæ sunt in primo capite libri Genescos. *Et erunt in signa*, è quibus videlicet verbis huius nostræ disputationis argumentum pertexuimus, prodidit astra esse à Deo posita in cælo, vt per varios aspectus & coniunctiones præsignificarent quæ consequentibus temporibus tum vniuersè, tum sigillatim euentura essent, non tamen ea efficerent. Itaque cælum esse dixit velut quendam librum in quo Deus depinxit atque descripsit quæcunque in toto mundani xui decursu, suo quæque tempore futura sunt. Ad hoc probandum, citat Origenes librum quendam cui titulus erat, Narratio

*Liber,  
qui in-  
scribeba-  
tur Nar-  
ratio Io-  
seph. ab  
Origene  
citatus.*

Q Ioseph,

*Ploti-  
nus,*

*Porphy-  
rius.*

*Julius  
Sirenius.*

Ioseph, olim apud multos in auctoritatem & fidem receptum; in quo Iacob. Patriarcha inducitur filios suos alloquens hunc in modū, Legi, inquit, in tabulis cœli quæcunque contingent vobis & filiis vestris. Plotinus autem condiscipulus Origenis idem sensit, idque docet in libro qui inscriptus est, Virum stellæ aliquid agant: in libro autem de Fato, cap. 6. hunc præterea stellarum usum esse tradit, ut qui illas suspiciant & quasi literas considerent, qui nimirum huiusmodi literaturam nouerunt, futura legant, ex ipsis figuris comparatione quadam analogica, eorum significationem & intellectum solerter indagantes. Quin, Porphyrius affirmat, cum ipse de se interficiendo vehementer cogitaret, Plotinum hoc cœlitus prouidisse, & à tanto facinore eum prohibuisse.

Hanc sententiam Iulius Sirenius libro 9. de Fato, capite 35. minimè damnandam censet: & quo probabilem esse ostendat, aliquot ex diuina Scriptura productis sententiis, eam ornat atque confirmat. Hoc enim, inquit, non obscure indicat Esaias cum ait in cap. 34. *Complicabuntur sicut liber cœli:* qua oratione significatur, cœlos post diem iudicij conuoluendos esse atque complicandos: quasi nunc cœli instar cuiusdam libri sint explicati & aperti nobis, haud dubiè ad legendum. Eodem pertinet illud quod est in Psalmo 21. *Annūciabunt cœli iustitiam eius,* & in Psalmo 18. *Cœli enarrant gloriam Dei,* & quod est in primo capite libri Geneseos de stellis, *Et sunt in signa,* & in Psam. 88. *Confitebuntur cœli mirabilia tua Domine.* Nec verò, inquit Origenes, hæc

opina

opinio tollit liberum hominis arbitrium, non magis profectò quàm prædicta futurarum rerum à sanctis Prophetis edita, vel præscientia omnium rerum quæ est in Deo. Plotinus scien- *Plotinus.* tiam astrorum ea ratione ut astra signa sunt humanorum euentuum, contingere homini aiebat, vel singulari quodam Dei munere, vel propter proximam Astrologi peritiam, ad eam enim comparandam, opus esse acerrima indagatione, summaque solertia.

Iulius autem Sirenus ne Augustinum quidem ab hac opinione abhorruisse putat: quippe in 2. lib. contra Manichæos c. 21. cum is ageret de hominibus, quorum, dum sunt in corpore mortali occulta sunt corda, ita scribit: Neque enim in illis corporibus cælestibus sic latere posse cogitationes credendum est, quemadmodum in his corporibus latent, sed sicut nonnulli motus animorum apparèt in vultu, & maxime in oculis, sic in illa perspicuitate ac simplicitate cælestium corporum omnes omnino motus animi latere non arbitror. Hæc ibi Augustinus. *Iulius Sirenus.*

---

29. *Verum secundum August. astra sint signa omnium rerum humanarum.*

VERUM, si qui locum hunc non prorsus Executi- inconsideratè legat, planè comperiet Augusti- *tur locus* num per cælestia corpora non intelligere orbes *Angu-* cælestes, sed corpora beatorum hominum, post *stini.* resurrectionem cælesti gloria & immortalitate donata: & ponere eum discrimen inter homines

in hisce caducis corporibus viuētes: & eisdē post resurrectionē in glorificatis corporibus immortalē & beatā vitā agentes: quōd illi arcana cordium multiplici simulatione callidē tegant, & occultent, ideoque sapē alios fallant: in his verò manifesta erunt omnium corda omnibus, omnisque prorsus aberit simulatio, fictio atque deceptio. Atque hunc esse verborum Augustini germanum intellectum, ex proximē consequentibus eius verbis palām est: hæc enim subtexuit, itaque illi merebuntur habitationem illam, & commutationem in Angelicā formam, qui etiam in hac vita cū possint sub tunicis pelliceis occultare mendacia, oderunt tamen ea, & cauent flagrantissimo amore veritatis, & hoc solū tegunt quōd ij qui audiunt ferre non possunt, sed nulla mentiuntur. Veniet enim tēpus, vt nihil etiam contegatur. Nihil est enim occultum quod non manifestabitur: sic Augustinus. Quare cū Augustinus satis explicatē, & apertē loquatur de corporibus hominum glorificatis, non autem de cœlis vel astris, demiror sanē Iulium Sirenū tam incogitanter, & oscitanter legisse hunc locum, vt propter eum maximē, Augustino affinxerit huiusmodi sententiam, cuius nec vllum eo loci vestigium apparet, & extat apud eundem in lib. 5. de Ciuit. Dei copiosa & grauis confutatio.

*Astrorū  
esse cer-  
ta signa  
rerū fu-  
turarū,*

30. De natura, & varietate signorum.

**C A T E R V M,** *astra esse signa rerum futura-  
rum, censeo equidem non solum esse alienum à*

*vera*

vera Philosophia, sed etiam sacris literis contrarium. Ac licet complures earum rationum quas superiori capite tractauimus, etiam valeant ad hoc probandum: nouis tamen aliquot argumentis quæ propriæ eiusmodi sententiam refellant, hoc loco vtendum est. Principio, quod est naturale signum alicuius rei, id vel eius rei causam vel effectum esse, vel vtrumque ab eadem superiori, & communi causa profiscisci necesse est: nam quod præter hæc, quartum membrum fingi posset, videlicet vt illud signum necessariò sit coniunctum cum causa rei ab illo significatæ, id non est diuersum à tertio membro: talis enim connexio, & coniunctio non aliter esse potest, quàm vt causa illa prius ex se pariat id quod est signum: deinde id quod est signatum, aut vt idem quod causam excitat vel admouet ad agendum, simul etiam adhibeat, & applicet id quod est signum ad præsignificandum: vtrumque autem horum ad communem causam refertur. Hinc igitur argumentari licet ad hunc modum: Si cæli & sydera sunt signa omnium rerum sublunarium, vel sunt earum rerum causa, sed hoc negat ista opinio: vel sunt effectus, quod nec illi dicent, nec vllus hominum sanæ mentis audebit dicere aut, quod tantummodo reliquum est, tam cælestia quàm sublunaria ab eadem superiori, & communi causa: proueniunt: quemadmodum Iris signum est serenitatis, non quia sit eius causa vel effectus, sed quia eadem est communis vtriusque causa. At causam communem cælestium corporum, & sublunarium, necesse est esse vel corpoream vel in corpoream: corpoream quidem

nullam, opinor, ponent isti, nullum enim corpus superius cœlis est: relinquitur igitur ut omnia referant ad causam incorpoream, hoc est, vel Deum, vel Angelos, qui mouent cœlos: ita ut, dum Angeli cœlos mouent in ipsorum cœlorum statu habituque, & in syderum positu & conformatione, quasi quibusdam suis nutibus, & tanquam notis atque signis inibi descriptis euenta rerum humanarum prænotent atque præmonstrent. At enim uerò id multis de causis non est credibile. Etenim qui sic opinantur, fateri eos oportet induci homines ab Angelis ad maxima scelera & execranda flagitia.

Ad hoc, Philosophia docet, necnon & Theologia idem tradit; Angelorum nullam esse actionem quam vocant transeuntem, & quæ proximè ab ipsis provenit, aliam quam motum localem, nec Angelos posse quicquā proximè agere, præterquam mouere motu locali. Angelos verò qui circumuoluunt orbis cœlestes, non aliter circa res sublunares operari censent Philosophi & Theologi, quam per motum & lumen cœli; nam influentias à lumine omninò diuersas paulò superius sustulimus. Per motum autem & lumen cœli, omnes futuros effectus rerum sublunarium, clarè distinctè certoque præmonstrari, nemo dicet qui verisimilia & credibilia loqui uelit. Deinde, cum eiusdem causæ duo effectus se inuicem necessariò indicant, ut ab eadem causa, sic eodem quoque modo ab illa provenire debent: alioquin fieri non potest ut se inuicem certo indicent: à Deo autem & Angelis quæ in corporibus cœlestibus fiunt, ea necessariò & inuariabiliter

fiabiliter se habent, quæ autem in his quæ sunt infra Lunam, valde mutabiliter, & vt ita loquar, defectibiliter contingunt.

Hinc alia quoque subtexuntur argumenta. Etenim, quomodo astra quæ sunt certo numero comprehensa, & semper vniusmodi & necessariò ac immutabiliter ita se habent, signa esse possunt omnium rerum futurarum, quæ prope modum infinitæ sunt multitudine ac varietate, & inter se plurimum differentes atque discrepantes: quomodo eadem syderum positura & conformatio, sub qua vel Gemini, vel alij, quam plurimi eodem puncto temporis nascuntur potest esse certum signum propriè & distinctè præsignificans tot tamque varios ac dissimiles casus & eventus qui in illis cernuntur? quare, si astra sunt signa rerum futurarum, earundem quoque causas esse fatendum est: quod si causas esse negamus, etiam signa esse negandum est.

### 31. *An Cometa signa sint humanarum rerum.*

**D I C E S**, Cometas qui in sublimi aëre generantur, signa esse quæ insignes admodum casus futuros portendant, quorum tamen Cometæ nec causæ sint nec effectus: quare idem quoque astris accidere respectu rerû sublunariû, non esse incredibile. At ego, Cometas certa signa humanorum casuum, & enētuum nunquam concedā, licet hoc tam vulgo persuasum sit, quā est à Sapientibus improbatum. Quod si hoc, cum vulgo



consentiens opinaretur, dicerem Cometas à stellis rerum futurarum effectricibus excitari, ut eas res antegressi præmonstrent. De stellis autem secus est, his enim nulla est corporea causa superior.

32. *An qui astra faciunt signa rerum futurarum, simul etiam necessario inducant & astruant Fatum.*

SE D quid multis moror? cogūtur istius opinionis Auctores, quāquam id minimè velint, Fati necessitatem inducere, & sanè, magis etiam quàm qui stellas faciūt causas rerum sublunarium. Etenim, ut stellæ causæ sint eorum quæ fiūt infra Lunam, non idèò tamen Fati necessitas existet, quod enim illarum afflatu defluxuque in terris esset efficiendum, id posset vel contrariis materiæ affectionibus, vel obstantibus causis particularibus impediri. At si astra naturaliter futurarum rerum signa sunt: omninò euenire necessarium est quod ab illis significatur: alioquin essent signa inania, & fallacia. Et cum Deus ea instituisset ad significandum, & in cælo tanquam in quodam volumine ea descripsisset veluti notas futurarum rerum indices, si euentus rerum cum illarum significationibus non congruerent, vel Deus earum auctor, & institutor ignorās esset futurorum euentuum, vel fallax. Denique, si astra præsignificant quæ futura sunt, aut præmonstrant quæ facienda sunt à causis particularibus, nō quidē omnibus, sed aliquibus tantum: sed hoc improbable est, ac signum simile, cur enim stellæ prænotēt futuros effectus aliquarū particulariū causarū potius quàm aliarū,  
vel

vel cur nō similiter præmōstrēt omnes, cūm omnium similis ratio sit? aut stellæ præsignificant omnes futuros effectus causarum omnium particularium: hoc si est, nullæ profectō reliquæ fient causæ per quas quod minus eueniat quod à stellis præsignificatur, impediri & prohiberi queat. Ex quo fit necessārio, vt omnia quæ infra Lunam fiunt, immutabili necessitate Fati nexa vinctaque tenantur: quod nec istius sententiæ defensores sentiunt, & id sentire impium est.

*Explicatur locus  
Isaia ex  
cap. 34.*

Testimonium autem illud Esaia productum ex 34. capite, *Cæli sicut libri complicabuntur*: quod inter cætera Scripturæ testimonia paulò superius commemorata, solū habere aliquid difficultatis, & non nihil negotij facessere videtur, variè interpretatum reperio: ita tamen, vt nulla interpretatio quæ modo vel probati sit Auctoris, vel sit ipsa probabilis, quicquam illi sententiæ suffragetur. Iustinus martyr respondens ad quæstionem nonagesimam quartam Orthodoxorum, quærebatur quemadmodum intelligendum esset quod dicitur ab Esaia, fore vt cælum aliquando velut liber complicaretur, sic ait. Quemadmodum cæli creationem diuinæ literæ per similitudinem cōferunt aliquando cum pellis extensione, dicentes. *Qui extendit cælum sicut pellem*, aliquando cum firmato fumo, *Cælum*, inquit, *ceu fumus firmatum est*, aliquando cum rotunditate cameræ. *Psal. 103*  
*Quis extendit*, inquit, *cælum velut cameram*. Sic *Esaia. 51*  
è diuerso, cæli dissolutionem per comparisonem *iuxta 30*  
conferunt cum aliis rebus, vt apud Esaia cū lumine inuoluendo & implicādo, sicut apud Dauidem *interpre-*  
*tes.*

*Esaia 40**mxia 70.**Interpre**tes.**B. Hieronymus*

commutādo. Sic Iustinus. Hieronymus verò super illis verbis hæc scribit, considerandum, quod non dicat interire cælos, sed replicari siue complicari quasi librum, ut postquam omnia peccata aperta fuerint & relecta, compliceantur qui prius aperti fuerant, ut nequaquam ultra scribantur in eis delicta multorum. In Scriptura enim dicuntur cæli annunciare iustitiam Dei, reuelare iram eius, & probare ac testificari hominum scelera.

*B. Tho.*

Sanctus Thomas & Nicolaus de Lira aliter exponunt, Complicabuntur, inquiunt, cæli tanquam liber, hoc est, non exercebunt ultra Ethnici astromantiam suam, nec post hæc ex astris diuinare audebunt euenta hominum, quasi legerent in syderibus descriptos casus & euentus, futuros. Alij sic interpretantur: Nō patebit amplius introitus in regnum cælorum, sed ianua cælestis clausa erit. Sunt etiam qui explanent hoc modo: Ministerium & vsus cælorū atque syderū exhibitus homini ante diē iudicii, postea esse desinet: nā licet non prorsus interibunt cæli, alio tamen statu erunt, & quibus nunc funguntur ministeriis, & obsequiis hominum causa, ab illis post diem iudicii quoquomodo vacabūt: quæ vacatio pulchrè declaratur ab Esaia similitudinem libri, quem posteaquā eo vsi sumus nec amplius nobis vsui futuras est complicare, & claudere solemus.

Nec displicet mihi interpretatio eorum qui aiunt, illa similitudine declarari: tantam fore diuinæ iræ (& vindictæ demonstrationem) aduersus gentes de quibus illic Esaia loquitur, tantam rerum omnium perturbacionem, & confusio-

nem,

nem, tantam denique hominum tristitiam, dolorem, & conflictationem, ut præ magnitudine mœroris atque doloris; & præ animi perturbatione, & oppressione, videantur hominibus cœlestia lumina restingui, stellæ de cœlo cadere, motusque earum conturbari, denique cœlum complicari, & recedere: nam quod hic dicitur complicari, in Apocalipsi dicitur recedere vel abire, sic enim habes in capite sexto, *Et cœlum recessit sicut liber involutus.*

*Ami-  
quosmos  
Hebrao-  
rū scri-  
bendi.*

Sed quò planior sit, & facilior ad intelligendum etiam non valde doctis similitudo libri quæ usus est Esaïas, sciendum est, apud Hebræos antiquitus libros sacros diuersa forma scribi, & compingi solitos esse, quàm nunc scribuntur libri apud nos. Habebant enim vnum duntaxat folium siue membranam oblongam, quæ circa cylindrum siue axem ligneum circumplectabatur, instar lineæ telæ radio textorio circumuolutæ. Videbantur autem huiusmodi libri, aliquam referre calorûm similitudinem & imaginem: quia sicut axem illum ligneum qui in medio voluminis est, complures ipsius membranæ ceu spiræ, altera super alteram ambiunt & circundant: ita hanc terram quæ medium totius vniuersi axem tenet, cœlestes orbes alter super alteram, collocati in orbem circumplectuntur. Verùm de testimonio Esaïæ satis dictum sit, cuius cū tam multæ ac variæ sint expositiones, nulla earum tamen mirificos istos astrotum Lectores, Interpretes, ac Vates adiuuat.

*Qua*

*Qua ratione nonnulli Astrologi multa  
vera prädixerint.*

# CAPVT V.

**R**ESTAT, quò tandem ad exitum hæc disputatio finemq; perducatur, vt causas aperiamus, cur permultæ quorundam Astrologorum prædictiones veræ fuerint, & cum rebus ipsis euentisque mirabiliter congruètes, hanc enim quæstionem, cum eius mentio supra incidisset, quò melius, commodiori scilicet loco tractari posset, in extremam hanc disputationem reiecimus.

Licet igitur prædictiones Astrologorum perumque falsas esse verissimum sit, & à nobis supra satis explicatum, quoniam tamen & olim proditum est à multis, hodieque admodum vulgare est, quinetiam à grauibus viris, quibus non credere difficile est, pro certo traditur, fuisse quosdam Astrologos quorum pleræque omnes prædictiones veræ fuerunt, vsu ipso euentuque comprobata: & vix vnum aut alterum de plurimis eorum prædictis secus euenit quàm illi prænu-  
ciauerant: age, nos etiam hoc credere in animum inducamus, ne peruulgatæ hominum opinionioni quasi publica fide & auctoritate confirmata, aduersari videamur. Concessa autem veritate huiusmodi prædictionum, causas eius disquiramus, videlicet qua ratione certò potuerint ab Astrologis futura prænunciari, quæ quod incerta sunt, vim & notionem humanæ intelligentiæ fugiunt.

fugiunt. Non longum faciam : equidem asseueranter affirmo , si quæ prædictiones Astrologorum veræ fuerunt , earum veritatem non ex veritate firmitateque artis Astromanticæ , quam nullam esse satis superque ostensum est , sed aliis ex causis proficisci : quæ autem sint huiusmodi causæ , breuibus explicabo.

33. *Quatuor cause, propter quas nonnunquam prædicta Astrologorum vera canunt.*

34. *Instinctu Daemonum agi nonnunquam homines ad diuinandum.*

PRIMA causa. Veritas istarum prædictionum nonnunquam prouenit ex pacto & societate quàm iniuit Astrologus cum Dæmone , vel ex occulto eius afflatu & instinctu , quo etiã nescientes homines ad diuinandum instigantur. Hoc tradit August. extremo c. 7. lib. 5. de Ciuitate Dei: Non immeritò , inquit , creditur , cùm Astrologi mirabiliter multa vera respondent , occulto instinctu fieri spirituum non bonorum , quorum cura est has falsas , & noxias opiniones de astralibus fatiis , inserere humanis mentibus atque firmare , non horoscopi notati , & inspecti aliqua arte , quæ nulla est. Sic Augustinus.

35. *Quot modis Daemon futura , aut ipse præsentire , aut homini præmonstrare soleat.*

DÆMON autem suggerit homini quod ab eo diuinetur , vel palàm se oculis eius aspectabi

stabilem, & conspicuum offerens, eumque futurarum humanis verbis prædocens: vel formatis in aëre vocibus præsignificantibus futura, citra ullam corporis speciem, & figuram: vel immissa scriptura aliqua quæ futurarum rerum prædictiones continet, vel dormienti per somnia aut vigilianti afficiendo, & commouendo phantasiam, fingendoque phantasmata idoneè ad representandum id quod diuinandum est, atque incitando hominem ad prædicendum id quod repræsentant phantasmata. Scire autem potest Dæmon futura, quæ prædocet hominem, reuelatione Dei per bonos Angelos ei facta: nonnunquam enim Deus ad agendū aliquid vtitur Dæmonum ministerio. Solet etiam Dæmon prænunciare hominī futura quæ ipsemet postea facturus est: solet ob incomparabilem sui motus celeritatem, quæ in longinquis locis remotisque mundi regionibus geruntur, ea ad homines qui longissimè absunt deferre. Potest item Dæmon ex clandestinis consiliis, verbis, scriptis, ex signis quæ in corpore tam exterius quàm interius apparent, occultas hominum cogitationes, & deliberationes tam præsentis quàm futuras, solertissimè coniectando, cognitas habere. Idemque coniicit ex præparatione causarum aliarumque rerum, quæ ad gerendum aliquid debent concurrere. Denique, ob incredibile subtilitatē, & solertiam mentis, ob tantam tot millium annorum experientiam, propter perfectam rerum omnium naturalium, absolutamque scientiam; callidissimus atque sagacissimus est ad præsentendum & pronoscendum futura.

Hoc ipsum quod hic docuimus, quia enucleate aperteque tradit Augustinus in libro 2. de *August.* Genesi ad litteram, capite 17. libet verba eius adscribere, De fatiis inquit, syderum, quaslibet eorum argutias, & quasi de mathesi documentorum experimenta, quæ illi Apotelesmata vocant, omnino à nostræ fidei sanitate respuamus, Talibus enim disputationibus etiam oradi causas nobis auferre conantur, & impia perversitate malis factis, quæ rectissime reprehenduntur, ingerunt accusandum potius Deum auctorem syderum, quam hominum scelera. Ideoque fatendum est, quâdo ab istis vera dicuntur, instinctu quodam occultissimo dici quem nescientes humanæ mentes patiuntur. Quod cum adde capiendos homines fit, spirituum seductorum operatio est quibus quædam vera de temporalibus rebus nosse permittitur, partim quia subtilioris sensus acumine, partim quia corporib. subtilioribus vigent, partim experientia validiore propter magnam longitudinem vitæ, partim à sanctis Angelis, quod ipsi ab omnipotente Deo discunt etiam iussu eius sibi revelantibus, qui merita humana occultissimæ iustitiæ sinceritate distribuit. Aliquando autem iidem nefandi spiritus etiam quæ ipsi facturi sunt, velut diuinando prædicunt. Quapropter bono Christiano, siue Mathematici, siue quilibet impie diuinantium, maxime dicentes vera, cauendi sunt, ne consortio dæmoniorum animam deceptam, pacto quodam societatis irreriant. Hactenus sunt Augustini verba.



36. *Quot modis & quàm graviter peccent, qui Dæmonum vel istorum Astrologorum opera utuntur ad divinandum.*

CÆTERTVM, grauiſſimo ſe obſtringūt ſcelere quicunq; cupidi futura noſcendi conſulunt Dæmones, vel Astrologos Dæmonum opera vrentes ad divinandum, Multis autem modis in eo ipſo peccari poteſt: primò ſi quis cōſulat Dæmonē de futuris, vel Dæmonis diſcipulū Astrologum, ratus eſſe Dæmoni futura omnia exploratē percepta: hoc enim cū vnus Dei propriū ſit noſſe futura, ſi quis eandem cognitionē etiam Dæmoni tribueret, impietatis & idololatriæ crimen eſſet. Deinde, ſi crimini vertitur cum excōmunicato ab Eccleſia communionem & ſocietatem habere, quantū crimen erit cū Diabolo acerrimo Dei & Eccleſiæ inimico & implacabili hominum hoſte, pacto & ſocietate coniunctū eſſe? & quem Deus ab omni ſocietate fidelium ablegauit ad inferas & tartareas ſedes, æterniſq; ſuppliciis mancipauit, eo & amico, & magiſtro atque doctore vti velle? Poſtea, qui Dæmonis familiaritate utitur, in magna certumq; periculum animā ſuam obiicit, vtpote quam Dæmon eiufmodi prædictionum illecebris circumuenire ac perdere vehementer cupit. Peccat etiam grauiſſimè, quiſquis Astrologos conſulit, quo per illos aliorum hominū occulta peccata cognoscat. His accedit, immane flagitium eſſe, propterea Dæmonem vel Astrologum conſulere, vt eorum conſilio vel auxilio magnum aliquod ſcelus perpetrari queat.

37. *Istiusmodi Astrologos ferè improbos & flagitiosos esse.*

ISTOS autē veridicos, vt ferunt Astrologos Dæmonum esse familiares & discipulos, multa nec obscura sunt indicia: Primò, imptobitas mōrum viraq̃ue impuritas & sordes: tum, contemptus omnium quæ ad Christianæ disciplinæ ac pietatis cultum exercitationemq̃ue pertinent: Postea, odisselucem, fugitare conspectum congressumq̃ue hominum, rarò versari in publico, ferè in obscuro & abdito, proculq̃; arbitris vivere: Ad hoc, de ipsorum fide ac religione, mala, nec sanè immeritò ac temerè, hominum existimatio: Deniq; multi de istis capti à censoribus fidei nostræ, quos Inquisitores vocant, vel ultro, vel coacti, habita scilicet quæstione, ad mortisq; cruciatibus, suā cū Dæmone societate & familiaritate cōfessi sunt: verum de prima causa satis.

SECUNDA causa. Astrologos diuinare futura, nonnunquā accidit ex occulta diuinæ prudentiæ dispositione quæ, vt in 4. & 7. libro Confessionū, inquit Augustinus, cæcas & improbas mentes consultorum aliquoties ignoto quodam instinctu sic agit, vt nescientes proferant, quæ consulentes vel ex eorum meritis vel ex abyssu iusti iudicij Dei oporteat audire.

*August.*

38. *De usu sortium apud antiquos ad prænosceda futura.*

HVC referre etiam conuenit sortes antiquis vsitatas, quando videlicet versib. alicuius poëtæ

R sortitò

fortitò acceptis, quid eis futurum portenderetur, inquirebant: quo modo nonnunquam contingebant illis carmina vel præsentibus, vel futuris negotiis mirè congruentia: velut Alexandro Seüero etiamnum adolescenti, nec imperium speranti, dum Virgilianas sortes scrutatur, versus ex libro *Æniedos* 6. exiêre, qui futurum illi Imperium præsignificabant his verbis.

*Tu regere imperio populos Romane memento:  
Hæ tibi erunt artes, pacisq; imponere morem,  
Parcere subiectis, & debellare superbos.*

Nec mirum ita euenire, Deo volente ideoque mentem, linguam moderante, & sortes aptè ad id quod præsignificari vulè miscente ac tēperante: qui non solum ex ore Balaam arioli & falsi vatis, sed etiã ex ore asinæ, qua ille oriolus vehabatur, verissima futurorum edidit oracula.

---

39. *Permissu Dai, nimis cupidos sciendi futura, laqueis dæmonum irretiri, & varijs ac perniciosius erroribus implicari*

*Augustinus.*

Non est hoc loco in præteritis relinquendum, quod valde sapienter & salutariter monet Augustinus in libro 2. de Doctrina Christiana, ca. 22. & 23. ait enim permissu Dei nonnunquam vsu venire, vt dæmones vel per ipsos etiam homines multa vera prædicant, quod nonnulli eiusmodi diuinationum, etiam cum superstitione atque impietate nimium studiosi atque curiosi, noxia persuasione seducti, in maiora & magis execranda flagitia, ita se derelinquit à Deo  
pro me

*Augustinus.*

pro meriti præcedentibus suis peccatis prolabantur. Sed præstat hic Augustini verba subscribere. *Valde observanda beati Augustini sententia.* Hinc fit, inquit, ut occulto quodam iudicio diuino cupidi malarum rerum homines, tradantur illudendi & decipiendi, pro meritis voluptatum suarum illudentibus eos atque decipientibus præuaricatoribus Angelis, quibus ista pars mundi infirma secundum pulcherrimum ordinem rerum, diuinæ providentiæ lege subiecta est. Quibus illusionibus, & deceptionibus euenit, ut istis superstitiosis, & pernitiolis, diuinationum generibus, multa præterita & futura dicantur, nec aliter accidant quam dicunt: multaque obseruantibus secundum observationes suas eueniant, quibus implicati curiosiores fiant, & sese magis magisque inserant multiplicibus laqueis perniciosissimi erroris. Hoc genus fornicationis animæ salubriter diuina Scriptura non tacuit, neque ab ea sic deterruit animam, ut propterea talia negaret esse sectanda, quia falsa dicuntur à professoribus eorum, *Sed etiam si dixerint nobis, inquit, & ita eueniet, credatis eis.* Non enim quia imago Samuelis mortui Sauli regi vera prænunciatur, propterea talia sacrilegia quibus imago illa præsentata est, minus execranda sunt: aut quia in Actibus Apostolorum, ventriloqua femina verum testimonium perhibuit Apostolis Domini, ideo Paulus Apostolis pepercit illi spiritui, ac non potius illius dæmonij correptione atque exclusione mundauit. Omnes igitur artes huiusmodi vel nugatorix vel noxiæ superstitionis, ex quadam pestifera societate hominum, &

iri. Hoc genere diuinationis vsus est Annibal, qui  
 perspectat imperitia, atque temeritate Terentij *Diuina-*  
 Varronis, & C. Flamminij Romanorum Cofs. *no An-*  
 & Imperatorum, Afris victoriam, Romanis *nibalis.*  
 insignem cladem valde fidenter, & asseueran-  
 ter prædixit, eamque prædictionem mox certa-  
 minis exitus: plurimis Romanorum millibus  
 interfectis, comprobauit.

---

41. *Nimiam credulitatem ac lenitatem consulentiū  
 Astrologos, interdum conducere ut eorum  
 prædicta vera cadant.*

QVARTA causa. Non raro Astrologorum  
 diuinatio vera existit ob stultam consulentiū  
 credulitatem: multi, namque facillimè credunt  
 quæ dicuntur ipsis de rebus quas vel maxime  
 optant, vel timent vehementer atque perhorre-  
 scunt. Solent enim eiusmodi credulitas instigare  
 animis consulentiū magnam spem rei bonæ à  
 diuinis promissæ, vel ingentem metum inicie-  
 re tristium & acerborum casuum calamitatis-  
 que ab illis prænunciata. Hi autem duo affectus  
 animi, cum potentissimi sint ad efficiendum &  
 commonendum hominem, crebro efficiunt, cer-  
 tē multum proficiunt, ut humana negotia ad  
 prædictos fines perducantur. Etenim vehemens  
 quædam spes ardensque desiderium excitant  
 atque incitant homines ut ad bona ipsis promissæ  
 sedulo se comparent, & omnibus suis opibus  
 viribusque contendunt: quo fit, ut ob eam rem  
 plerumque quod intendunt, optatorum suorum

& alienorum promissorum compotes facti, perueniant. Ex aduerso autem metus, pavor, horrorque prædictorum malorum atque calamitatum, sæpè faciunt homines cunctanter ac dubitanter aggredi negotia, timide ac negligenter persequi, & quocumque obiecto impedimento turpiter & infelicitè deserere, eaque ratione in prænunciata ipsis mala delabi. Luculenta eius rei exempla reperimus in Romano exercitu, cui (ut scribit Liuius) cum auguria & auspicia secreto inspecta infaustum belli exitum minarentur, auspices & duces ne militem in arma euntem funesto nuncio consternarent, versis in contrariam partem auspicii, omnia fausta & triumphalia portendi & à Diis promitti mentiti sunt, quo mendacio vtiliter decepti milites, alacriter prælium inierunt, fortiter pugnabant, & hostes quos auguria victores fore præmonstrabant, feliciter vicerunt.

*Nicias* *Atheniensium* *dux*  
*ducis Atheniensium* *classis* *incognita* *sibi* *Lunæ* *defectione* *portendi* *ratus* *classis* *naufragium*, si ea  
*the- nocte* *portum* *egrederetur*, cum stulto metu occu-  
*siu ex-* *cupatus* *oppressusque* *discessum* *difert*, à Sira-  
*tialis in-* *cusanis* *cum* *tota* *classe* *captus* *est*. Verum ne di-  
*stia.* *sceptatio* *hæc* *longius* *quam* *initio* *promi-*

issimus, & quam fert instituti nostri

ratio producat, hic finem


disputandi de diuina

tione Astrologica

faciemus.

\* \* \*

F. I. N. I. S.





INDEX RERVM  
PRÆCIPVARVM  
IN TRACTATV DE  
MAGIA. CONTENTARYM.

BIBLIOTECA NAZ.  
ROMA  
VITTORIO EMANUELE

A



ARCHIMEDIS sphaera.	fol. 15
Archimedis scientia potentia.	16
Actio Daemonum est duplex.	30
Apollonij fabula Leonis.	33
Astronomica Magia quid sit.	52
Aurum Chemicum non potest <u>vendi</u> pro vero.	74
Argentum viuum non est materia omnium metallo- rum, sicut nec sulphur.	76
Authoris sententia de auro alchimistico.	84
Animalia generari possunt solo calore ignis.	85
Auri pigmentum est species veri auri.	86
Alchimia ars cur non videatur esse vera.	ibid.
Alchimia vsus non est permittendus in Repu- blica.	88
An aliquid primogenia materia hominis maneat per totam vitam.	226
Annibalis somnium de vastatione Italiae.	135
Alexandri Magni somnium.	136

R

4

Animus

# I N D E X.

<i>Animus noster cur sit habilior in somno ad percipiendus reuelationes diuinas.</i>	143
<i>Argumenta S. Scriptura quibus Astrologica diuinationo refellitur.</i>	169
<i>D. Augustini notabilis oratio in reconciliatione cū Ecclesia cuiusdam Mathematici.</i>	176
<i>Animaduersion in Petrum de Aliaco.</i>	178
<i>Argumentatio valida contra Astrologos.</i>	180
<i>Astrologorum prædictiones si essent vera essent odiose hominibus.</i>	205
<i><u>Astrologorum prædictiones</u> cui generi hominum arideant.</i>	209
<i>Astrologorum fundamenta.</i>	220. 225. 230
<i>Aristotelis sententia tollunt e medio Astronoman-tiam.</i>	217
<i>B. Ambrosius comparat prædictiones Astrologorum tela aranea.</i>	220
<i>Astra non esse certa signa rerum futurarum.</i>	236
<i><u>Annibalis</u> diuinationo.</i>	252
<i>Auctoris senectia quomodo facta sit à Magis Pha-raonis virgarum in serpentes mutatio.</i>	112. 116
<i>Amnes retrofluentes.</i>	34

## B.

<i>Boetij opera mira.</i>	17
<i>D. Basilij argumentatio contra Astrologos.</i>	90

## C.

<i>Columba lignea volans.</i>	17
<i>Caput anaxum loquens.</i>	20
<i>Calor celestis &amp; elementaris non differunt specie.</i>	84

Cham



# I N D E X.

<i>Cham fuit idem qui Zoroastres.</i>	<u>90</u>
<i>Cassiani opinio de origine Magia.</i>	<u>92</u>
<i>Cause quinque cur dormientibus multa diuinitus reuelentur.</i>	<u>143</u>
<i>Causa quatuor cur diuina somnia sint aliquando obscura.</i>	<u>149</u>
<i>Gaietani sententia aduersus pradictiones Astrologorum.</i>	<u>175</u>
<i>Catonis dictum in Astrologos.</i>	215

## D.

<i>Damonem cur simulent animas demortuorum.</i>	<u>67</u>
<i>Deus cur sit passus prodigia fieri à Magis.</i>	<u>117</u>
<i>Damonorum natura &amp; munus secundum Platonem.</i>	<u>151</u>
<i>Damones cur olim non doctis sed imperitiis somnia dederint.</i>	<u>147</u>
<i>Demonum astutia in dandis somnijs</i>	<u>149</u>
<i>Deus varijs modis efficit homines per somnia.</i>	<u>140. 141</u>
<i>Decreta contra Astrologos iudiciarios.</i>	168
<i>Dilemma aliquod contra Astrologos.</i>	205

## E

<i>Epicureorum opinio de somnijs.</i>	123
---------------------------------------	-----

## G

<i>D. Gregorius sex somniorum causas tradit.</i>	<u>132</u>
<i>Eiusdem memorabilis sententia de somnijs.</i>	<u>139</u>

## H

<i>Historia Iannis &amp; Mambri Magorum Pharaonis.</i>	<u>108</u>
--	------------

## R

<i>Homeri</i>
---------------

# I N D E X.

*Homeri commentum pro distinctiōe verorum somniorum.* 126.127

*Hebraeorum antiquus mos scribendi.* 242

## L.

*Lamiarum ingenium & libido.* 12

*Liberi arbitrii usus nunquam est perfectus in somno.* 156

## M

*Magorum stimenta.* 5

*Magorum opera varia.* 2

*Magi Persarum quales.* 15

*Magia naturalis.* 18

*Magia naturalis triplex.* ibid.

*Magia varia species.* 49

*Magi quomodo Dæmonibus imperent.* 49

*Magia usus.* 102

*Magia vetita diuinis legibus.* ibid.

*Magie unde tanta authoritas.* 98

*Magie origo prima à Dæmone.* 93

*Miraculum quid sit.* 45

*Miraculorum verorum tres gradus.* ibid.

*Miraculorum verorum quinque differentia a falsis*

*& simulatis.* 46

*Mortuos nulla vi magica posse reviviscere.* 14

## N.

*Necromantie usus antiquus.* 61

*Necromancia consuetudo.* 63

*Nicia ducis Atheniensium inscitia exitialis.* 253

Opera

# I N D E X.

## O.

<i>Opera qua possunt Damones facere.</i>	30
<i>Opiniones tres de serpentibus Magorum Pharaonis.</i>	<u>110.111.112</u>
<i>Oenomaus confutator oraculorum Apollinis.</i>	<u>171</u>
<i>Origenis disputatio contra Astrologos.</i>	<u>172</u>

## P.

<i>Porphyry dubitationes novem, quomodo Magi Damones innocenti.</i>	<u>25</u>
<i>Philonis sententia de origine Magia.</i>	89
<i>Porphyrius quid senserit de veritate somniorum.</i>	130
<i>Pythagora mos &amp; consuetudo.</i>	<u>131</u>
<i>Petrus Alsatius plurimum peccavit contra chronographiam.</i>	140
<i>Professores divinando futura, aliquando fuisse eiec- tore cinitatibus.</i>	<u>219</u>

## R.

<i>Remora piscis.</i>	<u>12</u>
<i>Refellitur ars Cabalistica tanquam inanis.</i>	55
<i>Rationes quinque pro Alchymistis.</i>	81
<i>Religio &amp; disciplina Christi tenebras Magicarum artium è mundo discussit.</i>	98
<i>Ratio cognoscendi somnia duplex.</i>	<u>139</u>
<i>Ratio quedam contra Astromantiam.</i>	<u>174</u>

## S.

<i>Salomonis Magia naturalis.</i>	18
<i>Statua per se incedentes.</i>	<u>32</u>

# I N D E X.

Statua loquentes more humano.	ibid.
Samuel an fuerit verus qui per Pythonissam representatus est Sauli.	58
Smerdes Magus inuasit regnum Persarum.	70
Sulphur non est materia metallorum omnium.	76
Somnia omnia esse vera Stoicorum, & Pythagora opinio.	122
Sententia quadam vera de somnijs.	124
Somniorum causa.	177. 133. 136. & 138
Sententia varia de causis somniorum.	126
Somnium Cyri.	127
Synesius mira sed falsa de spiritu phantastico tradit.	130
Somniorum Damonis duo genera.	137
Somnia quadam impijs hominibus data sunt à Deo.	148
Somniorum quatuor genera sine vitio possunt observari.	151
Somnium Salomonis cur illi fuerit datum.	159

S.  
T.

B. Thoma sententia de operibus Magorum.	10
B. Thoma argumentum contra Necromantiam.	63
Testimonia scripturae de somnijs.	135
B. Teriulliani sententia de Necromantia.	65

Voces quomodo possint esse causa efficientes rerum aliquarum.	22
Utilitates artis Chimicae.	78
Vanitas maior eorum, qui observant somnia quam astra.	112

# I N D E X.

<i>astra.</i>	<u>153</u>
<i>Vsus rationis saepe est liber in somno.</i>	<u>156</u>
<i>Vita hominis est instabilis, qui non secundum rationem, sed sensum vivit.</i>	<u>205</u>

## X.

<i>Xenophanis, &amp; Epicuraorum opinio de somnijs.</i>	<u>123</u>
---	------------

## Z.

<i>Zoroastres Magia parens.</i>	<u>89</u>
<i>Zodiacus apud Astrologos duplex.</i>	<u>188</u>



**L**IBROS hos tres R. P. Benedicti Pererij  
*aduersus fallaces, & superstitiosas artes, &c.  
 non modo propter breuitatem, perspicuitatem, ele-  
 gantiam, verum etiam propter orthodoxam, &  
 accuratam pulcher-~~marum~~arum, & utilissimarum  
 Quaestionum explicationem, tum luce, tum laude  
 dignissimos indico.*

Albertus Hungerus, S. Theologiae  
 D. Professor, & Procancellarius,  
 atque Theologici Collegij pro  
 tempore Decanus in Catholica  
 Academia Ingolstadiana.











